

Riosi Ra'íchara

Samachique Tarahumara New Testament

This Bible is copyrighted by Wycliffe Bible Translators (Wycliffe.org) and is printed with permission by the Digital Bible Society for non-commercial use. This Bible is available for free download in a variety of digital formats at dbs.org/bibles.

Language:
Country:
Publisher:
Copyright:
Last Updated: 2023-10-20
ID: 92747913-2139-4c5b-bd75-e21cc6dd42ef
ISO: tar
ISBN:

Mateo	4
Márkosi	54
Lúkasi	83
Juan.....	138
Tito.....	176
Hebreos.....	180
1 Pegro	200
1 Juan.....	207
2 Juan.....	213
3 Juan.....	214

Mateo

Echi jaré ki'yá bachánara piréami pagótami mapu Jesucristo pagótamawara níili

(Lk: 3:23-38)

1 Jena'í osirúami ju echi jaré ki'yá bachánala piréami pagótami riwalá, si'néami mapu ikí Jesucristo pagótamawala níili. Echi Walubela Jesucristo bilé níili echi Rabiri riwéami rijói kúchala kúchuwala. Ayénachó Binói bilé níili echi ki'yánala bitéami Abrami riwéami rijói kúchala kúchuwala.

² Echi Abrami níili echi Isaka onolá. A'lí echi Isaka níili echi Jakobo onolá. A'lí echi Jakobo níili echi Jurá onolá, ayénachó onolá níili echi auché jaré Jurá ritémawala. ³ A'lí echi Jurá níili echi Páresi riwéami rijói onolá. Ayénachó binói níili echi Sera riwéami rijói onolá. A'lí echi Tamari riwéami mukí aboni iyela níili. A'lí echi Páresi níili echi Esromi riwéami rijói onolá. A'lí echi Esromi níili echi Arami riwéami rijói onolá. ⁴ A'lí echi Arami níili echi Aminarabi riwéami rijói onolá. A'lí echi Aminarabi níili echi Nasona riwéami rijói onolá. A'lí echi Nasona níili echi Salmoni riwéami rijói onolá. ⁵ A'lí echi Salmoni níili echi Bosa riwéami rijói onolá. A'lí echi Ra'aba riwéami mukí níili echi Bosa iyela. A'lí echi Bosa níili echi Obera riwéami rijói onolá. A'lí echi Ruta riwéami mukí níili echi Obera iyela. A'lí echi Obera níili echi Isaí riwéami rijói onolá. ⁶ Echi Isaí níili echi Rabiri riwéami rijói onolá.

A'lí biché pe wakinana echi Rabili walula silfami níili. Ayénachó echi Rabiri níili echi Salomoni onolá. Echi mukí mapu chabénala echi Uríasi upila níili, échiko níili echi Salomoni iyela. ⁷ Echi Salomoni níili echi Roboami riwéami rijói onolá. Echi Roboami níili echi Abíasi riwéami rijói onolá. A'lí echi Abíasi níili echi Asa riwéami rijói onolá. ⁸ Echi Asa níili echi Josapati riwéami rijói onolá. A'lí echi Josapati níili echi Jorama riwéami rijói onolá. A'lí echi Jorama níili echi Usíasi riwéami rijói onolá. ⁹ Echi Usíasi níili echi Jotami riwéami rijói onolá. Echi Jotami níili echi Akasa riwéami rijói onolá. A'lí echi Akasa níili echi Esekíasi riwéami rijói onolá. ¹⁰ A'lí echi Esekíasi níili echi Manasesi riwéami rijói onolá. A'lí echi Manasesi níili echi Amoni riwéami rijói onolá. A'lí echi Amoni níili echi Josíasi riwéami rijói onolá. ¹¹ A'lí echi Josíasi níili echi Jekoníasi riwéami rijói onolá. Ayénachó onolá níili echi auché jalé Jekoníasi ritémawala. Echali ki'yá níili mapalí si'néami aboni pagótamawala miná

si'wina kawichí torúami níili, mapo'ná Babilóniachi anilíwachi níili.

¹² A'lí mapalí echi pagótami ma si'wina torúami níili, pe wakinana echi Jekoníasi níili echi Salatieli riwéami rijói onolá. A'lí biché echi Salatieli níili echi Sorobabéli riwéami rijói onolá. ¹³ A'lí biché echi Sorobabéli níili echi Abiyura riwéami rijói onolá. Echi Abiyura níili echi Eliakimi riwéami rijói onolá. A'lí echi Eliakimi níili echi Asori riwéami rijói onolá. ¹⁴ A'lí echi Asori níili echi Saroka riwéami rijói onolá. Echi Saroka níili echi Akimi riwéami rijói onolá. A'lí echi Akimi níili echi Eliyura riwéami rijói onolá. ¹⁵ A'lí echi Eliyura níili echi Eleasari riwéami rijói onolá. A'lí echi Eleasari níili echi Matani riwéami rijói onolá. A'lí echi Matani níili echi Jakobo riwéami rijói onolá. ¹⁶ A'lí echi Jakobo níili echi José onolá. A'lí echi José, echi María kunala níili. Chopi chabénala niráa echi María rana'lí echi táa towí Jesusi, echi mapu Cristo anérami ju.

¹⁷ Echirigá ju mapu makói miná naó rijói onorúami níili echi si'néami aboni kúchuwala yuwa, echali jonsa mapalí echi Abrami bitéali, echali yénasí mapalí así bitéali echi Rabiri. A'lí echali jonsa mapalí bitéali echi Rabiri, makói miná naó rijói ayénachó onorúami níili echi si'néami aboni kúchuwala yuwa, echali yénasí mapalí echi pagótami miná si'wina torúami níili echo'ná Babilóniachi anilíwachi. A'lí auché jaré makói miná naó rijói ayénachó onorúami níili echi si'néami aboni kúchuwala yuwa, echali jonsa mapalí echi pagótami miná si'wina torúami níili echo'ná Babilóniachi, echali yénasí mapalí así ranálati echi Walubela Jesucristo.

Jesucristo je'ná jerigá ranarúami níili

(Lk. 2:1-7)

¹⁸ A'lí biché echi Walubela Jesucristo je'ná jerigá ranarúami níili: Bilé mukí, María riwéami, Binói iyela níima riwéali. A'lí echi María kunema riwéali bilé rijói José riwéami. Chopi mapalí aboni ketasi cho napawili, echali riwílati mapu echi María ma bocháami níili, mapujiti echi Wabé Galabé Riosí Iwigala echirigá 'yali. ¹⁹ Echali echi José galá upema riwéali echi María. Chopi mapalí echi José galá machili mapu echi María ma bocháami níili, echali binói ma ketasi nakili upénala. A'lí echi José wabé galabé oláami níili, echijiti binói ketasi nakili echirigá ku ruyénala echi auché jaré pagótami. ²⁰ Chopi mapuyénasí echi José je'ná jerigá 'nátali,

echalí binói rimuga niráa riwali bilé walula Riosi kapitánawala mapu jeaneli: Mujé José, mápumi echi Rabiri riwéami rijói kúchala kúchuwala ju, arigá upé echi María. Ketásirapé majá, mapujiti échiko chopi bocháami ju mapujiti echi Galabé Riosi Iwigala echirigá 'yali.

²¹ Echali echi walula Riosi kapitánawala ayénachó jeaneli: Echi María ranaméa bilé taa towí múchali. A'lí mujemi riwarama Jesusi niráa, mapujiti Binói galá ku wikawama si'néami echi jaré Binói pagótamawala mapurigá aboni chati olali.

²² A'lí suwaba je'ná jerigá ikili mapurigá echirigá galá ikimea mapurigá echi Walubela Riosi bachá niráa nuleli nawésanala, mapalí echi walula Riosi jiti nawésami jerigá anili:

²³ ¡Nibira! Bilé tiwé ke bilé cho wesi rijói yuwa kochiami arigá bochama.

A'lí échiko ranamea bilé taa towí 'muchali.

A'lí bichemi Emanueli riwarama, echirigá mapu jerigá aniwáami ju:

Riosi tamujé tamí yuwa ju.

²⁴ A'lí mapalí echi José galá ku busureli, echali binói we yáati upeli echi tiwé mapurigá echi walula Riosi kapitánawala nuleli. ²⁵ Chopi echi José ke cho kochili binói upila yuwa mapuyénasí échiko ke cho ranali echi taa towí, ne bachá wilfami kepu raná. Echali echi taa towí 'múchali Jesusi riwarálati.

Jaré wabé 'nátami rijói 'nébia sili

2 A'lí echi Erorsi walula silfami níili echo'ná Juréachi anilíwachi kawírali mapalí echi Jesusi ranálati echo'ná Belénachi anilíwachi. A'lí echali rawé jaré wabé 'nátami rijói sili echo'ná Jerusalémachi anilíwachi walúlachi. A'lí aboni ka'yé panina jonsa simíbami níili.

² A'lí biché aboni je'ná jerigá rukuésiya sili: ¿Kumi atí echi taa towí mapu bukúlí ranálati, echi mapu pe waminana ne walubela silfami níima, 'yemi Juríosi pagótami yuwa? Echo'ná ka'yé bo'ónala waminá panina tamujeta ma riwali Binói níwala sopolí. Jípita ma sili mapurigata echo'ná bacháami Binói yuwa, wéemi raweka, chokoba jaga, wabé warubéraga anebo.

³ Chopi mapalí echi walula silfami je'ná jerigá námali, echali binói ne wabé majali, ne si'néami echi auché jaré echo'ná Jerusalémachi piréami ayénachó. ⁴ Echali echi Erorsi bayeli napawínala si'néami echi jaré o'wéala sacerdote, ayénachó ne si'néami echi auché jaré Juríosi pagótami níwala binériami, Riosi nulalila binériami. A'lí echi Erorsi rukueli aboni kumi 'nalina ranarúami níima riwéali echi Cristo anilíwami. ⁵ A'lí aboni ku nijéwaga jeaneli: Echo'ná Belenchi ranarúami níima riwéali, echo'ná Juréachi anilíwachi kawírali, mapujiti echiligá osirúami ju echo'ná Riosi Ra'íchara oselíwalachi mapo'ná echi walula Riosi jiti nawésemi je'ná jerigá osali mapurigá Riosi Binói jeanili:

⁶ Echo'ná Belenchi anilíwachi walúlachi, echo'ná Juréachi anilíwachi kawírali nirúami, arigá wabé walúlachi ju echi auché jaréana o'wéalachi yuwa, echo'ná Juréachi anilíwachi kawírali nirúami, mapujiti echo'ná Belenchi ranarúami níima bilé taa towí mapu walubela niséliami níima,

mapu galá nisérama echi jaré Nijé níwala Isaeli anilíwami pagótami.

⁷ Echali echi Erorsi chiná niráa bayeli echi jaré galabé 'nátami rijói mapu echo'ná Jerusalémachi sili. A'lí binói rukugá machili mapu chu kilíbuko ne bachá niráa riwirúami níili echi sopolí. ⁸ A'lí echi Erorsi júlaga, echo'ná Belenchi jeanigá júuli: Echo'ná simíbaga, galá rukuesi kumi atigá echi taa towí. Chopi mapalítamo riwá, galá tamí ku ruyesi, mapurigá nijeni ayénachó echo'ná simea, mapurigani ayénachó bacháami binói yuwa, wéemi raweka, chokoba wiligá o'wikema. ⁹ A'lí mapalí aboni ma je'ná jerigá námali mapurigá echi walula silfami aneli, echali aboni ku simíbali. A'lí biché aboni auchecho riwali echi sopolí mapu aboni ma riwali bukúlinala, echo'ná kayé panina. A'lí echi sopolí bacháami ináraga, bayélali aboni mapuyénasí echo'ná Belenchi nawagá, echo'ná moba chukúbali mapo'ná echi taa towí Jesucristo bu'wiri. ¹⁰ Echali aboni ne wabé kaníili mapalí aboni ku riwali echi sopolí. ¹¹ A'lí ma mo'wigá echo'ná kalírali, aboni riwali echi taa towí Jesucristo, echi Binói iyela, María riwéami, ayénachó. A'lí aboni wéemi raweka bacháami chokoba jaga o'wikeli echi taa towí Jesucristo. Ayénachó aboni toli jaré wabé natéami namuti. A'lí aboni ma irápaga, kóoli echi taa towí, echi wenomí oro aniríwami, bilé wabé natéami moluwá ayénachó, echi wabé su'weti mira aniríwami ayénachó. ¹² A'lí mapalí aboni ma kochigá rimuli, echali Riosi aneli aboni mapurigá aboni ketasi ku ruyema echi walula Erorsi mapu kumi asali echi taa towí Jesucristo. Echijiti echo'ná si'wina buwichí simáraga, aboni ku simíbali echo'ná aboni kawíwalachi.

Echo'ná Ejíptochi júmsali

¹³ A'lí mapalí echi jaré wabé 'nátami rijói ma ku simíbali, echali echi José rimuga niráa, riwali echi walula Riosi kapitánawala mapu jeaneli: ¡Asiska we yáa mutú echi taa towí! ¡We sapú bayéraga togá echi taa towí, echi Binói iyela ayénachó, echo'ná auché biléana kawírali, Ejíptochi anilíwachi! A'lí echo'ná tibí mapuyénasí nijé nimí anema mápumi auchécho ku nawá jena'í mujé kawíwalachi, mapujiti echi walula Erorsi we ama mi'línala echi taa towí. ¹⁴ A'lí echi José ku busuresa, we yáati, rokogó niráa bayéraga toli echi towí, echi towí iyela ayénachó, a'lí echo'ná auché biléana kawírali, Ejíptochi anilíwachi simíbali. ¹⁵ A'lí aboni echo'ná muchili mapuyénasí ma mukuli echi Erorsi. Echirigá ne sébali ikili mapurigá Riosi bachá niráa anili, mapurigá

echi walula Riosi jiti nawésami jeanigá osali: Echi Walubela Riosi jeaní:

Echo'ná Ejíptochi jonsa bayélini echi keni Raná.

Echi walula Erorsi nulali ko'wínara echi jaré kúuchi

¹⁶ A'lí echi Erorsi ne wabé yoli mapalí echi jaré wabé 'nátami rijói ketasi ku ruyeli. Echali binói nuleli ko'wínala ne si'néami echi jaré kúuchi kúrowi echo'ná Belenchi muchúami, echo'ná mulubé nologá muchúami ayénachó, ne si'néami mapu ikí ketasi cho okuá bamíbami níili, mapujiti binói ruyérami níili echi jaré wabé 'nátami rijói jiti, mapurigá ketasi cho okuá bamíbami níili, mapalí jonsa echi sopolí bachá niráa riwílati.

¹⁷ Echirigá ne sébali ikili mapurigá bachá niráa anirúami níili, mapalí echi walula Riosi jiti nawésami, Jeremíasí riwéami, jeanigá osali:

¹⁸ Echo'ná Ramachi anilíwachi piréami pagótami ná-mali bilé mukí wabé naláami.

Echi Rakeli niili, mapalí ne wabé nalali mapujiti ma ko'wirúami níili binói kúchuwala.

A'lí biché binói ketasi chirigá nakili mapu ku kanílatami níima, mapujiti ma suwili kepu kúchuwa.

Aboni ku rowili echo'ná Ejíptochi jonsa

¹⁹ A'lí mapalí echi Erorsi ma mukúami níili, echali echi José rimuga bu'wili echo'ná Ejíptochi mapalí bilé walula Riosi kapitánawala ra'íchali jeanigá: ²⁰ Wilísaga auchecho siné bayéraga togá echi táa towí, kepu iyé ayénachó, A'lí echo'ná echi jaré Isaeli anilíwami pagótami kawíwalachi ku simigá, mapujiti ma mukuli echi Erorsi mapu miná mi'línali echi táa towí Jesucristo.

²¹ A'lí biché echi José we sapú wilísaga bayéraga toli echi táa towí Jesucristo, echi Binói iyela ayénachó. A'lí aboni ku simíbali echo'ná Isaeli aniríwami pagótami kawíwalachi.

²² Chopi mapalí echi José ruyérami níili mapurigá echi Arkelao riwéami ma wiláratí mapurigá walula silíami niráa echo'ná Juréachi, A'lí echi José we majali echo'ná simiyá, mapujiti echi Arkelao, echi Erorsi ranala níili. A'lí biché mapalí echi José kochigá rimuli, echali echi walula Riosi kapitánawala ruyeli mapurigá echo'ná Galiléachi anilíwachi kawírali simea. A'lí echo'ná simíbali. ²³ A'lí mapalí aboni sili echo'ná Galiléachi anilíwachi kawírali, A'lí aboni piréali echo'ná biléana walúlachi mapo'ná Nasarétachi anilíwachi níili. Echirigá ne sébali ikili mapurigá bachá niráa nawésali echi jaré o'wéala Riosi jiti nawésami mapurigá osirúami ju echo'ná Riosi Ra'íchala oselíwalachi mapurigá echi Walubera Jesucristo echo'ná Nasarétachi bitéami níima.

Echi Juani mapu pagóami níili we nawésali echo'ná biléana waná kawichí

(Mr. 1:1-8; Lk. 3:1-9, 15-17; Jn. 1:19-28)

3 Echali rawé echi Juani, mapu pagóami níili, echo'ná biléana waná kawichí nawali, echo'ná Juréachi anilíwachi kawírali. A'lí echi Juani we nawésali echi pagótami echo'ná waná kawichí síami. ² A'lí jeanigá nawésali: ¡Auchecho si'nú, galabéala niráa ku 'natasí! ¡Ku ro'wisi Riosi yuwa mapujiti ke 'me ayó echi ripá riwigachi atíami Riosi galá nulema jena'í wichimóbachí piréami pagótami! ³ A'lí je'ná Juani binói níili echi rijói mapu echi walula Riosi jiti nawésami, Isaíasí riwéami, bachá niráa echijiti rugá nawésali mapurigá je'ná jerigá osirúami ju echo'ná Riosi Ra'íchala oselíwalachi:

Echo'ná biléana waná kawichí, bilé rijói o'weli ra'íchaga nawésama jeanigá:

Echi Walubela ke sayiná nawama jena'í wichimóbachí.

A'lí mapalí bilé walula echirigá nawama, 'yémitamo sinibí galá a'lara echi buwé mapurigá echo'ná galá simírama echi walula.

Jipi, ayénachó galá a'lárasí 'yemi aboni sulálachi achigórigá mapurigátamo sinibí galá a'lara echi buwé.

⁴ A'lí echi Juani echi kameyo anilíwami bo'wala niwárami napacha iyénali. Ayénachó bilé wichí puka iyénali. A'lí binói ko'wali echi korochi wakichéami. Ayénachó ko'wali echi kolimena, echo'ná kawichí nirúami.

⁵ A'lí ne si'néami pagótami echo'ná Jerusalémachi anilíwachi walúlachi piréami kipúbiya simíbali echo'ná mapo'ná echi Juani nawesa asali. Ayénachó ne si'néami echo'ná Juréachi anilíwachi kawírali piréami echo'ná kipúbiya sili, ne si'néami pagótami echo'ná nologá bakochi Joránachi anilíwachi piréami ayénachó. ⁶ A'lí echo'ná bakochi Joránachi anilíwachi echi Juani galá pagoli echi si'néami pagótami, mapalí aboni ku rugá nawésali suwaba mapurigá aboni ma chati olali.

⁷ Chopi mapalí echi Juani riwali mapu wikabé echi jaré Bariseo anilíwami binériami, ayénachó wikabé echi auché jaré Saruseo anilíwami binériami echo'ná binói yuwa sili mapurigá aboni echirigá ba'wí jiti pagótami níima, A'lí binói jeaneli: ¡'Yemi pagótami mapurigá jaré sinowi kúchuwala ju! ¡'Yémitamo wabé 'yékami ju, echijítamo wakiná júmsali, mayega mapurigátamo ketasi kastigo 'yárami níibo waminana rawé! ⁸ Ne galabé olasi, mapurigátamo echirigá 'nérao echi auché jaré pagótami máputamo ma ne bichíwali ku galabé 'nátaga, ma ku ro'wili Riosi yuwa.

⁹ Ketasi chopi 'natasí echo'ná pachana 'yemi sulálachi niráa mapu 'yemi aboni wabé galabé oráami pagótami ju, chopi mapujiti 'yémitamo echi Abrami pagótamawara ju. Nijé 'yemi nimí ané mapu a Riosi nakisáagá mapu auché jaré wikabé Abrami pagótamawala niwárami níima, Riosi Binói galá omérama je'ná wikabé

rité jiti, ne wikabé echi Abrami pagótamawala niwayá. ¹⁰ A'lí echi Juani ayénachó jeanili: Echi jaré pagótami mapurigá jaré rakéami namuti ju. Ayénachó ma mulipi ju mapalí jaré rakéami namuti káraga mitétami níima. Echali ne suwaba rakéami namuti mapu ketasi galabé rakeko, échiko káraga miteka, echo'ná na'írali ulútami níima. ¹¹ Nijé ne bichíwali 'yemi mi pagola echi ba'wí jiti, mapujítitamo ma ku ro'wili Riosi yuwa. Chopi echi Walubela mapu jubáami tamí yuwa inaro, échiko ne wabé simírami Walubela ju ketasi mapurigá nijé. A'lí nijé ketásini 'me we galá ju mapurigani galá mulubéanama Binói yuwa. Nirapeni galá ju mapurigani akaráptama Binói akalá. Echi Walubela 'yemi mi 'yama echi wabé Galabé Riosi Iwigala, ayénachó Binói walú kastigo 'yama echi jaré chati oláami, echo'ná wabé chati ratáami na'írali. ¹² A'lí echi Walubela ma karigá atí mapurigá kasúuwama echi turío, mapujiti echo'ná rapirátachi Binói suwaba galá kasúwama Binói níwala turío. Ayénachó Binói napabuka katiwama echi turío echo'ná pachá Binói níwala rikóachi. Echali Binói káragana'ema echi kajela echo'ná walú na'írali mapo'ná tarapé siné cho'wíami níima.

Echi Jesusi ba'wí jiti pagótami níili

(Mr. 1:9-11; Lk. 3:21-22)

¹³ A'lí Jesusi echo'ná Galiléachi jonsa simisá, a'lí nawali echo'ná bakochi Joránachi anilíwachi, mapo'ná echi Juani asali. A'lí Jesusi nakili mapurigá Binói ba'wí jiti pagótami níima echi Juani jiti. ¹⁴ Chopi echi Juani wabé riwélaga, ketasi nakili mapu pagoma. A'lí echi Juani jeaneli echi Jesusi: Arigá galá níima mapurigá Mujé binói tamí pagoma echi ba'wí jiti. ¿Áchami nakí Mujé mapurigá nijé nimí pagoma? ¹⁵ A'lí Jesusi ku nijéwaga jeaneli: Jipi arigá tamí pagó, mapujiti arigá 'wérali ju mapurigata echirigá sébali olabo ne suwaba echi galabé oluwáwami. A'lí Juani pagoli echi Jesusi ba'wí jiti. ¹⁶ A'lí mapalí Jesusi echirigá ba'wí jiti pagótami níili, A'lí ku machinsa echo'ná ba'wírali jonsa, Binói riwali echo'ná ripá riwigachi mapurigá we iráparami niráa níili. Ayénachó Binói riwali mapurigá echi we Galabé Riosi Iwigala echo'ná Binóichi moba rikínali mapurigá bilé makawi niráa. ¹⁷ A'lí Riosi Binói echo'ná ripá riwigachi jonsa ra'íchaga jeanili: Je'ná ju echi bilepi Nijé Ranala mápuni ne wabé galé. Nijeni ne wabé ganili Binói jiti.

Echi riablo we nakili mapu Jesusi chati olama

(Mr. 1:12-13; Lk. 4:1-13)

4 A'lí echi we Galabé Riosi Iwigala bayérali echi Jesusi echo'ná biléana waná kawichí, mapurigá echi riablo echo'ná ra'íchama Binói Jesusi. Echi riablo chopi nakili mapurigá Jesusi chati olama, chopi Jesusi ketasi chirigá chati olali. ² A'lí biché mapalí Jesusi tarapé na-

muti ko'wali nawosa makói rawé, nawosa makói rokogó yénasí, a'lí Binói ne wabé locheli. ³ A'lí echi riablo echo'ná Jesusi yuwa nawagá, jeaneli: Mujé a ne bichíwali Riosi Ranala níisagámi, galá nulé je'ná wikabé rité mapurigá wikabé pani nílama. ⁴ A'lí Jesusi ku nijéwaga jeaneli: Echo'ná Riosi Ra'íchala oselíwalachi jerigá osirúami ju:

Echi pagótami ketasi chopi ko'wáami jiti pirérama, chopi ayénachó arigá 'wérali ju mapu aboni galá bichíima suwaba Riosi Ra'íchala, mapurigá aboni ne bichíwali sinibí niráa pirélama.

⁵ A'lí echi riablo toli echi Jesusi echo'ná Galabé Walúlachi, Jerusalémachi anilíwachi. A'lí binói wilali echi Jesusi echo'ná ripá moba echi walubé Juríosi ri'obáwalachi. ⁶ A'lí echi riablo jeaneli: Mujé a ne bichíwali Riosi Ranala níisagá, jena'í jonsa mi ri'lé pochí, a'lí tarapé namuti mi chibi ikimea, mapujiti jerigá osirúami ju echo'ná Riosi Ra'íchala oselíwalachi:

Riosi nulema echi jaré wikabé kepu kapitánowa mi jiti,

mapurigá aboni mi mutúma echo'ná kepu sikachí niráa,

mapurigá mi ke siné chiwimea kepu rarachí echo'ná ritérari.

⁷ A'lí Jesusi ku nijéwaga jeaneli: Ayénachó je'ná jerigá osirúami ju echo'ná Riosi Ra'íchala oselíwalachi:

Ketasi mi waminá nulé mapurigá echi Walubela kemi Riósawa chati olama.

⁸ A'lí pe wakinana echi riablo toli echi Jesusi echo'ná ripá biréana wabé ripabé rabó. A'lí sinepi niráa 'nérali suníami kawichí walula nulálachi jena'í wichimóbachí nirúami. Ayénachó 'nérali mapurigá echo'ná nuláami o'wéala ne wabé simírami o'wéala níili. ⁹ A'lí echi riablo jeaneli: Nijé wabé omérami ju nimí ayá mapurigami ne walubela nuláami níima ne suníami jena'í wichimóbachí. Nijé nimí 'yama suwaba je'ná walubélawala a Mujé arigá tamí yuwa bacháami chokoba wilisáagá, mapurigami tamí waminabi walubélaga anémami, ketasi mapurigá Mujé. ¹⁰ A'lí Jesusi jeaneli: Miná waná simigá mujé Satanasi riwéami riablo, mapujiti echo'ná Riosi Ra'íchala oselíwalachi je'ná jerigá osirúami ju:

Mujé chopi bacháami chokoba wiligá walubélaga anema echi Walubela mujé Riósawala.

Ayénachómi chopi o'wikema echi Walubela mujé Riósawala.

¹¹ A'lí echi riablo ma ariweli. A'lí echi jaré Riosi kapitánawala we yáati sisáa, ku'wírali echi Jesusi.

Jesusi chótali nawésiya

(Mr. 1:14-15; Lk. 4:14-15)

¹² A'lí mapalí Jesusi ma námali mapu echi Juani ma pachá bachárami níili, echali Binói ku simili echo'ná Galiléachi anilíwachi kawírali. ¹³ A'lí Jesusi ketasi auche-

cho ku bitéali echo'ná Nasarétachi anilíwachi walúlachi, chopi Binói nawagá bitéali echo'ná Kaper-naúmachi anilíwachi walúlachi, echo'ná ba'wírali suwé mapo'ná Sabulona anilíwami pagótami kawíwalachi ju, echi auché jaré Nepalí anilíwami pagótami kawíwalachi ayénachó, ¹⁴ mapurigá echirigá galá ikimea mapurigá bachá niráa anili echi Walula Riosi jiti nawésami Isaíasí riwéami, mapalí je'ná jerigá osali:

¹⁵ Echo'ná echi jaré Sabulona anilíwami pagótami kawíwalachi, ayénachó echo'ná echi jaré Nepalí anilíwami pagótami kawíwalachi, echo'ná walú ba'wírali burúami, waminá bo'ónala Joránachi anilíwachi bakochi, echo'ná Galiléachi anilíwachi kawírali mapo'ná piré echi jaré isena pagótami.

¹⁶ Echi pagótami mapu echo'ná rokowárali piréali ma galá machíratami níili.

Ayénachó echi jaré pagótami mapu chopi suwiméa riwéali, ma galá rayéntami níili.

¹⁷ Echálí jonsa Jesusi chótali nawésiya jeanigá: ¡Galabé si'nú niráa 'natasí! ¡Ku ro'wisi Riosi yuwa! Mapujiti ke 'me ayó echi Riosi ripá riwigachi atíami galá nulema si'néami pagótami.

Jesusi bayeli naó rijói mapu rochí sirúami níili, mapurigá aboni Binói yuwa najátama

(Mr. 1:16-20; Lk. 5:1-11)

¹⁸ A'lí echo'ná ba'wírali suwé Galiléachi anilíwachi iyénaga, Jesusi riwali okuá rijói najirémami, echi mapu Simoni níili, mapu ayénachó Pegro riwéami níili, echi Antresi ayénachó, mapu echi Simoni rijimala níili. A'lí aboni we pali echi walú namuti tétami mapuyiri chiní echo'ná ri'lé ba'wílali mapujiti aboni rochí sirúami níili.

¹⁹ A'lí Jesusi jeaneli: Wakiná tamí yuwa najátasi, a'lí 'yemi nimí binérama mapurigátamo galá omérabo binériya echi auché jaré pagótami, mapurigá aboni galá tamí bichííma. ²⁰ A'lí biché aboni we yáa ariwesa echi jaré o'weli namuti tétami mapuyiri chiní, a'lí Jesusi yuwa jubáami najátali.

²¹ Echo'ná jonsa, Jesusi pe minana simigá riwali auché jaré okuá rijói najirémami, echi mapu Jakobo riwéami níili, echi Juani ayénachó mapu binói Jakobo rijimala níili. Okuánika echi bilé rijói Sibireo riwéami kúchuwala níili. Je'ná okuá najirémami muchiri echo'ná pachá biléana bárkochi, echi kepu onó Sibireo riwéami yuwa. A'lí aboni pachókiya muchili echi o'weli tétami namuti mapuyiri chiní mapujiti aboni chapili echi wikabé rochí. A'lí Jesusi bayeli echi aboni. ²² A'lí okuánika aboni we yáati ariwesa echi barko, ayénachó ariwesa aboni onolá, a'lí jubáami najátaga simíwali echi Jesusi yuwa.

Jesusi binérali wikabé pagótami

(Lk. 6:17-19)

²³ A'lí Jesusi ne suníami iyénali echo'ná Galiléachi. Ayénachó galá binéraga nawésali echo'ná suníami aboni ri'obáwalachi. Binói galá nawésali echi Galabé Riosi Ra'íchala, jeanigá mapu Riosi ma galá nulé echi pagótami. Ayénachó Binói galá ku sa'wali suwaba nayúkowami, suwaba okókowami ayénachó. ²⁴ A'lí si'néami echo'ná Síriachi anilíwachi kawírali piréami galá ikíili mapu Jesusi echirigá olali. A'lí aboni echo'ná Binói yuwa pali ne si'néami echi jaré nayúkami, si'néami mapu karúrigá nayúkowami jiti nayúkali, ne si'néami mapu ikí risúu olárami níili echi okókowami jiti ayénachó, ne si'néami echi auché jaré wabé chati riablo aliwala aliwéami ayénachó, ne si'néami echi auché jaré umugúsuwami ayénachó, ne si'néami echi auché jaré ketasi omériami 'asísiya ayénachó. A'lí Jesusi galá ku sa'wali ne si'néami. ²⁵ A'lí Jesusi yuwa najátali wikabé pagótami echo'ná Galiléachi anilíwachi kawírali piréami, echo'ná makóisana o'wéalachi piréami ayénachó, echo'ná walúlachi Jerusalémachi piréami ayénachó, echo'ná Juréachi anilíwachi kawírali piréami ayénachó, echo'ná bo'ónala bakochi Joránachi anilíwachi piréami ayénachó.

Jesusi galá nawesa, echo'ná ripá rabó asagá

5 Mapalí Jesusi riwari echi wikabé pagótami, a'lí Binói simili echo'ná biléana ripá rabó. A'lí mapalí Binói echo'ná asíwali, a'lí echi jaré mapu Binói binérali echo'ná sili mapo'ná Binói asali. ² A'lí Jesusi chótali binéria, jeanigá:

Echi jaré wabé ganíliami

(Lk. 6:20-23)

³ Arigá ne wabé ganíliami ju si'néami pagótami mapu ikí we o'mónami juko aboni sulálachi niráa, mapujiti Riosi galá nulé aboni. ⁴ Ayénachó arigá wabé ganíliami ju si'néami pagótami mapu ikí we nalákako, mapujiti Riosi galá ganílatama aboni. ⁵ Ayénachó ne wabé ganíliami ju si'néami pagótami mapu ikí ketasi níliami juko, mapujiti aboni narema je'ná kawí mapurigá aboni níwala niráa. ⁶ Ayénachó ne wabé ganíliami ju si'néami pagótami mapu ikí ne wabé nakiko mapu aboni ku wikawárami níima, mapujiti aboni ne bichíwali galá ku wikawárami níima. ⁷ Ayénachó ne wabé ganíliami nilisi 'yemi si'néami pagótami mapu ikí we natimáami juko, mapujiti Riosi ne wabé natimama aboni. ⁸ Ayénachó ne wabé ganíliami ju si'néami pagótami mapu ikí galá bi'wíami suléami juko, mapujiti aboni galá riwimea Riosi. ⁹ Ayénachó ne wabé ganíliami ju si'néami pagótami mapu ikí galá ruyé echi auché jaré pagótami, jeanigá mapu aboni kilí ologá pirélama.

A'lí echirigá ruyéami pagótami echirigá ganílama mapujiti Riosi anema aboni, Binói kúchuwala niráa. ¹⁰ Ayénachó si'néami galá bichíyami pagótami ne wabé ganíliami ju mapalí echi auché jaré ke bichíyami pagótami ne wabé chati ologá a'najátama aboni, chopi mapujiti aboni galá bichíi Riosi, ayénachó mapujiti aboni we galabé olá. A'lí aboni we ganíliami ju mapujiti Riosi galá nulé aboni. ¹¹ 'Yémitamo arigá ne wabé ganíliami ju mapalí echi auché jaré ke bichíyami pagótami 'yemi mi wabé yóniga a'najátama chopi mapujítitamo tamí bichíi. Ayénachótamo arigá ne wabé ganíliami ju mapalí aboni, 'yéka niráa, wabé chárigá ra'ichama, 'yemi mi sayéraga. ¹² Echali ne wabé ganílasí 'yemi, mapujítitamo galá ku natétarami níibo echo'ná ripá riwigachi. Echirigá achigórigá kichiga a'najátarami níili echi jaré o'wéala Riosi jiti nawésami mapu chabé ki'yá piréali, mapalí 'yémitamo ketasi cho piréali.

Echi jaré bichíyami mapurigá echi koná ju

(Mr. 9:50; Lk. 14:34-35)

¹³ 'Yémitamo ju mapurigá echi koná, jena'í wichimóbachí nirúami. Chopi a echi koná ketasi galabé akáami níisagá, echali echi koná ketasi chirigá galá ku akáami niwárami níima, chopi ma ketasi iré. Echali miná machí pátami níima mapo'ná echi pagótami we rikema.

Echi jaré bichíyami ayénachó mapurigá rajáami ju

¹⁴ 'Yémitamo mapurigá rajáami ju, jena'í wichimóbachí. Ayénachó mapalí wikabé kalí niwárami níisa echo'ná biléana ripá rabó, echali echi kalí sinibí galá riwirúami níima. ¹⁵ Mapalí echi pagótami rajema echi chopé, ke wesi aboni wilama echi chopé rajáami echo'ná ri'lé pachá biléana kajonchi. Chopi aboni ripabé ritérali wilama mapurigá aboni echirigá machílatama si'néami echo'ná pachá kalírali muchúami. ¹⁶ 'Yemi ayénachó echirigá mapurigá rajáami niráa níisi, echo'ná bacháami echi auché jaré pagótami yuwa. Ne galabé ologá pirélasí echi auché jaré pagótami yuwa, mapurigá aboni galá riwimea mapurigá 'yémitamo sinibí galabé ologá piré, mapurigá aboni echijiti waminabi walubéraga anema echi 'yemi Onolá mapu echo'ná ripá riwigachi atí.

Jesusi binérali mapurigá Riosi nuleli echi pagótami

¹⁷ Ketasi 'natasí mapu Nijé nakubámiya nawali echi Riosi nulalila. Ni bilé cho 'natasí mapu Nijé nakubámiya nawali echi auché jaré osirúami, Riosi jiti nawésami oselíwala. Ketasini nakubámiya nawali. Chopi Nijeni nawali mapuriganí echirigá ne sébali olama mapurigá echo'ná osirúami ju. ¹⁸ Ne bichíwali Nijé 'yemi nimí ané mapu ketasi suwibama bilé taa osirúami, nirapé suwibama echi wabé tabéala osirúami ma-

pu echo'ná Riosi nulalila oselíwalachi osirúami ju mapuyénasí abijí tibima Riosi bitélachi echo'ná ripá riwigachi nirúami, mapuyénasí abijí tibima je'ná wichimoba ayénachó. Chopi ne suwaba gará ikimea mapurigá osirúami ju echo'ná Riosi nulalila oselíwalachi. ¹⁹ Mapuyíripi rijói ketasi gará nijéwasagá echi wabé tabéala Riosi nulalila, chopi arigá binérasa echi auché jaré pagótami mapurigá aboni ayénachó ketasi galá nijéwama, échiko ne wabé tabéala níima echo'ná ripá riwigachi mapo'ná Riosi we nulá mapurigá ne Walubela niráa. Chopi mapuyíripi rijói ne galá nijéwasagá, ayénachó echirigá binérasa echi auché jaré pagótami mapurigá aboni ayénachó galá nijéwama, échiko mapurigá bilé walula niráa níima echo'ná ripá riwigachi mapo'ná Riosi nulá mapurigá ne Walubela niráa. ²⁰ Mapujiti 'yemi nimí ané mapu a 'yemi ketásitamo waminabi galabé oláami níisagá, ketasi mapurigá echi jaré Riosi nulalila binériami, ayénachó ketasi mapurigá echi Bariseo anilíwami binériami, a'lí 'yémitamo ketasi chirigá sebabo echo'ná ripá riwigachi mapo'ná Riosi we nulá mapurigá ne Walubela niráa.

Jesusi binérali echi pagótami jeanigá mapu aboni ketasi na'áwama

(Lk. 12:57-59)

²¹ Mátamo námali mapurigá Riosi aneli echi jaré ki'yá piréami, jeanigá: ¡Ketási mi'yá auché jaré! Ayénachó echi mapuyíripi mi'lisáagá auché jaré, échiko ne wabé wi'nijírami níima. ²² Chopi Nijé 'yemi nimí jeané: Mapuyíripi rijói ne wabé simírami yónasagá echi auché jaré pagótami, échiko ne wabé simírami wi'nijírami níima. A'lí echi jaré o'wéala ochérami ayénachó wabé wi'nijima mapuyíripi rijói wabé chati anésagá echi auché jaré pagótami. Ayénachó mapuyíripi rijói wabé chati anésagá echi auché jaré, échiko echo'ná ri'lé riáblochi pátami níima, mapo'ná ne walú rajá.

²³ Echijiti ami pásagá mujé níwala kónawami echo'ná pachá Riosi níwala ri'obachi, mapurigami echo'ná bacháami 'yama Riosi, chópimi echo'ná a binói 'natásagá mapurigá auché bilé rijói mi we sayera, jaré namuti jiti, ²⁴ echali echo'ná pachá ri'obachi bacháami ariwé echi mujé níwala kónawami. A'lí bachá niráa ku simigá ku katéwaga ganílama echi auché bilé rijói yuwa mapu mi we sayera. Echalimi auchecho siné ku simigá echo'ná ri'obachi mapurigami galá 'yama Riosi echi mujé níwala kónawami.

²⁵ Sinibí we yáati ku katéwaga ganili echi mujé sayela yuwa, mapuyénasími binói yuwa inaro echo'ná buwichí, mapalí 'yémitamo okuánika katéwaga simabo echi jaré igúsuwami yuwa. Echirigá we yáati ku katéwaga ganili binói yuwa mapurigá ketasi ikimea mapu echi mujé sayela mi banírama echo'ná bacháami echi komisario yuwa, a'lí echi komisario mi 'yama echi kapitani, a'lí bichemi pachá bachárami níimiré.

²⁶ Ne bichíwali nimí ané mapu echirigá ikisáagá, muje-mi ketasi ku machínama echo'ná pachá kumurachi jonsa, mapuyénasími ke cho káraga natétasagá ne suwaba wenomí mapu ikí echi jaré igúsuwami mi bujénali.

Jesusi binérali jeanigá mapu echi jaré mapu niwíami juko ketasi auché jaré isena yuwa kochimea

²⁷ 'Yémitamo ma námali mapurigá Riosi aneli echi jaré ki'yá piréami jeanigá: 'Yemi rijói jubéami ketasi kochisí echi jaré isena muguí yuwa. Ayénachó 'yemi muguí kunéami ketasi kochisí echi jaré isena rijói yuwa. ²⁸ Chopi Nijé 'yemi nimí jeané: Mapuyíripi rijói chopi we 'néniga nakígá yuwa kochinálásaga bilé si'nú mukí yuwa, échiko ma chati olali pachana binói sulálachi niráa, achigórigá mapurigá bilé rijói ne bichíwali we chati olá mapali binói kochimea bilé si'nú mukí yuwa mapu ketasi binói upila ju. ²⁹ Echijiti a mujé busila echo'ná watoná mi chati olárasagá, ketasi nakiwi mapu mujé binói busila mi echirigá chati olárama. ¡Waminá machí pa echi mujé busila, kéremá! Waminabi ne galá níima wikáwasagá biléana busí, mapurigami arigá ku bitérama echo'ná ripá riwigachi, mapurigami ketasi káraga pátami níima echo'ná ri'lé riáblochi mapo'ná walú rajá. ³⁰ Ayénachó a mujé sikala echo'ná watoná mi chati olárasagá, ketasi nakiwi mapu mujé binói sikala mi echirigá chati olárama. ¡Waminá ripuná echi mujé sikala, kéremá! Waminabi ne galá níima wikáwasagámu biléana siká mapurigami arigá ku bitélama echo'ná ripá riwigachi, mapurigami ketasi káraga pátami níima echo'ná ri'ré riáblochi mapo'ná walú rajá.

Jesusi binérali jeanigá mapu echi jaré mapu ma niwíami juko, ma ketasi auchecho ku rojuama
(Mat. 19:9; Mr. 10:11-12; Lk. 16:18)

³¹ Ayénachótamo ma námali mapurigá echi Moisesi je'ná jerigá osogá nuleli echi jaré ki'yá piréami pagótami: Mapuyíripi rijói ma ariwesa binói upira, echarí gará níima 'yasa bilé oselí osirúami jeanigá mapu binói ma ariweli echi binói upila, mapurigá aboni echirigá ma ku rojuama. ³² Chopi Nije 'yemi nimí jeané: Mapuyíripi rijói ariwésagá binói upila, échiko we chati olá, binói upila sayéraga, mapujiti echi mukí echirigá osá chokéami niráa kunesa, we chati olá mapurigá bilé si'nú rijói yuwa kochíami. Ayénachó mapuyíripi rijói upeko echi ku pátami mukí yuwa, échiko ayénachó chati olá mapurigá bilé si'nú mukí yuwa kochíami niráa. Chopi siné káachi riwirúami níisa mapurigá echi mukí bachá niráa, auché bilé rijói yuwa kochili mapalí echi mukí ke cho kunéami níili, echalí risensia ju mapu binói kunala ku rojuaga ariwema echi mukí.

Jesusi binérali jeanigá mapu echi pagótami ketasi chuwé ra'íchaga anema echi Walubela Riosi riwará

³³ Ayénachótamo ma námali mapurigá echi Moisesi je'ná jerigá oseli echi ki'yá piréami pagótami: Ketásimi we chuwé ra'íchaga ané echi Warubera Riosi riwalá. Chópimi ne bichíwaga ra'ichama Riosi yuwa. ³⁴ Chopi Nijé 'yemi nimí jeané: Ketásitamo wepi chuwé ra'ichasi tabiyiri namuti jiti, nirapétamo chuwé ra'ichasi echo'ná ripá riwigachi nirúami namuti jiti, mapujiti echo'ná ripá riwigachi Riosi níwara asibálachi ju. ³⁵ Ketasi wepi chuwé ra'ichasi jena'í wichimóbachi nirúami namuti jiti, mapujiti jena'í wichimóbachi ju mapo'ná Riosi we nulé echi pagótami. Nirapé wepi chuwé ra'ichasi echo'ná Jerusalémachi aniríwachi walúlachi jiti, mapujiti echo'ná walúlachi echi Walubela Riosi níwala ju. ³⁶ Nirapétamo wepi chuwé ra'ichasi 'yemi mo'ola jiti, mapujiti ketásitamo oméрабо rosákami niwayá ni bilé kupá, nirapétamo oméрабо chókami niwayá. ³⁷ Chópitamo jerigá ra'ichasi: Ayena. Ayena. Jerigá anigá kéremá: Ketasi. Ketasi. Mapujiti suwaba mapu waminabi simírami ju je'ná jiti, échiko ketasi 'me galabé ra'ichárami ju.

Jesusi binérali jeanigá mapu echi pagótami ketasi ku kuwana sayérama echi jaré aboni asayela
(Lk. 6:29-30)

³⁸ Mátamo námali mapurigá echi Moisesi je'ná jerigá nuleli echi jaré ki'yá piréami pagótami jeanigá: A bilé rijói mi busugásnasagá biléana busí, a'lí mujé binói ayénachó achigórigá ku busugásanama biléana echi rijói busila. Ayénachó mapu a bilé rijói mi na'mínasagá biléana ramé, a'lí mujé binói ayénachó achigórigá ku na'mini biléana echi rijói ramilá. ³⁹ Chopi Jesusi binói ayénachó jeanili: Nijé 'yemi nimí jerigá ané: Ketásitamo echirigá ku kuwana sayéрабо echi auché jaré pagótami mapu 'yemi mi chati olá. Chopi mapuyíripi rijói mi cho'nisá echo'ná watoná mujé banalachi, ayénachó risénsia 'ya mapurigá binói mi auchecho siné cho'nimea echo'ná o'winá mujé banalachi. ⁴⁰ A'lí mapuyíripi rijói nakiko mapu mi 'yema mujé napáchala, mapalí binói justicia tani echi jaré igúsuwami yuwa, arigá káraga 'ya mujé napáchala, mujé kimala ayénachó. ⁴¹ A'lí biché mapuyíripi rijói mi nuleko mapu mujé apanéraga simea binói yuwa pe mulubé niráa, arigá simigá binói yuwa auchecho miná osá niráa. ⁴² Galá 'ya mapuyíripi rijói mi tániko bilé namuti. Ayénachó galá wikanéwi mapuyíripi rijói nakiko wikaká chapimea mujé níwala namuti.

Jesusi binérali jeanigá mapu echi pagótami arigá kalema echi jaré aboni asayela

(Lk. 6:27-28, 32-36)

⁴³ Mátamo námali mapurigá echi jaré ki'yá piréami pagótami jeanili: Ne galá kalé echi jaré echo'ná mulubé mujé yuwa piréami, ayénachó ne wabé kichí echi jaré mujé asayela. ⁴⁴ Chopi Nijé 'yemi nimí jeané: Ne galá kalesi echi jaré 'yemi asayela. Ne galabé ra'ichasi echi jaré mapu 'yemi mi we chati ra'íchaga ané. Ne galá olasi echi jaré yuwa mapu 'yemi mi we kichí. Ayénachó Riosi yuwa tániga ra'ichasi echi jaré jiti mapu 'yemi mi wabé kichiga, risúu olá, ayénachó echi jaré jiti mapu 'yemi mi wabé kichiga a'najata. ⁴⁵ Echirigá olasi mapurigátamo ne bichíwali kétamo Onó tanala níibo, mapu echo'ná ripá riwigachi atí, mapujiti Binói galá olá mapurigá echi Binói níwala rayénali ne galá rayénataga olá echi jaré wabé chati oláami pagótami, achigórigá mapurigá ayénachó rayénata echi auché jaré galabé oláami pagótami. A'lí Riosi ayénachó nulá mapu galá ukumea echo'ná echi jaré galabé bichíyami pirélachi, ayénachó echo'ná echi jaré ketasi bichíyami pirélachi. ⁴⁶ Mapujiti átamo chopi kalésagá echi jaré pagótami mapu ayénachó 'yemi mi wabé kalé, ¿churigátamo ku natétarami níibo mapurigá galabé oláami niráa? ¿Kéchatamo echirigá achigórigá olá mapurigá echi jaré wenomí napabúami, mapu 'yémitamo we chati oláami niráa ané? ⁴⁷ A'lí átamo chopi naripásagá echi auché jaré 'yemi ritémawala, ¿píritamo echirigá wabé simírami galabé olá? ¿Kéchatamo echirigá achigórigá olá mapurigá echi auché jaré ketasi bichíyami pagótami? ⁴⁸ Ne galá níisi 'yemi, mapurigá kétamo Onó, ripá riwigachi bitéami ne galabé ju.

Jesusi binérali jeanigá mapu churigá echi pagótami galabé olama

6 Ketasi chopi olasi echi we galabé olalila bacháami echi auché jaré pagótami yuwa, mapurigátamo echirigá chopi galá riwirúami níibo echi jaré aboni jiti. Átamo echirigá olásagá ketásitamo ku natétarami níibo 'yemi Onolá jiti, mapu echo'ná ripá riwigachi atí.

² Mapalimi kóoma echi auché jaré we tisúwati pagótami, ketasi echirigá olasi chopi mapurigá auché jaré pagótami riwimea mápumi galabé olá. Ketasi nulesi we iwéami siménara bacháami mujé yuwa mapalimi echirigá kóoma echi jaré tisúwati. Echirigá chopi olá echi auché jaré mapu galabéraga ané aboni niráa, chopi aboni arigá wabé 'yékaka olá. Aboni chopi echirigá olá echo'ná pachá aboni ri'obáwalachi, echo'ná walúlachi nasipa ri'narátachi keremá, mapurigá echi auché jaré pagótami echirigá riwisáa, wabé galabéraga anema aboni. Ne bichíwari Nijé 'ye-

mi nimí ané mapu aboni ma ku natétarami ju. Riosi ketasi waminabi natétama aboni. ³ Chopi mapalí mujemi kóoma jaré we tisúwati pagótami, galá níima chiná niráa kóosa. Echali ketasi kóosi aboni echo'ná bacháami auché jaré pagótami yuwa, mapurigá aboni echirigá galá riwisá, a'lí animea mapu mujé binói we galabé oláami ju. ⁴ Echijiti we chiná niráa kóosi echi auché jaré we tisúwati. A'lí mujé Onolá mapu ne galá ritiwá suwaba namuti chiná nasótami, échiko ne galá suwaba riwíraga mi galá ku natétama.

Jesusi binérali jeanigá mapu churigá galá níima ra'ichasa Riosi yuwa

(Lk. 11:2-4)

⁵ A'lí mapalimi tániga ra'icha Riosi yuwa, ketasi níisi mapurigá echi auché jaré pagótami mapu chopi galabéraga ané aboni niráa, chopi aboni arigá wabé 'yékaka olá. Echi jaré aboni we kaníliga jawi echo'ná pachá ri'obachi mapalí aboni olá mapurigá Riosi yuwa ra'íchaga niráa. Ayénachó aboni we kaníliga jawi echo'ná machímanomí mapalí aboni ayénachó echo'ná olá mapurigá Riosi yuwa ra'íchaga niráa. Aboni chopi echirigá olá mapurigá echi auché jaré pagótami, echirigá riwisáa, ne garabé oláami niráa anema echi aboni. Ne bichíwali 'yemi nimí ané mapu aboni ma niwa kepu natétawala. Riosi ketasi waminabi natétama aboni. ⁶ Chopi mujé mapalimi ra'icha Riosi yuwa, echo'ná pachánala mujé kalílachi bakí. A'lí ma 'yérasa 'yera, a'lí ra'ichá mujé Onolá yuwa mapu chiná atí. A'lí mujé Onolá mapu galá ritiwá suwaba namuti chiná nasótami, Binói mi galá ne suwaba riwíraga ku natétama.

⁷ A'lí mapalimi ra'icha Riosi yuwa, ketasi wisabé ra'ichá bilepi ra'ichali niráa mapurigá echi jaré ketasi galabé bichíyami sinibí olá, mapujiti aboni mayé mapu Riosi galá námama aboni mapujiti aboni wisabé niráa ra'icha bilepi ra'ichali niráa. ⁸ Ketasi níisi 'yemi mapurigá aboni niráa, mapujiti kétamo Onó galá machí mapu piri namuti newalé, mapalítamo ke cho táni. ⁹ 'Yémitamo jerigá ra'ichabo Riosi yuwa: Tamujé Onolá mápumi echo'ná ripá riwigachi atí, ne galá o'wikérami níilaga Mujé riwalá. ¹⁰ Ne galá nulá Mujé jena'í wichimóbach, ne Walubela niráa. Suwaba galá olá mapurigá Mujé nakí jena'í wichimóbach, achigórigá mapurigami olá echo'ná ripá riwigachi. ¹¹ Tamujé tamí 'ya echi ko'wáami máputa newalé jipi rawé. ¹² Tamujé tamí ku wikawi suwaba mapurigata we chati olali, mapurigá tamujé ayénachó ku wikawa si'néami echi auché jaré mapu tamujé tamí we chati olali. ¹³ Ketasi ariwé mapu echi wabé chati oláami riablo tamujé tamí chati olá nalama, chopi tamujé tamí 'ye echi wabé chati oluwáwami, mapujiti Mujé chopi risensia ju mapu nulema echi jaré pagótami, mapujiti Mujé suwaba omérami ju, mapujítimi ne Walubela ju ne sinibí niráa.

¡Echirigá nílaga! ¹⁴ Mapujiti ayénatamo ku wikawásagá echi auché jaré pagótami mapalí aboni 'yemi mi chati olama, a'lí kétamo Onó, ripá riwigachi atíami, ayénachó 'yemi mi ku wikawama. ¹⁵ Chopi a ketásitamo ku wikawásagá echi auché jaré pagótami mapalí aboni 'yemi mi chati olama, a'lí kétamo Onó ketasi cho 'yemi mi ku wikawama mapurigá 'yémi aboni we chati olali.

Jesusi binerali jeanigá mapu churigá galá níima olasa mapalí aboni wi'ribé niráa ketásirapé namuti ko'wá, mapalí aboni chopi Riosi yuwa ra'íchaga muchuwi

¹⁶ Ayénachó mapalí 'yémitamo wi'libé niráa ketásirapé ko'wá, mapalítamo chopi Riosi yuwa ra'icha muchuwi, echalí ketasi wabé o'mónami níisi mapurigá olá echi auché jaré pagótami mapu chopi galabéraga ané aboni niráa, mapalí aboni arigá wabé 'yéka olá. Echi jaré aboni ne wabé chati chu'wéega o'mona mapurigá echi auché jaré pagótami mayema mapurigá aboni echirigá tarapé ko'wá wi'libé niráa, mapalí aboni chopi Riosi yuwa ra'icha muchuwi. Arí aboni chopi echirigá olá mapurigá echi auché jaré pagótami galá mayema mapu aboni wabé galabé oláami ju. Ne bichíwali Nijé 'yemi nimí ané mapu aboni ma niwa kepu natétawa. Riosi ma ketasi waminabi natétama aboni. ¹⁷ Chopi mapalí mujemi wi'libé niráa ketásirapé namuti kowá, mapalimi chopi Riosi yuwa ra'icha atí, echalí ne galá tichí mujé kupala, ayénachó galá basigó, ¹⁸ mapurigá echi auché jaré pagótami ketasi machimea mápumi echirigá wi'libé niráa ketásirapé namuti ko'wá, mapalimi chopi Riosi yuwa ra'icha atí. Echirigá olasi mapurigá mujé Onolá mi galá suwaba riwíraga, galá ku natétama, mapujiti Binói ne galá ritiwá ne suwaba namuti chiná nasótami.

Jesusi binera jeanigá mapu churigá echi jaré bichíyami ne wabé níwami níima echo'ná ripá riwigachi
(Lk. 12:33-34)

¹⁹ Ketasi chopi napabusi wikabé galabé namuti jena'í wichimóbachí, mapo'ná echi koséwali we suwá echi jaré namuti, ayénachó mapo'ná echi jaré namuti we suwiba, ayénachó mapo'ná echi jaré chigórami we chigóbia, mo'wimea echo'ná pachá 'yemi pirélachi. ²⁰ Chopi ne wabé napabusi echi wabé galabéala echo'ná ripá riwigachi, mapo'ná echi koséwali ketasi suwábama echi jaré namuti, ayénachó mapo'ná echi jaré namuti ketasi suwibama, ayénachó mapo'ná echi jaré chigórami ketasi chigóbiya, mo'wiméa echo'ná 'yemi pirélachi. ²¹ Mapujiti echo'ná mapo'ná 'yemi níwala galabéala atí, echo'ná 'yemi aboni ayénachótamo nakíboa muchínala.

Bilé na'í rajáami niráa echo'ná pachana echi pagótami surárachi nirúami
(Lk. 11:34-36)

²² Mujé busila mapurigá bilé na'í rajáami ju, echo'ná mujé sapálachi nirúami. A'lí mapalí mujé busila ne galabé níisagá, echalí ne suníami echo'ná pachana mujé sapálachi káraga galá machíimi níima, ayénachómi ne galá kónami níima, ayénachó Riosi galá machílama echo'ná pachana mujé sulálachi, mapurigami galá machimea Riosi Ra'íchala. ²³ Chopi mapalí mujé busila wabé chati níisagá, echalí ne suníami echo'ná pachana mujé sapálachi káraga rukuáwami níima, ayénachómi ne wabé risirúami níima, ayénachó Riosi ma ketasi machírama echo'ná pachana mujé sulálachi, echijítimi ketasi galá machimea Riosi Ra'íchala. A'lí mapalí echi rajáami echo'ná pachana mujé sulálachi nirúami arigá we cho'wíami níisagá ¡echalí ne wabé simírami rukuáwami níima echo'ná pachana mujé sulálachi niráa!

Ketasi galá ju korúkawa echi wenomí
(Lk. 16:13)

²⁴ Ke wesi omérama sinepi niráa nijéwiya okuá rijói o'wéala mapurigá ibili echi binói walúlawala níisa, mapujiti echalí biléala we kichima, siné kaachi, a'lí auché biléala we kalema, siné káachi. Echalí echi bilé yuwa wabé kanílama keremá, a'lí echi auché bilé yuwa ketasi kanílama keremá. Echijiti 'yémitamo ketasi oméramo o'wikeya Riosi, átamo sinepi niráa ne wabé korúsagá echi wikabé namuti wenomí jena'í wichimóbachí nirúami.

Riosi ne galá nisé Binói kúchuwala
(Lk. 12:22-31)

²⁵ Echijiti Nijé 'yemi nimí jeané: Ketasi wikabé namuti wabé nílaga 'natasí, mapu churigátamo waminabi pirélabo, mapu píritamo kopoa, mapu píritamo bajibo kéremá. Nirapé 'natasí 'yemi aboni jiti, mapu píritamo napachabo. Echi pagótami aliwala ne wabé simírami natiguí, ketasi mapurigá echi ko'wáami. Ayénachó echi pagótami sapala waminabi ne wabé simírami natiguí ketasi mapurigá echi jaré napachala. ²⁶ Ne galá 'nesi echi jaré chuluguí echo'ná ripá i'nika 'yéname, mapujiti aboni ketasi ichá, nirapé 'wí, nirapé napabú echo'ná biléana rikówachi. Chopi kétamo Onó ripá riwigachi atíami ne galá kowa si'néami echi jaré churuguí. ¡Yémitamo waminabi wabé simírami natiguí, ketasi mapurigá echi jaré chuluguí! ²⁷ Ke wesi 'yemi ne wabé nílaga 'nátaga, omérama a binói auché péé wi'libé niwayá bilé makali.

²⁸ Echijiti ¿churékulátamo ne wabé nílaga 'nata mapu churigátamo napachabo? Ne galá 'nesi mapurigá echi

jaré rakó, echo'ná kawichí nirúami, we galá ba'yóami niráa ochero. Echi jaré rakó ketásirapé nocha, nibilé niwá napacha. ²⁹ Chopi Nijé 'yemi nimí ané mapu echi walula silfami Salomoni riwéami ketásirapé echiyena ne wabé ba'yóami napáchali ketasi mapurigá bilé rakó niráa, mapalí binói ne wabé níwami níli. ³⁰ A'lí a Riosi echirigá ne wabé galá ba'yóami niráa napachátasagá echi rakó mapu jipi rawé galá jawi echo'ná kawichí, chopi ba'alínala rawé echo'ná na'írali ikósarami níima, ¡Riosi Binói 'yemi mi ne wabé simírami gala napachátama, 'yemi pagótami ke 'me galá bichíyami! ³¹ Echijiti ketasi wabé nílaga 'natasi jeanigá: ¿Pírita kopoa? Jeanigá keremá: ¿pírita bajibo? Jeanigá keremá: ¿pírita napachabo? ³² Mapujiti echi auché jaré pagótami ke bichíyami wabé nílaga amí suwaba je'ná jeyiri namuti. A'lí echi 'yemi Onorá, ripá riwigachi atíami, ne galá machí mapu 'yémitamo we newalé suwaba je'ná jeyiri namuti. ³³ Chopi ne bachá niráa tansi mapurigá Riosi 'yemi mi ne galá nulema pachana 'yemi sulálachi niráa, ayénachó ne galabé ologá pirélasí mapurigá Riosi nakí. Echali Riosi ayénachó 'yemi mi 'yama suwaba je'ná jeyiri namuti mapu ikítamo newalebo. ³⁴ Echirigá ketasi wabé nílaga 'natasi jeanigá: ¿Churigá ikimea ba'alí rawé? Mapujiti ba'alínala rawé arigá nirúlama auché jaré wikabé echiyiri namuti mapu 'yemi mi echirigá wabé nílaga 'natárama, átamo echirigá nakiságá 'natánala.

Ketasi wi'nijisi auché jaré pagótami

(Lk. 6:37-38, 41-42)

7 Ketasi wi'nijisi auché jaré pagótami, mapurigá Riosi ketasi cho 'yemi mi wi'nijima. ² Mapujiti mapurigá 'yémitamo wi'nijibo echi auché jaré, echi Walubera Riosi echirigá achigórigá 'yemi mi ku wi'nijima. A'lí a 'yémitamo pe téeli niráa anáwisagá echi auché jaré pagótami, echali Riosi ayénachó echirigá achigórigá 'yemi mi ku anáwima. ³ ¿Churékurami we 'neni echi taa namuti busuékowami mapu echo'ná mujé rijimala busílachi chukú, a'lí bichemi ketásirapé 'neni echi walú kutega mapu echo'ná mujé binói busílachi bu'wí? ⁴ ¿Churigami omero jeané echi mujé rijimala, keremá: Pe téeli buwé. Nijé machí pásama echi taa busuékowami namuti echo'ná mujé busílachi jonsa, mapalí echo'ná mujé binói busílachi abijí bu'wí bilé walú kutega? ⁵ ¡We ikaléami jumi! Ne bachá machí pa echi walú kutega echo'ná mujé binói busílachi jonsa, a'lí bichemi ne galá riwimea mapurigami machí pama echi taa namuti busuékowami echo'ná mujé rijimala busílachi jonsa.

⁶ Ketasi 'yasi echi Riosi níwala wabé galabéala echi jaré wabé simírami chati oláami pagótami yuwa, mapu arigá mapurigá kochí ju. Nirapé achasi 'yemi níwala wabé galabéala, mapurigá echi perla anilíwami niráa, echo'ná bacháami echi auché jaré wabé simírami chati

oláami pagótami mapu arigá mapurigá kóchi ju, mapurigá echi kóchi ketasi miná rikema, ayénachó mapurigá aboni ketasi ku ro'wiga, 'yemi mi ikima.

Sinibí tániga ra'ichasi Riosi yuwa

(Lk. 11:9-13; 6:31)

⁷ Galá tansi Riosi, a'lí bichétamo 'yárami níibo. Galá asi mapurigá Riosi 'yemi mi 'yama, a'lí bichétamo galá riwiboa. Galá bayesi mapurigá Riosi 'yemi mi irápama, a'lí bichétamo galá iráparami níibo. ⁸ Mapujiti si'néami echi jaré mapu ikí tániko Riosi bilé namuti, abóniko ne galá narema. A'lí echi jaré mapu ikí galá amíko mapurigá Riosi 'yama aboni bilé namuti, abóniko galá riwimea. A'lí echi jaré mapu ikí galá bayeko mapurigá Riosi irápama, abóniko galá iráparami níima. ⁹ ¿Chigá rijói nirú echo'ná 'yémechi, mapalí binói ranala galá tánsa bilé rimé, acha 'yama bilé rité? ¹⁰ A'lí mapalí echi binói ranala we tani bilé rochí, ¿Acha 'yama bilé sinówi? ¹¹ A'lí 'yemi pagótami ketásitamo galabé oláami ju arigátamo galá machí we galabé kóoya. Chopi a 'yémitamo arigá machiságá we galabé namuti kóoya 'yemi aboni kúchuwala, ¿kecha Riosi Onorúami, ripá riwigachi atíami, wabé galabé namuti 'yama echi jaré mapu galá tániko?

¹² Echijiti ne suwaba namuti máputamo nakí mapu echi auché jaré pagótami 'yemi mi galá olíima, echirigá achigórigá olasi 'yemi echi auché jaré pagótami yuwa, mapujiti suwaba Riosi Ra'íchala osirúami tamujé tamí je'ná jerigá binera.

Echi pe uchíi yéachi

(Lk. 13:24)

¹³ Mo'wisí echo'ná wabé uchíi yéachi, mapujiti ne wabé wi'lé ju echo'ná auché biléana yéachi, ayénachó wabé wi'lé ju echo'ná buwichí, echo'ná ri'lé riáblochi burúami, mapo'ná walú rajá, a'lí biché ne wikabé ju mapu echo'ná mo'wiko. ¹⁴ Mapujiti ne wabé uchíi ju echo'ná yéachi, ayénachó ne wabé uchíi ju echo'ná buwichí mapo'ná arigá 'wérali ju máputamo simárabo, átamo nakiságá máputamo sinibí piréami níibo. A'lí pe okúaa ju mapu riwako echi buwé.

Ibili rakéami namuti galá machirúami níima mapalí ma raké

(Lk. 6:43-44)

¹⁵ Galá tibusi 'yemi aboni niráa, mapurigá echi jaré 'yékaka nawésami ketasi 'yemi mi 'yékama, mapujiti aboni 'yemi mi yuwa simea mapurigá Riosi pugula bo'wá niráa, chopi pachánala aboni arigá ne wabé aparúami ju mapurigá nalíwali niráa. ¹⁶ 'Yémitamo galá machiboa aboni, acha ne bichíwali galabé oláami pagótami ju, mapujiti 'yémitamo galá riwiboa mapurigá aboni olá, mapujiti aboni olalila mapurigá

aboni rakala niráa ju. 'Yémitamo galá machí mapu echi galabé uva anilíwami rakala ketasi ripunárami níima echo'ná biléana so'uwárali. Ayénachó echi jaré galabé chuná rakala ketasi ripunárami níima echo'ná biléana chakórari. ¹⁷ Echijiti suwaba galabé rakéami namuti, ne bichíwali rakema echi galabé rakala. Ayénachó echi wabé sití rakéami namuti chopi rakema echi we sití rakala. ¹⁸ Echi galabé rakéami namuti ketasi omero rakea echi wabé sití rakala. A'lí biché echi wabé sití rakéami namuti ketásirapé omero rakea echi we galabé rakala. ¹⁹ Ne suwaba rakéami namuti mapu ketasi rakema echi galabé rakala, échiko miná ripunárami níima, a'lí biché echo'ná na'írali pátami níima. ²⁰ Ne bichíwali 'yémitamo galá machiboa echi auché jaré pagótami, acha galabé oláami ju, mapalítamo riwiboa mapu churigá aboni ologá piré, mapujiti aboni olalila ju mapurigá aboni rakala niráa.

Ketasi 'me si'néami pagótami mo'wimea echo'ná ripá riwigachi
(Lk. 13:25-27)

²¹ Ayénachó Jesusi jeaneli: Ne wikabé pagótami wisabé tamí jeané: ¡Mujemi ne wabé Walubela ju! Chopi Nijé 'yemi nimí ané mapu ketasi 'me si'néami aboni mo'wimea echo'ná ripá riwigachi. Chopi echo'ná mo'wimea echi jaré mapu galabé olama mapurigá Nijé Onolá ripá riwigachi atíami we nakí. ²² Echali ne jubá rawé wikabé pagótami jerigá tamí anema: ¡Tamujé Walubéluwala! Tamujé wabé nawésali Mujé riwalá jiti, ayénachóta Mujé riwalá jiti ku machí a'wali echi jaré riablo aliwala echo'ná pachana jaré pagótami sulálachi jonsa! ¡Tamujeta wisabé wabé galabé si'winárigá olali mujé riwalá jiti, mapurigá ke wesi auché jaré pagótami omero olayá! ²³ Chopi echali Nijeni ku nijéwaga jeanema: Nijeni ke siné 'yemi mi machili. ¡Waminá waná simíbaga! ¡Tamí ariwesi, 'yemi chati oláami pagótami!

Okuá kalí
(Lk. 6:47-49)

²⁴ Mapuyíripi námiko je'ná Nijé Ra'íchala, mapu ayénachó echirigá galá nijéwaga olá mapurigá Nijeni nulá, échiko mapurigá bilé galabé 'nátami rijói ju, echi mapu echo'ná moba biléana rapichí niwali kepu kalí. ²⁵ A'lí mapalí ne walubé ukuli, ne walubé bu'wíbali ba'wí echo'ná kalírali. Ayénachó mapalí ne wabé ikali, echali ne wabé iwéami wichíbari echo'ná kalírali, chopi echi kalí ketasi najuli, mapujiti ne galá tigótami níili echo'ná moba biléana rapichí. ²⁶ Chopi mapuyíripi námiko je'ná Nijé Ra'íchala, chopi ketasi echirigá galá nijéwaga olásagá mapurigá Nijeni nurá, échiko mapurigá bilé rijói ketasi 'nátami ju, echi mapu echo'ná satérali moba niwali kepu kalí. ²⁷ A'lí mapalí ne walubé ukuli, ne walú bu'wíbali ba'wí echo'ná kalírali. Ayé-

nachó ne wabé iwéami ikagá, wabé wichíbali echo'ná kalírali. Echali echi kalí káraga najuli.

²⁸ A'lí Jesusi ma sunisa je'ná jerigá ra'icha echali echi wikabé pagótami ne galá kilí 'nátaga tibili, mapujiti aboni ne wabé galá nirali mapurigá Jesusi nawésali. ²⁹ Mapujiti Jesusi ne wabé machíami niráa binérali, mapurigá bilé walubela niráa. Binói ketasi binérali mapurigá echi jaré nulalíwami binériami, mapu chopi binérali mapurigá osirúami ju echo'ná Riosi nulalila oselíwalachi.

Jesusi ku sa'wali bilé rijói ne wabé chati chá nayúami
(Mr. 1:40-45; Lk. 5:12-16)

8 A'lí mapalí Jesusi ku rikínali echo'ná ripá rabó jonsa, echali Binói yuwa najátali ne wikabé pagótami. ² Echali bilé rijói ne wabé chati cha nayúami nawali echo'ná Jesusi yuwa. A'lí wéemi raweka, bacháami Jesusi yuwa chokóba wiligá, ne Walubela aneli. Ayénachó jeaneli: ¡Ami galá nakisáagá, Mujé we galá omérami ju mapurigami tamí ku sa'wama! ³ A'lí Jesusi wachínaga nochogá jeaneli: ¡Nijeni wabé nakí! ¡Galá ku sa'wárami nílaga! A'lí we yáati galá ku sa'wárami níili. Ma ketasi waminabi echirigá chati cha nayúami níili. ⁴ A'lí Jesusi jeaneli: Tarapé wesi ku ruyé mapurigami ku sa'wárami níili. Chopi ku simigá 'nérami echi sacerdote anilíwami rijói mápumi ma ku sa'wárami ju. A'lí 'yami echi jaré namuti mapu Moisesi osogá nulali mápumi 'yama riwéali, mapujítimi ma ku sa'wíami ju. Echirigá olá mapurigá echi auché jaré pagótami galá machimea mápumi ma ku sa'wíami ju.

Jesusi ku sa'wali echi walula sontarsi piónawala
(Lk. 7:1-10)

⁵ A'lí mapalí Jesusi ma nawali echo'ná walúlachi, Kapernaúmachi anilíwachi, echali echo'ná Binói yuwa nawali bilé walula kapitani, bilé kiento sontarsi nuléami. Échiko we risúu anigá tánali, ⁶ jeanigá: Walubela, nijé piónawala ne wabé nayúami bu'wí echo'ná bitichí. Ketasi omero wilísiya. ⁷ A'lí Jesusi jeaneli: Nijeni echo'ná simigá ku sa'wama echi mujé piónawala. ⁸ Chopi echi kapitani ku nijéwaga jeaneli: Walubela, nijeni ketasi ne wabé galabé ju, mapurigá Mujé niráa. Echijiti ketasi galá nímiré Mujé bakisáagá echo'ná pachá nijé bitélachi. Chopi ra'íchaga niráa nulá Mujé, mapurigá ku sa'wárami níima. A'lí echi nijé piónawala galá ku sa'wimea. ⁹ Mapujiti echi jaré nijé o'wéalwala tamí we jiwériga nulé. A'lí nijé ayénachó jiwériga nulé echi auché jaré pe kuchípala sontarsi. A'lí mapalini bilé je'ná jerigá ané: ¡Echo'ná simigá! A'lí échiko ne bichíwali echo'ná simea. A'lí auché bilecho jeanésuwa: ¡Wakiná simí! A'lí échiko we yáati wakiná simea. A'lí bicheni echi keni piónawa jerigá anésaga: ¡Je'ná jerigá olá! A'lí échiko ayénachó ne bichíwali echirigá olá. Echijiti

chopi ra'íchaga niráa nulá Mujé, mapurigá nijé pió-nawala galá ku sa'wimea. A'lí ne bichíwali ku sa'wimea. ¹⁰ A'lí mapalí Jesusi námali je'ná jerigá aníachi, a'lí Binói ne wabé galá nirali echi rijói. A'lí Binói aneri echi jaré pagótami Binói yuwa síami, jeanigá: Ne bichíwari Nijé 'yemi nimí jeané: Je'ná rijói mapu si'nú pagótami ju, ne wabé galabé niráa tamí bichíi. Ke wésini riwali 'yemi Isaeli pagótami mapurigá je'ná jerigá ne garabé bichíyami ju. ¹¹ Ayénachó Nijé 'yemi nimí ané mapu ne wikabé simea, ne suníami a'nagú nologá jonsa, a'lí si'néami aboni kopoya muchíbama echo'ná ripá ri-wigachi, echi Abrami yuwa, echi Isaka yuwa, ayénachó echi Jakobo yuwa. ¹² Chopi jaré 'yemi Isaeli pagótami pagótawala mapu echo'ná muchima riwéali, arigá miná machí rokowárali a'wátami níima mapujiti aboni ketasi galá bichíili. A'lí echo'ná aboni ne wabé nalákama, ayénachó aboni ne wabé ki'lákama aboni ramilá, mapujiti aboni ne wabé risúu olárami níima. ¹³ A'lí Jesusi jeaneli echi walula kapitani: ¡Ma ku simigá! ¡Mapurigami bichíili, echirigami olárami nílaga! A'lí echi binói pió-nawala echalí we yáati galá ku sa'wárami níili.

Jesusi ku sa'wali echi Pegro wasila

(Mr. 1:29-31; Lk. 4:38-39)

¹⁴ A'lí Jesusi nawagá echo'ná Pegro bitélachi, riwali mapurigá echi Pegro wasila we ínuwa nayú bu'wili. ¹⁵ A'lí Jesusi chapili echi mukí sikala, a'lí we yáati ku sa'wárami níili. Ma ketasi ínuwa nayúami níili. A'lí ku asísaga, galá ku nigúuraga nóchali echi Jesusi ku'wíriya.

Jesusi ku sa'wali ne wikabé nayúkami

(Mr. 1:32-34; Lk. 4:40-41)

¹⁶ A'lí echalí rawé mapalí ma rokogó níili, echo'ná Jesusi yuwa pálati wikabé pagótami mapu wabé chati ri-ablo aliwala aliwéami níili. A'lí Jesusi ra'íchaga chopi nulega, galá ku machí a'wali echi jaré wabé chati ri-ablo aliwala echo'ná pachana echi jaré pagótami sulálachi jonsa. Ayénachó Binói ku sa'wali ne si'néami echi auché jaré nayúkami. ¹⁷ Echirigá ne sébali ikili mapurigá bachá niráa nawésarami níili mapu ikimea riwéali, mapalí echi ki'yánala bitéami walula nawésami Isaíasi riwéami jerigá osali:

Echi Walubela Binói ma ku sa'wali tamujé okolíwala, ayénachó Binói galá ku sa'wali tamujé nayúkuwala.

Jaré nakili echi Jesusi yuwa najátanala

(Lk. 9:57-62)

¹⁸ A'lí mapalí Jesusi riwali ne wikabé pagótami echo'ná ne nologá Binói yuwa síami, echalí Binói nuleli echi jaré mapu Binói binérali mapurigá mi bo'ónala simea, echo'ná walú ba'wírali moba simáraga. ¹⁹ Chopi we yáati echo'ná nawali bilé rijói nulalíwami binériami,

echi mapu jeaneli: Binériami, nijé nimí yuwa najátama mapo'ná kanápuromí Mujemi simea. ²⁰ A'lí Jesusi ku ní-jéwaga jeaneli: Echi jaré kiyochi echo'ná pachá iwárali piré. Ayénachó echi jaré churuguí a níwa rosolá. Chopi Nijeni ketasi niwa biré kalí mapo'ná ni bu'umea. Arigá Nijeni wilárami ju mapurigá Ku'wíriami niráa. ²¹ A'lí auché bilé mapu Jesusi binérali ayénachó jeaneli: Walubela, pe risensia, nijeni buwema mapuyénasí nijé onolá ma mukumea, mapujiti ma we ochérami ju. A'lí mapalini ma toma echi nijé onolá, echalí nijé nimí yuwa najátama. ²² A'lí Jesusi jeaneli: ¡Arigá tamí najató! Echi auché jaré ketasi bichíyami pagótami mapurigá suwíami niráa ju. Ariwé mapurigá aboni toma echi auché jaré aboni níwala suwíami.

Jesusi ku wilábali echi wabé iwéami iká

(Mr. 4:35-41; Lk. 8:22-25)

²³ A'lí Jesusi bakili echo'ná pachá biléana bárkochi mapurigá echo'ná asigá ku simea echo'ná walú ba'wírali suwé jonsa. A'lí echi jaré mapu Binói binérali, ayénachó Binói yuwa ku simíbalí. ²⁴ Chopi echo'ná walú ba'wírali ke sayiná ne wabé jiwériga ikali. Echijiti echo'ná pachá bárkochi ne noguí buchili ba'wí, chopi Jesusi we kochigá bu'wili mapujiti ne wabé risíami níili. ²⁵ A'lí echo'ná Jesusi yuwa sigá echi jaré Binói yuwa binéami jeanigá ku achali: ¡Walubela, tamujé tamí ku'wira, wete suwibóaré! ²⁶ A'lí Binói jeaneli: ¿Churékulátamo wabé majá, 'yemi rijói ketasi 'me bichíyami? A'lí ku asísaka, Binói we ra'ámali echi wabé jiwéraga ikáami, echi walú ba'wí ayénachó. A'lí we yáati suwaba ne galá siwega ku wilíbali. ²⁷ A'lí echi jaré rijói wabé 'nigá muchili, jeanigá: ¿Chuyiri wabé jiwérami Rijói ju je'ná, mapujiti echi wabé jiwérami ikáami ne galá nijewi, echi walú ba'wí ayénachó?

Okuá rijói wabé chati riablo aliwala aliwéami ma ku sa'wárami níili

(Mr. 5:1-20; Lk. 8:26-39)

²⁸ A'lí mapalí Jesusi ma nawali echo'ná bo'ónala suwé mapo'ná Garáráchi anilíwachi kawírali ju, echalí okuá rijói we júmsaga natipábiya sili, mapu wabé chati ri-ablo aliwala aliwéami níili. A'lí aboni echo'ná jaréana risochí chu'wechi jonsa 'machínali. Ayénachó okuánika ne wabé jobátami níili, mapuyénasí ke wesi omérali echo'ná mulubé simara. ²⁹ A'lí aboni ne wabé o'weli ra'íchaga jeanigá rukueli: ¿Piri mi olama tamujé tamí yuwa, mujé Jesusi mápumi echi bilepi Riosi Ranala ju? ¿Áchami nawali mapurigami bachá niráa tamujé tamí risúu olama, mapalí ke cho sébachi ju? ³⁰ A'lí echo'ná pe mikabé wikabé kóchi ko'yá uchútari. ³¹ A'lí echi jaré wabé chati isena riablo aliwala we risúu anigá jeaneli echi Jesusi: Ami tamujé tamí ku machí a'wánalasagá, tamujé tamí risénsia 'ya máputa echo'ná pachana echi

wikabé kóchichi mo'wibóa. ³² A'lí Jesusi jeaneli: ¡Echo'ná simíbaga! A'lí echi wikabé wabé chati riablo aliwala echo'ná echi rijói sulálachi jonsa ku machínasa, echo'ná pachana echi wikabé kóchichi mo'wili. Echálí ne suwaba echi wikabé kóchi ke sayiná miná júmsali. A'lí echo'ná biléana ripabé koláachi jonsa rujuili echo'ná ri'lé walú ba'wírali. A'lí ne suwaba miná si'lili.

³³ Echálí echi jaré kochi méлами we sapú ku júmsaga ku sili echo'ná walúlachi. A'lí aboni suwaba ku ruyeli echo'ná piréami mapurigá ikili echi okuá rijói yuwa mapu wabé chati riablo aliwala aliwéami níli. ³⁴ A'lí si'néami pagótami echo'ná walúlachi piréami natipábiya simíbali echi Jesusi. Mapalí aboni galá riwáli, a'lí aboni ne risúu anigá tánali mapurigá Binói ku simea, echo'ná aboni kawíwalachi jonsa.

Jesusi ku sa'wali bilé rijói mapu tarapé omérami níli asísiya

(Mr. 2:1-12; Lk. 5:17-26)

9 A'lí Jesusi echo'ná bárkochi bakigá, mi bo'ónala simili. A'lí nawali echo'ná walúlachi mapo'ná Binói bitéali. ² Echálí bilé rijói nayúami echo'ná Binói yuwa pálati, biléana kimachí rikagá. Echi rijói ke omériami níli asísiya. A'lí Jesusi galá machigá mapurigá aboni galá bichíilo, a'lí jeaneli echi rijói ke omériami asísiya: Keni raná, ¡galá tamí bichíi mujé! ¡Mami ku wikawárami ju ne suwaba mapurigami chati olali! ³ A'lí jaré rijói nulalíwami binériami je'ná jerigá 'nata muchili: Je'ná rijói we sayéraga ra'icha echi Walubela Riosi, mapujiti chopi Riosi omero ku wikáwiya echi pagótami chati olalila. ⁴ A'lí Jesusi galá machigá echirigá 'nátachi aboni, a'lí jeaneli: ¿Churékulátamo echirigá chati 'nata, echo'ná 'yemi sulálachi? ⁵ A'lí Jesusi ayénachó jeaneli: Ketasi wabé simírami oméami níli, Nijeni jeanée je'ná rijói: ¡Mapurigami chati olali, ma galá ku wikawárami ju! A'lí échiko ne bichíwali we yáati galá ku wikawárami níli. Nirapé cho oméami ju mapurigá Nijeni jeanema: ¡Ku wilísaga, ku simigá! A'lí binói ne bichíwali we yáati ku sa'wárami níma. ⁶ Echálí Jesusi jeaneli echi pagótami: 'Yémitamo ma riwiboa mapurigá Nijeni olama, echijítitamo ne galá machiboa mapu Nijeni galá omero ku wikáwiya jena'í wichimóbacha piréami pagótami chati olalila. Riosi tamí wilali mapurigá Ku'wíriami niráa. Echálí Jesusi we yáati jeaneli echi ke omériami asísiya: ¡Asísaga, ku chapigá kemi kimá, ku simigá echo'ná kemi bitélachi! ⁷ A'lí echi rijói ke akáanami we yáati ku wilísali. Ma ku sa'wárami níli. A'lí binói ku simili echo'ná binói bitélachi. ⁸ A'lí je'ná jerigá riwisá, echi pagótami ne wabé 'nátaga, wabé 'néniga muchili. Ayénachó aboni ne Walubela aneli echi Riosi Onorúami mapu 'yali mapurigá Jesusi echirigá wabé omériga olama.

Jesusi bayeli echi Mateo mapurigá Binói yuwa simea

(Mr. 2:13-17; Lk. 5:27-32)

⁹ A'lí echo'ná jonsa ku simílasa, Jesusi riwali bilé rijói wenomí napabúami, Mateo riwéami, mapu wenomí napabuya asali echi walula silíami echo'ná nuláami natétimiya. Echálí Jesusi jeaneli: ¡Tamí yuwa najató! A'lí echi Mateo ku wilíska, Jesusi yuwa simili.

¹⁰ A'lí Jesusi bayérami níli mapu ko'mea echo'ná echi Mateo bitélachi. Echálí wikabé echi auché jaré wenomí napabúami ayénachó bayérami níli. Auché jaré wikabé ayénachó bayérami níli mapu echi jaré Juríosi chati oláami niráa aneli. Echálí ne si'néami napawika ko'yá muchili Jesusi yuwa. A'lí echi jaré mapu Jesusi binérami ayénachó echo'ná ko'yá muchili. ¹¹ A'lí mapalí echi jaré Bariseo anilíwami binériami je'ná jerigá riwali, echálí aboni jeaneli echi jaré mapu Jesusi binérami: ¿Churékula echirigá ko'wá echi 'yemi níwala binériami echi jaré wenomí napabúami yuwa, echi auché jaré yuwa ayénachó mapu chati oláami anérami ju? ¹² A'lí Jesusi je'ná jerigá namsa jeaneli: Echi jaré mapu ketasi nayúkako ketasi newalé bilé óyami. Chopi echi jaré nayúkami newalé. ¹³ Echálí Jesusi waminabi jeaneli: Nijeni ketasi bayémiya nawali echi jaré galabé oláami pagótami. Chópini bayémiya nawali echi auché jaré chati oláami pagótami, mapurigá aboni ku ro'wisa, ne si'nú galabéala niráa 'natama. Ma ku simíbaga binsi 'yemi mapurigá aniwáami ju je'ná jerigá osirúami: Nijeni nakí máputamo wabé natimáami níibo, ketasi mapurigátamo chopi wikabé namuti ko'yagá, tamí 'yasa.

Echi jaré mapu Juani binérami we rukueli echi Jesusi

(Mr. 2:18-22; Lk. 5:33-39)

¹⁴ A'lí echi jaré mapu Juani binérami ma sili echo'ná Jesusi yuwa. A'lí jeaneli: Tamujé wisabé, wi'libé niráa ketásita ko'wá, mapalita chopi Riosi yuwa ra'icha. Echi auché jaré Bariseo anilíwami binériami ayénachó achigórigá olá. ¿Churékula sinibí arigá wabé ko'wá echi jaré mapu Mujé binérami? ¹⁵ A'lí Jesusi jeaneli: Ketasi omérama ne wabé siweya echi jaré mapu jaré bukulí niwíami yuwa omáwiya muchuwi, mapalí echi bukulí niwíami rijói aboni yuwa abijí asisá. Pe waminánomí rawé, mapalí echi bukulí niwíami rijói ma 'yérami níma echo'ná abónichi, echálí rawé aboni ayena wabé siwega ma ketasi ko'mea, wi'libé niráa, mapalí aboni chopi Riosi yuwa tániga ra'icha muchima.

¹⁶ Tarapé wesi pachókama bilé luwíami napacha echi bukulíwami chiní jiti, mapujiti echirigá pachókasuwa, echi bukulíwami pachókalami we téeli nílama, ma wichósuwa. A'lí echi luwíami napacha waminabi chi'wama. ¹⁷ Nirapé wesi ro'wama echi bukulíwami uva anilíwami ba'wila echo'ná pachana jaléana sití wichí chiwáwalachi. Echirigá olásagá, ma ronínasa, echi uva

ba'wila we chi'wanama echi sití wichí chiwáwala. A'lí suwaba ku'lima echi uva ba'wila. Ayénachó echi wichí chiwáwala suwaba chi'wama. Echijiti galá níima ro'wasa echi bukulíwami uva ba'wila, ke cho ronóami, echo'ná pachana jaréana bukulíwami wichí chiwáwalachi. A'lí ne galá anawí a'nagupi nutétami níima.

Jesusi ku owíntaga achali bilé tiwé mapu ma mukúami níili

(Mr. 5:21-43; Lk. 8:40-56)

¹⁸ A'lí mapuyénasí Jesusi abijí je'ná jerigá ra'íchali aboni yuwa, echalí echo'ná nawali bilé rijói walula. A'lí echo'ná Jesusi yuwa bacháami wéemi raweka, chokoba wiligá jeaneli: ¡Nijé malala bukulí mukuli! ¡Arigá tamí yuwa simigá, Mujé sikala jiti nochogá, mapurigá ma ku bitélama! ¹⁹ A'lí Jesusi we yáati wilísaga, echi rijói yuwa simili. A'lí echi jaré mapu Jesusi binérali ayénachó así simíbali.

²⁰ A'lí mapalí Jesusi iyénali echo'ná buwichí echi wikabé pagótami yuwa, echalí bilé mukí, mapu makói miná okuá bamíbali jonsa we léniga nayúami níili, ne jubáami nawagá nocháli Jesusi napáchala suwilá.

²¹ Mapujiti echi mukí je'ná jerigá 'nátali: Chopi nochásagáni echi Jesusi napáchala suwilá, nijeni ma galá ku sa'wárami níima. ²² Chopi Jesusi ku ro'wiga, galá 'néniga jeaneli: ¡Ne galá kaníliga bichíi! Mami ku sa'wárami ju, mapujítimi tamí bichíili. Echalí echi mukí ma galá ku sa'wárami níili.

²³ A'lí mapalí Jesusi nawali echo'ná echi Jáiro bitélachi, Binói echo'ná riwali wikabé echi jaré kuséami, ne wikabé pagótami we nakátara aníami ayénachó, mapujiti echi jaré Juríosi sinibí echirigá olali mapalí ma mukuli bilé. ²⁴ A'lí Jesusi jeaneli: Waminá chakena simíbaga. A'lí Binói galá machili mapu Binói ku owíntama riwéali echi tiwé mapu ma mukúami níili, echijiti Binói jeaneli echi jaré pagótami: Je'ná tiwé, tamí jiti, ketasi mapurigá mukúami ju, chopi kochíami niráa ju. A'lí echo'ná muchúami wabé kachigá tiníchalí echirigá aníachi Jesusi. ²⁵ Chopi mapalí echi wikabé pagótami ma ku machí a'wátami níili, echalí Jesusi bakili echo'ná mapo'ná echi mukúami tiwé bu'wili. A'lí mapalí Jesusi chapili echi mukúami tiwé sikala, echalí echi tiwé mapu bukulínala mukúami níili, ma ku wilísali, mapujiti binói ma galá ku bitéami níili. ²⁶ Echijiti pe wakinana ne si'néami pagótami echo'ná kawírali piréami galá machili mapu Jesusi echirigá ne wabé jiwériga olali.

Jesusi ku sa'wali okuá rijói mapu ke machíliami níili

²⁷ Chopi mapalí Jesusi simírali echo'ná jonsa, echalí okuá rijói ke machíliami we najátali Binói yuwa, wabé o'weli ra'íchaga, jeanigá: ¡Tamujé tamí we natimá, mujé Rabiri Ranala! ²⁸ Echalí mapalí Jesusi nawali echo'ná biléana kalírali, ayénachó echo'ná sili echi okuá rijói ke

machíliami. A'lí Jesusi jeanigá rukueli: ¿Áchatamo bichíi mapurigá Nijeni omérama 'yemi mi ku 'machíliami niwayá? A'lí aboni jeaneli: ¡Ayena, Walubela! ²⁹ A'lí Jesusi nocháli aboni busila jeanigá: ¡Mapurigátamo galá bichíili, echirigá galátamo olárami nílaga! ³⁰ A'lí aboni busila we yáati galá ku machíliami niwálati. A'lí Jesusi iwériga jeanigá nuleli mapurigá aboni tarapé wesi je'ná jerigá ruyema. ³¹ Chopi aboni ku simíbaga waminabi galá nawésali Binói jiti ne suníami echo'ná kawírali piréami.

Jesusi ku sa'wali bilé rijói mapu ke ra'íchami níili

³² A'lí mapalí aboni ku simíbaga olali, echalí bilé rijói ke ra'íchami echo'ná pálati mapu wabé chati riablo aliwala aliwéami níili. ³³ Chopi mapalí echi we chati riablo aliwala ku machí pátami níili, echalí echi rijói galá ku omérali ra'icha. A'lí echi pagótami echo'ná piréami wepi we 'nátaga, 'nigá muchili, jeanyá: Ke siné echirigá riwirúami níili jena'í tamujé Juríosi pagótami kawíwarachi. ³⁴ Chopi echi jaré Bariseo anilíwami binériami jeanili: Echi Jesusi chopi omero ku machi á'waya echi jaré chati riablo ariwala, echo'ná echi pagótami sulálachi jonsa, mapujiti Binói we níwa echi ne walula riablo jiwérawala.

Jesusi wabé natimali echi wikabé pagótami

³⁵ A'lí Jesusi ne noligá iyénali echo'ná suníami walúlachi, echo'ná suníami rijówachi ayénachó. A'lí Binói ne galá binérali echo'ná suníami aboni ri'obáwalachi, mapujiti Binói galá nawésali echi galabé nawésuami, jeanigá mapu Riosi ma galá nulé echi pagótami. Ayénachó Binói ku sa'wali suwaba nawilí, ne suwaba okolí ayénachó, mapu ikí okóli echo'ná piréami pagótami. ³⁶ A'lí mapalí Jesusi riwali echi wikabé pagótami, echalí Binói we natimali aboni, mapujiti mapurigá wikabé bo'wá níili mapu we chijaka 'yena, mapu tarapé te mélemi. ³⁷ A'lí Jesusi jeaneli echi jaré mapu Binói binérali: Ne wikabé pagótami ketasi cho galá bichíi Riosi Ra'íchala, chopi Nijeni arigá nakí mapu aboni galá bichíima. A'lí péé okuáa ju echi jaré mapu galá nawesa Riosi Ra'íchala. ³⁸ Echijiti tánsi mapurigá echi Walubela Riosi waminabi wikabé nawisánala jula-ma, mapurigá echi jaré pagótami galá bichíima Riosi Ra'íchala.

Echi jaré makói miná okuá mapu Jesusi binérali

(Mr. 3:13-19; Lk. 6:12-16)

10 A'lí Jesusi bayeli echi jaré makói miná okuá mapu Binói binérali. A'lí omérawami 'yali, echi jaré wabé chati riablo aliwala sayéraga, mapurigá echi jaré mapu Binói binérali galá omérama ku machí a'wáa echi wabé chati riablo aliwala echo'ná pachana jaré pagótami sulálachi muchúwamichi jonsa. Ayénachó

omérwami 'yali mapurigá aboni ku sa'wama ne suwaba nayulí, ne suwaba okówami ayénachó. ² A'lí echi jaré makói miná okuá julárami jerigá riwéami níili: Echi ne bachá Simoni riwéami níili, mapu ayénachó Pegro anérami níili; echi Antresi ayénachó bilé níili, echi mapu binói Pegro rijimala níili; echi Jakobo ayénachó, echi mapu echi Sibireo ranala níili; echi Juani ayénachó, echi mapu echi Jakobo rijimala níili; ³ echi Jilipi; echi Batalomé ayénachó; echi Tomasi; echi Mateo, echi mapu wenomí napabúami níili ayénachó; echi Jakobo, echi Alibeo riwéami ranala; echi Libeo ayénachó, echi mapu ayénachó Tareo anérami níili; ⁴ echi Simoni, echo'ná Kananéachi anilíwachi bitéami ayénachó, echi Júراسي Jiskarioti ayénachó, echi mapu pe wakinana bayébali echi jaré sontarsi mapurigá aboni borogá chapimea echi Jesusi, mapurigá Binói arigá mi'lirúami níima.

Jesusi nawésanala júuli echi jaré makói miná okuá

(Mr. 6:7-13; Lk. 9:1-6)

⁵ Echali Jesusi nawésanala júuli je'ná makói miná okuá, ayénachó jeanigá nureli: 'Yémitamo Jurósi anilíwami pagótami ju. Ketasi simasi echo'ná echi jaré isena pagótami buwilachi, nibilé mo'wisí echo'ná biléana walúlachi echi jaré Samáriachi piréami walúwachi. ⁶ Chopi ne bachá simasi echi jaré Isaeli anilíwami pagótami yuwa, echi jaré mapu wikáami niráa 'yena mapurigá echi jaré bo'wá wikáami niráa. ⁷ A'lí bichétamo simíbaga, jeanigá nawisasi: Ke 'me ayó rawé Riosi galá nulema jena'í wichimóbachi piréami pagótami. ⁸ Galá ku sa'wasi echi jaré nayúkami. Ayénachó ku sa'wasi echi jaré wabé chati chá nayúkami. Galá ku owíntasi echi jaré ma suwíami. Ayénachó ku machí a'wasi echi jaré wabé chati riablo aliwala, echo'ná pachana jaré pagótami sulálachi muchúami. 'Yémitamo ketasirapé natétaga, arigá 'yárami níili mapurigátamo galá omérabo echirigá ku sa'wayá echi jaré nayúkami. Echijiti ketásirapé bujesa ku sa'wasi aboni. ⁹ Ketásirapé tosí echi wenomí oro anilíwami echo'ná 'yemi níwala malétachi. Ketasi cho tosí echi wenomí plata anilíwami, nírapé tosí echi jaré kúuchi wenomí kobre anilíwami. ¹⁰ Ketasi tosí bilé maleta echo'ná buwichí. Ketasi cho okuá napachákoami tosí. Nibilé aká tosí, nibilé tisola, mapujiti galá níima mapurigá echi jaré Nijé níwala nóchami galá kóorami níima.

¹¹ Chopi echo'ná chuwé biléana walúlachi mapo'nátamo mo'wiboa, echo'ná chuwé biléana rijówachi keremá, ne bachá galá rukuesi chigá echo'ná bitéami galá oláami ju. A'lí echo'ná echi rijói bitélachi tibisi, mapuyénasítamo ma ku simiba echo'ná walúlachi jonsa. ¹² A'lí mapalítamo mo'wiboa echo'ná kalírali, ne galá kuíruga narépasí echo'ná piréami. Ayénachó tansi Riosi mapurigá aboni galá ku'wíratami níima. ¹³ A'lí a

echo'ná kalírali piréami pagótami ne galá bichíisagá, a'lí aboni ne bichíwali galá ku'wíratami níima. Chopi a echo'ná piréami ketasi galá bichíyami níisagá, echali aboni arigá ketasi galá ku'wíratami níima. ¹⁴ A'lí mapalí biléana piréami pagótami ketasi 'yemi mi narésagá, nírapé 'yemi mi námanalasagá, echali mapalítamo ku simabo echo'ná jonsa, ne galá bi'wasi echi napisó mapu ri'leka 'yemi ralálachi chukúbali. Echirigátamo ku ruyebo mapu echo'ná piréami pagótami wabé chati oláami ju. ¹⁵ Ayénachó Jesusi jeaneli: Ne bichíwali 'yemi nimí ané mapu echali ne jubá wi'nijíwachi rawé, echi jaré chati oláami pagótami echo'ná Sorómachi piréami, ayénachó echi jaré chati oláami pagótami echo'ná Gomórachi piréami, ketasi 'me walú kastigo 'yárami níima, mapurigá ne wabé kastigo 'yárami níima echi jaré pagótami mapu ketasi 'yemi mi narigako.

Echi jaré nawésami kichiga a'najátarami níima

¹⁶ Arigá simíbaga nawisábasi echi Galabé Riosi Ra'íchala. Nijeni 'yemi mi jula mapurigátamo kilí ologá pirélabo mapurigá jaré 'méchuli niráa, chópitamo nawésabo jaré pagótami mapu ne wabé jobátami níima mapurigá echi jaré nalíwali niráa. Echijiti ne galá 'nénami níisi mapurigá echi jaré sinowi niráa, chopi ayénachó ne galá kilí ologá pirélasí mapurigá echi jaré makawi niráa. ¹⁷ Ne galá tibusí 'yemi aboni niráa echi auché jaré pagótami jiti, mapujiti aboni 'yemi mi bologá tomea echo'ná bacháami echi jaré aboni o'wéalowala yuwa, ayénachó aboni 'yemi mi wipisoma echo'ná aboni ri'obáwalachi. ¹⁸ Ayénachó 'yemi baníratami níibo echo'ná bacháami jaré o'wéala silíami yuwa, echo'ná bacháami jaré waminabi wabé o'wéala yuwa ayénachó. Echirigátamo risúu olárami níibo mapujítitamo tamí jiti bichíyami ju. Chopi je'ná jerigá ikimea mapurigátamo galá omérabo nawésiya aboni, mapurigátamo ayénachó nawésabo echi auché jaré isena pagótami. ¹⁹ Chopi mapalí aboni 'yemi mi echirigá banírama echo'ná bacháami echi jaré o'wéala yuwa, echali ketasi bachá niráa wabé nílaga 'natasi mapu churigátamo ku nijéwaga aniboa, mapujiti echali rawé 'yemi galá 'yárami níibo mapu churigátamo ra'ichabo. ²⁰ Mapujiti 'yemi ketasi chopi ju máputamo ra'ichabo echali rawé, chopi echi Wabé Galabé Riosi Iwigala, echi 'yemi Onolá Iwigala, echali 'yemi mi binérama mapurigátamo ra'ichabo.

²¹ Echali rawé sébachi echi bilé rijimá nijima auché bilé binói rijimala mapurigá miná mi'lirúami níima. Ayénachó echali rawé jaré onorúami nijima aboni tanala mapurigá miná ko'wirúami níima. Ayénachó jaré kúcharami ne wabé sayérama aboni 'wénawala, mapurigá aboni 'wénawala echirigá ko'wirúami níima. ²² Echali rawé ne si'néami echi auché jaré pagótami 'yemi mi ne wabé kichima mapujítitamo tamí bichíya-

mi ju. Chopi ne si'néami 'yemi máputamo arigá galá bichíibo, echalí ne jubá rawé yénasí, 'yémitamo galá ku'wíratami níibo. ²³ Chopi mapalí biléana walúlachi piréami 'yemi mi wabé kichiga a'najátama, echalí waminá júmsasi echo'ná auché biléana, mapujiti ne bichíwali 'yemi nimí ané máputamo ketasi cho sunibo 'yena echo'ná ne suníami echi jaré Isaeli pagótami o'wéalowalachi mapalí Nijeni ma ku nolínama jena'í wichimóbachí. Riosi tamí wilali mapurigá Ku'wíriami niráa.

²⁴ Ayénachó Jesusi jeaneli: Echi jaré binéami mapu bilé rijói galá binera ketasi waminabi o'wéala ju ketasi mapurigá echi bilé mapu galá binéra aboni, chopi echi binériami waminabi walula ju. A'lí echi jaré pióntami nibilé cho waminabi o'wéala ju ketasi mapurigá echi auché bilé mapu aboni nuláami ju, chopi echi nuláami waminabi walula ju. ²⁵ Chopi ne galá sébali ju mapurigá echi jaré mapu binératami ju achigórigá níima mapurigá echi binériami mapu galá binéra aboni. Ayénachó sébali ju mapurigá echi jaré pióntami achigórigá níima mapurigá aboni walúlowala. A'lí a jena'í wichimóbachí piréami tamí jeanésagá: ¡Mujé echi Bersebubi riwéami riablo jumi! Echalí aboni 'yemi mi waminabi echirigá chati anema.

¿Chigá nalina galá níima máputa majasa?

(Lk. 12:2-9)

²⁶ Echirigá ketasi majasi 'yemi, echi jaré aboni jiti, mapujiti suwaba namuti mapu ikí chiná nasótami ju, échiko pe minánomí galá ku riwirúami níima. Ayénachó suwaba echi jaré namuti mapu ikí ke machirúami ju, échiko pe minánomí galá ku machirúami níima. ²⁷ A'lí mapurigá Nijé 'yemi nimí ané echo'ná rokowárali niráa, echirigá ne galá machíami niráa anesi 'yemi echo'ná ne galá rayénachi niráa mapurigá ne si'néami echi auché jaré echirigá galá machimea. A'lí mapurigá 'yémitamo ne nakachí niráa námali, echirigá ne galá machíami niráa nawisasi mapurigá echo'ná ripá moba biléana kalírali wilfami nawésami niráa, mapurigá si'néami pagótami galá námama. ²⁸ Jesusi jeaneli: Ketasi majasi echi auché jaré mapuyíripi ko'yako echi pagótami, chopi ketasi omero ko'wayá echi pagótami iwigala. Ne bachá galá majasi echi Riosi mapu galá omero suwábiya echi pagótami iwigala, echi pagótami sapala ayénachó, mapalí Binói walú kastigo 'yama echo'ná ri'lé riáblochi, wabé chati rajáami na'írali. ²⁹ Echi jaré kúuchi chuluguí tarapé natéami ju. Okuá echi kúuchi chuluguí chopi natiguí bilé kentavo. Arigá echi Walubela Riosi, kétamo Onó, galá machimea mapalí bilé taa chuluguí ri'lé wi'yérali wichí. ³⁰ Riosi galá machí chu kipu kupá ibili 'yemi niwa, mapujiti echi wikabé 'yemi kupala arigá ne suwaba galá tarárami ju. ³¹ Echirigá ketasi majasi 'yemi, mapujítitamo ne wabé

simírami natéami ju Riosi yuwa, ketasi mapurigá echi jaré wikabé kúuchi chuluguí.

Jaré galá nawésako, jeanigá mapu aboni bichíi Jesu-cristo niráa

(Lk. 12:8-9)

³² A'lí mapuyíripi nawésako echi auché jaré pagótami jeanigá mapu binói galá tamí bichíi, Nijeni ayénachó anema echi Nijé Onolá echo'ná ripá riwigachi atíami mapu Nijeni galá machí echiyiri rijói. ³³ A'lí mapuyíripi nawésako echi auché jaré pagótami jeanigá mapu binói ketasi tamí bichíi, Nijeni ayénachó anema echi Nijé Onolá echo'ná ripá riwigachi atíami mapu Nijeni ketasi machí echiyiri rijói.

Jesusi okoná niráa rojuana jena'í wichimóbachí piréami

(Lk. 12:51-53; 14:26-27)

³⁴ Ketasi 'natasí mapu Nijeni nawali mapurigá jena'í wichimóbachí piréami chopi kilí ologá pirélama. Ketásini echijiti nawali, chópini nawali mapurigá jena'í wichimóbachí piréami pagótami okoná niráa rojonárami níima, ³⁵ mapurigá bilé rijói ke bichíyami we sayérama kepu onó mapu galá tamí bichíyami ju. Ayénachó mapurigá bilé tiwé mapu ke bichíyami ju we sayérama binói iyela mapu galá tamí bichíyami ju. Ayénachó mapurigá bilé mo'olí ke bichíyami we sayérama binói wasila mapu galá tamí bichíyami ju. ³⁶ Echirigá ikimea mapu echi auché jaré echo'ná binói bitélachi piréami ne wabé sayérama ibili rijói mapu tamí bichíyami ju.

³⁷ Mapuyíripi waminana ne wabé simírami galeko kepu onó, kepu iyé, ketasi mapurigá binói tamí galé, échiko ketasi ne sébali tamí galé, nirapé galabé olá mapurigá Nijé yuwa binéami niráa. Ayénachó echi mapu waminana ne wabé simírami galeko kepu kúuchi ketasi mapurigá binói tamí galé, échiko nirapé ne sébali tamí galé, nirapé cho galabé olá mapurigá Nijé yuwa binéami niráa. ³⁸ Ayénachó echi mapuyíripi ketasi arigá anacháma mapalí binói risúu olárami níima, achigórigá mapurigá Nijeni arigá anacháma mapalini wabé risúu olárami níima, échiko nirapé ne sébali tamí galé, nirapé cho galá olá mapurigá Nijé yuwa binéami niráa. ³⁹ Mapuyíripi rijói jena'í wichimóbachí chopi kanílagá bitélanaliko, échiko chopi miná mukumea. A'lí mapuyíripi rijói chopi olánaliko mapurigá Nijeni nakí, échiko ne sinibí niráa bitélama.

Echi galabé oláami pagótami galá ku natétarami níima

(Mr. 9:41)

⁴⁰ Echi mapuyíripi 'yemi mi narigako, échiko ayénachó tamí narigá. A'lí echi mapu tamí narigako, échiko ayénachó narigá Riosi Onorúami, Echi mapu tamí júuli. ⁴¹ Echi mapuyíripi galá bichíiko mapurigá nawesa bilé rijói Riosi jiti nawésami, mapujiti Riosi júuli

echi rijói echirigá nawésanala, échiko sinibí niráa bitélama achigórigá mapurigá echi Riosi jiti nawésami sinibí bitélama. Ayénachó echi mapu galá narigako bilé galabé oláami rijói mapujiti echi rijói galabé oláami ju, échiko galá ku natétarami níima, achigórigá mapurigá echi galabé oláami rijói ku natétarami níima.

⁴² Echali Jesusi ayénachó jeaneli: Echi jaré kúuchi galá tamí bichíiko. Ne bichíwali 'yemi nimí ané mapu ne galá ku natétarami níima mapuyíripi rijói 'yásagá pe taa ba'wí ruláami bilé je'ná kúuchi, chopi mapujiti echiyiri rijói tamí yuwa binéami ju.

Echi Juani rukuénala júuli jaré rijói

(Lk. 7:18-35)

11 Mapalí Jesusi ma sunili echirigá binériya echi jaré makói miná okuá mapu sinibí Binói yuwa 'yéнали mapurigá binéami niráa, echali Jesusi ku simili echo'ná jonsa. A'lí Binói binériga, nawésiya, iyénari ne suníami echo'ná nirúami o'wéalachi.

² A'lí mapalí Juani echo'ná pachá kumurachi bachárami níili, echali binói galá ruyérami níili suwaba mapu ikí echi Walubela Jesucristo olali. Echali echi Juani rukuénala júuli okuá rijói mapu binói Juani yuwa binéami níili. ³ A'lí aboni jeanigá rukueli: ¿Mujecha ju echi bilé nawésami mapu nolínama riwéali? ¿Áchata buwebo mapu auché bilé nolínama, keremá? ⁴ A'lí Jesusi ku nijéwaga jeaneli: Ku simíbagá, ku ruyébasi echi Juani suwaba namuti mapuyíripi 'yémitamo ma ná-mali, ne suwaba namuti mapuyíripi 'yémitamo ma riwáli ayénachó. ⁵ Galá ku ruyébasi mapurigá echi jaré ke machíliami galá ku machili, ayénachó mapurigá echi jaré ke akáanami galá ku 'yena, ayénachó mapurigá echi jaré wabé chati cha nayúkami galá ku sa'wárami ju, ayénachó mapurigá echi jaré ke námiamí galá ku nami, ayénachó mapurigá echi jaré suwíami galá ku o'wíntarami ju. Ayénachó mapurigá echi jaré wabé tisúwati pagótami galá nawésarami ju echi Galabé Riosi Ra'íchala. ⁶ A'lí ne wabé kaníliami ju echi jaré mapu ketasi na'áwako tamí jiti.

⁷ Echali mapalí echi jaré mapu Juani jiti julárami níili ma ku simíbali, echali Jesusi chótali nawésiya echi auché jaré pagótami, echi Juani jiti rugá. Echali Jesusi jeaneli: Mapalí 'yémitamo echo'ná waná kawichí 'yéнали echi Juani 'nébiya, echali 'yémitamo ketasi echo'ná 'nébiya simíbali bilé rijói mapu ketasi ne bilepi niráa wachínaga 'nátami ju. Echiyiri rijói mapurigá bilé baká ju mapu we nokérami ju echi iká jiti. ⁸ A'lí Jesusi waminabi jeaneli: Echali 'yémitamo ketasi cho echo'ná waná kawichí 'nébiya simíbali bilé rijói wabé simírami galabé simati napáchami, mapujiti echi jaré galabé simati napáchami chopi muchuwi echo'ná echi jaré o'wéala pirélachi. Echi jaré wabé simati napáchami ketasi 'yena echo'ná jaréana waná kawichí. ⁹ Chopi 'yémitamo ne bichíwali echo'ná 'nébiya simíbali bilé rijói

walula Riosi jiti nawésami. Ayénachó Nijé 'yemi nimí ané máputamo bilé rijói waminabi wabé walubela 'nébiya simíbali, ketasi mapurigá echi auché jaré o'wéala Riosi jiti nawésami. ¹⁰ Mapujiti je'ná Juani ju mapu binói jiti rugá, je'ná jerigá osirúami ju echo'ná Riosi Ra'íchala oseríwalachi:

Waminá bacháami mapo'ná Mujemi simírama, echo'ná a'láranala julámani bilé keni kapitánawa.

Échiko bachá nawésama echi jaré pagótami, mapurigá aboni mi galá bichíima, echali mapalí Mujé echo'ná nawama.

¹¹ Ayénachó Jesusi jeaneli: Ne bichíwali 'yemi nimí ané mapu ke wesi jena'í wichimóbachi piréami pagótami waminabi walubela niráa wilíbali ketasi mapurigá echi Juani. Chopi echi mapu ne wabé tabéara juko, echi auché jaré yuwa mapu ikí Riosi galá nulé, échiko arigá waminabi walula ju ketasi mapurigá echi Juani.

¹² Echali chabénala rawé, echi Juani mapu pagóami níili rawéwalachi jonsa, jipi rawé yénasí, si'néami mapu ikí wabé nakiko olánala mapurigá Riosi nulé, abóni wabé jiwériga ologá, galá omero echirigá olayá. A'lí echi jaré mapu ikí ne wabé simírami bichíinali, abóniko ne galá omero bichiya. ¹³ Mapujiti si'néami echi jaré Riosi jiti nawésami ki'yánala piréami galá nawésali mapuyénasí echali rawé mapalí echi Juani ayénachó nawésali. A'lí aboni nawésali jeanigá mapurigá Riosi galá nulema riwéali echi pagótami. Ayénachó Riosi nulalila mapurigá echi Moisesi osali, echirigá achigórigá aniwáami ju mapu Riosi galá nulema riwéali echi pagótami jena'í wichimóbachi piréami. ¹⁴ A'lí átamo nakisáagá echirigá bichíinala, echi Juani ma galabé ologá nawali mapurigá echi ki'yá bitéami Elíasi mapu ku nolínama riwéali. ¹⁵ A'lí Jesusi jeaneli: ¡'Yemi máputamo nakeko, ne galá namsi!

¹⁶ Echali Jesusi waminabi jeaneli: Je'ná pagótami mapuyiri echi jaré kúrowi ju, mapu echo'ná ri'narárachi ri'yeka, a'nagupi o'weli ra'íchaga ¹⁷ jeaní: ¡Tamujeta 'yemi mi tákali echi kusela, chópítamo ketasi awilí! ¡Ayénachóta wabé o'móniga nawajili, chópítamo ketasi nalákali! ¹⁸ Mapujiti mapalí echi Juani nawali, binói tarapé ko'wéami níili, nirapé bajíami níili, chopi 'yémitamo jeanili: ¡Echi Juani we riablo níwami ju! ¹⁹ A'lí biché Riosi tamí wilali mapurigá Ku'wíriami niráa. Chopi mapalí Nijeni nawali, mápuni ayena we ko'wá, mápuni ayena bají, a'lí bichétamo jeaní: ¡Nibira, bilé rijói we ko'wéami ju, ayénachó we bajíami ju echi uva ba'wila! Ayénachó echi jaré wenomí napabúami apanérawala ju, echi auché jaré chati oláami pagótami ayénachó apanérawala ju. A'lí echi we galabé machiwáami we galá anérami ju, si'néami echi jaré wabé galabé machíami pagótami jiti.

Jaléana o'wéalachi piréami ketasi galá nijéwami níli
(Lk. 10:13-15)

²⁰ A'lí Jesusi 'nátaga yónali echi jaré pagótami echo'ná jaréana o'wéalachi piréami mapo'ná Binói Jesusi chabénala nochogá ku sa'wali echi wikabé nayúkami, ayénachó mapo'ná Binói wisabé wabé omériga olali mapurigá ke wesi auché jaré pagótami omero olayá. A'lí Binói echirigá yónali mapujiti echo'ná o'wéalachi piréami ketasi o'móniga ku ro'wili Riosi yuwa, nirapé bichíli. A'lí Jesusi jerigá anili: ²¹ ¡Báaji 'yemi pagótami echo'ná Korasinchi piréami! ¡Báaji 'yemi pagótami echo'ná Becháirachi piréami! Echo'ná Tírochi, echo'ná Sirónachi piréami pagótami ketasi bichíyami ju, chopi a Nijeni wabé omériga olásagá echo'ná abónichi achigórigá mapurigani ma olali echo'ná 'yémichi, echi jaré ke bichíyami pagótami ma ku ro'wíami ními Riosi yuwa, ne wabé chajótami napáchaga, ne wabé napisóami níisa, mapurigá wabé o'mónami niráa. ²² A'lí Jesusi ayénachó jeaneli: Echijiti 'yemi nimí ané mapu echo'ná Tírochi piréami, echo'ná Sirónachi piréami ketasi 'me kastigo 'yárami níima echalí ne jubá wi'ni-jíwachi rawé, chopi 'yémitamo ne wabé kastigo 'yárami níibo. ²³ A'lí 'yemi pagótami echo'ná Kapernaúmachi piréami ne wabé o'wéalatami níli mapurigá echo'ná ripá riwigachi muchúami niráa. Chópitamo ne echo'ná ri'lé riáblochi rikibúrami níibo. Nijé nimí ané mapu echo'ná Sorómachi piréami pagótami ne wabé chati oláami níli, chopi a Nijeni wabé omériga olásagá echo'ná abónichi mapurigá ke wesi auché jaré pagótami omero olayá, achigórigá mapurigá Nijeni ma olali echo'ná 'yémichi, echi jaré pagótami echo'ná Sorómachi piréami ketasi cho káraga suwábarami ními, jipi rawé yénasí. ²⁴ Echijiti 'yemi nimí ané mapu echo'ná Sorómachi anilíwachi kawírali piréami pagótami ketasi 'me walú kastigo 'yárami níima echalí ne jubá wi'ni-jíwachi rawé, chopi 'yémitamo ne wabé simírami walubé kastigo 'yárami níibo.

Tamí yuwa sisí, a'lí bichétamo galá isábabo
(Lk. 10:21-22)

²⁵ Echalí rawé Jesusi, Riosi yuwa ra'íchaga, jeanili: Nijé nimí walú natétara 'ya Mujé Onorúami, mapujítimi ne Walubela ju echo'ná ripá riwigachi, jena'í wichimóbachí ayénachó. Nijé nimí walú natétara 'ya mapujítimi chinásali je'ná jeyiri namuti mapurigá echi jaré wabé machíami pagótami ketasi echirigá machimea, ayénachó mapurigá echi auché jaré wabé 'nátami pagótami ketasi cho echirigá machimea. Chópimi ma machírali je'ná jeyiri namuti echi jaré kúuchi. ²⁶ Echirigá Nijé nimí natétara 'ya Mujé Onorúami mapujiti Mujemi echirigá ne wabé nakili olánala.

²⁷ A'lí Jesusi jeaneli echi jaré pagótami: Keni Onó ma tamí 'yali ne suwaba namuti mapu ikí nilú. A'lí ke wesi galá tamí machí, chopi Riosi Onorúami tamí machí, mapujítimi Binói Ranala ju. A'lí ke wesi galá machí Riosi Onorúami, chopi Nijeni galá machí Binói, mapujítimi bilepi Binói Ranala ju. A'lí echi auché jaré ayénachó galá machí Riosi Onorúami, si'néami mapu ikí Nijeni nakí mápuni galá machírama aboni echi Onorúami.

²⁸ Tamí yuwa sisí si'néami mapuyíripi wabé nocháratami ju, ayénachó si'néami mapuyíripi wabé uchérami ju. A'lí Nijé 'yemi nimí ku isábatama. ²⁹ Bulesa tosí Nijé níwala mosobela 'yemi niráa. Nijé 'yemi nimí yuwa ku'wíraga nochama. Tamí yuwa galá binési, mapujiti Nijé ketasi chibisíami ju, nibilé choni níliami ju. A'lí bichétamo we galá isábabo echo'ná 'yemi sulálachi niráa. ³⁰ Mapujiti Nijé níwala mosobela ketasi oméami ju. Ayénachó ketasi bitéami ju echi jaré Nijé níwala muruka mapu Nijé 'yemi nimí 'yama, mapujiti ketasi 'me oméami ju oluwawa mapurigá Nijeni nakí.

Echi jaré mapu Jesusi binérali we mosika kuli turío siné rawé isábawachi
(Mr. 2:23-28; Lk. 6:1-5)

12 A'lí echalí siné rawé isábawachi Jesusi simírali echo'ná mapo'ná echi turío ma wáami níli. A'lí echi jaré mapu Binói binérali ne wabé 'locheka, chótali mosika kuya echi turío rakala. ² A'lí echi jaré Bariseo anilíwami binériami je'ná jerigá riwisáa jeaneli: ¡Nibira! ¡Echi jaré mapu Mujé binera we olá mapurigá ketasi risénsia ju oluwáwa jipi isábawachi rawé! ³ Chopi Jesusi jeanigá rukueli: ¿Kéchatamo siné 'nénali mapurigá osirúami ju echo'ná Riosi Ra'íchala oselíwalachi, mapurigá echi walula silíami Rabiri riwéami olali mapalí binói ne wabé 'locheli, echi auché jaré mapu binói yuwa muchili ayénachó? ⁴ Mapujiti echi Rabiri ma bakigá echo'ná pachá Riosi ri'obáwarachi we ko'wali echi jaré pani mapu Riosi 'yárami níli. A'lí ketasi risénsia níli mapu echi Rabiri ko'mea echi pani. Nirapé risénsia níli mapu echi auché jaré Rabiri yuwa 'yénami ko'mea. Chopi risénsia níli mapu echi jaré sacerdote anilíwami rijói ko'mea. ⁵ A'lí Jesusi ayénachó jeanigá rukueli: ¿Kéchatamo siné 'nénali mapurigá osirúami ju echo'ná Riosi nulalila oselíwalachi mapurigá echo'ná pachá walubé Juríosi ri'obáwalachi echi jaré sacerdote anilíwami rijói we nocha sinibí isábawachi rawé, chopi aboni ketasi wi'nijírami ju? ⁶ Jipi Nijeni 'yemi nimí ané mapu Nijé Binói mápuni jena'í atí, Nijeni waminabi ne Walubela ju, ketasi mapurigá echi walubé Juríosi ri'obáwala. ⁷ Chopi a galátamo machisáagá mapu churigá aniwáami ju mapurigá Riosi Binói anili, mapurigá je'ná jerigá osirúami ju: Nijeni nakí máputamo wabé natimáami níibo, ketásini nakí mapurigátamo chopi wikabé namuti ko'yagá tamí 'yasa, a'lí 'yémitamo ketasi echirigá wi'nijibi echi auché jaré mapu ketasi na-

muti nokuáami ju. ⁸ A'lí Jesusi jeanili: Nijeni ne Walubela ju echalí isábawachi rawé, mapujiti Nijeni wilárami níili mapurigá Ku'wíriami niráa.

Bilé rijói ke akáanami níili biléana sikachí

(Mr. 3:1-6; Lk. 6:6-11)

⁹ A'lí Jesusi echo'ná jonsa ku simírasa, echo'ná aboni ri'obáwalachi nawali. ¹⁰ A'lí echo'ná pachá asali bilé rijói, biléana sikachí ke akáanami. A'lí echi jaré Bariseo anilíwami binériami wabé wi'nijífinalaga rukueli jeanigá: ¿Acha risensia ju ku sa'walíwa echi jaré ke akáanami, jipi isábawachi rawé? ¹¹ A'lí Jesusi ku nijéwaga, jeanigá rukueli: ¿Chigá rijói 'yemi, bilé bo'wá bukélasa, a'lí echi bo'wá wichisá echo'ná biléana jochi echalí isábawachi rawé ¿kecha chapigá ku machí pama? ¹² A'lí Jesusi ayénachó jeaneli: ¿Waminabi ne wabé natéami ju bilé rijói, ketasi mapurigá bilé bo'wá! Echijiti ne galá risensia ju galá oluwawa echi jaré pagótami jipi isábawachi rawé. ¹³ A'lí Jesusi jeaneli echi rijói biléana sikachí ke akánami: ¿Wachiná kemi siká! Echali echi rijói galá ku wachínali binói sikala, mapujiti echali jonsa binói sikala we yáati galá ku sa'wárami níili mapurigá echi auché biléala. ¹⁴ A'lí mapalí echi jaré Bariseo anilíwami binériami ma ku 'machínali echo'ná ri'obachi jonsa, echalí aboni a'nagupi ra'íchali echi Jesusi sayéraga, mapu churigá aboni omérama miná mi'limea echi Binói.

Chabé ki'yánara osirúami níili echi Jesusi jiti rugá

¹⁵ Chopi Jesusi echirigá galá machigá ku simili echo'ná jonsa. A'lí wikabé pagótami Binói yuwa najátali. A'lí Jesusi ku sa'wali si'néami echi jaré mapu ikí nayúkami níili. ¹⁶ Chopi Jesusi we iwéami nureli mapurigá aboni ketasi ku ruyema echi auché jaré pagótami mapurigá Binói echirigá omérali olayá. ¹⁷ A'lí Jesusi echalí je'ná jerigá ra'íchali mapurigá echirigá galá ikimea mapurigá Riosi Binói bachá niráa anili Binói Jesusi jiti rugá, mapurigá echi walula Riosi jiti nawésami, Isaíasi riwéami jeanigá osali:

¹⁸ Je'ná rijói Nijé piónawala ju, echi mapu Nijeni chapili. Nijeni ne wabé galé echi Binói.

Ayénachó Nijeni ne wabé ganlí echi Binói jiti, echo'ná Nijé iwigálachi niráa. Ayénachó Nijeni 'yama Binói echi ne wabé Galabé Riosi Iwigala.

A'lí Binói justicia olama echi auché jaré isena pagótami yuwa, si'néami mapu ikí ketasi Juríosi pagótami ju.

¹⁹ A'lí echi Binói ketasi yónama auché jaré yuwa, nibilé yónaga, o'weli ra'ichama echo'ná walúlachi nasípasí.

Nibilé wesi námama echi Binói o'weli yóniga ra'íchachi echo'ná pagótami napawílachi.

²⁰ Echi Binói ketasi miná ka'línama echi bilé baká o'líami.

Nibilé cho'wama echi bilé rajilí molínami, mapuyénasi Binói ke cho seba justicia olayá.

²¹ A'lí echi jaré isena pagótami ne galá bichíima echi Binói.

Jaré anili mapu echi Jesusi níwali echi ne walula riablo ariwala

(Mr. 3:19-30; Lk. 11:14-23; 12:10)

²² A'lí echo'ná Jesusi yuwa pálati bilé rijói mapu bilé wabé chati riablo aliwala aliwéami níili. A'lí echi rijói ke machíliami níili, ke ra'íchami ayénachó, chopi Jesusi galá ku sa'wali. A'lí echi rijói ma galá ku machíliami níili, ayénachó galá ku ra'íchali. ²³ A'lí ne si'néami echi jaré pagótami chopi wabé 'nigá muchili. A'lí aboni a'nagupi jeanigá rukueli: ¿Kecha je'ná ju echi Rabiri Ranala máputa we buwé? ²⁴ Chopi echi jaré Bariseo anilíwami binériami je'ná jerigá námaga, jeanili: Je'ná Jesusi chopi ku machí a'wasá echi jaré riablo aliwala mapujiti Binói niwa echi ne walula chati riablo aliwala, Berseubi riwéami. ²⁵ A'lí Jesusi galá machigá mapurigá aboni 'nátali, a'lí jeaneli: Echo'ná suníami walula nulálachi piréami, ne si'néami a aboni sayérasagá, ne si'néami káraga suwibama. A'lí biléana rijówachipi piréami a aboni sayérasagá, si'néami miná suwibama. Ayénachó biléana kalílali piréami a aboni sayérasagá, si'néami miná suwibama. ²⁶ A'lí a echi Satanasi riwéami riablo ku machí a'wásagá echi jaré riablo aliwala, echalí echi Satanasi a binói sayéraga oláma. A'lí a echirigá olásagá echi Satanasi ketasi waminabi mapurigá walula níima. ²⁷ A'lí a Nijeni echi Berseubi riwéami riablo jiti ku machí a'wásagá echi jaré we chati riablo aliwala, ¿chigá jiti ku machí a'wasá echi auché jaré 'yemi pagótamawala? Echijiti aboni 'yemi mi wi'nijíami níima. ²⁸ Chopi a Nijé ku machí a'wásagá echi jaré wabé chati riablo aliwala mapujítini niwa echi Wabé Galabé Riosi Iwigala, ne bichíwali Riosi ma galá nulá je'ná 'yéwichi.

²⁹ A'lí echi riablo, Satanasi riwéami, ne wabé aparúami ju. A'lí tarapé wesi galá omérama chigoya echo'ná bilé wabé aparúami rijói bitélachi, mapalí ketasi bachá bulérami níisa echi wabé aparúami rijói. Chopi bachá bulusáagá, a'lí echi rijói galá omérama chigoya echo'ná echi wabé aparúami rijói bitélachi.

³⁰ Ayénachó Jesusi jeaneli: Echi mapu ketasi tamí yuwa juko, échiko chopi tamí sayérami ju. A'lí echi mapu ketasi tamí yuwa napawiko echi auché jaré pagótami, échiko chopi waminá chijana echi pagótami mapurigá aboni ketasi tamí yuwa níima. ³¹ Echali Jesusi jeaneli: Echijiti Nijeni 'yemi nimí ané mapu ne suwaba echi jaré pagótami chati olalila galá ku wikawárami níima, a aboni galá ku tánsagá wikáwali. Ayénachó suwaba mapurigá aboni chati ra'íchali tamí sayériga echirigá ku wikawárami níima. Chopi echi jaré pagótami mapu we chati ra'íchako echi we Galabé Riosi

Iwigala sayéraga, abóni ma ketasi ku wikawárami níma. ³² A'lí Jesusi jeaneli: Nijeni wilálami níli mapurigá Ku'wíriami niráa. A'lí mapuyíripi tamí sayéraga ra'íchako, échiko galá ku wikawárami níma, ku wikáwari tánsagá Riosi. Chopi mapuyíripi echi we Galabé Riosi Iwigala sayéraga ra'íchako, échiko ketasi siné ku wikawárami níma mapuyénasí binói abijí bitélasa jena'í wichimóbachi, nirapé cho mapalí binói ma mukusá.

Ibili rakéami namuti galá machirúami níma, acha galá ju, mapalí ma rakema

(Lk. 6:43-45)

³³ 'Yémitamo galá machí mapu bilé masana we galabé ju mapalí ne galabé niráa raké. Ayénachótamo galá machi mapu auché bilé masana we sití ju mapalí échiko we sití niráa raké, mapujiti ibili masana galá machirúami níma echi masana rakala jiti, acha galabé raké, acha wabé sití raké, kéramá. ³⁴ 'Yemi pagótami chopi mapurigá sinowi ju! 'Yémitamo ketasi omero galabé niráa ra'icha mapujítitamo wabé chati suléami ju, mapujiti ibili rijói chopi ra'icha achigórigá mapurigá binói 'nata echo'ná binói sulálachi niráa. ³⁵ Echi we galabé oláami rijói we ra'icha echi we galabé ra'íchali mapujiti galabé suléami ju. A'lí echi we chati oláami rijói we chati ra'icha mapujiti we chati suléami ju.

³⁶ Chopi Nijeni 'yemi mi ané mapu echalí ne jubá wi'nijíwachi rawé echi jaré pagótami arigá ku ruyema Riosi ne suwaba namuti mapurigá aboni we chati ra'íchali. ³⁷ Mapujiti a mi galabé namuti ra'ichásagá, mujemi ku'wíratami níma, chopi a mi wabé chati niráa ra'ichásagá mujemi wi'nijírami níma.

Jaré chati oláami pagótami we nakili 'nénara mapurigá Jesusi wabé omériga olali

(Mr. 8:12; Lk. 11:29-32)

³⁸ A'lí echi jaré nulálwami binériami, echi auché jaré o'wéala Bariseo anilíwami binériami yuwa, si'néami ku nijéwaga jeaneli: Binériami, tamujeta nakí mápumi we yáati wabé omériga olama mapurigá ke wesi auché jaré pagótami omero olayá. Tamujeta nakí mápumi we 'nebo mapalimi echirigá wabé omériga olama. ³⁹ A'lí Jesusi jeaneli: Jipi piréami wabé chati oláami pagótami ketasi galá bichiyami ju. Aboni chopi nakí 'nénala mapalí Nijeni wabé simírami omériga olá mapurigá ke wesi auché jaré pagótami omero olayá. Chopi Nijeni ketásirapé namuti echirigá wabé simírami omériga olama chopi mapurigá aboni tamí 'nema echirigá oláachi. Chopi aboni arigá riwimea mapalí Riosi wabé simírami omériga olama tamí yuwa mapurigá Binói olali echi ki'yá bitéami Jonasi riwéami rijói yuwa, mapu Riosi jiti nawésami níli. ⁴⁰ Mapujiti mapurigá echi Jonasi asali echo'ná pachá echi bilé walubé rochírali

bikiyá rawé, bikiyá rokogó yénasi, echirigá achigórigá Nijeni asimea ri'lé pachá wi'yérali bikiyá rawé, bikiyá rokogó niráa. Nijeni wilárami níli mapurigá Ku'wíriami niráa. ⁴¹ A'lí Jesusi ayénachó jeaneli: Echalí ne jubá wi'nijíwachi rawé echi jaré ki'yá piréami pagótami mapu echo'ná Nínibichi anilíwachi piréali, si'néami wi'nijíbiya ku 'muchísama je'ná jipi piréami pagótami sayéabiya. Mapujiti echalí ne jubá rawé aboni 'yemi mi echirigá wi'nijima mapujiti aboni ne wabé o'móniga tánali wikáwali Riosi mapalí echi Jonasi we nawéseli aboni. Chopi jipi rawé Nijé mápumi 'yemi mi jena'í nawésiya atí, ne wabé simírami Walubela juni, ketasi mapurigá echi Jonasi, a'lí bichétamo arigá ketasi o'móniga tani wikáwali Riosi. ⁴² Ayénachó Jesusi jeaneli: Echalí ne jubá wi'nijíwachi rawé, mapalí je'ná jipi piréami pagótami wi'nijírami níma, echalí echi mukí walula silíami, mapu echo'ná mikabé 'naka bitéami níli, arigá wi'nijímiya ku asísima je'ná jipi piréami pagótami. Echalí echirigá ikimea mapujiti echi mukí walula silíami ne wabé mikabé jonsa kipúmiya simili mapurigá echi walula silíami Salomoni riwéami ne wabé machíami niráa nawésali. Chopi Nijé mápumi jipi rawé jena'í 'yemi yuwa atí, ne wabé simírami Walubela juni, ketasi mapurigá echi walula silíami Salomoni. Chopi 'yémitamo arigá ketasi nijewa mapurigá Nijeni 'yemi mi nawesa.

Bilé chati riablo aliwala ku nawali mapo'ná machí páta-mi níli

(Lk. 11:24-26)

⁴³ A'lí Jesusi jeaneli: Mapalí bilé we chati riablo aliwala ku machínasa echo'ná bilé rijói sulálachi jonsa, a'lí echi we chati riablo aliwala echo'ná auché jaréana wachichéachi aya iyena mapo'ná asimea. Chopi ketasi riwisa, ⁴⁴ echalí echi chati riablo aliwala jerigá aní: Echo'ná ku nijé kalíachi siméa mapo'nani jonsa machínali. A'lí mapalí echi riablo aliwala ku nawá echo'ná rijói sulálachi mapo'ná binói chabénala bitéali, echalí binói riwimea echi rijói sulálachi ma ne galá ku a'láratami niráa, mapurigá bilé kalí ne galá ba'yóratami, ma galá pichítami niráa. ⁴⁵ A'lí ku simisáa echi riablo aliwala, a'lí binói yuwa chapimea auchecho kichao ne wabé simírami chati riablo aliwala, ketasi mapurigá binói. A'lí ne si'néami echi jaré riablo aliwala echo'ná echi rijói sulálachi ku mo'wisáa, echo'ná pirélama. Echirigá pe jubáami echi rijói ne wabé simírami risúu olálami níma, ketasi mapurigá binói risúu olálami níli ne bachánala niráa. Echirigá achigórigá ayénachó ikimea je'ná jipi piréami chati oláami pagótami.

Echi Jesusi iyera, Binói 'némiya nawali echi jaré Binói ritémawala ayénachó
(Mr. 3:31-35; Lk. 8:19-21)

⁴⁶ A'lí mapalí Jesusi abijí echirigá ra'íchiaya asali echi wikabé pagótami yuwa, echalí echo'ná machí asali echi Jesusi iyela, echi jaré Binói ritémawala ayénachó. A'lí aboni nakili ra'ichánala Binói yuwa. ⁴⁷ A'lí bilé rijói jeaneli: ¡Nibira! Echi Mujé iyela, echi jaré Mujé ritémawala echo'ná machí muchuwi. Aboni we nakí Mujé yuwa ra'ichánala.

⁴⁸ Chopi Jesusi ku nijéwaga jerigá rukueli echi rijói: ¿Áchami ne galá machináali chigá ne bichíwali ju mapurigá Nijé iyela, ayénachó mapurigá Nijé ritémawala niráa? ⁴⁹ Echalí Jesusi, Binói sikala jiti jówaga echi jaré mapu Binói binérali, a'lí jeanigá ku nijéwali: ¡Nibira! Jena'í muchuwi echi jaré Nijé ritémawala, echi Nijé iyela ayénachó. ⁵⁰ Mapujiti mapuyíripi olako mapurigá Nijé Onolá, ripá riwigachi atíami nakí, echi ju Nijé rijimala, Nijé wayela ayénachó, Nijé iyela ayénachó.

Echi turío icháami
(Mr. 4:1-9; Lk. 8:4-8)

13 Echalí rawé Jesusi ma machinsa echo'ná Binói bitélachi jonsa, a'lí simigá echo'ná walú ba'wírali suwé, echo'ná asíbalí. ² A'lí echo'ná Jesusi yuwa napawili wikabé pagótami. A'lí Jesusi bakili biléana barkochi echo'ná ba'wichí moba chukúami. Echalí Binói echo'ná bárkochi pachá asíbalí. A'lí si'néami echi wikabé pagótami echo'ná ba'wírali suwé jali. ³ A'lí Binói wikabé namuti irétaga nawésali jeanigá: ¡Nibira! Bilé rijói chótali turío ichayá. ⁴ A'lí ma ichisuwa jaré raká rujuili echo'ná mulubé biléana buwichí. A'lí jaré chuluguí echo'ná sisáa, káraga suwali. ⁵ A'lí auché jaré raká echo'ná biléana rapirúachi rujuili mapo'ná ketasi 'me wi'yéali. A'lí echi jaré raká we yáati a'wili mapujiti ketasi 'me rokóami wi'yéachi níli. ⁶ Chopi mapalí wabé ratáami rayénali, echi kúuchi turío bukulí a'wíami we wakicheka suwili mapujiti ketasi ri'libe nawéali. ⁷ A'lí auché jaré raká rujuili echo'ná wabé so'uwéami riyáwachi. A'lí echi riyawi wabé ochérasa waminá napolíbanali echi turío. Echijiti ketasi rakeli. ⁸ A'lí auché jaré raká echo'ná galabé wi'yérali rujuisa, ne galá rakeli. A'lí jaré raká ibili niráa bilé kiento rakeli. Auché jaré ibili niráa usansa makói rakeli. Auché jaré ibili niráa baisá makói rakeli. ⁹ A'lí Jesusi jeaneli: Mapuyíripi nakeko, ¡galá kipú!

Jesusi irétaga nawésali echi pagótami
(Mr. 4:10-12; Lk. 8:9-10)

¹⁰ A'lí echi jaré mapu Jesusi binérali murubéanaga mapo'ná Binói asali, jeanigá rukueli: ¿Churékulami sinibí echirigá irétaga niráa ra'icha echi pagótami? ¹¹ A'lí Jesusi ku nijéwaga jeaneli: 'Yémitamo ma galá

machíratami ju mapu churigá Riosi we nulé echi pagótami. Chopi echi auché jaré ketasi cho echirigá machíratami ju. Aboni ketasi cho galá machí mapu churigá Riosi nulá, echijiti Nijeni ne suwaba irétaga nawesa echi auché jaré ke cho galá bichíyami. ¹² Mapujiti mapuyíripi ma galá níwako, échiko waminabi 'yárami níima, a'lí waminabi níwama. Chopi mapuyíripi ketasi níwako, échiko suwaba 'yérami níima echi pe okuáa mapu binói abijí niwa. ¹³ Echijiti Nijeni irétaga nawesa echi auché jaré pagótami, mapujiti aboni ma 'néniga, ketásirapé galá ritiwá, ayénachó aboni ma kipuga, ketásirapé galá nami. A'lí aboni ketasi galá machí mapurigá Nijeni ra'icha. ¹⁴ Echirigá ma galá sébali ikili aboni yuwa mapurigá ne bachá niráa nawésali echi walula Riosi jiti nawésami Isaíasi riwéami mapalí binói je'ná jerigá osali:

'Yemi nakala jítitamo námabo, chópitamo ketasi galá machiboa,

ayénachótamo galá 'néniga riwiboa, chópitamo ketasi galá machiboa.

¹⁵ Mapujiti je'ná pagótami we biwárami suléami ju.

Aboni ketasi nami aboni nakala jiti.

Ayénachó aboni busila ma kupili; mapurigá aboni ketasi 'nénama aboni busila jiti,

mapurigá aboni nirapé námama aboni nakala jiti,

mapurigá aboni nirapé machimea echo'ná aboni sulálachi,

mapurigá aboni ketasi ku ro'wima tamí yuwa, mapurigá Nijeni ku sa'wama aboni.

¹⁶ Chopi 'yémitamo ne wabé kanílatami níibo mapujítitamo ma galá 'neni 'yemi busila jiti, ayénachó mapujítitamo ma galá nami 'yemi nakala jiti. ¹⁷ Mapujiti ne bichíwali 'yemi nimí ané mapu wikabé echi jaré

o'wéala Riosi jiti nawésami, ayénachó wikabé echi jaré galabé oláami pagótami, si'néami wabé nakili 'nénala je'ná jeyiri mapurigá 'yémitamo ma ritiwá, chopi aboni ketásirapé riwali. Ayénachó aboni nakili námanala je'ná jeyiri mapurigá 'yémitamo ma nami, chopi aboni ketásirapé námali.

Je'ná jerigá aniwáami ju mapurigá Nijeni nawésali
(Mr. 4:13-20; Lk. 8:11-15)

¹⁸ ¡Ne galá namsi 'yemi! Je'ná jerigá aniwáami ju echi mapurigá Nijeni irétaga nawésali echi pagótami, echi turío icháami jiti: ¹⁹ Mapuyíripi námako nawésaluami mapurigá Riosi galá nulé jena'í wichimóbachí piréami pagótami, a'lí ketasi galá machisáagá chu aniwáami nawésaluami ju, a'lí echi wabé chati oláami riablo we yáati nolinsa, miná 'wísama echi we Galabé Ra'íchali mapu echi rijói ma galá námali. Echi we Galabé Ra'íchali mapurigá ichirúami niráa níli echo'ná echi rijói surálachi, chopi echi riablo miná 'wísali, mapurigá echi rijói ketasi waminabi echijiti 'natama. Echirigá achigórigá ikili echi rijói yuwa mapurigá ikili echi jaré

raká yuwa mapu ichirúami níili echo'ná buwichí suwé, mapalí echi jaré chuluguí sisáa suwali. ²⁰ A'lí Jesusi ayé-nachó jeaneli: Mapurigá ikili echi jaré turío mapu echo'ná moba biléana rapirúachi rujuili, echirigá achigórigá ikimea echi jaré pagótami mapu bachá niráa galá kaníliga námali echi Galabé Riosi Ra'ichala; ²¹ chopi abóni ketasi we yáati galá bichíi ne sulachí niráa, mapujiti aboni achigórigá ju mapurigá echi jaré turío ketasi 'me galá nawéami. Aboni pe téeli niráa bichíima, chopi mapalí aboni we risúu olárami níima mapujiti aboni echirigá bichíinali Riosi Ra'ichala, echalí aboni ma ketasi waminabi galá bichíima. ²² Ayénachó mapurigá ikili echi jaré turío mapu echo'ná wabé so'uwéami riyáwachi ichirúami níili, achigórigá ikimea echi auché jaré pagótami, si'néami mapu ikí galá namsa Riosi Ra'ichala, arigá ketasi galá bichíima. Aboni chopi wikabé namuti wabé nílaga, 'nátaga pirélama. Ayénachó aboni ne wabé koruma echi wikabé namuti jena'í wichimóbachi nirúami. Echijiti aboni ketasi bichíinali Riosi Ra'ichala. A'lí aboni ketasi galá ku'wíratami níima. ²³ A'lí mapurigá ikili echi jaré turío mapu echo'ná galabé wi'yérali ichirúami níili, echirigá achigórigá ikimea echi auché jaré pagótami, si'néami mapu ikí galá namsa Riosi Ra'ichala ne galá sulachí niráa bichíima. Aboni ne galá nijéwaga olama mapurigá Riosi nulé, ayénachó wabé galá bichíiga, wabé galabé ologá pirélama jena'í wichimóbachi. Jaré aboni mapuyiri echi turío ju mapu baisá makói rakeli. Auché jaré mapuyiri echi auché jaré turío ju mapu usansa makói rakeli, mapujiti aboni waminabi galabé olama. Auché jaré mapuyiri echi auché jaré turío ju mapu bilé kiento rakeli, mapujiti aboni waminabi wabé simírami galabé olama.

Echi basíawi ichirúami níili echo'ná turíochoi

²⁴ A'lí Jesusi auchecho siné irétaga ra'ichali jeanigá: Mapalí Riosi we nulé echi pagótami, achigórigá ju mapurigá mapalí bilé rijói ichali ne galabé raká echo'ná binói kawíwalachi. ²⁵ Chopi mapalí echi auché jaré pagótami we kochigá bitili, echalí echo'ná nawali bilé rijói we sayérami mapu we ichali echi basíawi echo'ná mapo'ná echi turío ichílati. A'lí ku simili. ²⁶ A'lí mapalí echi turío ma galá muleli, echalí echo'ná nasipa echi turío yuwa ayénachó riwirúami níili echi basíawi. ²⁷ Echalí echi rijói icháami níwala pioni echo'ná binói yuwa sisáa, jeaneli: Walula, ¿kéchami ne turío chopi ichali echo'ná mujé kawíwalachi? ¿Churékula biché echo'ná we a'wili echi basíawi? ²⁸ A'lí echi rijói jeaneli: Auché bilé rijói tamí sayériga echirigá olali. A'lí echi jaré pioni jeanigá rukueli: ¿Áchami nakí máputa ku simíbaga bo'niboa echi basiáwi? ²⁹ A'lí binói jeaneli: Jipi ketasi echirigá bo'nisí echi basiáwi, mapujiti átamo bo'nisáaga, siné káachi 'yémitamo ayénachó echi turío

yuwa bo'niboa. ³⁰ Chopi ariwesi mapurigá okuánika napawika ochérama mapuyénasí ma seba sikirékowachi. Echalí nijeni jeanema echi jaré turío sikiréami: Bachá chapisí echi basiáwi. A'lí bulesa mapurigá sonó, suwaba na'esi. Chopi ku napabusi echi turío echo'ná nijé níwala rikówachi.

Echi mostasa anilíwami rakala

(Mr. 4:30-32; Lk. 13:18-19)

³¹ Echalí Jesusi ayénachó auchécho je'ná jerigá irétaga binéraga jeaneli: Mapalí Riosi galá nulé echi pagótami, echalí mapuyirai ju bilé taa mostasa anilíwami rakala mapu bilé rijói ichali echo'ná wi'yérali. ³² Echi mostasa anilíwami rakala ne bichíwali ne wabé tabéala ju suwaba echi auché jaré raká yuwa. Chopi mapalí ma ochérasa, echi mostasa ne wabé walube ju suwaba echi auché jaré ichirúami namuti yuwa. A'lí walubé ochera mapurigá bilé masana niráa, a'lí echi jaré chuluguí, ripá i'nika 'yénamí, echo'ná sisáa we rosorama echo'ná echi mostasa otowálachi.

Jesusi irétaga binera echi levadura jiti rugá

(Lk. 13:20-21)

³³ A'lí Jesusi auchecho siné irétaga ra'ichali jeanigá: Echi pani echi levadura jiti niwalíwa. A'lí mapalí Riosi galá nulé echi pagótami, achigórigá ju mapurigá mapalí bilé mukí ma baisá niráa anáwaga echi harina, galá nasówali echi levadura echi harina yuwa mapuyénasí suwaba galá kapótami níili.

Jesusi chopi irétaga niráa binérali mapujiti bachá niráa nawésarami níili mapu Binói echirigá binérama riwéali

(Mr. 4:33-34)

³⁴ Echalí Jesusi suwaba je'ná jerigá irétaga ra'ichali echi pagótami yuwa. Ayénachó Jesusi sinibí chopi irétaga niráa ra'ichali aboni. ³⁵ Mapurigá ne galá sébali ikimea mapurigá echi walula Riosi jiti nawésami anili mapalí binói je'ná jerigá osali mapurigá osirúami ju echo'ná Riosi Ra'ichala oselíwalachi:

Chotámani irétaga ra'íchiya.

Ayénachó wiká namuti nawésamani mapu ketasi siné machirúami níili ki'yá chokichí jonsa, mapalí je'ná kawí niwálati.

Jesusi nawésaga ané churigá aniwáami ju mapurigá Binói binérali echi basíawi rakala jiti rugá mapu ichirúami níili echo'ná turíochoi

³⁶ A'lí Jesusi ma ku ripórasa echi wikabé pagótami, ku bakiri echo'ná pachá kalírali. A'lí echi jaré mapu Binói binérali echo'ná Binói yuwa sigá jeaneli: Tamujé tamí auché ruyé mapu churigá aniwáami ju mapurigami irétaga nawésali echi basíawi jiti. ³⁷ A'lí Jesusi ku nijéwaga jeaneli: Nijeni wilárami níili mapurigá Ku'wíría-

mi niráa. Nijeni ju mápuni we ichá echi we galabé raká.³⁸ A'lí Jesusi waminabi jeanili: Suwaba echi jaré raká ichirúami niráa níili jena'í wichimóbachí. Echi we galabé raká mapurigá si'néami echi jaré pagótami ju mapu ikí galá nijéwaga olá mapurigá Riosi nulé. A'lí echi basíawi rakala mapurigá echi auché jaré chati oláami pagótami ju.³⁹ A'lí echi sayé mapu ichali echi basíawi, échiko echi riablo ju. A'lí echalí sikiréowachi níima echalí ne jubá rawé. A'lí echi sikiréami, echi jaré Riosi kapitánawala ju.⁴⁰ Echirigá mapurigá echi basíawi bo'nirúami níima, ayénachó mapurigá na'érami níima echo'ná na'írali, echirigá achigórigá níima echalí ne jubá rawé.⁴¹ Nijeni wilárami níili mapurigá Ku'wíríami niráa. A'lí echalí ne jubá rawé Nijeni julama echi jaré Nijé kapitánawala mapurigá aboni chapimea ne si'néami echi jaré wabé chati olíriami, ayénachó echi jaré chati oláami mapu ikí nirú jena'í wichimóbachí mapo'nani Nuláami ju.⁴² A'lí ne si'néami aboni miná ri'lé wabé chati rajáachi na'írali u'lútami níima. Echo'ná aboni ne wabé nalákama, ayénachó aboni ne wabé ki'lákama aboni ramilá, mapujiti aboni ne wabé risúu olárami níima.⁴³ A'lí echi auché jaré galabé oláami pagótami echo'ná ripá riwigáchi muchima mapo'ná aboni Onolá we Nuráami ju. A'lí aboni ne galá ratába-ma mapurigá echi rayénali niráa. ¡Si'néami 'yemi mapu ikítamo nakeko, ne galá namsi!

Echi wabé natéami namuti wenomí mapu chinátarami níili

⁴⁴ Ayénachó mapalí Riosi galá nulé echi pagótami, achigórigá ju mapurigá mapalí bilé wabé natéami namuti wenomí we chinásarami níili echo'ná biléana kawichí. Echalí bilé rijói ma riwisáa echi wabé natéami namuti wenomí, a'lí auchecho ku pólasa, ne bachá wabé kaníliga ralineá suwaba echi jaré binói níwala namuti, mapurigá echirigá wikabé napabusa wenomí, galá ralimea echi kawí mapo'ná chinásarami ju echi wabé natéami namuti wenomí.

Echi wabé natéami perla anilíwami namuti

⁴⁵ Ayénachó mapalí Riosi galá nulé echi pagótami, achigórigá ju mapurigá mapalí bilé rijói we amí echi we galabé natéami perla anilíwami namuti.⁴⁶ Mapujiti mapalí echi rijói ma riwisáa bilé wabé galabé perla, echalí ma ku simigá ralineá suwaba binói níwala namuti, mapurigá echirigá napabusa wikabé wenomí, galá ralimea echi wabé galabé perla anilíwami.

Echi walubé tétami namuti mapuyiri chiní

⁴⁷ Ayénachó mapalí Riosi galá nulé echi pagótami achigórigá ju mapurigá mapalí bilé walubé tétami namuti mapuyiri chiní echo'ná ri'lé walú ba'wíríali achárami ju. Echi jaré rochí sirúami echirigá achasa, wikabé

karúmati namuti rochí rakoma.⁴⁸ Chopi mapalí echi walubé tétami namuti mapuyiri chiní ma galá buchíami níisa echi jaré namuti rochí, echalí echo'ná ba'wíríali suwé ku machí pátami níima. A'lí echo'ná muchika, echi jaré rochí sirúami galá rojuániga, chapigá nutema echi jaré galabé rochí echo'ná jaréana walírali, chopi echi auché jaré wabé sití namuti rochí waminá chake-na u'lútami níima.⁴⁹ A'lí Jesusi ayénachó jeaneli: Echirigá achigórigá níima echalí ne jubá rawé, mapujiti echi jaré Riosi kapitánawala nolínaga, miná rojonama echi jaré chati oláami pagótami, echi auché jaré galabé oláami pagótami ayénachó.⁵⁰ A'lí echi jaré chati oláami pagótami miná ri'lé wabé chati rajáami na'írali u'lútami níima. A'lí echo'ná aboni ne wabé narákama, ayénachó aboni ne wabé na'áwaga ki'lákama aboni ramilá.

Echi jaré bukuriwami galabé namuti, echi jaré chérami galabé namuti yuwa

⁵¹ A'lí Jesusi rukueli jeanigá: ¿Áchatamo galá machili suwaba je'ná jeyili namuti? A'lí aboni ku nijéwaga jeaneli: Ayena, Walubela.⁵² A'lí Jesusi ayénachó jeaneli: Echijiti ibili rijói Riosi nulalila binériami mapu ayénachó ma galá binérami ju mapu churigá Riosi ma galá bukulíwami nulé echi pagótami, échiko mapuyiri bilé rijói kalíwami ju mapu echo'ná binói níwala galabéalachi jonsa ku machí a'wá echi jaré ne bukulíwami namuti, echi auché jaré ocháarami namuti ayénachó.

Jesusi ku nawali echo'ná Nasarétachi

(Mr. 6:1-6; Lk. 4:16-30)

⁵³ A'lí mapalí Jesusi ma sunili suwaba je'ná jerigá ra'icha, a'lí Binói ku simíli echo'ná jonsa.⁵⁴ A'lí ma ku nawasa echo'ná Binói kawíwalachi, Jesusi galá binérami echo'ná piréami pagótami echo'ná aboni níwala ri'obachi. Echijiti si'néami aboni chopi we 'nigá muchili, jeanigá: ¿Churigá galá omero je'ná rijói echirigá ne wabé galá machigá ra'icha, ne suwaba namuti jiti rugá? ¿Churigá je'ná jerigá wabé omériga olá mapurigá ke wesi auché jaré pagótami omero olayá?⁵⁵ A'lí aboni a'nagupi jeaneli: Tamujeta galá machí je'ná rijói. Binói echi tábala sipáami ju, echi María ranala. Ayénachóta galá machí binói ritémawala, echi jaré mapu Jakobo riwéami ju, echi José ayénachó, echi Simoni ayénachó, echi Júراسi asíchiko.⁵⁶ A'lí jena'í tamujé tamí yuwa muchuwi si'néami Binói a'wayela. Tamujeta machí mapu je'ná rijói ketasi walubela ju. ¿Churigá biché galá omero suwaba je'ná jeyiri namuti olayá?⁵⁷ A'lí aboni wabé kichili echi Jesusi. Chopi Binói jeaneli: Si'néami pagótami galá o'wiké bilé rijói Riosi jiti nawésami. Chopi echi auché jaré pagótami echo'ná echi binói Riosi jiti nawésami kawíwalachi piréami siné káachi ketasi o'wikema echi nawésami. A'lí echi jaré

echo'ná binói nawésami kalíłachi piréami nibilé cho o'wikema echi nawésami. ⁵⁸ A'lí echo'ná Jesusi ketasi wabé omériga olali wikabé namuti mapurigá ke wesi auché jaré pagótami omero olayá, mapujiti aboni ketasi galá bichiyami níli.

Echi Juani mapu pagóami níli, ma mi'lırúami níli
(Mr. 6:14-29; Lk. 9:7-9)

14 Echalı rawé echi walula silíami Erorsi riwéami galá námali echi Walubela Jesusi jiti ra'ichálawachi. ² Echijiti echi Erorsi jeaneli echi jaré binói piónawala: ¡Echi rijói echi Juani níima mapu chabénala pagóami níli! ¡Échiko ma mukúami níli, chopi ma ku owínaliré! Echijiti échiko galá omero wabé omériga olayá mapurigá auché jaré pagótami, ke wesi omero olayá.

³ Echi walula Erorsi echirigá anili mapujiti chabénala binói nulali pachá bachánala echi Juani, mapujiti echi Eroríasi riwéami mukí wabé sayérali echi Juani. Echi Eroríasi riwéami mukí echi jilipi riwéami rijói upila níli, echi mapu echi binói Erorsi rijimala níli. Chopi echi Erorsi arigá chapili echi Eroríasi mapurigá binói upila niráa. A'lí echi mukí we sayérali echi Juani, ⁴ mapujiti echi Juani jeaneli echi Erorsi: Tarapé risensia ju mápu-mi echirigá chapimea kemi rijimá upila mapurigá kemi upí niráa. ⁵ Echijiti echi Erorsi we mi'lináali echi Juani, chopi binói we majali echi auché jaré pagótami jiti, mapujiti si'néami pagótami galá bichíili mapu echi Juani walula Riosi jiti nawésami níilo.

⁶ Chopi mapalı echi Erorsi walú omáwali echalı sébachi rawé mapalı binói ranálati, echalı echi Eroríasi riwéami mukí kilá echo'ná pachá nasípasí bakigá, we awili echo'ná bacháami. A'lí echi Erorsi riwisáa wabé kaníili. ⁷ Echijiti echi walula Erorsi ne bichíwaga 'yá-morúli ne suwaba mapu ikí tasa echi tiwé. ⁸ A'lí echi tiwé bachá niráa nulérami níli binói iyela jiti. Echijiti echi tiwé ku nijéwaga jeaneli: Echo'ná biléana bitólachi achagá, we yáati tamí 'ya echi Juani mo'ola, echi Juani mapu pagóami ju mo'ola. ⁹ Echalı echi walula silíami ne wabé majaga o'mónali. Chopi mapujiti binói ma echirigá ne bichíwaga aneli echi tiwé, bacháami echi auché jaré echo'ná mészachi muchúami yuwa, echijiti binói arigá nulali mapurigá echirigá olárami níima mapurigá echi tiwé nakili. ¹⁰ Echalı echi walula silíami júuli bilé sontarsi kotorénala echi Juani, mapu echo'ná pachá kumurachi bachárami níli. ¹¹ A'lí echi Juani mo'ola ku párami níli, echo'ná biléana bitólachi achagá. A'lí 'yárami níli echi tiwé. Echalı echi tiwé 'yali binói iyela. ¹² A'lí echi jaré mapu echi Juani binérali, echo'ná sigá, chapili echi mukúami sapala. A'lí aboni chu'wiróbiya toli. Echalı aboni ku simíbagá ruyeli echi Jesusi suwaba mapurigá ikili.

Jesusi galá kówali malí mil rijói

(Mr. 6:30-44; Lk. 9:10-17; Jn. 6:1-14)

¹³ A'lí mapalı Jesusi je'ná jerigá námali, a'lí Binói ku simili echo'ná suwé jonsa, biléana bárkochi asagá. Echalı Jesusi waminá bo'ónala biléana waná suwé simináli. Chopi mapalı echi wikabé pagótami ne suníami echo'ná o'wéalachi piréami echirigá galá námali mapurigá Jesusi echirigá ku simili, echalı aboni wichí jaga najátaga, mikabé suwé simánali. A'lí echirigá ologá aboni bachá sili echo'ná bo'ónala suwé mapo'ná Jesusi nawama riwéali. ¹⁴ A'lí mapalı Jesusi sébali echo'ná bo'ónala suwé, a'lí mapalı Binói ku machínali echo'ná bárkochi jonsa, echalı Binói riwali mapu echi wikabé pagótami ma echo'ná napawiga muchili. A'lí Jesusi ne wabé natimali echi pagótami. Echalı Binói ku sa'wali ne si'néami mapu ikí nayúkami níli.

¹⁵ A'lí echalı rawé mapalı ma alíwachi níli, echi jaré mapu Jesusi binérali, echo'ná Binói yuwa sigá jeaneli: Jena'í wabé waná kawichí ju. Ayénachó ma aliwa. Ma ku ripori echi wikabé pagótami mapurigá aboni ku simama echo'ná jaléana mulubé rijówachi, ko'wáami raliboya, mapujiti aboni tarapé niwa mapu ko'mea. ¹⁶ Chopi Jesusi jeaneli: Ketasi arigá 'wérali ju mapu aboni ku simama. ¡'Yemi aboni 'yasi mapurigá aboni ko'mea! ¹⁷ A'lí aboni jeaneli: Tarapeta niwa ko'wáami jena'i tamuje. Chopi malí pani nirú, okuá kúuchi rochí ayénachó. ¹⁸ A'lí Jesusi jeaneli: ¡Wakiná tosí! ¹⁹ A'lí Binói nureli echo'ná kasalátali muchínala echi wikabé pagótami. Echalı Binói chapigá echi malí pani, echi okuá rochí ayénachó, a'lí ripá 'néniga, natétara 'yali Riosi. A'lí Jesusi rojuániga 'yali echi pani, echi jaré mapu Binói binérali. A'lí aboni galá nachúntali echi wikabé pagótami. ²⁰ A'lí si'néami echi wikabé pagótami ma kosá, ne galá posali. A'lí ma sunisa ko'yá, aboni ku napabuli echi kúuchi ko'wáami tibíami. A'lí aboni echirigá buchíwali makói miná okuá walírali. ²¹ A'lí echi jaré wikabé mapu galá ko'wali, malí mili rijói níli, ke taraka echi jaré wikabé muguí, echi jaré kúuchi ketásichó yuwa tarali.

Jesusi wirigá iyénali echo'ná moba walubé ba'wírali

(Mr. 6:45-52; Jn. 6:16-21)

²² Echalı Jesusi we yáati mo'wínala júuli echo'ná bárkochi echi jaré mapu Binói binérali. A'lí Binói bachá júuli si'néami aboni echo'ná bo'ónala walú ba'wírali suwé simánala, mapuyénasi Binói ku ripórali echi wikabé pagótami. ²³ A'lí Jesusi ma ripórasa echi wikabé pagótami, waminá waná ripá rabo simili, Riosi yuwa ra'ichámiya. A'lí echalı alí chónachi Jesusi echo'ná waná ripá rabó we bi'neli asali. ²⁴ A'lí echi barko ma echo'ná nasípasí walú ba'wírali inárali. Chopi echi barko wabé chati rakibúrami níli, mapujiti echi wabé

iwéami iká ku kuwana rakibuli, ayénachó echi walú ba'wí we chati apulali. ²⁵ Chopi echalí bi'yá chónachi, Jesusi Binói echo'ná walú ba'wichí moba wiligá iyénaga nawali echo'ná nasípasí mapo'ná aboni echirigá sírali, echo'ná bárkochi 'yénaga. ²⁶ A'lí mapalí aboni echirigá riwali echi Jesusi echo'ná ba'wichí moba wiligá in-árachi, a'lí aboni ne wabé majajali, jeanigá: ¡Bilé chu'wí ju! A'lí aboni ne wabé majaga sinákali. ²⁷ Chopi Jesusi we yáati ra'íchali jeanigá: ¡Ketasi majasi! Nijeni ju. ¡Tarapé namuti chibi ikimea! ²⁸ A'lí echi Pegro ku nijéwaga jeaneli: ¡Walubela, a Mujé Binói níisagá, tamí julá mápuni echo'ná mi yuwa simea, ba'wichí moba wirigá ináraga! ²⁹ A'lí Jesusi jeaneli: ¡Wakiná simí! A'lí echi Pegro rikínaga echo'ná bárkochi jonsa, ayénachó echo'ná ba'wichí moba wiligá inárali, echo'ná Jesusi yuwa simiyá. ³⁰ Chopi ke sayiná galá 'néniga mapurigá wabé iwéami ikali echo'ná walú ba'wírali, echalí echi Pegro ne wabé majali. A'lí we yáa chótali botuwísiya. Chopi ne o'weli sinali jeanigá: ¡Walubela, tamí ku'wiri! ³¹ Echali Jesusi galá wachínaga Binói sikala, we yáati chapili echi Pegro. A'lí jeaneli: Mujé rijói péebi bichíyami ¿churékula ketasi tamí bichíili? ³² A'lí mapalí okuánika ku mo'wili echo'ná pachá bárkochi, echalí ke sayiná ariweli ikayá. ³³ A'lí si'néami mapu ikí muchili echo'ná bárkochi, echo'ná Jesusi yuwa sigá, wéemi raweka chokoba jábali, jeanigá: ¡Ne bichíwali Mujemi bi'nélipi Riosi Ranala ju!

Jesusi ku sa'wari echi jaré nayúkami echo'ná Jenesarétachi muchúami
(Mr. 6:53-56)

³⁴ A'lí waminá bo'ónala sigá, echo'ná Jenesarétachi anilíwachi kawírali sili. ³⁵ A'lí mapalí echo'ná piréami galá machili mapu echi Jesusi níilo, echalí aboni echo'ná ne suníami noligá jonsa júuli pánala echo'ná Binói yuwa, ne si'néami mapu ikí nayúkami níili. ³⁶ A'lí aboni risensia tánali mapurigá echi jaré nayúkami chopi nochama echo'ná Jesusi napáchala suwilá. A'lí si'néami mapu ikí nocháliko, galá ku sa'wárami níili.

Echi pagótami chati surérama mapujiti aboni chati 'nata
(Mr. 7:1-23)

15 A'lí jaré rijói nulalíwami binériami mulubéanali Jesusi yuwa, jaré rijói Bariseo anilíwami binériami ayénachó mapu echo'ná Jerusalémachi jonsa simíbami níili. A'lí aboni jeanigá rukueli: ² ¿Churékula echi jaré mapu Mujé binérali ketasi nijéwaga olá mapurigá echi jaré chabé ki'yá piréami o'wéala sinibí olali? Aboni ketasi bachá si'winárigá panígasa, arigá we ko'wá. ³ Chopi Jesusi jeaneli: 'Yémitamo ayénachó ketasi nijéwaga olá mapurigá Riosi nulali, chópitamó sinibí waminabi olá mapurigá echi auché jaré 'yemi

pagótamawala sinibí olali. ⁴ Mapujiti Riosi je'ná jerigá nulali: Galá o'wiké kemi onó, echi kemi iyé ayénachó. Echi mapu wabé yóniga aneko kepu onó, echi kepu iyé omá, échiko waminá mi'lirúami níima. ⁵ Chopi 'yémitamo jeaní: Mapuyíripi jeanésegá echi binói onolá, echi binói iyela keremá, jeanigá: Mani 'yali Riosi ne suwaba nijé níwala namuti mapujiti nijé nimí ku'wírimi, echijítini ma ketasi omero waminabi mi ku'wíriya. ⁶ Echalítamo ayénachó jeaní mapu ma ketasi arigá 'wérali ju mapurigá échiko waminabi ku'wírama kepu onó, kepu iyé omá. A'lí 'yémitamo echirigá ologá tarapé galabé nirali Riosi nulalila. Chópitamó nijéwaga olá mapurigá echi auché jaré 'yemi pagótamawala sinibí olali. ⁷ ¡'Yémitamo wabé 'yékami ju! Echi walula Isaíasi ne bichíwaga nawésali 'yemi jiti rugá, máputamo wabé 'yékaka oláami ju, mapalí binói bachá niráa je'ná jerigá osali:

⁸ Je'ná pagótami chumuchí chopi ra'íchaga aní mapu aboni wabé tamí o'wiké.

Chopi aboni arigá ketasi ne sulachí niráa, bichíwaga tamí galé.

⁹ A'lí aboni ketasi bichíwali niráa tamí o'wiké, aboni chopi nawesa mapurigá echi jaré pagótami nulá nawísánala.

A'lí aboni wepi 'yékaka aní mapu Riosi achigórigá nulá.

¹⁰ A'lí Jesusi bayegá echi wikabé pagótami, a'lí jeaneli: Galá námiga machisí je'ná jeyiri: ¹¹ Echi pagótami ketasi chirigá chati sulélama chopi mapujiti aboni we ko'wá echi ko'wáami mapu ketasi risensia ju mapu aboni ko'mea. Chopi echi pagótami ne bichíwali we chati sulélama mapujiti aboni wabé chati 'nátaga echo'ná aboni sulálachi, ayénachó wabé chati ra'icha.

¹² A'lí echi jaré mapu Jesusi binérali, echo'ná Binói yuwa sigá, jeaneli: ¿Kéchami machí mapu echi jaré o'wéala Bariseo ne wabé na'áwali mapujítimi echirigá ra'íchali? ¹³ Chopi Jesusi ku nijéwaga jeaneli: Ne suwaba echi jaré ichi mapu keni Onó, echo'ná ripá riwigachi atíami ketasi ichali, échiko ku bo'nirúami níima. ¹⁴ Ayénachó Jesusi jeaneli: Ariwesi echi jaré Bariseo anilíwami o'wéala binériami. Aboni chopi mapurigá jaré ke machíliami ju mapu we bayera auché jaré ke machíliami. A'lí a bilé ke machíliami rijói miná bayérasagá auché bilé ke machíliami, okuánika echo'ná biléana jochi rujuímí. ¹⁵ A'lí echi Pegro ku nijéwaga jeaneli: Tamujé tamí ku ruyé: ¿Chu aniwáami ju mapurigami irétali? ¹⁶ A'lí Jesusi jeanigá rukueli: ¿Kéchatamo cho galá machí mapu churigá aniwáami ju mapurigá Nijeni irétaga binera echi pagótami? ¹⁷ ¿Kéchatamo cho machí mapu suwaba echi ko'wáami mapu ikí bilé rijói ko'wako, échiko echo'ná echi rijói ropáráchi chopi simigá, a'lí echo'ná jonsa simíraga ku machínama? ¹⁸ Chopi echi pagótami we chati ra'icha achigórigá mapurigá aboni chati suléami ju, echijiti aboni waminabi

chati suléami niwárami ju. ¹⁹ Echi jaré pagótami wabé chati 'nata mapujiti aboni we chati suléami ju. Auché jaré echijiti wabé nakówaka ko'yáami ju. Auché jaré mapu ma niwíami ju echijiti arigá kochí auché jaré isena yuwa. Auché jaré mapu ke cho niwíami ju echijiti ayénachó chati ologá wiká yuwa kochí. Auché jaré echijiti we chigórami ju. Auché jaré echijiti ikaleka ra'icha. Auché jaré echijiti wabé sayéraga ra'icha Riosi. ²⁰ Mapalí echi pagótami we chati olá, echalí aboni wabé chati sulélama. A'lí aboni ketasi chati sulélama chopi mapujiti aboni arigá ko'wá echi ko'wáami, mapalí aboni ketasi cho wisabé si'winárigá panígali.

Bilé mukí mapu si'nú ra'íchami níili arigá bichíili Jesusi
(Mr. 7:24-30)

²¹ A'lí Jesusi ma ku simigá echo'ná jonsa, echo'ná biléana kawichí simili mapo'ná mulubé níili Tírochi anilíwachi walúlachi, Sirónachi anilíwachi ayénachó. ²² A'lí bilé mukí si'nú ra'íchami, echo'ná Kananéachi anilíwachi kawírali bitéami, echo'ná Jesusi yuwa nawagá, o'weli ra'íchaga jeaneli: ¡Mujé Walubela Rabiri Ranala, tamí natimá! Nijé kilá ne wabé risúu olálami ju, mapujiti we niwa bilé wabé chati riablo aliwala! ²³ Chopi Jesusi ketásirapé ku nijéwali. A'lí echi jaré Binói yuwa binéami, sigá jeaneli: ¡Ku julá echi mukí mapujiti binói chopi wabé sinaka najata tamujé tamí yuwa! ²⁴ A'lí Jesusi ku nijéwaga jeaneli: Nijeni chopi julárami níili echi jaré Juríosi pagótami ku'wírимиya, si'néami mapu ikí aboni 'wikáami ju mapurigá bo'wá niráa. ²⁵ A'lí echi mukí echo'ná nawagá, bacháami Jesusi yuwa wéemi raweka, chokoba wilíwali, jeanigá: ¡Walubela, tamí ku'wiro! ²⁶ A'lí Jesusi ku nijéwaga jeaneli: Echi jaré Juríosi pagótami 'yemi mi ané kochí niráa, mapujítitamo isena pagótami ju. Echijiti ariwé mapu echi auché jaré mapu Riosi kúchuwala anérami ju, ne bachá ko'mea. Ketasi galá níima chapiwawa echi jaré Riosi kúchuwala níwala ko'wáami, waminá kochí kóoluwa! ²⁷ A'lí echi mukí jeaneli: ¡Ayena, Walubela! Chopi echi jaré kochí arigá ko'wá echi kúuchi ko'wáami chi'wáami mapu we rujuini echo'ná wi'yérali mapalí echi jaré kochí puguéami ko'yá muchuwi. ¡Echijiti arigá tamí ku'wiro, pe táa niráa! ²⁸ A'lí Jesusi ku nijéwaga jeaneli: ¡Mukí, ne galami bichíi! ¡Galá mi olárami nílaga mapurigami nakí! A'lí echi mukí kilá we yáati galá ku sa'wárami níili echalí jonsa.

Jesusi ku sa'wali wikabé nayúkami

²⁹ A'lí Jesusi ku simigá echo'ná jonsa, ma nawali echo'ná auché biléana mapo'ná mulubé níili walubé ba'wírali Galiléachi anilíwachi. A'lí echo'ná suwé jonsa ku simigá, echo'ná ripá biléana rabó 'moka, echo'ná asíbali. ³⁰ A'lí echo'ná Jesusi yuwa sili ne wikabé pagótami. A'lí aboni así pali wikabé mapu ke akáanami níili,

auché jaré mapu ke 'machíliami níili ayénachó, auché jaré mapu ke ra'íchami níili ayénachó, auché jaré sikamochi ayénachó, auché jaré mapuyíripi nayulí jiti nayúkami níili asíchiko. Ne si'néami echo'ná Jesusi yuwa pálati. A'lí Binói galá ku sa'wali si'néami aboni. ³¹ Echijiti echi auché jaré pagótami chopi wabé 'nigá muchili mapalí aboni riwali mapu echi jaré ke ra'íchami ma galá ra'íchali, ayénachó mapu echi jaré sikamochi galá ku akáanami níili, ayénachó mapu echi jaré ke 'machíliami galá ku 'nénali. A'lí echi pagótami waminabi walubélaga aneli echi Walubela Riosi, echi Isaeli pagótami Riósawala.

Jesusi galá kówali naó mili rijói
(Mr. 8:1-10)

³² A'lí Jesusi bayegá echi jaré mapu Binói binérali, a'lí jeaneli: Wabeni natimá je'ná wikabé pagótami mapujiti ma bikiyá chi'leli mapalí jonsa aboni tamí yuwa muchuwi. A'lí aboni ma ketasi niwa mapu ko'mea. A'lí bicheni ketasi nakí mapuni ku julama echirigá ke cho kosáagá aboni, mapujiti jaré ketasi omérama simiba echo'ná buwichí, mapujiti aboni we mikabé jonsa simíbali. ³³ A'lí echi jaré mapu Jesusi binérali jeaneli: ¿Churigata galá kóobo je'ná wikabé pagótami jena'í mikabé kawichí, mapurigá aboni galá posama? ³⁴ A'lí Jesusi jeanigá rukueli: ¿Chu kipu ko'wáami níwatamo? A'lí aboni jeaneli: Chópita niwa kichao kúuchi pani, pe okuáa kúuchi rochí ayénachó. ³⁵ A'lí Jesusi nuleli muchí-nala echi wikabé pagótami echo'ná wi'yérali. ³⁶ A'lí Binói chapigá echi kichao pani, echi jaré rochí ayénachó, a'lí natétara 'yali Riosi. A'lí rojuániga 'yali echi jaré mapu Binói binérali. A'lí aboni nachútali echi wikabé pagótami. ³⁷ A'lí si'néami echi wikabé pagótami ma kosá, ne galá posali. A'lí aboni ku napabuli kichao walírali buchíami echi kúuchi chi'wáami ko'wáami tibíami. ³⁸ A'lí echi jaré wikabé pagótami mapu ko'wali, naó mili rijói níili. A'lí ketasi tarárami níili echi jaré wikabé muguí, echi jaré wikabé kúuchi ke cho.

³⁹ A'lí mapalí Jesusi ma ku ripórali echi pagótami, echalí Binói ku bakili echo'ná bárkochi. A'lí echo'ná pachá bárkochi asagá ku nawali echo'ná Makatárachi anilíwachi kawírali.

Jaré rijói tánali mapurigá Jesusi we yáati wabé omériga olama mapurigá aboni riwimea echirigá oláachi
(Mr. 8:11-13; Lk. 12:54-56)

16 A'lí echi jaré Bariseo anilíwami binériami sili echo'ná Jesusi yuwa, echi auché jaré Saruseo anilíwami ayénachó. A'lí aboni ketasi bichíili mapu Jesusi ne bichíwali ne wabé omériga olali mapurigá Riosi chopi omero olayá. Echijiti aboni tánali mapurigá Jesusi we yáati echirigá wabé omériga olama sinepi niráa, mapurigá aboni galá riwiméa echirigá oláachi.

² Chopi Binói ku nijéwaga jeaneli: Sinibí alíwachi mapalí we sitana echi nolí, echalí 'yémitamo jeaní: Ba'alí we galá rawéwamaré. ³ Chopi ba'alínala bi'yá 'yémitamo jeaní: Jipi rawé walú ukuméaré mapujiti we sitana echi nolí, ayénachó mapujiti we nolé. ¡'Yémitamo ne wabé 'yékami ju! Sinibí rawé 'yémitamo galá machí churigá ikimea echalí rawé mapalítamo galá ritiwá echi nolí. Chópitamo ketasi machí churigá ikimea waminánomí rawé. Chopi bachá niráa osirúami níili echo'ná Riosi Ra'íchala oselíwalachi mapurigá ikimea riwéali waminánomí rawé. Ayénachó 'yémitamo ma ritiwá mapurigá ma chótali echirigá ikiyá mapurigá bachá niráa osirúami níili mapurigá ikimea riwéali. ⁴ Ayénachó Jesusi jeaneli: Jipi piréami wabé chati oláami pagótami ketasi galá bichíyami ju. Aboni chopi nakí 'nénala mapalí Nijeni wabé simírami omériga olá mapurigá ke wesi auché jaré pagótami omero olayá. Chopi Nijeni ketásirapé namuti echirigá wabé simírami omériga olama chopi mapurigá aboni tamí 'nema echirigá oláachi. A'lí aboni arigá riwimea mapalí Riosi wabé simírami omériga olama tamí yuwa mapurigá Binói olali echi ki'yá bitéami Jonasi riwéami rijói yuwa, mapu Riosi jiti nawésami níili. A'lí Jesusi ma ariwesa aboni, a'lí ku simili.

Echi levadura anilíwami

(Mr. 8:14-21)

⁵ A'lí aboni sili echo'ná bo'ónala auché biléana walú ba'wírali suwé, chopi mapalí ma sébali, echalí aboni mayeli mapu ke newaleli jaré pani toyá. (Alí echi pani echi levadura anilíwami jiti niwaliwa.) ⁶ A'lí Jesusi jeaneli: ¡Ne galá 'nesi! A aboni niráa galá tibusi mapurigátamo waminá ariwebo echi jaré Bariseo níwala levadura anilíwami, echi auché jaré Saruseo níwala ayénachó. ⁷ A'lí aboni je'ná jerigá 'nátali: Binói echirigá aní mapujítita ketasi toli echi jaré pani, mapujiti echi jaré pani echi levadura achigá niwalíwa. ⁸ Echalí Jesusi galá machigá je'ná jerigá 'nátachi aboni, echijiti jeaneli: 'Yemi rijói péebi bichíyami ju. 'Yémitamo wabé níлага 'nata chopi mapujítitamo ketasi bilé pali echi jaré pani. ⁹ ¿Kéchatamo cho machí mapurigá Nijeni wabé omériga olá? ¿Kéchatamo newalá mapurigá Nijeni olali mapalini nachútali echi malí kúuchi pani, echi malí mili rijói koya? ¿Nirapéchatamo newalá chu kipu walírali buchíami 'yémitamo ku napabuli echi kúuchi pani chi'wáami tibíami? ¹⁰ ¿Kéchatamo newalá mapurigani olali maparítamo nachútali echi kichao kúuchi pani echi naó mili rijói koya? ¿Nirapéchatamo newalá chu kipu walírali buchíami 'yémitamo ku napabuli echi kúuchi pani chi'wáami tibíami? ¹¹ ¿Churékulátamo ketasi machili mapu Nijeni ketasi ra'íchali echi jaré pani jiti rugá, mapalini jeaneli mapu 'yemi aboni galá tibusi mapurigátamo miná ariwebo echi jaré Bariseo níwala levadura, echi jaré Saruseo níwala ayénachó? ¹² Echalí

aboni galá machili mapu Jesusi ketasi ra'íchali echi jaré pani jiti rugá, mapalí Binói jeaneli mapu aboni ariwema echi jaré Bariseo níwala levadura, chopi mapurigá aboni ketasi bichíima mapurigá echi jaré Bariseo binérali, nirapé mapurigá echi jaré Saruseo binérali.

Echi Pegro galá nawesa

(Mr. 8:27-30; Lk. 9:18-21)

¹³ A'lí mapalí Jesusi nawali echo'ná kawichí mapo'ná mulipi ju echo'ná walúlachi Sesaréachi anilíwachi, echi Jilipi níwala, echalí Jesusi jeaneli echi jaré mapu Binói binérali: Nijeni wilárami níili mapurigá Ku'wíríami niráa, chopi ¿churigá aní echi auché jaré pagótami? Aboni, ¿chigá tamí mayé? ¹⁴ A'lí aboni jeaneli: Jaré aboni mayé mapu Mujemi echi Juani ju, echi mapu chabé pagoli echi pagótami. Auché jaré mayé mápumi echi Elíasi ju. Auché jaré mayé mápumi echi Jeramíasi ju, auché bilé ki'yá bitéami Riosi jiti nawésami rijói keremá, mápumi ki'yá bitéali jena'í wichimóbachi, chopi mápumi ma ku owínali. ¹⁵ A'lí Jesusi jeanigá rukueli: 'Yemi, ¿chigátamo tamí mayé? ¹⁶ A'lí echi Simoni Pegro jeaneli: ¡Mujé ju echi Cristo anilíwami! Riosi mi wilali mapurigá Walubela Nigúurami niráa. ¡Mujé ju echi sinibí bitéami Riosi Ranala! ¹⁷ A'lí Jesusi ku nijéwaga jeaneli: Ne wabé kanílatami jumi mujé Simoni, mápumi echi Jonasi ranala ju, mapujiti ke wesi rijói mi echirigá machírali, chopi Nijé Onolá, ripá riwigáchi atíami, mi echirigá machírali. ¹⁸ Ayénachó Nijé nimí ané mapu mujemi Pegro riwé, echi mapu je'ná jerigá aniwáami ju: Bilé rité. A'lí je'ná jerigá mapurigá mujemi anili, ne bichíwali ju. Ayénachó je'ná mapurigá mujemi anili, mapurigá biléana rapichí ju mapo'ná ketasi chirigá nokomea. Ayénachó achigórigá mapurigá wabé jiwérami ju bilé kalí mapu kalilárami ju echo'ná moba biléana rapichí, echirigá ayénachó si'néami echi jaré napawika bichíyami mapu ikí bichíiko mapu Nijeni bilepi Riosi Ranala ju, abóni galabé jiwériga napawika bichíyami ju. A'lí echi mukuwáwami ketasi omelo, echiyiri bichíyami sayériya. Chopi aboni sinibí niráa galá tibútarami níima, mapujiti aboni sinibí piréami níima tamí yuwa. ¹⁹ A'lí Nijé nimí 'yama mapurigami binérama echi pagótami, mapurigá aboni galá machimea mapurigá Riosi nulé aboni. A'lí ne si'néami mapu ikí ketasi bichíima mapurigami binérama aboni jena'í wichimóbachi, abóniko ketasi ku'wíratami níima echo'ná ripa riwigachi, chopi si'néami mapu ikí galá bichíima, abóni galá ku'wíratami níima echo'ná ripá riwigachi. ²⁰ A'lí Binói nuleli echi jaré mapu Binói binérali mapurigá aboni ke wesi ruyema mapu Binói Jesusi, echi Cristo anilíwami níili.

Jesusi bachá niráa nawesa mapurigá Binói mi'lirúami níima riwéali

(Mr. 8:31-9:1; Lk. 9:22-27)

²¹ Echali jonsa Jesusi chótali ruyee echi jaré mapu Binói binériali mapurigá arigá 'wérali níili mapu Binói simea echo'ná Jerusalémachi, mapurigá Binói echo'ná wabé risúu olárami níima echi jaré o'wéala ochérami jiti, ayénachó echi auché jaré o'wéala sacerdote jiti, ayénachó echi auché jaré nulaliwami binériami jiti, ayénachó mapurigá Binói Jesusi waminá mi'lirúami níima, chopi mapurigá Binói auchecho siné ku owínama riwéali ma bikiyá chi'rigá. ²² A'lí echi Pegro waná togá, chótali jeaniyá: ¡Walubela, Riosi mi galá ku'wírama, ketasi arigá 'wérali ju mápumi echirigá olárami níima!

²³ A'lí Jesusi ku kuwana 'néniga jeaneli echi Pegro: ¡Miná waná simigá! Mujé tamí we kumé mapujítimi chopi ra'icha mapurigá echi Satanasi riwéami riablo niráa. Mujé ketasi 'nata mapurigá Riosi 'nata, chópimi 'nata mapurigá echi auché jaré pagótami 'nata.

²⁴ A'lí Jesusi jeaneli echi jaré mapu Binói binériali: A jaré 'yemi nakisáagá olánala mapurigá Nijeni nakí máputamo olabo, ketasi waminabi olasi mapurigá 'yemi aboni chopi nakí olánala. Chopi sinibí rawé nijéwaga olasi mapurigá Nijé 'yemi nimí nulema, ayénachó arigá anachasi maparítamo risúu olárami níibo, achigórigá mapurigá Nijeni anachama mapalini risúu olárami níima. ²⁵ Mapujiti mapuyíripi chopi nakisáagá mapu binói wabé kanílagá bitélama jena'í wichimóbachí, échiko tarapé biyíri olásagá chopi miná mukumea. A'lí mapuyíripi chopi nakisáagá olánala mapurigá Nijeni nakí mapu binói olama, échiko ne sinibí niráa bitélama. ²⁶ A'lí Jesusi ayénachó jeaneli: A bilé rijói ne suwaba mésagá jena'í wichimóbachí nirúami namuti, a'lí arigá miná mukusá, je'ná echiyiri rijói tarapé chirigá ku'wíratami níima suwaba echi jaré wikabé namuti jiti. Mapujiti ma mukúami níisa, binói ketasi omérama we yáati auchecho ku bitéliya jena'í wichimóbachí. Nibilé wesi omérama echirigá ku bitéliya, a ne suwaba jena'í wichimóbachí nirúami wenomí jiti natétiga. ²⁷ A'lí Jesusi waminabi jeaneli: Nijeni wilárami níili mapurigá Ku'wíriami niráa. A'lí minánomí Nijeni ku nawama jena'í wichimóbachí ne wabé Walubela niráa, mapurigá Nijé Onolá ne Walubela ju. Ayénachó echalini ku nolínama echi jaré wikabé Riosi kapitánawala yuwa. A'lí bicheni ku kuwana natétama ibili rijói achigórigá mapurigá binói olali. ²⁸ Ne bichíwali 'yemi nimí ané mapu jaré 'yemi jena'í muchúami ketásitamo cho suwiboa, átamo ketasi cho tamí riwisáa mapalini ne wabé Walubélatami níima. Nijeni wilárami níili mapurigá Ku'wíriami niráa.

Jesusi si'nú nakulíwarami níili

(Mr. 9:2-13; Lk. 9:28-36)

17 A'lí wakinánokuá usani rawé, Jesusi chapili echi Pegro, echi Jakobo ayénachó, echi Juani, echi Jakobo rijimala ayénachó. A'lí echo'ná waná bayériali, biléana ripabé rabó. ² A'lí aboni riwáli mapurigá Jesusi akala si'nú nakulíwarami níili, we galabé rajáami niráa mapurigá echi rayénali. Ayénachó Binói napáchala ne wabé simírami rosákami niwáratí, ne wabé ratábami niráa. ³ A'lí ke sayiná echo'ná aboni yuwa jábali echi walula Moisesi, echi walula Elíasi ayénachó, echi mapu chabé ki'yá piréali jena'í wichimóbachí, chopi aboni ma ku sigá, ra'íchali echi Jesusi yuwa. ⁴ A'lí echi Pegro jeaneli echi Jesusi: ¡Walubela, ne galá níima máputa jena'í tibibo! Ami nakisáagá, bikiyá kalí látami niwabo jena'í. Echi bilé Mujé níwala níima. Auché bilé echi Moisesi níwala níima. Auché bilé echi Elíasi níwala níima. ⁵ A'lí abijí ra'íchachi echi Pegro, echo'ná ne wabé ratábami bimoli mapuyénasí aboni ma ketasi machíili. Echali ke sayiná Riosi Binói we ra'íchali echo'ná bimolírali jonsa. A'lí jeanili: ¡Je'ná Jesusi Nijé Ranala ju, mapu Nijeni ne wabé galé! ¡Nijeni ne wabé ganili echi Binói jiti! ¡Galá namsi mapurigá Binói 'yemi mi nawesa! ⁶ A'lí echi jaré bikiyá Jesusi yuwa binéami je'ná jerigá namsa, ne wabé majaga, akaná uchúpali. ⁷ A'lí Jesusi murubéanaga echo'ná aboni yuwa, chapigá jeaneli: ¡Ku jásiasi! ¡Ketásirapé majasi! ⁸ A'lí aboni auchécho galá ku 'néniga, ke wesi riwáli, chopi bi'neli Jesusi.

⁹ A'lí mapalí aboni ku tiguínali echo'ná ripá rabó jonsa, Jesusi jeaneli: Nijeni wilárami níili mapurigá Ku'wíriami niráa. Ke wesi ku ruyesi mapurigátamo riwáli echo'ná ripá rabó, mapuyénasí Nijeni auchécho ku owínama mapalí Nijeni ma mukúami níisa. ¹⁰ A'lí echi jaré Binói yuwa binéami jeanigá rukueli: ¿Churékula echi jaré nularíwami binériami aní mapu arigá 'wérali ju mapu echi walula Elíasi bachá ku nolínama? ¹¹ A'lí Jesusi ku nijéwaga jeaneli: Ne bichíwali echi Elíasi bachá ku nolínaga, ne galabé ku niwama suwaba namuti. ¹² Chopi Nijeni 'yemi mi ané mapu bilé rijói mapuyiri echi Elíasi ma nawali. A'lí echi jaré pagótami ketasi machili echi rijói, chopi aboni wabé risúu olali echi binói, suwaba mapu ikí aboni nakili olánala. A'lí aboni ayénachó tamí echirigá risúu olama. Nijeni wilárami níili mapurigá Ku'wíriami niráa. ¹³ A'lí echi jaré mapu Jesusi binériali galá machili mapu Binói ra'íchali echi Juani jiti rugá, echi mapu pagóami níili.

Jesusi ku sa'wari bilé towí mapu we mukúsawami níili

(Mr. 9:14-29; Lk. 9:37-43)

¹⁴ A'lí mapalí aboni auchecho ku síli echo'ná mapo'ná echi wikabé pagótami muchili, echali bilé rijói mulubéanali echo'ná Jesusi yuwa. A'lí echo'ná bacháami

wéemi raweka chokoba wiligá ¹⁵ jeaneli: ¡Walubela, galá natimá echi nijé ranala, mapujiti binói we mukúsuwami ju! Echijiti binói wabé chati risúu olárami ju. A'lí binói wisabé wichí echo'ná na'írali, echo'ná ba'wírali ayénachó. ¹⁶ A'lí ma pálini echo'ná echi jaré yuwa mapu Mujemi binérali, chopi aboni ketasi omérali ku sa'wayá. ¹⁷ Echálí Jesusi jeaneli echi jaré mapu Binói binérali: ¡'Yémitamo ketasi 'me galá bichiyami ju! Ma wi'libé niráa Nijé 'yemi nimí yuwa asali chópitamom abijí ketasi cho galá tamí bichíili. ¡Chabé jonsa 'yémitamo ketasi galá nijéwaga olá mapurigá Nijé 'yemi nimí nuleli! ¡Wakiná tosí echi towí! ¹⁸ A'lí Jesusi we yóniga ra'íchali echi wabé chati riablo aliwala mapu echo'ná pachana towírali asali. Echálí echi wabé chati aliwá we yáati ku machínali echo'ná pachana towírali jonsa. A'lí echi towí ma ne galá ku sa'wárami níili echálí jonsa.

¹⁹ A'lí echi jaré mapu Jesusi binérali echo'ná sili Binói yuwa. A'lí pe waná togá, aboni jeanigá rukueli: ¿Churékula tamujé ketasi omérali ku machí paya echi wabé chati riablo aliwala? ²⁰ A'lí Jesusi jeaneli: 'Yémitamo ketasi omérali mapujítitamo ketasi 'me galá bichíi. A'lí ne bichíwali 'yemi nimí ané mapu átamo pe taa mapu chulú echi taa mostasa anilíwami rakala niráa bichíisagá, a'lí átamo jeansa je'ná ripabé chulichí: ¡Echo'ná waná simigá jena'í jonsa! Echálí ne bichíwali galá simírama. A'lí bichétamo ne bichíwali echirigá galá oméramo ne suwaba namuti olayá. ²¹ A'lí Jesusi ayénachó jeanili: Je'ná jeyiri chati riablo aliwala chopi ku machínama mapalítamo we tánabo Riosi, ayénachó mapalítamo wi'libé niráa ketasi kopoa ko'wáami, mapurigátamo chopi echirigá Riosi yuwa tániga ra'ichabo.

Jesusi auchecho siné bachá niráa nawesa jeanigá mapurigá Binói mi'lirúami níima riwéali

(Mr. 9:30-32; Lk. 9:43-45)

²² A'lí pe minana auchécho ku muchúwachi aboni echo'ná Galiléachi anilíwachi kawírali, echálí Jesusi jeaneli: Nijeni wirárami níili mapurigá Ku'wíriami niráa, chopi Nijeni arigá we nijírami níima mapurigá echi jaré pagótami tamí risúu olama suwaba mapu ikí aboni nakí olánala. ²³ A'lí aboni tamí mi'limea, chopi baikiyá chí'ligá auchécho ku owínamani. A'lí echi jaré mapu Jesusi binérali ne wabé simírami o'mónali.

Echi wenomí pachá echi rochí rinírachi atíami

²⁴ A'lí mapalí aboni ku síli echo'ná Kapernaúmachi anilíwachi walúlachi, echálí jaré rijói nipáami echi Pegro yuwa sili, a'lí jeaneli: Echi 'yemi binérami, ¿kecha natétama echi okuá namúti wenomí mapu echi walubé Juríosi ri'obáwala natétarawami ju? ²⁵ A'lí echi Pegro jeaneli: Ayena ne bichíwali natétama. A'lí biché

mapalí echi Pegro auchecho ku bakili echo'ná kalírali, echálí Jesusi bachá ra'íchaga jeaneli: Simoni, ¿churigami mayé mujé? Echi jaré o'wéala jena'í wichimóbachi nuláami, ¿chigá nipama aboni? ¿Acha nipama echi jaré aboni tanala? ¿Kecha nipama echi auché jaré isena keremá? ²⁶ A'lí biché echi Pegro ku nijéwaga jeaneli: Aboni chopi nipama echi auché jaré isena. A'lí Jesusi jeaneli: ¡Alí echi jaré aboni kúchuwala ketasi natétama! ²⁷ Chopi mapurigá aboni ketasi tamujé tamí yónama, simigá mujé echo'ná walú ba'wírali mapurigami echo'ná achama bilé binolí, echálí chapigá echi rochí mápumi bachá chiwama, a'lí rinátaga riwiméami bilé namuti wenomí mapu echijiti káraga natétarami níima. Chapigá natétami aboni, Nijé jiti, ayénachó mujé binói jiti.

¿Chigá ne walula níima?

(Mr. 9:33-37; Lk. 9:46-48)

18 Echálí rawé echo'ná sili jaré mapu Jesusi binérali. A'lí aboni jeanigá rukueli: ¿Chigá ne walula níima, echi jaré yuwa mapu Riosi galá nulé? ² A'lí Jesusi bayegá bilé ta towí, echo'ná nasipa aboni yuwa achali. ³ A'lí Jesusi jeaneli: Ne bichíwali 'yemi nimí ané: Átamo ketasi ku rowísaga Riosi yuwa, ayénachó átamo ketasi galá bichíisagá mapurigá echi jaré kúuchi galá bichíi, echálí 'yémitamo ketasi galá nijéwami níibo mapurigá Riosi 'yemi mi nulé. ⁴ Echijiti mapuyíripi tarapé níliami níisagá mapurigá je'ná taa towí tarapé níliami ju, échiko ne walula ju si'néami echi auché jaré yuwa mapu ikí Riosi galá nulé. ⁵ A'lí mapuyíripi galeko bilé je'ná jeyili taa towí mapujiti binói galá tamí bichíi, échiko ayénachó galá tamí galé.

¡Ketasi chati olari auché jaré!

(Mr. 9:42-48; Lk. 17:1-2)

⁶ Echálí Jesusi ayénachó jeaneli: Mapuyíripi rijói we chati olárasagá bilé taa mapu tamí bichíi, échiko ne wabé simírami chati olá. Ne bachá niráa ne galá níimili echiyiri rijói waminá walú ba'wírali pátami níisa, echo'ná binói kutálachi bilé matá jiti bulugá, mapurigá échiko ketasi echirigá chati olárama echi bilé taa mapu tamí bichíi. ⁷ Jena'í wichimóbachi piréami wabé chati risúu olárami ju mapujiti we nirú jaré mapu wabé chati olíriami ju echi auché jare. Sinibí nirúlama jaré mapu echirigá chati olíriami níima, chopi si'néami mapu ikí echirigá chati olírasagá auché jaré, ¡abóniko pe minánomí arigá ne wabé simírami kástigo 'yárami níima! ⁸ Wabé galabé níimili mujé ke akánami niráa níisagá, sikamochi niráa, kasimochi niráa kéremá, ami arigá pe waminánomí ku bitélasa echo'ná ripá riwigachi. Chopi ketasi chirigá galá níimili mujé arigá okuá síkeka, ayénachó okuá roneka, waminá pátami níisa echo'ná ri'lé riáblochi mapo'ná walú rajá. Echijiti a

mujé sikala mi chati olárasagá, mujé ronola kéremá, iwaminá ripuná! ⁹ Wabé galabé níimili mujé pe bilepi buséami níisagá, ami arigá pe waminánomí ku bitélasa echo'ná ripá riwigachi. Chopi ketasi chírigá galá níimili mujé arigá okuá buseka, waminá pátami níisa echo'ná ri'lé riáblochi mapo'ná walú rajá. Echijiti a mujé busila mi chati olárasagá, iwaminá machí pa!

Echi bo'wá wikáami

(Lk. 15:3-7)

¹⁰ ¡Galá 'natasí! Ketasi kichisi nibilé je'ná jaré kúuchi, mapujiti Nijeni 'yemi mi ané mapu echi jaré o'wéala Riosi kapitánawala ne galá nisé je'ná jaré kúuchi. A'lí echi jaré Riosi kapitánawala sinibí echo'ná bacháami keni Onó yuwa muchuwi, mapu echo'ná ripá riwigachi atí. ¹¹ Nijeni wilárami níili mapurigá Ku'wíríami niráa, a'lí Nijeni nawali jena'í wichimóbachí mapurigani ku riwisáa, ku'wíríama echi jaré mapu ma 'wikáami níili.

¹² ¿Churigátamo mayé? A bilé rijóí bukélasagá bilé kiento bo'wá, a'lí a bilé bo'wá waminá wikasa, ¿kecha echo'ná kawichí ariwema echi auché jaré kimakoisa makóí, miná kimakóí, mapuyénasí binóí ámiya siméa echi bilé wikáami? ¹³ Ne bichíwali Nijeni 'yemi mi ané mapu a ku riwisáagá echi bilé mapu wikáami níili, echi rijóí waminabi ne wabé simíríami kanílama echi bilé bo'wá jiti, ketasi mapurigá binóí kanílama echi auché jaré kimakoisa makóí miná kimakóí jiti mapu ketasi 'wikári. ¹⁴ Echirigá achigórigá echi 'yemi Onolá echo'ná ripá riwigachi atíami ketasi nakí mapu nibilé je'ná jaré kúuchi miná 'wikama.

Galá ku wikawasi echi auché jaré ritématami

(Lk. 17:3)

¹⁵ Echijiti a mujé rijimala mi chati ologá sayérasagá, echo'ná binóí yuwa simigá, mapurigami oyéraga ra'íchama binóí mapalí 'yemi okuánika awínali muchuwi. A'lí a binóí galá kilí siwega kipúsagá, mami galá ku katéwali mujé rijimala yuwa. ¹⁶ Chopi siné káachi a binóí ketasi nakisáagá ku katiwánala mi yuwa, echalí mi yuwa togá auché bilé rijimala, auché okuá kéremá mapurigá suwaba ne galá machirúami níima okuá testigo jiti, bikiyá testigo jiti kéremá. ¹⁷ Chopi a echi rijimá ketasi kilí siwega kipúsagá echi auché jaré, echalí galá ku ruyé suwaba ne si'néami echi jaré napawika bichíyami. A'lí a binóí ketasi nakisáagá kilí siwega kipúnala si'néami echi auché jaré napawika bichíyami, echalí miná ariwé echi rijimá, mapurigá ke bichíyami niráa, mapurigá wenomí napabúami kéremá.

¹⁸ Ne bichíwali 'yemi nimí ané mapu ne si'néami mapu ikí ketasi bichíima mapurigátamo binérabo aboni jena'í wichimóbachí, abóni ketasi ku'wíratami níima echo'ná ripá riwigachi, chopi si'néami mapu ikí galá bichíima mapurigátamo binérabo aboni jena'í

wichimóbachí, abóni galá ku'wíratami níima echo'ná ripá riwigachi. ¹⁹ Auchocho siné Nijeni 'yemi mi ané mapu a okuá 'yemi jena'í wichimóbachí muchúami sinepi niráa, chopi tánsagá Riosi mapurigá 'yémitamo nakí mapu Riosi 'yemi mi olíima, echalí Riosi, echo'ná ripá riwigachi atíami, ne bichíwali echirigá olama achigórigá mapurigá 'yemi tánali. ¡Echi Walubela Riosi Nijé Onolá! ²⁰ Mapujiti mapo'ná okuá bichíyami napawika muchuwi mapujiti aboni galá tamí bichíí, ayénachó mapo'ná bikiyá napawika muchuwi kéremá, echo'ná Nijeni ayénachó nasipa aboni yuwa asimea. ²¹ A'lí echi Pegro echo'ná Jesusi yuwa nawagá, jeanigá rukueli: Walubela, ¿chu kisabi arigá 'wérali ju mapu nijeni ku wikawama echi keni rijimá mapalí binóí abijí waminabi tamí chati ologá sayérasa? ¿Áchani echirigá ku wikáwama kicháosa chokéami? ²² A'lí Jesusi jeaneli: Ketásini chopi mi ané mápumi ku wikawi kichaosa siné, chopi Nijeni mi ané mápumi ku wikawama mapuyénasí kicháosa niráa kicháosa makóí chokéami.

Echi pioni mapu ketasi nakili ku wikawánala auche jaré

²³ Echijiti mapalí Riosi galá nulé echi jaré pagótami, mapuyiri ju bilé rijóí walula silíami, echi mapu nipá-morúli echi jaré binóí pióñawala. ²⁴ A'lí mapalí echi walula silíami chótali echirigá nipásiya, echalí bilé rijóí echo'ná párami níili mapu makóí mili wabé natéami namuti wenomí wikali. ²⁵ Chopi mapalí je'ná rijóí ketasi omérali ku natétiya, echalí echi walula silíami nulali ral-inéanala echi rijóí, binóí upila ayénachó, binóí kúchuwala ayénachó, suwaba binóí níwala ayénachó, mapurigá si'néami aboni wabé nochama mapurigá pioni ne sinibí niráa. A'lí echi silíami echirigá nulali ral-inéanala, mapurigá echirigá galá ku natétarami níima suwaba mapu ikí echi rijóí wikali. ²⁶ A'lí echi rijóí bacháami echi walula silíami yuwa, wéemi raweka, chokoba wilíbalí. A'lí waminabi walubela anega jeaneli: ¡Tamí natimá! ¡Pe téeli buwé! ¡Nijé nimí ku natétama ne suwaba! ²⁷ A'lí echi walula silíami wabé natimáli echi rijóí. A'lí ku su'lánaga, ne suwaba ku wikáwali mapu ikí wikali. ²⁸ Chopi mapalí echi bilé rijóí ku simili, binóí we yáati riwali auché bilé rijóí mapu binóí apanérawala níili, echi mapu wikáami níili pe okuáa peso. A'lí kotochí kusébana chapili, jeanigá: ¡Tamí ku nateti mápumi tamí wiké! ²⁹ Echalí echi jubá rijóí echo'ná bacháami, wéemi raweka, chokoba wilíbalí echi bachá rijóí yuwa. A'lí ne wabé risúu anigá jeaneli: ¡Tamí jiti natimaga buwé! Nijeni mi natétama ne suwaba. ³⁰ Chopi echi bachá rijóí ketasi nakili. A'lí ku simigá, binóí pachá bachali echi jubá rijóí echo'ná kumurachi, mapuyénasí ne suwaba ku natétama mapu ikí binóí wikali. ³¹ A'lí echi auché jaré wikabé rijóí mapu ayénachó apanérawala níili echi okuá rijóí yuwa, aboni ma riwisáa suwaba mapurigá ikili, ne wabé siweli. A'lí biché

aboni ku simíbaga ruyeli echi walula silíami suwaba mapurigá ikili. ³² A'lí echi walula silíami bayeli echi rijói. A'lí jeaneli: Mujé chati oláami rijói, nijeni mi ku wikáwali suwaba mapu ikí mujemi tamí wikeli, mapujiti mujé tamí risúu anigá tánali. ³³ Wabé galá níimili mujé ayénachó galá natimasa mujé apanérawala, mapurigá nijé ayénachó nimí wabé natimali. ³⁴ Echali echi walula silíami ne wabé yoga nijali echi rijói echo'ná echi komisario yuwa, mapurigá echo'ná pachá kumurachi bachárami níima mapuyénasi ne suwaba ku natétasa mapu ikí binói wikali. ³⁵ Echali Jesusi ayénachó jeaneli: Nijé Onolá, echo'ná ripá riwigachi bitéami, echirigá achigórigá olama 'yemi mi yuwa, a 'yémitamo ketasi ku wikawásagá ne sulachí niráa ibili 'yemi ritémawala mapu ikí 'yemi mi chati ologá sayérasa.

Jesusi jeanigá binérali mapu echi jaré niwíami ketasi risensia ju ku rojuana
(Mr. 10:1-12; Lk. 16:18)

19 A'lí mapalí Jesusi sunili je'ná jerigá nawésiya echi pagótami, echali Binói ku simili echo'ná Galiléachi anilíwachi kawírali jonsa. A'lí Binói ku nawali echo'ná Juréachi anilíwachi kawírali, echo'ná bakochi Joránachi anilíwachi bo'ónala. ² A'lí ne wikabé pagótami jubáami najátali Jesusi yuwa. A'lí Binói echo'ná galá ku sa'wali si'néami mapu ikí nayúkami níili.

³ Echali echo'ná Jesusi yuwa sili echi jaré Bariseo anilíwami binériami, echi mapu we wi'nijínalaga jeanigá rukueli: ¿Acha risensia ju bilé rijói ariwesa kepu upí, chuwé bilé namuti yiri jiti? ⁴ A'lí Jesusi ku nijéwaga jeaneli: ¿Kechátamo siné 'nánari echo'ná Riosi Ra'íchla oselíwalachi, mapurigá osirúami w mapu ki'yá chokichí mapalí Riosi niwali echi pagótami, mapu Binói niwali bilé rijói, miná bilé mukí yuwa? ⁵ A'lí Riosi ayénachó jeaneli: Echijiti bilé rijói ariwema binói onolá, binói iyela ayénachó, a'lí echi rijói upema kepu upí. A'lí echali jonsa okuánika ne bilepi sapá chopi níima.

⁶ Echirigá aboni ma ketasi okuá niráa ju, chopi birepi sapá ju. Echijiti 'yemi pagótami ketasi ku rojuasi echi jaré mapu Riosi ma napabuli. ⁷ A'lí aboni jeanigá rukueli: ¿Churékula biché osogá nulali echi Moisesi máputa bilé oselí ku rojuákwami osibóa, a'lí risensia ju ku ariwema. ⁸ A'lí Jesusi jeaneli: Echi Moisesi 'yemi mi risensia 'yali ku ariwénala 'yemi jubila chopi mapujítitamo wabé biwárami suléami ju; chopi ki'yá chokichí jonsa ketasi echirigá níili. ⁹ A'lí Nijeni 'yemi mi ané mapuyíripi ariweko binói upila, a'lí auché bilé upesa, échiko wabé chati olá mapurigá bilé si'nú mukí yuwa kochíami. A'lí mapuyíripi upesa echi mukí ariwérami, ayénachó wabé chati olá mapurigá si'nú mukí yuwa kochíami. Chopi mapalí machirúami ju mapu echi mukí kochili si'nú rijói yuwa, echali risensia ju miná ariwema.

¹⁰ A'lí echi jaré mapu Jesusi binérali jeaneli: Echirigá níisagá mapalí bilé rijói upé bilé mukí, ketasi galá níima upesa. ¹¹ A'lí Jesusi jeaneli: Jaré ketasi omero nijéwiya je'ná mapurigátamo anili, chopi mapuyíripi Riosi echirigá binérama, abóni echirigá olama. ¹² Mapujiti jaré rijói ketasi jubé chopi mapujiti aboni ketasi nakí jubénala. Auché jaré ketasi jubé mapujiti aboni echirigá niwárami níili auché jaré pagótami jiti. Auché jaré rijói ketasi jubé mapujiti aboni chopi nijéwaga olánali mapurigá Riosi nulé aboni. Ne si'néami mapu ikí omero je'ná jerigá nijéwiya, galá níima aboni echirigá olasa.

Jesusi galabéraga aneli echi jaré kúuchi
(Mr. 10:13-16; Lk. 18:15-17)

¹³ Echali echo'ná Jesusi yuwa pálati jaré kúuchi mapurigá Binói echo'ná moba aboni mo'ólachi nochasa Riosi yuwa ra'íchaga tánama mapurigá Riosi ku'wírama aboni. Chopi echi jaré mapu Jesusi binérali we ra'ámaga aneli echi jaré mapu pali echi kúuchi, mapu aboni ketasi echirigá kumema echi Binói. ¹⁴ Chopi Jesusi jeaneli: Ariwesi mapurigá echi jaré kúuchi tamí yuwa simea. A'lí ketasi anesi mapu ketasi risensia ju mapu aboni tamí yuwa simea, mapujiti Riosi galá nulé si'néami echiyiri bichiyami. ¹⁵ A'lí Jesusi ma echirigá nochasa aboni, a'lí biché Binói echo'ná jonsa ku simili.

Echi rijói wikabé namuti níwami
(Mr. 10:17-31; Lk. 18:18-30)

¹⁶ A'lí bilé rijói echo'ná Jesusi yuwa nawagá jeaneli: Ne galabé Binériami, ¿piri galabé namuti olámani mapurigá nijeni echijiti sinibí niráa bitélama? ¹⁷ A'lí Jesusi ku nijéwaga jeaneli: ¿Churékulami tamí Galabé ané? Mujemi machí mapu chopi Riosi bi'nélipi galabé ju. Chopi ami nakisáagá mápumi sinibí bitélama, ne galá nijewi Riosi nulalila. ¹⁸ A'lí echi rijói ku nijéwaga jeaneli: ¿Chu yiri? A'lí Jesusi jeaneli: Ketasi mi'yá auché jaré pagótami. Ketasi si'nú mukí yuwa kochí. Ketasi chigó. Ketasi ikalega ra'ichá. ¹⁹ Galá o'wiké kemi onó, echi kemi iyé ayénachó. Ne wabé galé echi auché jaré pagótami echo'ná muripi mujé yuwa piréami, achigórigá mupurigami galé mujé binói niráa. ²⁰ A'lí echi riyói ku nijéwaga jeaneli: Nijeni sinibí suwaba echirigá galá nijéwaga olali, chabé chokichí jonsa mapalini táa níili. ¿Piri namuti abijí 'wérali ju mapurigani olama? ²¹ A'lí Jesusi jeaneli: Ami nakisáagá mápumi ne galabé níima, ku simigá ralinéami ne suwaba mujé níwala namuti. A'lí 'yami echi natigala echi jaré tisúwati. Echalimi wabé níwami níima echo'ná ripá riwigachi. A'lí wakiná tamí yuwa simí, tamí najató. ²² A'lí echi rijói je'ná jerigá nám-sa, ne wabé o'móniga ku simiri, mapujiti binói wikabé namuti níwami níili.

²³ A'lí biché Jesusi jeaneli echi jaré mapu Binói binérali: ¡Ne bichíwali Nijeni 'yemi mi ané mapu ne wabé nóchali ju mapurigá bilé rijói wikabé namuti níwami galá nijéwaga olama mapurigá Riosi nulá! ²⁴ Nijeni 'yemi mi auchécho ané mapu ketasi 'me nóchali ologá simíramiré bilé walú namuti kameyo anilíwami echo'ná biléana wichá iwárali. Chopi ne wabé simírami nóchali ju mapurigá bilé rijói wikabé namuti níwami galá nijéwaga olama mapurigá Riosi nulá. ²⁵ Echálí echi jaré mapu Jesusi binérali, je'ná jerigá namsa, chopi ne wabé 'náta muchili. A'lí aboni jeanigá rukueli: ¿Chigá biché galá ku'wílatami níima? ²⁶ A'lí Jesusi galá 'néniga echi jaré aboni, echálí Binói jeaneli: Echi jaré pagótami jena'í wichimóbachi piréami ketasi omero ku'wíriya echi auché jaré wabé níwami pagótami mapurigá aboni galá nijéwaga olama mapurigá Riosi nulé aboni olánala. Chopi Riosi Binói ne wabé simírami omérami ju ku'wíriya echi jaré wabé níwami pagótami mapurigá aboni galá omérama echirigá olayá, mapujiti Riosi ne suwaba namuti galá omérami ju.

²⁷ A'lí echi Pegro ku nijéwaga jeaneli: Binériami, tamujeta ne suwába ariweli. A'lí bicheta mi yuwa najátali. ¿Píríta níwabo waminana rawé? ²⁸ A'lí Jesusi jeaneli: Ne bichíwali Nijé 'yemi nimí ané mapu Nijeni wilárami níili mapurigá Ku'wíriami niráa. A'lí waminana rawé mapalí ne suwaba namuti ku bukulíwami níwárami níima, mapalí Nijeni asibama echo'ná Nijé níwala walubela ripabé asibálawachi, echálí 'yémitamo ayénachó muchíbabo echo'na makói miná okuá ripabé muchíawachi mapurigátamo justicia olabo echi jaré makói miná okuá rojáami echi jaré Isaeli anilíwami pagótami. ²⁹ Echálí Jesusi ayénachó jeaneli: Jaré mapu tamí bichíiko, arigá ariweli kepu kalí mapujiti aboni wabé tamí galeli. Auché jaré ariweli kepu ritémawa mapujiti aboni wabé tamí galeli. Auché jaré echijiti ariweli kepu 'wénawa ayénachó. Auché jaré echijiti ariweli kepu kúchuwa ayénachó. Auché jaré echijiti ariweli kepu kawíwala ayénachó. Echálí Jesusi ayénachó waminabi jeaneli: Mapuyíripi echirigá olako mapujiti binói tamí wabé galé, échiko ku narema bilé kiento chokéami niráa suwaba, ayénachó échiko 'yárami níima mapurigá binói ne sinibí niráa bitélama. ³⁰ Chopi wikabé mapu jipi rawé ne bachá o'wéala juko, abóniko ne jubá tabéala níima echálí rawé. A'lí biché wikabé mapu jipi rawé ne jubá tabéala juko, abóniko ne bachá o'wéala níima echálí rawé.

Jesusi binérali jaré rijói nóchami jiti rugá

20 A'lí Jesusi ayénachó jeaneli: Mapalí Riosi galá nulé echi pagótami, mapuyiri ju mapalí bilé rijói uva icháami siné rawé bi'yá simili jaré nóchami ásiya

mapurigá aboni nocháma echi uva anilíwami rakala napabuya, echo'ná mapo'ná ichirúami níili wikabé echi jaré uva anilíwami rakéami namuti. ² Echálí echi rijói ma katéwaga aboni yuwa makói peso natétama ruyesa siné rawé, a'lí júuli nochánala echo'ná binói kawíwalachi. ³ A'lí ma ratabáachi echi rijói ku simigá riwáli auché jaré echo'ná walúlachi nasípasí ke nóchaga, wepi muchúami. ⁴ A'lí jeaneli: Ayénachó simíbaga nochábasi 'yemi echo'ná nijé kawíwalachi mapo'ná wáami ju echi uva anilíwami rakala. A'lí nijeni 'yemi mi galá natétama. A'lí aboni ayénachó nochábiya simíbali. ⁵ A'lí echi rijói auchechecho ku simili ne nasipa rawé, ayénachó auchechecho ku simili ma kisúwachi, a'lí echálí achigórigá auché jaré nuleli nochánala. ⁶ A'lí pe alíwachi ke 'me ayó ku buyáachi echi jaré nóchami echi rijói ayénachó riwáli auché jaré ketasi nóchaga muchúami. A'lí jeaneli: ¿Churékulátamo wepi muchuwi ke nóchaga, bi'yá jonsa? ⁷ A'lí aboni jeaneli: Jena'ita muchuwi mapujiti ke wesi tamujé tamí nuleli nochánala. A'lí echi rijói jeaneli: Ayénachó nochábiya simíbagá 'yemi echo'ná nijé kawíwalachi, a'lí bichétamo galá natétarami níibo.

⁸ A'lí echálí ma alíwachi echi rijói uva níwami jeaneli echi bilé nuláami binói yuwa nóchami: Ku bayegá echi jaré nóchami, ma nateti echi nóchala. Ne bachá nateti echi jaré mapu ne jubá chótali nochasia. A'lí ne jubá nateti echi jaré mapu ne bachá chótali nochasia. ⁹ A'lí ma sisáa echi jaré mapu ma alíwachi chótali, mapalí ke 'me ayó buyama riwéali echi nóchami, a'lí ibili niráa makói peso natétalati. ¹⁰ A'lí ayénachó sisáa echi jaré mapu ne bachá chótali nochásia, a'lí aboni mayeli mapu pe waminabi wikabé simírami natétarami níima riwéali. Chopi aboni ayénachó ibili niráa chopi makói peso natétalati. ¹¹ A'lí chapigá echi natétala aboni sayériga ra'íchali echi rijói uva icháami, ¹² jeanigá: Je'ná jaré mapu ne jubá chótali, chopi pe téeli nóchali, a'lí biche-mi achigórigá natétali mapurigami tamujé tamí natétali. Chopi tamujé, bi'yá jonsa, echálí wabé rataáachi ayénachó, ne alíwachi yénasí, ne wabé simírami nóchali. ¹³ A'lí echi rijói uva icháami ku nijéwaga jeaneli bilé aboni: Apanero, nijeni ketasi mi 'yékaka olá. Mujemi aligá tamí aneli mápumi nochama riwéali makói peso niráa siné rawé. ¹⁴ Chapigá mujé níwala, ku simigá. Chopi nijeni natétanali je'ná mapu pe téeli nóchali achigórigá mapurigá nijeni mi natétali. ¹⁵ Nijé chopi binói risénsia ju mapurigá nijeni olama mapurigá nijé binói nakí, echi nijé níwala wenomí jiti. ¡Ketasi galá ju mapu mujé korúkami níima, chopi mapujiti nijé binói galabé oláami ju! ¹⁶ A'lí biché Jesusi ayénachó jeaneli: Echirigá níima mapu echi jaré mapu jipi rawé ne bachá o'wéala juko, abóniko ne jubá tabéala níima echálí rawé, mapujiti ne wikabé bayérami ju, chopi péé okuáa chapirúami ju.

**Jesusi auchecho siné bachá niráa nawésali mapurigá
Binói mi'lirúami níima riwéali**
(Mr. 10:32-34; Lk. 18:31-34)

¹⁷ A'lí mapalí Jesusi moyénaga inárali echo'ná Jerusalémachi simiyá, echalí echo'ná buwichí Binói waná bayéraga echi jaré makói miná okuá mapu Binói binéali, a'lí jeaneli: ¹⁸ Tamí galá kipusi. Riosi tamí wilali mapurigá Ku'wíriami niráa. Chopi mata moyena echo'ná Jerusalémachi simiba. Echo'ná Nijeni echi jaré o'wéala sacerdote, echi jaré nulalíwami binériami 'yárami nímani. A'lí aboni we tamí wi'nijiga mi'lináama. ¹⁹ A'lí echo'ná isena pagótamichi nijírami nímani, mapurigá aboni tamí mi'limea. A'lí aboni we tamí tiníchama, ayénachó tamí ne wabé wipisoma, a'lí aboni tamí michóniga mi'limea echo'ná kúrsichi. Chopi bikiyá chi'rigá, auchécho ku owínamani.

Echi Sibireo upila tánali Jesusi
(Mr. 10:35-45)

²⁰ A'lí echo'ná Jesusi yuwa nawali echi Sibireo kúchuwala iyela, echi okuá binói kúchuwala yuwa. A'lí echo'ná Jesusi yuwa bacháami wéemi raweka chokoba wilíbalí. A'lí wabé Walubela anega tánali mapurigá bilé namuti olárami níima. ²¹ Echalí Jesusi jeanigá rukueli: ¿Churigami nakí mapurigá Nijé nimí olíima? A'lí echi mukí jeaneli: Tamí 'ya mapurigá je'ná okuá nijé kúchuwala mi yuwa mulubé a'nagupi muchíbama mapurigá pe kuchípala nuláami niráa, echalí mapalí Mujemi ne Walubela niráa nulama. Tamí risensia 'ya mapurigá bilé echo'ná watonachi asimea, ayénachó mapurigá echi auché bilé echo'ná o'winachi asimea. ²² A'lí Jesusi ku nijéwaga jeaneli: 'Yémitamo tarapé machí mapu píritamo tamí tani. ¿Áchatamo anáchaga oméрабо mapurigá Nijeni anachama mapalini wabé simírami risúu olárami níima? ¿Áchatamo anáchaga oméрабо mapurigá Nijeni anachama mapalini mi'lirúami níima? A'lí aboni jeaneli: Ayénata oméрабо. ²³ A'lí Jesusi jeaneli: Ne bichíwali arigá 'wérali ju mapu 'yémitamo achigórigá anachabo mapurigá Nijeni anachama. Ayénachó 'wérali ju mapurigátamo ko'wirúami níibo, achigorigá mapurigá Nijé Binói mi'lirúami níima. Chopi Nijé ketasi risensia ju mápuni 'yemi mi 'yama máputamo muchibo echo'ná keni watonachi, echo'ná keni o'winachi kéremá. Chopi risensia ju mapu echo'ná muchima echi jaré mapu Keni Onó, aboni jiti echo'ná a'láraga 'yánali mapu echo'ná muchima.

²⁴ A'lí mapalí echi auché jaré makói binéami je'ná jerigá námali, echalí aboni ne wabé na'áwali echi okuá najirémami sayéraga. ²⁵ A'lí Jesusi bayegá si'néami echi jaré aboni, a'lí jeaneli: 'Yémitamo galá machí mapu echi jaré isena pagótami o'wéalawala ne wabé 'wérali nulé echi jaré isena pagótami. Ayénachótamo machí

mapu echi jaré aboni silínawala ne wabé 'wérali olá aboni yuwa. ²⁶ Chopi 'yemi yuwa ketasi echirigá níima, mapujiti mapuyírípi 'yemi nakisáagá mapu ne walula níima si'néami echi auché jaré 'yemi yuwa, échiko mapurigá si'néami 'yemi piónawala nílaga. ²⁷ Ayénachó echi mapu ne bi'neli ne walula nílanaliko si'néami echi auché jaré 'yemi yuwa, échiko wepi nigúurami nílaga, echi auché jaré 'yemi yuwa. ²⁸ Nijeni wilárami níli mapurigá Ku'wíriami niráa. Nijeni ketasi nawali chopi mapurigani ku'wíratami níima. Chopi Nijeni ku'wírímiya nawali echi auché jaré pagótami. Ayénachó mukumea nawálini, mapurigani mukumea echi auché jaré pagótami chati olarila jiti, mapurigani echirigá ku natétama wikabé pagótami chati olalila jiti.

Jesusi ku sa'wali okuá rijói mapu ke machíliami níli
(Mr. 10:46-52; Lk. 18:35-43)

²⁹ A'lí mapalí aboni ku simíbalí echo'ná Jerikochi anilíwachi walúlachi jonsa, echalí ne wikabé pagótami jubáami najátali Jesusi yuwa. ³⁰ A'lí echo'ná mulubé buwichí muchili okuá rijói ke machíliami. A'lí mapalí aboni mayeli mapu echi Jesusi echo'ná simíraga inárali, echalí aboni o'weli ra'íchaga jeaneli: Walubela Rabiri Ranala, ¡tamujé tamí natimá! ³¹ A'lí echi auché jaré pagótami ra'ámaga aneli mapu ketasi echirigá o'weli ra'ichama. Chopi aboni waminabi wabé o'weli ra'íchaga jeanili: ¡Mujé Walubela Rabiri Ranala, tamujé tamí wabé natimá! ³² Echalí Jesusi echo'ná wiríbaga, bayegá echi okuá ke 'machíliami, a'lí jeanigá rukueli: ¿Churigátamo nakí mapurigani 'yemi mi olíima? ³³ A'lí aboni jeaneli: ¡Walubela, tamujeta wabé nakí mapurigata ku machíliami niwárami níibo! ³⁴ A'lí Jesusi wabé natimaga nocháli aboni busílachi. Echalí we yáati aboni galá ku machíliami níli. A'lí aboni ayénachó jubáami najátaga simíbalí Jesusi yuwa.

Jesusi nawali echo'ná Jerusalémachi
(Mr. 11:1-11; Lk. 19:28-40; Jn. 12:12-19)

21 A'lí mapalí echi wikabé pagótami mulubéanali echo'ná Jerusalémachi, mapalí aboni sili echo'ná Betajechi anilíwachi, mapo'ná mulipi ju echo'ná ripá rabó Olíbachí anilíwachi, echalí Jesusi okuá júuli echi jaré mapu Binói binéali. ² A'lí Binói jeaneli: Miná bacháami, echo'ná rijówachi simíbaga. Echo'ná 'yémitamo we yáa riwiboa bilé bulito ranéami, wíira chukúami. Ayénachótamo riwiboa echi bulito ranala, ma walú. ¡Ku botánaga, wakiná tosí okuánika! ³ A'lí a jaré echo'ná muchúami ketasi nakisáagá, echalí 'yémitamo jeanebo: Echi Walubela Jesusi wabé newalé je'ná bulito. A'lí aboni we yáa nijima. ⁴ A'lí suwaba je'ná jerigá ne bichíwali ikili mapurigá echi walula Riosi jiti nawésami bachá niráa anili mapu ikimea riwéali, mapurigá je'ná jerigá osirúami ju echo'ná Riosi Ra'íchala osilíwalachi:

⁵ Jeanesi echo'ná Jerusalémachi piréami pagótami: ¡Galá 'nigá muchisi! Echi 'yemi Walubélawala 'yemi mi yuwa nawama,

echi mapu ketásirapé chibisíami níima.

Echi Binói we asema bilé bulito, echi mapu auché bilé galá binéami bulito ranala níima.

⁶ A'lí echi okuá binéami echo'ná simasa olali mapurigá Jesusi nuleli. ⁷ A'lí aboni echo'ná pali echi bulito mukila, echi ranala ayénachó. Echali aboni galá pérali echi bulito, aboni kimala jiti. Echali Jesusi galá aseli echi bulito ranala ma walú. ⁸ A'lí echi jaré wikabé pagótami pérsali aboni kimala echo'ná buwichí mapo'ná Jesusi simírama riwéali. Ayénachó jaré aboni echi chaliwá sawéami ripúnaga, ayénachó echo'ná buwichí pérsali. ⁹ Echali echi jaré wikabé pagótami mapu bacháami sírali, ayénachó echi auché jaré wikabé mapu jubáami sírali, si'néami o'weli ra'íchaga jeaneli: ¡Tamu-jeta nakí mapu Riosi mi ku'wírama, Mujé mápumi Rabiri Ranala ju. Echi Walubela Riosi mapu mi júuli jena'í wichimóbachí, Binói mi we galá 'ya suwaba echi wabé galabéala. ¡Tamu-jeta nakí mapu echi Ripá Riwigachi Atíami Riosi mi galá ku'wírama!

¹⁰ Echali mapalí Jesusi ma nawali echo'ná Jerusalémachi, ne si'néami echo'ná walúlachi piréami ne wabé cha'igá napawika, buchuwí anigá ra'íchali. Ayénachó a'nagupi jeanigá rukueli: ¿Chigá ju je'ná rijói? ¹¹ A'lí echi jaré pagótami Jesusi yuwa 'yéami ku nijéwaga jeaneli: ¡Je'ná ju echi Jesusi, echo'ná Nasaréachi, echo'ná Galiléachi anilíwachi kawírali bitéami, echi mapu walubela Riosi jiti nawésami ju!

Jesusi ku machí a'wali echi jaré ralinéami echo'ná Riosi ri'obáwalachi jonsa

(Mr. 11:15-19; Lk. 19:45-48; Jn. 2:13-22)

¹² Echali Jesusi bakili echo'ná walubé ri'obachi, Riosi ri'obáwalachi. A'lí Binói ku machí a'wali echo'ná jonsa si'néami echi jaré pagótami mapu echo'ná pachá ralinéaga nóchami níili, ayénachó machí a'wali si'néami echi auché jaré echo'ná raláami. A'lí Binói miná na'mínali echi jaré jubechi mapo'ná auché jaré wenomí nakulíwiya muchili. Ayénachó na'mínali echi jubechi mapo'ná auché jaré echi makawi ralineá muchili.

¹³ Echali Jesusi jeaneli: Echo'ná Riosi Ra'íchala oseríwarachi je'ná jerigá osirúami ju: Nijé kalíla, Riosi yuwa ra'ichálawami kalí anéami níima. Chopi 'yémitamo ma niwali Riosi kalila mapurigá echi jaré chigórami risochíwala niráa.

¹⁴ A'lí echo'ná walubé ri'obachi machímana Jesusi yuwa sili jaré ke 'machíliami, auché jaré ke a'káanami ayénachó. Echali Jesusi galá ku sa'wali si'néami aboni.

¹⁵ Chopi echi jaré o'wéala sacerdote, ayénachó echi auché jaré nulalíwami binériami ne wabé na'áwali mapalí aboni riwali echi Jesusi wikabé namuti wabé omériga oláachi, mapurigá ke wesi auché jaré pagóta-

mi omero olayá. Ayénachó aboni na'áwali mapalí aboni námali echi jaré kúruwi echo'ná ri'obachi jeaníami: ¡Tamu-jé tamí ku'wiro, Mujé Rabiri Ranala! ¹⁶ Echali aboni jeaneli echi Jesusi: ¿Kéchami nami mapurigá je'ná jaré kúruwi aní? A'lí Jesusi jeanili: Ayena.

¿Kéchatamo siné 'nénali 'yemi mapurigá je'ná jerigá osirúami ju echo'ná Riosi Ra'íchala oselíwalachi:

Echi jaré kúuchi mi walubéлага anema, echi auché jaré kúuchi chí'íami ayénachó?

¹⁷ A'lí Jesusi ma ariwesa aboni, echali Binói ku simili echo'ná walúlachi jonsa. A'lí echo'ná Betániachi anilíwachi simigá, echo'ná chí'lébalí.

Jesusi yóniga aneli bilé chuná

(Mr. 11:12-14, 20-26)

¹⁸ A'lí ba'alínala rawé bi'yá mapalí Jesusi echo'ná buwichí inárali, echo'ná walúlachi ku simiyá, echali Binói ne wabé 'locheli. ¹⁹ A'lí Binói riwali bilé chuná echo'ná mulípi buwichí wilíami. Chopi ma nawagá echo'ná chunárali, ketási riwali rakala, chopi wabé nirúuli sawala. A'lí Jesusi ra'íchaga jeaneli echi chuná: ¡Ke siné waminabi raké mujé chuná! A'lí echi chuná we yáati waminá wakicheli. ²⁰ A'lí mapalí echi jaré binéami je'ná jerigá riwali, echali aboni chopi wabé 'nigá jali. A'lí jeanili: ¿Churigá echirigá wabé yáati káraga wakicheli echi chuná? ²¹ A'lí Jesusi ku nijéwaga jeaneli: Ne bichíwali Nijeni 'yemi mi ané mapu átamo ne sinibí ne galá bichíisagá, echali 'yémitamo ketasi chopi je'ná jerigá olabo mapurigá Nijeni olali je'ná chuná yuwa, chopi átamo ayénachó jeanéasagá je'ná ripá rabó: ¡Echomí! ¡Echo'ná walú ba'wírali simigá! Echali ne bichíwali echirigá olárami níima. ²² A'lí mapu chubiyíritamo tásagá mapalítamo Riosi yuwa tániga ra'ichabo, echirigátamo ne bichíwali narepo, átamo ne galá bichíisagá.

Jesusi sinibí olali mapurigá Walubela niráa

(Mr. 11:27-33; Lk. 20:1-8)

²³ A'lí mapalí Jesusi ku nawali echo'ná walubé Juríosi ri'obáwalachi echali Binói binérali echi pagótami. A'lí Binói yuwa sili echi jaré o'wéala sacerdote, echi jaré o'wéala ochérami pagótami o'wéalawala ayénachó. A'lí aboni jeanigá rukueli: ¿Churigami echirigá wabé omériga olá je'ná jeyiri namuti? ¿Chigami risensia 'yali mapurigami je'ná jerigá olama? ²⁴ Echali Jesusi ku nijéwaga jeaneli: Nijeni ayénachó 'yemi mi sinepi rukue-ma. A'lí átamo tamí ku nijéwasagá, echali Nijeni ayénachó 'yemi mi anema chigá tamí risensia 'yali mapurigá Nijeni wabé omériga olama je'ná jeyiri namuti. ²⁵ ¿Acha Riosi ripá riwigachi atíami nureli echi Juani pagónala echi pagótami? ¿Acha auché jaré pagótami echirigá nuleli kéremá? Echali aboni kilí niráa a'nagupi ra'íchaga jeanili: A tamujé jeanisáagá: Echi Riosi ripá ri-

wigachi atiami echirigá nuleli olánala, echalí Binói tamujé tamí je'ná jerigá rukuema: ¿Churékula bichéta-mo ketasi bichíili mapurigá echi Juani tamí jiti nawésali? ²⁶ A'lí ata jeanisáagá: Jaré pagótami nuleli echi Juani pagónala echi pagótami, a'lí bicheta wabé majá echi pagótami jiti, mapujiti si'néami pagótami galá bichíili mapu echi Juani, walula Riosi jiti nawésami níili. ²⁷ A'lí aboni ku nijéwaga jeaneli: Ketásita machí chigá nuleli echi Juani pagónala echi pagótami. A'lí Jesusi ayénachó jeaneli: Nijeni ketasi cho 'yemi mi anema chigá tamí risensia 'yali mapurigani je'ná jerigá olama.

Bilé rijói okuá kúruwi kúchali

²⁸ A'lí Jesusi waminabi jeaneli: ¿Churigátamo mayé? Bilé rijói okuá kúruwi kúchali. A'lí echi rijói echo'ná echi bachá wilíami yuwa nawagá jeaneli: Keni raná, jipi simigá nochá echo'ná nijé kawíwalachi mapo'ná echi uva anilíwami ichirúami ju. ²⁹ A'lí echi towí ku nijéwaga jeaneli: ¡Ketásini nakí! Chopi pe wilibeko galá ku 'nátaga, arigá simili nochánala. ³⁰ A'lí echi rijói echi auché bilé towí yuwa nawagá achigórigá aneli. Echali echi jubá wilíami towí jeaneli: Galá ju keni onó, nijeni ayena simea nochámiya; chopi binói arigá ketasi simili. ³¹ A'lí Jesusi jeanigá rukueli: ¿Chuyiri echi okuá galá nijéwaga olali mapurigá kepu onó nuleli? A'lí aboni ku nijéwaga jeaneli: Echi bachá wilíami chopi echirigá olali. A'lí Jesusi jeaneli: Ne bichíwali 'yemi nimí ané mapu echi jaré chati oláami wenomí napabúami, echi jaré wabé chati oláami muguí ayénachó ne bachá wabé o'móniga ku ro'wiga Riosi yuwa, galabé olama mapurigá Riosi nulá, mapalí 'yémitamo ketasi cho echirigá olabo. ³² Mapujiti echi Juani chabénala wabé galabé ologá nawali 'yemi yuwa, chópitamó ketasi bichíili. A'lí echi jaré chati oláami wenomí napabúami galá bichíili mapurigá Juani nawésali, echi jaré wabé chati oláami muguí ayénachó. A'lí 'yémitamo je'ná jerigá galá riwisáa arigá ketasi ku ro'wili Riosi yuwa, nirapétamo bichíili.

Echi jaré chati oláami nóchami

(Mr. 12:1-12; Lk. 20:9-19)

³³ Ayénachó Jesusi jeaneli: Galá kipusi mapurigani auchecho siné irétaga ra'ichama: Bilé rijói onorúami echo'ná biléana kawichí ichali wikabé uva aniliwami rakéami namuti. A'lí echi rijói ne galá 'yérali echo'ná kawírali. Echali galá joka, echo'ná niwáli mapo'ná kamina echi uva rakala, mapurigá machí pama echi uva ba'wila. Ayénachó echo'ná pe ripabé kalirali mapurigá echo'ná jonsa galá omérama 'néniya suwaba echo'ná ichirúami. A'lí echi rijói suwaba tanéwaga 'yali auché jaré nóchami. Echali binói auché biléana kawichí ne wabé mikabé simili. ³⁴ A'lí pe kinana mapalí ma sébali echi uva rakala ripunálawachi, echali echi uva níwami

rijói jaré pioni júuli echo'ná echi jaré nóchami yuwa mapurigá aboni narema binói níwala uva rakala. ³⁵ Chopi echi jaré nóchami echo'ná tibúami chapili echi auché jaré pioni. A'lí bilé we chi'wali, auché bilé arigá mi'yali, auché bilé riteti basibuli. ³⁶ A'lí echi rijói waminabi wikabé auché jaré pioni júuli. Chopi echi jaré nóchami achigórigá olali aboni yuwa. ³⁷ A'lí ne jubáami echi rijói júuli bilepi kepu raná, mapujiti jeanili: Aboni galá o'wikémiré je'ná nijé ranála. ³⁸ Chopi echi jaré chati oláami nóchami ma riwisáa echi rijói ranala, a'lí a'nagupi jeaneli: Je'ná ju echi mapu ne suwaba níwami níima. ¡Kiná simasi, chapigá mi'liboa, a'lí bicheta chapiboa binói níwala kawí! ³⁹ A'lí aboni ma chapigá, miná machí paka echo'ná kawírali jonsa, arigá mi'yali.

⁴⁰ Echali Jesusi jeanigá rukueli: Mapalí ma ku nawasa echi wikabé uva níwami, ¿churigá kastigo 'yama echi jaré chati oláami nóchami? ⁴¹ A'lí aboni ku nijéwaga jeaneli: ¡Échiko suwaba suwábama echi jaré chati oláami nóchami! Echali tanéwaga 'yama binói níwala kawí auché jaré nóchami. A'lí aboni galá nijima echi binói níwala raká mapalí ma wáami ju. ⁴² Echali Jesusi jeanigá rukueli: ¿Kéchatamo siné 'nénali mapurigá osirúami ju echo'ná Riosi Ra'íchala oselíwalachi mapurigá tamí jiti rugá, je'ná jerigá osirúami ju?

Echi rité mapu echi jaré kalí niwáami miná chakena pali, mapurigá ketasi galabé niráa, je'ná rité echo'ná sitoche, ma bachá niráa achárami ju. Echi Walubela Riosi je'ná jerigá olali.

Tamujeta ne galá machí mapurigá Binói echirigá ne wabé jiwériga olali, mapurigá ke wesi auché jaré omero olayá.

⁴³ A'lí Jesusi waminabi jeaneli: Echijiti Nijeni 'yemi mi ané mapu Riosi ketasi waminabi galá nulema 'yemi pagótami, chopi Binói nulema auché jaré isena pagótami mapu galá nijéwaga ologá pirélama mapurigá Riosi nulema aboni. ⁴⁴ A'lí mapuyíripi echo'ná moba je'ná Ritérali wichisáagá, échiko arigá nosobúrami niráa níima. A'lí mapuyíripi echo'ná binói móbachi wichisáagá je'ná Rité, échiko we kúuchi mojonárami niráa níima.

⁴⁵ A'lí mapalí echi jaré o'wéala sacerdote, ayénachó echi jaré o'wéala Bariseo anilíwami binériami galá kipuli mapurigá Jesusi irétaga binérali, echali aboni machili mapu Binói, aboni jiti rugá ra'íchali. ⁴⁶ A'lí aboni wabé chapináali echi Binói, chopi aboni arigá wabé majali echi auché jaré pagótami, mapujiti echi pagótami mayeli mapurigá Jesusi ne bichíwali walubela Riosi jiti nawésami níili.

Jesusi binera echi niwíami jiti rugá

22 A'lí Jesusi auchecho siné irétaga ra'íchaga jeaneli: ² Mapalí Riosi galá nulé echi pagótami,

mapuyiri ju mapalí bilé walula silíami walú omáwali mapalí binói nolá we niwili. ³ Echali echi walula silíami júuli jaré binói pióawala we yáati bayénala echi jaré mapu ma bayérami níili, mapurigá aboni ma siméa echo'ná omowálawachi. Chopi echi jaré mapu echirigá bayérami níili, ketasi nakili simánala. ⁴ A'lí echi walula silíami auché jaré jeanigá júuli: Jeanébasí echi jaré mapu bachá bayérami níili: Mani a'lárali echi ko'wáwami. Mani ko'yali nijé bukula bóisi, echi jaré wáasi sabéami ayénachó. Suwaba ma galá kariwérami ju. ¡Ma simasi echo'ná omowálawachi! ⁵ Chopi aboni ketasi chirigá nijéwaga, auché jaréana simíbalí. Bilé echo'ná binói níwala ichílachi simili. Auché bilé echo'ná binói níwala nóchalachi simili. ⁶ Auché jaré chapigá echi walula silíami pióawala wabé chibi ologá, miná ko'yali. ⁷ A'lí echi walula silíami je'ná jerigá námiga wabé yónari. A'lí júuli binói sontársawala ko'wínala echi jaré jobátami rijói. A'lí miná ikósali aboni walúlawalachi. ⁸ Echali echi walula silíami jeaneli echi jaré binói pióawala: Ma ne bichíwali galá a'láratami ju mapurigá omoáwaga niwima nijé nolá, chopi echi jaré mapu bayérami níili ketasi nakili simánala. Ne si'néami aboni echirigá chati oláami níili. ⁹ Ayénachó jeaneli: Echo'ná suníami buwichí simíbagá mapo'ná echi jaré pagótami 'yena. Wakiná omowálawachi bayesi si'néami mapu ikítamo ritiwá. ¹⁰ A'lí echi jaré pióatami echo'ná wikanáami buwichí simíbagá, galá napabuli si'néami echi jaré pagótami mapu ikí aboni riwali. A'lí jaré chati oláami níili, chopi auché jaré galabé oláami níili. A'lí echo'ná omowálawachi ne sébali buchili echi wikabé pagótami mapu echirigá bayérami níili.

¹¹ Echali echi walula silíami echo'ná pachá 'némiya bakili echi jaré mapu echo'ná bayérami níili. Chopi binói echo'ná riwali bilé rijói mapu ketasi napachátarami níili mapurigá echi walula ma 'yali napachánala ibili niráa mapu ikí echo'ná bayérami níili. ¹² Echali echi walula silíami jeaneli: Amígo, ¿churigami bakili jena'ibi, mapujitimi ketasi napachátarami ju mapurigá 'wérali ju napachasa mapalimi simea jena'í niwíkwachi? Chopi echi rijói ketásirapé namuti omérali ku nijéwaga ra'icha. ¹³ Echali echi walula silíami jeaneli echi jaré binói pióawala: ¡Chapigá bulesi echi rijói ronólachi, binói sikálachi ayénachó! ¡Miná machí rokowárali pasí! Echo'ná rokowárali echi rijói ne sinibí niráa wabé nalama, ayénachó binói ne wabé ki'lákama binói ramilá, mapujiti binói wabé risúu olárami níima. ¹⁴ Mapujiti wikabé pagótami bayérami ju, chopi pe okuáa narétami ju.

¿Acha risensia ju máputa wenomí 'yabo echi silíami?
(Mr. 12:13-17; Lk. 20:20-26)

¹⁵ Echali echi jaré Bariseo anilíwami binériami ku simíbalí. A'lí aboni a'nagupi ra'íchaga we 'nátali mapu churigá aboni rukuema riwéali echi Jesusi. A'lí aboni

chopi nakili mapu echi Jesusi ku nijéwaga ra'ichama, echi nulalíwami sayéraga, mapurigá aboni echijiti galá omérama wi'nijiya Binói Jesusi. ¹⁶ Echali echi jaré Bariseo júuli auché jaré mapu aboni binérali, ayénachó auché jaré mapu Erorsi amígowala níili, mapurigá si'néami aboni ra'ichama Jesusi yuwa. A'lí si'néami aboni Jesusi yuwa ra'íchaga jeaneli: Binériami, tamujeta galá machí mápumi chopi ra'icha echi ne bichíwali, ayénachó mápumi ne bichíwali binera mapu echi pagótami chopi galá bichíga olama mapurigá Riosi nulé aboni. Mujemi ke bilé wesi majawá, chópimi galabé olá echi jaré tabéala yuwa, achigórigá mapurigami olá echi auché jaré o'wéala yuwa. ¹⁷ A'lí aboni waminabi jeaneli: Tamujé tamí ku nijewi, ¿churigá mi mayé? ¿Acha risensia ju máputa wenomí 'yabo echi walula silíami Sesara anilíwami? ¿Kéchata 'yabo kéremá? ¹⁸ Chopi Jesusi galá machili mapurigá aboni wabé 'yéka ra'íchali. Echijiti Binói jeanigá rukueli: ¿Churékulátamo nakí mapurigani sayéraga ra'ichama echi walula Sésara? 'Yémitamo ne wabé 'yekami ju. ¹⁹ Echali Jesusi ayénachó jeaneli: Tamí 'nérasí echi wenomí, echi walula natétuami. A'lí aboni 'yali bilé namuti wenomí mapurigá aboni natétaga olali echi walula silíami. ²⁰ A'lí Jesusi jeanigá rukueli: ¿Chigá ju je'ná mapu jena'í wenomírali atí? ¿Chigá riwalá ju jena'í osirúami? ²¹ A'lí aboni jeaneli: Echi walula Sésara níwala ju suwaba. A'lí Jesusi jeaneli: Echijiti galá natétasi echi Sésara echi mapu echi Sésara níwala ju. Chopi 'yasi Riosi suwaba mapu Riosi níwala ju. ²² A'lí je'ná jerigá námiga, aboni chopi wabé 'nátaga muchili. A'lí aboni ma ariwesa ku simíbalí.

Echi jaré suwíami arigá ku o'wínama

(Mr. 12:18-27; Lk. 20:27-40)

²³ Echali rawé echo'ná Jesusi yuwa sili echi jaré Saruseo anilíwami. Aboni we bichíi mapu echi jaré mapu ma suwíami ju ketasi ku o'wínama. Echali aboni rukueli, ²⁴ jeanigá: Binériami, echi ki'yá bitéami Moisesi tamujé tamí osogá nuleli mapu a bilé rijói ke cho kúchwaga mukusáa, chopi ariwesa binói upila, mapu echali arigá 'wérali ju mapu echi mukúami rijói rijimala upema echi mukí kunámami, mapurigá jaré kúchalama. A'lí echi jaré kúcharami mapurigá echi mukúami rijimala kúchwala níima. ²⁵ A'lí aboni waminabi jeaneli: Jena'í tamujé yuwa piréali kichao rijói najirémami niili. A'lí echi bachirúami ne bachá upeli, chopi tarapé cho kúcharasa mukuli. Echirigá binói ariweli binói upila mapurigá echi bonirúami echirigá upema. ²⁶ A'lí echirigá achigórigá ikili echi osá wilíami bonirúami, echi baisá wilíami bonirúami ayénachó, waminá echi kicháosa wilíami bonirúami yénasí. Ibili niráa echi jaré kichao najirémami echirigá upeli echi mukí. ²⁷ A'lí ne jubá ayénachó mukuli echi mukí. ²⁸ A'lí echi jaré Sarukeo anilíwami rijói jeaneli: Echali mapalí echi jaré

ma suwíami ku o'wínamiré, ¿chu yiri 'nalina upila níima echi mukí? Mapujiti si'néami echi jaré kichao najirémani ibili niráa upeli.

²⁹ Echali Jesusi ku nijéwaga jeaneli: 'Yémitamo wabé 'yékarami ju mapujítitamo ketasi galá machí mapurigá osirúami ju echo'ná Riosi Ra'íchala oselíwalachi, nirapétamo machí mapurigá Riosi suwaba omériami ju. ³⁰ A'lí Jesusi waminabi jeaneli: Mapalí echi jaré ma suwíami ku o'wínama, echali aboni tarapé wesi jubema, nirapé wesi kunema. Chopi mapurigá echo'ná ripá riwigachi muchúami Riosi kapitánawala níima. ³¹ Echali Jesusi ayénachó jeaneli: ¡Echi jaré ma suwíami ne bichíwali ku o'wínama! Ayénachó 'yémitamo siné káachi ma wisabé 'nénali mapurigá osirúami ju echo'ná Riosi Ra'íchala oselíwalachi mapurigá Riosi Binói jeanigá ra'íchali: ³² Nijeni ju echi Walubela Riosi. Echirigá Nijeni abijí ju echi ki'yá bitéami Abrami Riósawala, ayénachó Nijeni abijí ju echi ki'yá bitéami Isaka Riósawala, ayénachó Nijeni abijí ju echi ki'yá bitéami Jakobo Riósawala, mapujiti aboni abijí piré tamí yuwa jena'í ripabé riwigachi. Echali Jesusi Binói jeanili: Si'néami echi jaré mapu ikí galá bichíili Riosi, ketasi mapurigá ma suwíami niráa ju, mapujiti Riosi níwala pagótami sinibí piréami ju Riosi yuwa. ³³ A'lí echi jaré pagótami wabé kilí 'nátaga muchili mapalí aboni ná-mali je'ná jerigá binérachi echi Jesusi.

¿Chuyiri 'nalí ju mapurigá ne bachá nulá Riosi?

(Mr. 12:28-34)

³⁴ A'lí mapalí echi jaré Bariseo anilíwami binériami galá machili mapurigá Jesusi echirigá binériga ra'amali echi jaré Saruseo anilíwami, echali aboni bilénapi napawili mapo'ná Jesusi asali. ³⁵ Echali bilé aboni mapu echi nulalíwami binériami níili, je'ná we machináliga rukueli jeanigá: ³⁶ Binériami, ¿chuyiri nalí ju mapurigá ne bachá nulá Riosi? ³⁷ A'lí Jesusi jeaneli: Ne wabé galesi echi Walubela kétamo Riósawa ne sulachí niráa. Ayénachó ne wabé galesi Riosi ne suwaba kétamo ariwá niráa. Ayénachó ne galá galesi Riosi ne suwaba kétamo 'nátaga niráa. ³⁸ Riosi echirigá nulá ne bachá niráa. A'lí je'ná nulalíwami ne wabé simírami walubela ju, ne suwaba echi auché jaré Riosi nulalila yuwa. ³⁹ Chopi ne noguí a'nawí ju mapurigá Riosi osá niráa, je'ná jerigá nulá: Ne wabé galé echi auché jaré pagótami achigórigá mapurigami galé mujé binói niráa. ⁴⁰ A'lí mapalítamo galá nijéwabo je'ná okuá nulalíwami, echali 'yémitamo ayénachó galá nijéwami níibo ne suwaba echi auché jaré Riosi nulalila, ayénachó ne suwaba mapurigá osali echi jaré o'wéala Riosi jiti nawésami.

¿Chigá ranala ju echi Cristo anilíwami?

(Mr. 12:35-37; Lk. 20:41-44)

⁴¹ Echali abijí napawika muchúachi echi jaré Bariseo anilíwami binériami, a'lí Jesusi jeanigá rukueli: ⁴² 'Yemi, ¿churigátamo aní échi Cristo anilíwami jiti, echi mapu Riosi júuli jena'í wichimóbachi? ¿Chigá ranala ju? Echali aboni ku nijéwaga jeaneli: Echi walula Rabiri ranala ju. ⁴³ Echali Jesusi jeaneli: Mapalí echi Wabé Galabé Riosi Iwigala galá nuleli echi Rabiri, echali echi Rabiri osali mapu echi Cristo anilíwami, binói Walubélawala ju. ¿Churékula biché aní mapu binói ranala, arigá binói Walubélawala ju? Mapujiti echo'ná Riosi Ra'íchala oselíwarachi osirúami ju mapurigá echi Rabiri jeanigá osali:

⁴⁴ Echi Walubela Riosi jeaneli echi keni Walubélawa: Jena'í tamí yuwa watonachi asagá, mapuyénako Nijeni wabé omériga ro'wama echi jaré Mujé sayela echo'ná ri'réami Mujé ralálachi mapurigami echirigá galá omérama aboni.

⁴⁵ A'lí echi Rabiri echirigá anisáagá mapu binói Walubélawala ju, ¿churigá binói ranala níima?

⁴⁶ Echali ke wesi auché jaré galá omérali ku nijéwiya. Ayénachó ke wesi waminabi rukueli, mapujiti si'néami we majali waminabi rukueya.

Jesusi we wi'nijíli echi jaré Bariseo anilíwami binériami, echi nulalíwami binériami ayénachó

(Mr. 12:38-40; Lk. 11:37-54; 20:45-47)

23 Echali Jesusi galá ra'íchali echi jaré pagótami. Ayénachó Binói ra'íchali echi jaré mapu Binói binérali. A'lí je'ná jerigá ra'íchali: ² Echi jaré nulalíwami binériami, ayénachó echi jaré Bariseo anilíwami binériami, si'néami we binera mapurigá echi ki'yá bitéami walula Moisesi osogá nulali. ³ Echirigá ne suwaba galá nijéwaga olasi mapurigá aboni 'yemi mi ané mapu echi Moisesi osogá nulali. Chopi ketasi olasi mapurigá aboni olá, mapujiti aboni we binera mapurigá echi jaré pagótami echirigá nijéwaga olama, chopi aboni ketásirapé echirigá olá. ⁴ Mapujiti mapalí echi jaré echiyiri binériami echirigá nulé echi auché jaré pagótami olánala, achigórigá ju mapurigá mapalí bilé rijói ne wabé simírami bitéami niráa uché auché jaré pagótami, mapuyénasi aboni ne noguí ketasi omérama apériya echiyena wabé bitéami muruka. Chopi echi rijói arigá ketásirapé nakí ku'wíranala aboni. ⁵ Echiyiri binériami suwaba echirigá olá mapurigá echi auché jaré pagótami ma riwisáa aboni echirigá oláachi, echali jeanimea: Echi jaré binériami ne wabé galabé oláami ju. Echijiti echiyiri binériami ayénachó wabé nakí bulugá 'yéna jaré oselí echo'ná aboni kowálachi, ayénachó echo'ná aboni matóchowalachi, mapo'ná osirúami ju jaré ra'íchali, Riosi Ra'íchala osirúami. Ayé-

nachó aboni echijiti ne wabé i'wéali niwá aboni napáchala suwilá nakala. ⁶ Ayénachó aboni echijiti chopi ne bachá niráa muchínali echo'ná omáwiga ko'wáwachi. Ayénachó aboni echijiti chopi ne bacháami muchínali echo'ná pachá ri'obachi napawíkowachi. ⁷ Ayénachó aboni wabé nakí mapurigá echi auché jaré pagótami ne wabé o'wikeka natipama aboni mapalí si'néami pagótami napawí. Ayénachó aboni wabé nakí mapurigá echi auché jaré pagótami jeanema: ¡We kaniliga, keni binériami! ⁸ Chopi ketasi ariwesi 'yemi mapurigá echi auché jaré pagótami 'yemi mi jeanema: ¡Keni Binériami! Mapujiti bilepi ju 'yemi níwala Binériami. Echi Cristo anilíwami bilepi ju 'yemi níwala Binériami. A'lí si'néami 'yemi ritémtami ju. ⁹ A'lí ketasi anesi 'yemi bilé rijói jena'í wichimóbachí bitéami jeanigá: ¡Kéta Onó! mapujiti bilepi ju 'yemi Onolá, echi mapu echo'ná ripá riwigachi atí. ¹⁰ Ketasi ariwesi mapurigá auché jaré pagótami 'yemi mi anema Binériami niráa, mapujiti echi Cristo anilíwami bilepi ju 'yemi níwala Binériami. ¹¹ ¡Echi mapu ne bachá ju si'néami echi auché 'yemi yuwa, échiko mapurigá si'néami 'yemi piónawala nílaga! ¹² Mapujiti echi mapu a binói niráa wilako mapurigá walula, échiko chopi mapurigá wabé tabéala niwárami níima. A'lí echi mapu a binói niráa wabé tabéala niwako, échiko walula niráa wilálami níima.

¹³ Chopi 'yemi nualíwami binériami ne wabé risúu olálami níibo, 'yemi Bariseo anilíwami binériami ayénachó. 'Yémitamo ne wabé 'yékami ju, mapujítitamo ketasi ariwé mapurigá echi auché jaré pagótami galá nijéwaga olama mapurigá Riosi nulé aboni. A'lí 'yemi aboni ketasi echirigá nijéwaga olá, nirapé chótamo ariwé mapurigá auché jaré pagótami echirigá nijéwaga olama, mapalí aboni arigá wabé nakí echirigá nijéwaga olánala.

¹⁴ Ne wabé risúu olálami níibo 'yemi nualíwami binériami, 'yemi Bariseo anilíwami binériami ayénachó. 'Yémitamo ne wabé 'yékami ju, mapujítitamo we 'ye echi jaré kunámami kalila, a'lí bichétamo chopi we 'yékaka niráa ra'icha mapurigá Riosi yuwa ra'íchaga niráa. Echijiti 'yémitamo waminabi wabé wi'nijírami níibo.

¹⁵ Ne wabé risúu olálami níibo 'yemi nualíwami binériami, 'yemi Bariseo anilíwami binériami ayénachó. ¡'Yémitamo ne wabé 'yékami ju! Mapujítitamo ne wabé simírami nóchali olá mapurigátamo echirigá ne sébali binérabo bilé rijói mapurigá binói bichíima achigórigá mapurigá 'yémitamo bichíi. Chopi mapalí échiko ma echirigá binératami ju, echalí binói ma niwárami ju waminabi osá chokéami 'yékaka oláami ketasi mapurigá 'yemi niráa, mapurigá echiyiri rijói echijiti pátami níima echo'ná ri'lé wabé chati na'írali mapo'ná ne walú rajá.

¹⁶ 'Yémitamo ne wabé risúu olálami níibo, mapujítitamo mapurigá ke machíliami niráa ju, chópítamo arigá we nakí bayéranala echi auché jaré pagótami mapu ketasi machí mapo'ná aboni simiba. 'Yémitamo ketasi galá machí Riosi Ra'íchala, chópítamo arigá wabé nakí binéranala echi auché jaré pagótami. A'lí a bilé rijói wepi jeanisáa: Riosi ri'obáwala, mapalí binói bichíwaga aní mapu binói ne bichíwali olama bilé namuti, echalí 'yémitamo aní mapu ketasi arigá 'wérali ju mapu echiyiri rijói ne bichíwali echirigá olama. Chopi a bilé rijói wepi jeanisáa: Echi oro anilíwami wenomí echo'ná ri'obachi nirúami, echalí 'yémitamo aní mapu ne bichíwali arigá 'wérali ju mapu echiyiri rijói ne bichíwali echirigá sébali olama mapurigá binói bichíwaga anili. ¹⁷ ¡'Yémitamo ke newalite ju! ¡Ayénachótamo mapurigá ke machíriami ju! Mapujiti 'yémitamo aní mapu echi wikabé oro anilíwami wenomí ne wabé simírami galabé ju, ketasi mapurigá echi walubé Juríosi ri'obáwala. A'lí echi wikabé oro anilíwami wenomí chopi galabé ju mapujiti echi oro echo'ná pachá echi walubé Juríosi pagótami ri'obáwalachi muchuwi. ¹⁸ A'lí a bilé rijói jeanisáagá: Nijeni ne bichíwali olama bilé namuti, mapujiti echo'ná pachá Juríosi ri'obáwalachi nirúami ripáami mésachi wabé galabé ju. Echalí 'yémitamo aní mapu ketasi arigá 'wérali ju mapu binói ne bichíwali echirigá olama. Chopi a bilé rijói jeanisáagá mapu binói ne bichíwali olama bilé namuti mapujiti echi jaré namuti ne wabé galabé ju mapu echo'ná moba ripáami mésachi muchúwaga 'yárami ju Riosi, echalí 'yémitamo aní mapu ayena arigá 'wérali ju mapu echiyiri rijói ne bichíwali olama mapurigá binói bichíwaga anili. ¹⁹ ¡'Yémitamo ke newalite ju! ¡Ayénachótamo mapurigá ke machíliami ju! Mapujiti echi jaré namuti mapu echo'ná moba ripáami mésachi muchúwaga 'yárami ju Riosi, échiko chopi wabé galabé niwárami ju mapujiti echi ripáami mesa wabé galabé ju. ²⁰ A'lí mapuyíripi ne bichíwaga anesa mapu binói ne bichíwali olama bilé namuti mapujiti echo'ná Juríosi ri'obáwalachi bacháami nirúami ripáami mesa ne wabé galabé ju, échiko echijiti ne bichíwaga ané, chopi binói ayénachó echirigá bichíwaga ané mapujiti echi jaré namuti mapu echo'ná muchúwaga 'yárami ju Riosi ayénachó ne wabé galabé ju. ²¹ A'lí echi jaré pagótami mapu ne bichíwaga ané mapu aboni ne bichíwali olama bilé namuti, mapujiti echi walubé Juríosi pagótami ri'obáwarachi wabé galabé ju, abóni echijiti bichíwaga ané, chopi aboni ayénachó echirigá bichíwaga ané mapujiti echi Walubela Riosi ne wabé galabé ju mapu echo'ná echi walubé Juríosi pagótami ri'obáwalachi bité. ²² A'lí echi jaré pagótami mapu ne bichíwaga ané mapu aboni ne bichíwali olama bilé namuti mapujiti echo'ná ripá riwigachi wabé galabé ju, abóniko echijiti bichíwaga ané. Chopi aboni ayénachó echirigá bichíwaga ané mapujiti echo'ná ripá riwigachi nirúami

ripabé wilíami Riosi asíbalachi ne wabé galabé ju. Ayénachó aboni echirigá bichíwaga ané mapujiti echi Walubela Riosi ne wabé galabé ju mapu echo'ná atí.

²³ ¡Ne wabé risúu olárami níibo 'yemi nularíwami binériami, 'yemi Bariseo anilíwami binériami ayénachó! ¡'Yémitamo ne wabé 'yékami ju! Mapujítitamo ne galá tibuka 'ya Riosi biléana rojonárami ibili makói echi jaré galabé sawala ichirúami mapu ikítamo napabú, mapurigá echi bawena anilíwami, echi auché bilé anérero anilíwami ayénachó, echi auché bilé komino anilíwami asíchiko. Chópitamo tarapé nijéwaga olali mapurigá ne wabé simírami 'wérali níili máputamo nijéwaga olabo mapurigá Riosi 'yemi mi nuleli, mapujítitamo ketasi galabé olali, nirapétamo natimali echi auché jaré pagótami, nirapétamo galá bichíili Riosi Ra'íchala. Arigá 'wérali níili máputamo echirigá suwaba nijéwaga olabo, ayénachó máputamo bilé rojonárami 'yabo Riosi, ibili makói echi jaré namuti ichirúami, mapu ikítamo napabú. ²⁴ ¡'Yémitamo mapurigá ke machíliami niráa ju, chópitamo arigá we nakí bayéranala auché jaré pagótami mapu ketasi machí mapo'ná aboni simiba! 'Yémitamo sinibí ne galá nijéwaga olá mapurigátamo ke 'me 'wérali nulérami níili máputamo olabo, chópitamo ketasi chirigá nijéwaga olá mapurigátamo ne wabé simírami 'wérali niráa nulérami níili máputamo olabo.

²⁵ Ne wabé risúu olálami níibo 'yemi nularíwami binériami, 'yemi Bariseo anilíwami binériami ayénachó. ¡'Yémitamo ne wabé 'yékami ju! Mapujítitamo galá kilí niráa ne galá bi'wá echi jaré vaso echo'ná machímana chopi niráa. Ayénachótamo ne galá kilí niráa ne galá bi'wá echi jaré bitoli echo'ná machímana chopi niráa, chópitamo echo'ná pachana 'yemi sulálachi ne buchíami niráa ju echi wabé chati oluwáwami, mapurigá echi chigólawami niráa, auché jaré wikabé namuti chati oluwáwami ayénachó. ²⁶ ¡'Yémi Bariseo anilíwami binériami mapurigá ke machíliami niráa ju! Ne bachá bi'wasi echo'ná pachánala echi vaso, ayénachó echo'ná pachánala echi bitólachi, mapurigá echo'ná machímana ayénachó ne galá bi'wíami níima!

²⁷ 'Yémi nularíwami binériami ne wabé risúu olárami níibotamo, 'yemi Bariseo anilíwami binériami ayénachó! ¡Wabé 'yékami jútamo! 'Yémitamo mapurigá jaréana kalirátachi chu'wechi ju, mapo'ná ne galá rosántami ju echo'ná machímana niráa, mapurigá echi jaré pagótami ne galá ba'yólama, chopi echo'ná pachana ne buchíami ju suwíami ochilá, ne suwaba echi wabé chati júkami ayénachó. ²⁸ Echirigá 'yemi achigórigá ne bichíwali galabé olánali chopi mapurigá echi auché jaré pagótami 'yemi mi riwimea echirigá oláachi, mapurigá aboni echirigá mayema máputamo ne galabé oláami ju. Chópitamo echo'ná pachana 'yemi sulálachi niráa ne wabé buchíami niráa ju echi

wabé 'yékuluwami jiti, ayénachó echi wabé chati oluwáwami jiti.

²⁹ ¡'Yémi nularíwami binériami ne wabé risúu olárami níibo, 'yemi Bariseo anilíwami binériami ayénachó! ¡'Yémitamo ne wabé 'yékami ju! 'Yémitamo arigá kalí niwiwa echo'na moba chu'wechi mapo'ná chu'wirótami níili echi jaré ki'yá piréami Riosi jiti nawésami, ayénachótamo we ba'yora mapo'ná chu'wirótami níili echi auché jaré ki'yá piléami mapu ne wabé galabé oláami níili. ³⁰ Ayénachótamo jeaní: A tamujé chabé ki'yá pirérasagá mapalí tamujé 'wénawala piréali, tamujeta ketasi ku'wiríbili mapalí aboni ko'yali echi jaré Riosi jiti nawésami. ³¹ 'Yémitamo echirigá ne bichíwaga nawésa, 'yemi aboni sayéraga, mapu 'yémitamo arigá tanala ju, echi jaré chabénala piréami mapu ko'yali echi jaré Riosi jiti nawésami. ³² ¡Jipi káraga olasi 'yemi ne suwaba mapurigá echi jaré 'yemi 'wénawala nakili olánala! ³³ ¡'Yémi mapurigá sinowi jútamo! ¡Mapurigá sayawi kúchuwala jútamo! Echijiti 'yémitamo ketasi omero galabé olayá. Ayénachótamo echijiti walú kastigo 'yárami níibo echo'ná ri'lé riáblochi mapo'ná walú rajá! ³⁴ ¡'Yémitamo wabé chati oláami ju! Echijiti Nijeni 'yemi mi yuwa julama jaré wabé galabé machíami rijói, auché jaré o'wéala Riosi jiti nawésami ayénachó. A'lí bichétamo arigá ko'wiboa jaré aboni. Ayénachótamo echo'ná jaréana kúrsichi michóniga ko'wiboa auché jaré aboni. Ayénachó echo'ná 'yemi ri'obáwalachi 'yémitamo waminá wipisopo auché jaré aboni. Ayénachótamo wabé kichiga a'najátabo auché jaré aboni, jena'í walúlachi jonsa, echo'ná auché jaréana o'wéalachi yénasí. ³⁵ Echijítitamo wi'nijírami níibo mapurigá ko'yáami niráa si'néami echi jaré wikabé galabé oláami pagótami, ne si'néami mapu ikí ko'wirúami níili jena'í wichimóbachi, ki'yá chokichí jonsa mapalí echi galabé oláami Abeli riwéami rijói mi'lílati, wakinana yénasí mapalí echi Sakarási riwéami rijói mi'lílati, echi mapu echi Berekási riwéami rijói ranala níili. A'lí 'yémitamo mi'yali echo'na machímana echi walubé Juríosi pagótami ri'obáwalachi, echo'ná bacháami mapo'ná echi jaré wikabé namuti ko'yagá 'yárami ju Riosi. ³⁶ Ne bichíwali Nijeni 'yemi mi jeané mapu 'yemi jipi piréami pagótami ne wabé 'wi'nijírami níima mapurigá ko'yáami niráa ne si'néami echi jaré galabé oláami pagótami mapu echirigá ko'wirúami níili.

Jesusi wabé natimali echo'ná Jerusalémachi piréami
(Lk. 13:34-35)

³⁷ Echalí Jesusi ayénachó jeaneli: ¡Ne wabé risúu olárami níibotamo 'yemi echo'ná Jerusalémachi piréami! 'Yémitamo waminá ko'yá echi jaré Riosi jiti nawésami, ayénachótamo riteti basibuka ko'yá echi auché jaré mapu Riosi júuli 'yemi mi nawésanala. ¡Nijeni wisabé nakili 'yemi mi nisénala mapurigá bilé tolí ranéami we nisé echi jaré binói níwala chulipi, mapalí binói we

rakó echi chulipi echo'ná ri'lé pachá binói analachi! ¡Chopi 'yémitamo ketasi nakili mapurigá Nijé 'yemi nimí nisema! ³⁸ ¡Nibira! 'Yémitamo ma waná chijanára-mi níbo jena'í 'yemi walúlawachi jonsa. ³⁹ Mapujiti Nijé 'yemi nimí jeané mapu 'yémitamo ma ketasi auchécho tamí riwiboa. Chópitamó arigá tamí riwiboa echalí ne jubá rawé mapalítamo jeaniboa: ¡Riosi ne wabé gal-abérali je'ná Rijói mapu ma ku nawá mapurigá ne Walubela niráa!

Jesusi bachá niráa nawésali jeanigá mapu echi walubé Juríosi ri'obáwalachi káraga najunárami níima riwéali
(Mr. 13:1-2; Lk. 21:5-6)

24 A'lí mapalí Jesusi ku simigá machínali echo'ná pachá echi walubé Juríosi pagótami ri'obáwalachi jonsa, echalí echi jaré mapu Binói binérali mulubéanalí Binói yuwa, mapurigá aboni galá 'nérama Binói Jesusi echi walú ri'obá. ² A'lí Jesusi jeaneli: 'Yémitamo galá ritiwá suwaba je'na walubé ri'obá. Chopi Nijeni ne bichíwali 'yemi mi ané mapu ne suwaba je'ná ri'obá waminá najunárami níima, mapu tarapé bilé rité jena'í tigótami aripima.

Je'ná jerigá ikimea, ke cho sébachi echalí ne jubá rawé
(Mr. 13:3-23; Lk. 21:7-24)

³ A'lí mapuyénasí Jesusi isábaga asali echo'ná ripá rabó Olíbochi anilíwachi, echalí echo'ná Binói yuwa mulubéanalí echi jaré mapu Binói binérali. A'lí aboni pe waná togá jeaneli: Tamujé tamí ané: ¿Kiríbuko je'ná jerigá ikimea? ¿Churigata galá machiboa mapalí ma ke 'me ayó sébachi níima mapurigá Mujemi ku nawama jena'í wichimóbachi? ¿Churigata galá machiboa mapalí ke 'me ayó níima echalí ne jubá suwibálawachi rawé?

⁴ Echalí Jesusi ku nijéwaga jeaneli: Ne galá 'nátaga tibusí 'yemi aboni niráa mapurigá ke wesi 'yemi mi 'yékama. ⁵ Mapujiti pe waminánomí wikabé rijói nolínama mapu ibili niráa wabé 'yékaka jeanimea: ¡Nijé binói ju echi Walubela Cristo! Ayena cho aboni echirigá anigá, ne wabé 'yékama wikabé auché jaré pagótami. ⁶ Echalítamo námabo wikabé sontarsi nakóami ra'ichálawachi. Ayena chótamo námabo wikanáami nakónalawachi. Chopi a aboni tibusí mapurigátamo ketasi majajabo, mapujiti arigá 'wérali ju mapurigá suwaba je'ná jeyiri ne bichíwali ikimea. Chopi echalí abijí ketasi cho níima ne jubá suwibálawachi rawé. ⁷ Mapujiti echalí rawé jaréana walula nulálachi kawírali piréami wabé nakoma, auché jaréana walula nulálachi kawírali piréami sayéraga. A'lí jaré o'wéala silíami pagótamawala ne wabé nakoma auché jaré o'wéala silíami pagótamawala sayéraga. Ayena cho wikabé pagótami ne wabé 'lochema. A'lí auché jaré wikabé pagótami ne wabé nayúkama. Ayena cho wikanáami jena'í wichimóbachi ne wabé nokomea kawí. ⁸ Echalí

je'ná jerigá chotama jena'í wichimóbachi piréami pagótami wabé risúu níliya. Chopi auché pe waminánomí aboni waminabi ne wabé simírami risúu nílama.

⁹ Echalí rawé aboni 'yemi mi nijima mapurigátamo ne wabé risúu olárami níibo. A'lí aboni 'yemi mi ko'wimea. A'lí si'néami echi auché jaré pagótami 'yemi mi echirigá ne wabé kichima mapujítamo tamí bichíyami ju. ¹⁰ Echalí wikabé ma ketasi tamí galá bichííma. Ayena cho jaré miná nijima auché jaré mapurigá aboni kastigo 'yárami níima. Ayena cho auché jaré a'nagupi ne wabé nakichima. ¹¹ A'lí wikabé 'yékaka nawésami nolínama, mapu wabé 'yékama wikabé auché jaré pagótami. ¹² A'lí mapujiti echalí ne wabé muwéwama echi wabé chati oluwáwami echijiti wikabé pagótami ma ketasi 'me kalema Riosi. ¹³ Chopi si'néami mapu ikí arigá galá bichíísama echalí ne jubá rawé yénasí, abóniko galá ku'wíratami níima. ¹⁴ A'lí je'ná Galabé Riosi Ra'íchala galá nawisárami níima ne suníami jena'í wichimóbachi, jeanigá mapu Riosi ne galá nulema echi jaré pagótami. Echalí ma sebama ne jubá suwibálawachi rawé.

¹⁵ Echo'ná Riosi Ra'íchala oselíwalachi osirúami ju mapurigá echi walula Riosi jiti nawésami Ranieli riwéami nawésali echi wabé chati suwibáliami namuti jiti rugá. (Galá níima mapuyiripi machiko oselí 'néniya, ne galá machisá je'ná jeyiri.) Echijiti mapalí 'yémitamo riwiboa echo'ná wabé galabéalachi atíami echi wabé chati suwibáliami namuti, ¹⁶ echalí 'yemi máputamo echo'ná Juréachi anilíwachi kawírali muchuwi miná júmsasi echo'ná jaréana ripá rabó. ¹⁷ Echalí rawé sébachi arigá 'wérali níima máputamo wabé yáati miná júmsabo. Echijiti a jaré 'yemi echo'ná 'yemi kalíllachi mulubé machímana muchísagá, ketasi auche-cho ku mo'wisí echo'ná pachá, jaré namuti úboya, chopi we yáati miná júmsasi. ¹⁸ Echalí a jaré 'yemi echo'ná kawichí nocha 'yénasagá, ketasi ku ro'wisí ku chapiboya 'yemi níwala kimá, chopi we yáati miná júmsasi. ¹⁹ A'lí Jesusi wabé natimaga jeaneli: Echalí rawé ne wabé simírami risúu olárami níima si'néami echi jaré muguí mapu ikí pocháami níimako, ayena cho ne si'néami mapu ikí kúuchi kúchuwami níimako. ²⁰ Wabé tansi Riosi mapu ketasi romó níima echalí rawé mapalí 'wérali níima máputamo miná júmsabo, ayena cho mapu ketasi isábawachi rawé níima. ²¹ Mapujiti echalí rawé jena'í wichimóbachi piréami pagótami ne wabé simírami risúu nílama. A'lí chabénala ke wesi siné echiyena risúu olárami níli, ki'yá chokichí jonsa mapalí Riosi niwali je'ná wichimoba, jipi rawé yénasí. A'lí waminánomí rawé ke wesi auché jaré echiyena risúu olárami níima. ²² A'lí a echi Walubela Riosi ariwésagá mapurigá jena'í wichimóbachi piréami pagótami ne wi'libé bamíwali echiyena risúu olárami níima, echalí ke wesi pagótami tibimi. Chopi Riosi ma nulali ma-

purigá echi pagótami pe okuáa bamíbali echirigá risúu olárami níima, mapujiti Binói wabé galeli echi jaré pagótami mapu Binói chapili.

²³ Echali rawé a bilé rijói 'yemi mi jeanésagá: ¡'Nesi, jena'í atí echi Cristo anilíwami mapu Riosi júuli jena'í wichimóbachí! A jeaniséagá kéremá: Echo'ná auché biléana atí echi Cristo anilíwami. ¡Ketasi bichíisi echirigá aníami rijói! ²⁴ Mapujiti jaré wabé 'yékami rijói jeanísiya nolínama: ¡Nijé binói ju echi Walubela Cristo anilíwami! A'lí auché jaré wabé 'yéka jeanimea: ¡Nijé binói ju bilé walubela Riosi jiti nawésami! A'lí aboni arigá wabé omériga olama wikabé namuti mapurigá ke wesi auché jaré pagótami omero olayá. A'lí aboni echirigá ologá we nakimea 'yékanala echi jaré mapu Riosi ma chapili mapurigá Binói níwala. Chopi aboni ketasi omérama 'yékanala echi jaré Riosi níwala. ²⁵ Nijeni echirigá ma 'yemi mi ne bachá niráa aneli ne suwaba mapurigá ne bichíwali ikimea pe waminánomí.

²⁶ Echirigá mapalí jaré 'yemi mi jeanésagá: Galá 'nesi, echi Cristo anilíwami echo'ná auché biléana waná kawichí atí. Echali ketasi echo'ná simasi mapujiti ketasi bichíwali níima. Ayena cho mapalí jaré 'yemi mi jeanésagá: Echi Cristo echo'ná pachá biléana kalírali atí. Echali ketasi bichíisi echirigá aníachi. ²⁷ Mapujiti mapurigá echo'ná nolírali ne wabé ni'wíka simea echo'ná panina jonsa, echo'ná tu bo'ónala yénasi, echirigá achigórigá Nijeni ku nolínama. Nijeni wilárami níili mapurigá Ku'wíríami niráa.

²⁸ Chopi 'yémitamo wabé chati oláami ju, echijiti echi jaré 'yemi sayela ma sisáa, 'yemi mi suwábamiré mapurigá echi jaré wikabé wilú waminá suwama echi jaré namuti suwíami.

Echali ne jubá rawé Jesucristo riwirúami níima ripá nolírali ku nolínachi

(Mr. 13:24-37; Lk. 21:25-33; 17:26-30, 34-36)

²⁹ A'lí waminánomí ma sunisa echali rawé mapalí jena'í wichimóbachí piréami echirigá ne wabé risúu olárami níima, echali we rokowama echi rayénali, ayena cho echi michá ma ketasi ratábama. A'lí echi jaré sopolí waminá rujuima, echo'ná ripá jonsa. A'lí ne suwaba echi jaré namuti echo'ná ripá nirúami echirigá waminá nakulíwarami níima. ³⁰ A'lí Jesusi jeanili: Nijé Binói wilárami níili mapurigá Ku'wíríami niráa. A'lí echali ne jubá rawé Nijé Binói riwirúami níima echo'ná ripá nolírali ku nolínachi, wabé omérami niráa. Echali si'néami pagótami ne suníami jena'í wichimóbachí tibíami wabé o'monama mapalí aboni tamí riwimea echo'ná ripana nolírali ku nolínachi. Echali Nijeni ne wabé omérami níima, ne wabé Walubela ayena cho. ³¹ Echali rawé Nijeni julama echi jaré keni o'wéala kapitánawa ne wabé iwéami taka napabuma ne si'néami mapu ikí Nijé Binói chapili, ne suníami a'nagú jena'í

wichimóbachí piréami, echo'ná wabé 'naka jonsa, echo'ná tu bo'ónala yénasi.

³² Ayena cho Jesusi jeanili: Ne galá binési mapurigá Nijeni 'yemi mi irétaga binérama, bilé chuná jiti rugá. Mapujiti mapalí echi chuná chaliwala ma chota súsiya, mapalí ma galá sawará, echalítamo galá machí mapu ma ne mulubé kuwesámaré. ³³ Echirigá ayena cho mapalítamo riwiboa echiriga íkiachi suwaba je'ná jeyiri namuti, echali galá machisi mapu ke 'me ayó suwibama suwaba namuti, ayena cho mapu Nijeni ma ne mulubé sébachi inaro echo'ná mulubé yéachi niráa. ³⁴ Ne bichíwali Nijeni 'yemi mi jeané mapu ke cho suwisáa si'néami je'ná pagótami, ne suwaba je'ná jerigá ikimea. ³⁵ Echo'ná ripá suwaba káraga suwibama. Jena'í wichimóbachí ayena cho suwaba suwibama. Chopi echi Nijé Ra'íchala ketasi siné suwibama.

³⁶ Chopi ke wesi galá machí chu kilíbuko echirigá ikimea. Nibilé wesi galá machí chu yénako níima echali rawé mapalí echirigá ikimea. Echi jaré Riosi kapitánawala echo'ná ripá riwigachi muchúami nirapé machí. Nijé ketasi cho machí, mápuni birépi Riosi Ranala ju. Chopi echi Nijé Onolá bi'nélipi galá machí chu kilíbuko echirigá ikimea. ³⁷ Chopi mapurigá níili chabé ki'yá mapalí echi Noé riwéami rijói bitéali jena'í wichimóbachí, echirigá achigórigá níima echali ne jubá rawé mapalí Nijeni ku nolínama jena'í wichimóbachí. Nijeni wirárami níili mapurigá Ku'wíríami niráa. ³⁸ Mapujiti echali chabé ki'yá rawé mapalí ketasi cho ne ripabé buchili ba'wí ne suníami jena'í wichimóbachí, echali echi jaré ki'yá piréami pagótami chopi wabé ko'ogá, bajiga muchili. Ayena cho jaré aboni we ni'wítiya muchili. Auché jaré 'yárami níili mapurigá ukunema. A'lí aboni echirigá olali echali rawé iyénasi mapalí echi Noé bakili echo'ná pachá echi walubé kalírali ba'wichí moba yénami, arka anilíwami. ³⁹ A'lí echi pagótami ketasi cho galá machili mapu echi ba'wí echirigá ne ripabé buchima riwéali. Chopi mapalí ma chótali echirigá buchisiyachi, echali aboni machili mapu echirigá ikimea riwéali. A'lí ne si'néami aboni miná si'lili echo'ná ba'wírali. A'lí echirigá achigórigá ikimea mapalí Nijeni ke sayiná ku nolínama jena'í wichimóbachí. Nijeni wilárami níili mapurigani Ku'wíríami niráa. ⁴⁰ Echali rawé okuá rijói echo'ná biléana kawichí nocha 'yénama. Echali bilé ku torúami níima, chopi auché bilé ariwérami níima. ⁴¹ Echali rawé okuá muguí napawika batuya uchuma. A'lí bilé ku torúami níima, chopi auché bilé ariwérami níima. ⁴² Ne galá 'nigá muchisi 'yemi, mapujítitamo ketasi machí chu kilíbuko Nijeni ku nolínama jena'í wichimóbachí. Nijeni 'yemi Walubélawala ju. ⁴³ Chopi je'ná galá machisi: Echi rijói kalíwami a galá machiséagá mapu chu yénako nawama riwéali echi chigórami, ne bichíwali echi rijói kalíwami ne galá tibumi, a'lí ketasi ariwemi mapurigá binói kalíllachi miná chigósarami níimi. ⁴⁴ Echijiti ayena

cho ne galá a'láraga muchisi 'yemi, mapujiti Nijeni ke sayiná ku nolínama. A'lí 'yémitamo ketásirapé machi-boa chu yénako níima mapalí Nijeni ku nolínama. Nijeni wilárami níili mapurigá Ku'wíríami niráa.

**Echi galabé oláami pioni, echi ketasi galá oláami pioni
yuwa**
(Lk. 12:41-48)

⁴⁵ Echi wabé galá oláami pioni, galabé 'nátami, echi ju mapu echi walubela kalíwami we wilá mapurigá walula nuláami niráa, echi auché jaré echo'ná binói kalíflachi piréami yuwa, mapurigá échiko ibili niráa 'yami ko'wáami mapalí ma seba tétali. ⁴⁶ Echali mapalí echi walubela kalíwami ku nawama, echiyiri pioni ne wabé ganílatami níima mapalí binói riwirúami níima echirigá oláachi. ⁴⁷ Echali Jesusi waminabi jeaneli: Ne bichíwali Nijé 'yemi nimí ané mapu echi walubela kalíwami we nulema echi pioni tibúnala ne suwaba Binói níwala namuti. ⁴⁸ Chopi siné káachi echi pioni ketasi galabé oláami níisagá, a'lí échiko a binói niráa jeansáagá: Echi nijé walubélawala ketasi we yáati ku nolínamiré. ⁴⁹ Ayena cho siné káachi chotásagá chi'wana echi auché jaré pióntami, ayena cho chotásagá ko'yá, ayena cho bajiya echi jaré tékuri yuwa, ⁵⁰ echali rawé ke sayiná ku nolínama echi walubela kalíwami mapalí echi chati oláami pioni ketasi 'nátaga buwé. Echali rawé ke sayiná ku nolínama mapalí echi pioni ketasi machí chu yénako ku nolínama riwéali. ⁵¹ Echali echi walubela kalíwami ne walú kastigo 'yama echiyiri pioni. A'lí binói waminá achama echi auché jaré wabé 'yékami yuwa. A'lí echo'ná si'néami aboni ne wabé nalákama, ayena cho ne wabé kí'lákama aboni ramilá, mapujiti aboni ne wabé risúu olárami níima.

Jesusi binera echi jaré makói iwé jiti rugá

25 Mapalí Riosi galá nulé jena'í wichimóbachí piréami pagótami, echali mapuyiri ju mapalí makói iwé natipásiya simíbali echi bilé rijói mapu niwíami níima riwéali. Echali ibili echi jaré iwé chapigá toli bilé lámpara anilíwami. ² A'lí malí echi jaré iwé galá 'nátami níili, chopi echi auché jaré malí ketasi galabé 'nátami níili. ³ A'lí echi jaré malí ketasi galabé 'nátami, aboni yuwa toli aboni níwala lámpara, chopi aboni ketasi toli echi petróleo anilíwami. ⁴ Chopi echi auché jaré malí galabé 'nátami ayena toli echi petróleo echo'ná aboni níwala limétachi, echi jaré aboni níwala lámpara yuwa. ⁵ A'lí mapalí echi rijói mapu niwíami níima riwéali ketasi we yáati nawali, echali ne si'néami echi jaré iwé wabé kochináliga, galá kochili.

⁶ A'lí echali nasipa rokogó jaré o'weli ra'íchami galá námami níili jeanigá: ¡Galá busuresi! Echi rijói mapu niwíami níima riwéali ma ne mulubé inaro! ¡Echo'ná

simíbaga 'yemi, ne galá naripasi! ⁷ A'lí ne si'néami echi jaré iwé ma ku muchísaga, galá ku katéwali aboni níwala lámpara. ⁸ Echali echi jaré ketasi galá 'nátami jeaneli echi auché jaré wabé galabé 'nátami, jeanigá: Pe taa tamujé tamí 'yasi echi 'yemi níwala petróleo, mapujiti tamujé níwala lámpara ma ne cho'wísimi. ⁹ Chopi echi jaré galabé 'nátami ku nijéwaga jeaneli: Ne bachá simíbaga 'yemi echi jaré ralinéami yuwa, mapurigá 'yemi aboni galá raliboa. Echirigata ketasi newalebo tamujé, ayena cho 'yemi aboni echirigá galá níwabo. ¹⁰ Chopi mapu yénasí aboni echirigá raliboya simíbali, echali ke sayiná nawali echi rijói mapu niwíami níima riwéali. Echali binói yuwa mo'wili echo'ná niwíowachi ne si'néami echi jaré iwé mapu ma galá a'láraga muchili. A'lí echali ma 'yératami níili echi 'yera.

¹¹ Chopi péé wilibeko echi auché jaré ketasi galabé 'nátami iwé ayena cho echo'ná 'yéachi sili. A'lí aboni wabé bayegá jeaneli: ¡Walubela! ¡Walubela! ¡Tamujé tamí irapi! ¹² Chopi echi walula echo'ná pachá jonsa ku nijéwaga jeaneli: ¡Ne bichíwali nijeni 'yemi mi ané mápuni ketasi 'yemi mi machí! ¹³ Echali Jesusi ayena cho jeaneli: Echijiti ne galá 'nagá muchisi si'néami 'yemi, mapujítitamo ketasi machí chu kilíbuko Nijeni ku nawama jena'í wichimóbachí. Nirapétamo machí chu yénako níima echali rawé mapalini ku nawama. Riosi tamí wilali mapurigá Ku'wíríami niráa.

**Jesusi binera echi jaré wabé natéami namuti wenomí
jiti rugá**

¹⁴ Mapujiti mapalí Riosi galá nulé jena'í wichimóbachí piréami pagótami, echali mapuyiri ju mapalí bilé rijói ne wabé mikabé simináali. Echali echi rijói bayegá echi jaré binói piónowala, a'lí aboni yuwa tanéwaga 'yali suwaba binói níwala wenomí. ¹⁵ Echali bilé pioni 'yárami níili malí wabé natéami namuti wenomí. Auché bilé ketasi 'me 'nátami 'yárami níili okuá. Auché bilé 'yárami níili pe bilepi. Ibili niráa echirigá 'yárami níili achigórigá mapurigá aboni ibili 'nátami níili. Echali echi rijói miná mikabé simili. ¹⁶ A'lí echi pioni mapu 'yárami níili echi malí wabé natéami namuti wenomí, échiko ku simigá namuti ralagá, ku ralinéaga galá meli auché jaré malí wabé natéami namuti wenomí.

¹⁷ Achigórigá olali echi auché bilé pioni mapu 'yárami níili echi okuá wabé natéami namuti wenomí. Échiko ayena cho meli auché jaré okuá wabé natéami namuti wenomí. ¹⁸ Chopi echi mapu pe bilepi 'yárami níili, échiko ku simigá echo'ná wi'yerali joka nasoli echi bilé wabé natéami namuti wenomí.

¹⁹ A'lí wabé kinánokuá rawé ma ku nawali echi jaré pióntami walubélawala. Echali binói nakili bujénala echi jaré pióntami níwala wenomí. ²⁰ A'lí echi bilé pioni mapu 'yárami níili echi malí wabé natéami namuti wenomí, échiko nawagá ku pali auché jaré malí. A'lí

binói jeaneli: Walubela, mujé tamí 'yali malí wabé natéami namuti wenomí. Nibira, Nijeni namuti ralagá, auchécho ku ralinéaga ma galá meli auché jaré malí wabé natéami namuti wenomí. ²¹ Echali echi binói walubélawala jeaneli: We galá ju mujé galabé pióntami, we galá oláami. Mujemi pe okuáa jiti ma ne galabé olali. Jipi nijeni mi auchécho waminabi wikabé namuti nulema tibúnala. ¡Tamí yuwa pachá simiró, ne wabé kanili! Nijeni mujé Walubélawala ju. ²² A'lí echi auché bilé pioni mapu 'yárami níili okuá wabé natéami namuti wenomí, échiko ayena cho nawagá jeaneli: Walubela, mujé tamí 'yali okuá wabé natéami namuti wenomí. Nibira, nijeni namuti ralagá, auchécho rarinéaga, ma galá meli auché jaré okuá. ²³ Echali echi binói walubélawala jeaneli: We galá ju mujé galabé pióntami, we galá oláami. Mujemi pe okuáa jiti ma ne galabé olali. Jipi nijeni mi auchécho waminabi wikabé namuti nulema tibútanala. ¡Tamí yuwa pachá simiró, ne wabeni kanili! Nijé mujé Walubélawala ju. ²⁴ A'lí echi auché bilé mapu 'yárami níili pe bilepi wabé natéami namuti wenomí, échiko ayena cho nawagá jeaneli: Walubela, nijeni mi galá machili mápumi we jiwériga olá tamujé tamí yuwa. Nijeni machí mápumi we sikiré echi turío mapo'ná mujé binói ketasi ichali. Ayena cho mi we chapí echi turío, mapo'nami ketasi mosili echi rakala. ²⁵ Echijiti nijeni wabé majaga ku simigá, echo'ná wi'yérali joka nasoli echi mujé níwala wabé natéami namuti wenomí. Jena'í atí. ¡Ku togá mujé níwala wenomí! ²⁶ Echali echi pioni walubélawala ku nijéwaga jeaneli: Mujé we nasínami, chati oláami pioni, mujemi galá machili mapu nije we sikilé echi turío mapo'nani ketasi ichali, ayena cho mápumi we chapí echi turío mapo'nani ketasi mosili echi rakala. ²⁷ Echijiti galá níili 'yásami echi nijé níwala wabé natéami namuti wenomí, echi jaré wenomí tibúami yuwa, mapurigá mapalini ku nawasa, echalini ku naremi echi nijé níwala wenomí, ayena cho echi mapu waminabi muwéali. ²⁸ Echali echi walula jeanigá nuleli echi auché jaré pagótami echo'ná muchúami: ¡Ku 'yesi echi wabé natéami namuti wenomí! ¡Ayena cho 'yasi echi auché bilé rijói mapu ma niwa makói wabé natéami namuti wenomí! ²⁹ Mapujiti mapuyíripi ma wikabé níwako, échiko waminabi auché jaré wikabé 'yárami níima. Chopi mapuyíripi ketasi níwako, échiko káraga 'yérami níima echi pe okuáa mapu binói abijí niwa. ³⁰ A'lí echi walubela waminabi jeaneli echo'ná muchúami pagótami: Waminá machíami ne wabé chati rokowárali pasi echi ketasi galabé oláami pioni. ¡Echo'ná binói ne wabé nalama, ayena cho ne wabé ki'lákama binói ramilá!

Ne si'néami pagótami justicia olárami níima

³¹ A'lí mapalí Nijeni ku nolínama, echali Nijeni ne wabé Walubela níima. Echali ne si'néami echi jaré

o'wéala Riosi kapitánawala ayena cho simea tamí yuwa. A'lí Nijeni asibama echo'ná Nijé níwala ripabé asibálawachi mapurigá ne Walubela niráa. Nijeni wilárami níili mapurigá Ku'wiriami niráa. ³² A'lí echo'ná bacháami tamí yuwa napabúrami níima ne si'néami echi jaré pagótami mapu ikí piréali jena'í wichimóbachí ki'yá chokichí jonsa. A'lí Nijeni okoná niráa rojonama ne si'néami aboni, mapurigá bilé rijói namuti niséami galá waná rojuana echi jaré chibá, ayena cho mapurigá binói waná rojuana echi jaré bo'wá. ³³ A'lí Nijeni echo'ná watonachi tamí yuwa uchuchama echi jaré bo'wá. Chópini echo'ná o'winachi tamí yuwa uchuchama echi jaré chibá. ³⁴ Echali mapurigá Walubela Silíami niráa Nijeni jeanema echi jaré echo'ná watona muchúami: Wakiná simasi 'yemi mapu echi Nijé Onolá ma 'yemi mi ne wabé galabélatali. Jipi jonsa echi Nijé Onolá 'yemi mi ne galá nulema, mapurigá Binói 'yemi mi nulema riwéali ki'yá chokichí jonsa, mapalí jena'í wichimóbachí ke cho gayénarami níili. ³⁵ Mapujiti Nijeni wabé 'locheli, a'lí bichétamo tamí galá kóoli. A'lí Nijeni ne wabé balámali, a'lí bichétamo tamí 'yali mápumi bajima. A'lí Nijeni si'wina bitéami níili, a'lí bichétamo tamí galá nareli echo'ná 'yemi pirélachi. ³⁶ A'lí Nijeni ketasi napáchali, a'lí bichétamo tamí galá napachátali. A'lí Nijeni nayúami níili, a'lí bichétamo tamí 'nébiya sili. A'lí Nijeni bachárami níili echo'ná kumurachi, a'lí bichétamo tamí yuwa 'nébiya sili. ³⁷ A'lí echi jaré galabé oláami ku nijéwaga jeanema: Walubela, ¿Chu kilíbukota mi riwali 'lochéami, a'lí bicheta mi kóoli? ¿Chu kilíbokota mi riwali balámami, a'lí bicheta mi 'yali mápumi bajima? ³⁸ ¿Chu kilíbukota mi riwali si'wina bitéami niráa, a'lí bicheta mi nareli echo'ná tamujé pirélachi? ¿Chu kilíbukota mi riwali ke napáchami, a'lí bicheta mi galá napachátali? ³⁹ ¿Chu kilíbukota mi riwali nayúami niráa, echo'ná kumurachi bachárami níisa keremá, a'lí bicheta mi yuwa sili? ⁴⁰ A'lí Nijeni mapurigá Walubela Silíami niráa ku nijéwaga jeanema: Ne bichíwali 'yemi nimí ané mapu átamo echirigá olásagá mapuyíripi bilé Nijé ritémawala yuwa, echalítamo ayena cho echirigá tamí olali.

⁴¹ Echali Nijeni ayena cho jeanema echi jaré echo'ná o'wina tamí yuwa muchúami, jeanigá: ¡Waminá chakena simíbaga 'yemi wabé chati oláami pagótami! ¡Echo'ná wabé chati sinibí rajáami na'írali simíbaga 'yemi! Echo'ná a'láratami níili mapurigá echi riablo echo'ná pátami níima, echi jaré binói kapitánawala ayena cho. ⁴² Mapujiti Nijeni we 'locheli, ali bichétamo ketasi tamí kóoli. A'lí Nijeni ne wabé barámali, a'lí bichétamo ketasi tamí 'yali mápumi bajima. ⁴³ A'lí Nijeni si'wina bitéami níili. A'lí bichétamo ketasi tamí nareli echo'ná 'yemi pirélachi. A'lí Nijeni ketasi napáchami níili, a'lí bichétamo ketasi tamí napachátali. A'lí Nijeni nayúami níili, ayena choni echo'ná kumurachi bachárami níili, a'lí bichétamo ketasi tamí yuwa 'nébiya sili.

⁴⁴ A'lí aboni ayena cho tamí ku nijéwaga jeanema: Walubela, ¿chu kilíbukota mi riwali 'lochéami niráa, barámami niráa keremá, si'wina bitéami niráa keremá, ke napáchami niráa keremá, nayúami niráa keremá, pachá bachárami niráa keremá, mapalita ketasi mi ku'wírali? ⁴⁵ A'lí Nijeni ku nijéwaga jeanema: Ne bichíwali 'yemi nimí ané mapu a ketásitamo echirigá ku'wírasagá ibili je'ná jaré mapu risúu olárami níili, echarítamo ketasi cho echirigá tamí ku'wírali. ⁴⁶ A'lí je'ná jaré chati oláami waminá simama echo'ná mapo'ná aboni sinibí niráa kastigo 'yárami níima. A'lí echi jaré galabé oláami simama echo'ná mapo'ná aboni sinibí niráa pirélama.

Echi jaré Jesusi sayera a'nagupi katéwali mapurigá Binói mi'lirúami níima

(Mr. 14:1-2; Lk. 22:1-2; Jn. 11:45-53)

26 A'lí echalí mapalí Jesusi ma sunili je'ná jerigá ra'íchiya echi wikabé pagótami, echalí Binói waminabi aneli echi jaré mapu Binói binérali jeanigá: ² 'Yémitamo galá machí mapu jipi jonsa, okuá chi'rigá sebama echi omówali mapalí echi jaré kúuchi bo'wá ko'wirúami níima. Echalí Nijeni nijírami níima mapurigá echi jaré pagótami tamí mi'limea, echo'ná biléana kúrsichi michóniga. Nijeni wilárami níili mapurigá ku'wíriami niráa. ³ A'lí echalí rawé mapalí Jesusi echirigá ra'íchali, echalí echi jaré o'wéala sacerdote ma napawika muchili echo'ná echi ne walula sacerdote, Kaijasi riwéami bitélachi machímana ri'narátachi. Ayénachó echi auché jaré nulalíwami binériami echo'ná aboni yuwa napawika muchili, echi auché jaré o'wéala ochérami asíchiko. ⁴ Echalí si'néami aboni napawika katéwaga ra'íchali mapu chúrigá 'yékami niráa chapirúami níima echi Jesusi mapurigá Binói miná mi'lirúami níima. ⁵ Chopi aboni a'nagupi jeaneli: Arigá ketásita chapiboa echi Jesusi mapuyénasí abijí omowálawachi rawé ju, mapurigá echi auché jaré wikabé pagótami ketasi ne wabé simírami na'áwama.

Bilé mukí ucheli wabé su'weti júkami aceite echo'ná Jesusi mo'ólachi

(Mr. 14:3-9; Jn. 12:1-8)

⁶ Echalí Jesusi echo'ná Betániachi anilíwachi asali, echo'ná echi Simoni bitélachi, echi mapu chabénala wabé chati cháa nayúami níili. ⁷ A'lí mapalí Jesusi echo'ná ko'yá asali, echalí echo'ná nawali bilé mukí, bilé limeta chapigá, echi mapu rité alabástro anilíwami jiti niwárami níili. A'lí aceite we su'weti júkami, wabé natéami, manili. Echalí echi mukí ne suwaba ro'weli echo'ná Jesusi mo'ólachi. ⁸ A'lí echi jaré mapu Jesusi binérali ma je'ná jerigá 'nénasa, ne wabé na'áwali. Echalí aboni a'nagupi ra'íchaga jeaneli: ¡Baji, je'ná wabé natéami aceite wepi ri'echárami níili! ⁹ Mapujiti je'ná

aceite ne wabé simírami natéami níili. Ralinéasagá galá níimili, mapurigata ku'wíрабо echi jaré wabé tisúwati echi wikabé wenomí jiti. ¹⁰ A'lí Jesusi galá machigá je'ná jerigá aníachi aboni, echalí Binói jeaneli: ¡Ketasi echirigá riwératasi je'ná mukí! ¡Binói echirigá ologá we galabé niráa tamí olali! ¹¹ Mapujiti ne sinibí niráa 'yemi mi yuwa muchima jaré we tisúwati pagótami. Chopi Nijeni ketasi 'yemi mi yuwa asimea ne sinibí niráa. ¹² Mapujiti mapalí je'ná mukí tamí ucheli je'ná wabé su'weti júkami jiti, echi binói ne bachá niráa echirigá olali mapurigá echi jaré pagótami tamí uchema mapalí Nijeni ma mukusáa, chu'wirótami níima. ¹³ Ne bichíwali 'yemi nimí ané mapu kanápuromí jena'í wichimóbachi mapo'ná je'ná we galabé Riosi Ra'íchala nawisárami níima, echo'ná ayénachó galá iré-tarami níima mapurigá je'ná mukí olali, mapurigá ne si'néami pagótami galá machimea mapurigá binói galá tamí olali.

Echi Júresi Jiskarioti nijili Jesusi

(Mr. 14:10-11; Lk. 22:3-6)

¹⁴ Echalí bilé rijóí, Júresi Jiskarioti riwéami, echi mapu bilé níili echi jaré makói miná okuá, échiko katéwaga ra'íchali echi jaré o'wéali sacerdote yuwa, ¹⁵ a'lí binói jeanigá rukueli: ¿Píritamo tamí 'yabo mapurigá nijeni nijima echi Jesusi, mapurigá 'yémitamo galá chapiboa? A'lí aboni baisá makói chirúlami wenomí plata natétali. ¹⁶ A'lí echalí jonsa echi Júresi Jiskarioti we 'nátali mapu chu kiríbuko galá níima mapu binói nijima echi Jesusi, mapurigá echi jaré Jesusi sayela chapimea.

Echi Walubela Jesucristo ko'wali echi jaré yuwa mapu Binói binérali

(Mr. 14:12-25; Lk. 22:7-14, 21-23; Jn. 13:21-30)

¹⁷ Echalí sébachi níili ne bachá omowálawachi rawé mapalí echi jaré Juríosi pagótami ko'wali echi jaré pani, ke nasówarami echi lewadura anilíwami, echi mapu jiti echi pani we galabé niwaliwa. Echalí echi jaré mapu Jesusi binérali, si'néami echo'ná Binói yuwa jeanigá sili: ¿Kumi mi nakí máputa a'láрабо mapurigami ko'mea echi kúuchi bo'wá sapala, jipi omowálawachi rawé? ¹⁸ A'lí Jesusi jeaneli: Echo'ná walúlachi simíbaga, bilé rijóí yuwa mapu Nijé 'yemi nimí riwírama. Echalí jeanesi: Echi Binériami mi jeané: Nijé tétawala ke 'me ayó sebama. Jipi rawé, echo'ná mujé bitélachi Nijeni omáwaga ko'mea echi bo'wá sapala awérami, echi jaré mapu Nijeni binérali yuwa. ¹⁹ Echalí echi jaré binéami echirigá olali mapurigá Jesusi nuleli aboni. A'lí aboni galá a'lárali mapurigá si'néami aboni omáwaga ko'mea echi bo'wá sapala awérami echalí omowálawachi rawé. ²⁰ A'lí ma alíwachi echalí rawé, echalí Jesusi asíbali echo'ná ko'wáwachi echi jaré makói miná okuá yuwa. ²¹ A'lí mapalí aboni echo'ná ko'yá muchili, echalí Jesusi

jeaneli: Ne bichíwali Nijeni 'yemi mi ané mapu bilé 'yemi tamí nijima mapurigá echi jaré tamí sayérami arigá tamí chapimea. ²² Echali aboni wabé o'móniga chótali ibili niráa jeanigá: ¿Walubela, acha nijé níimaré? ²³ A'lí Jesusi ku nijéwaga jeaneli: Echi bilé 'yemi mapu jena'í bilénapi bitólachi tamí yuwa pagueko, échiko tamí nijima. ²⁴ Ne bichíwali suwaba tamí yuwa ikimea achigórigá mapurigá tamí jiti rugá osirúami ju echo'ná Riosi Ra'íchala oselíwalachi. Riosi tamí wilali mapurigá Ku'wíriami niráa. Chopi ne wabé risúu nílama echi rijói mapu tamí nijima mapurigá echi pagótami tamí chapimea. Ne galá níimili echiyiri rijói ketasi cho ranarúami níisa. ²⁵ A'lí echi Júراسи níili mapu nijima riwéali. Échiko ku nijéwaga jeanigá rukueli: Binériami, ¿Acha nijé ju mápuni mi nijima riwéali? Echali Jesusi ku nijéwaga jeaneli: ¡Mujemi ne bichíwaga anili mapu mujemi ju! ²⁶ A'lí mapuyénasí aboni ko'yá muchili, Jesusi chapigá bilé walú pani, Riosi yuwa ra'íchaga tánali mapurigá galabélatama. A'lí Binói rojuánaga 'yali ne si'néami echi jaré mapu Binói binérali. Echali jeaneli: Chapigá kosí. Je'ná ju Nijé sapala. ²⁷ A'lí Jesusi chapili echi vaso mapo'ná maníami níili echi uva anilíwami ba'wila. A'lí ma natétara 'yasa Riosi, si'néami 'yali bajínala. A'lí jeaneli: Si'néami 'yemi galá bajisi je'ná. ²⁸ Mapujiti je'ná ju Nijé lalá, echi mapu Riosi bukulíwami niráa bichíwaga anili mapu wikabé pagótami jiti ku'luwárami ju, mapurigá aboni chati olalila ku wikáwarami níima. ²⁹ A'lí Nijeni 'yemi mi ané mapu jipi jonsa ketásini waminabi bajima je'ná uva anilíwami ba'wila. Chópini auchécho bajima echali rawé mapalí Nijeni bukulí bajima si'néami 'yemi yuwa echali mapalí Nijé Onolá galá nulema jena'í wichimóbachí piréami pagótami.

Jesusi bachá niráa nawésali jeanigá mapu echi Pegro 'yékaka animea mapu binói ketasi machili echi Jesusi
(Mr. 14:26-31; Lk. 22:31-34; Jn. 13:36-38)

³⁰ A'lí mapalí aboni ma nawajili, echali aboni ku simíbali echo'ná ripá rabó Olíbochi anilíwachi. ³¹ A'lí Jesusi jeaneli: Téliko rokogó si'néami 'yémitamo tamí waminá bi'neli ariwebo, mapurigá tamí jiti rugá, je'ná jerigá osirúami ju: Echi bo'wá Niséami mi'lirúami níima, a'lí echi jaré Binói pugula bo'wá waminá chijanárami níima. ³² Chopi mapalí Nijeni ma ku owinsa, echalini bachá simea echo'ná Galiléachi anilíwachi kawírali. A'lí 'yémitamo ayénachó pe wakinana echo'ná simabo. ³³ Echali echi Pegro ku nijéwaga jeaneli: ¡A ne si'néami echi auché jaré mi bi'neli ariwésagá, nijeni ketasi siné mi bi'neli ariwema! ³⁴ Echali Jesusi jeaneli: Ne bichíwali Nijé nimí ané mapu jipi rokogó ke cho kusúwachi echi tolí, echali mujemi baísá chokéami animea mápumi ketasi tamí machí. ³⁵ A'lí echi Pegro jeaneli: ¡Arigá ne wabé 'wérali níisagá mapu nijeni mi yuwa mukumea,

ke sineni animea mápuni ketasi mi machí! A'lí ne si'néami echi auché jaré binéami achigórigá anili.

Echo'ná Jechamanichi anilíwachi Jesusi we ra'icha Riosi yuwa
(Mr. 14:32-42; Lk. 22:39-46)

³⁶ A'lí Jesusi nawali echo'ná biléana mapo'ná Jechamanichi anilíwachi níili. Ne si'néami echi jaré mapu Binói binérali ayénachó sili. Echali Jesusi jeaneli: Jena'í muchisi mapuyénasí Nijeni pe minana simigá ra'íchama Riosi yuwa. ³⁷ A'lí Jesusi echo'ná Binói yuwa togá echi Pegro, ayénachó echi okuá Sibiréo tanala, a'lí chótali ne wabé siwega o'mona. ³⁸ Echali Jesusi jeaneli: Nijeni ne wabé simírami o'mona ne sulachí niráa. ¡Echijiti Nijeni ne noguí mukuméaré! Jena'í tibisi. Galá 'nagá muchisi tamí yuwa. ³⁹ A'lí pe waminana simigá, Jesusi akaná chukúbage, Riosi yuwa ra'íchaga jeaneli: Nijé Onolá, a Mujé echirigá nakisáagá, tamí ku'wiro mapurigani ketasi risúu olárami níima. Chopi ketasi tamí olá mapurigá Nijé Binói chopi nakí. Tamí olá mapurigá Mujé Binói nakí.

⁴⁰ Echali pe wakinana ma ku nawagá mapo'ná abijí muchili echi auché jaré mapu Jesusi binérali, echali Binói jeaneli echi Pegro: ¡'Yémitamo arigá ketasi omérali péé téeli 'nagá muchuwa tamí yuwa! ⁴¹ ¡Ne galá 'nagá muchisi! Riosi yuwa tániga ra'ichasi, mapurigátamo ketasi chati olabo mapalí echi riablo 'yemi mi wabé chati olánalama. Ne sulachí niráa 'yémitamo ne wabé galabé olánali, chopi 'yemi aboni ketasi omérami ju galabé olayá.

⁴² A'lí Jesusi auchecho siné Riosi yuwa jeanigá ra'íchali: Nijé Onolá, a mi arigá nakisáagá mapurigá Nijeni risúu olálami níima, ne suwaba galá olálami níilaga mapurigá Mujé Binói nakí. ⁴³ A'lí Jesusi auchecho siné ku nawagá, auchecho siné riwali we kochigá bitíami, mapujiti aboni ne wabé kochináali.

⁴⁴ A'lí Jesusi ku ariwesa, auchecho siné simili. A'lí baísá chokéami Riosi yuwa ra'íchaga, achigórigá anili. ⁴⁵ A'lí Jesusi ku nawagá mapo'ná bitili echi jaré mapu Binói binérali, echali jeaneli: Ma kochisí. Ma galá isábasi. ¡Nesi! Ma seba tétali. Nijeni ma nijírami níima mapurigá echi jaré chati oláami pagótami tamí chapimea. Nijeni wilárami níili mapurigá Ku'wíriami niráa. ⁴⁶ ¡Jáasi! Ma simabo. Galá 'nesi. Ma nawali echi mapu tamí nijima.

Jesusi borogá tórati
(Mr. 14:43-50; Lk. 22:47-53; Jn. 18:2-11)

⁴⁷ Echali abijí ra'íchachi Jesusi, echo'ná nawali echi Júراسи, echi mapu bilé níili echi auché jaré makói miná okuá yuwa. Ayénachó echi Júراسи yuwa sili wikabé pagótami ripiyá kami, auché jaré kusí kami ayénachó. A'lí si'néami aboni nulélati echi jaré o'wéala sacerdote

jiti, echi jaré o'wéala ochérami jiti ayénachó. ⁴⁸ A'lí echi mapu nijili, chabénala niráa, katéwaga jeaneli: Echi mapu nijeni naripama, echi ju. Ne galá chapísí.

⁴⁹ Echali echi Júراسي echo'ná nawali mapo'ná Jesusi wilili. A'lí binói we yáati jeaneli: ¡Kuíra, Binériami! A'lí we kaníruga narépalí. ⁵⁰ A'lí Jesusi jeaneli: Apanero, ¿pírími olámiya nawali? Echali echi auché jaré ripiyá kami mulubé sigá chapili echi Jesusi. A'lí galá buleli. ⁵¹ Echali bilé rijói mapu Jesusi yuwa iyénali, chapigá binói níwala wilibé ripiyá, ku machí pali. A'lí echi ripiyá jiti chi'wánaga, ripúnali echi walula sacerdote piónawala nakala. ⁵² Echali Jesusi jeaneli: Ku nasó mujé níwala ripiyá echo'ná wichibáchalachi, mapujiti si'néami echi jaré mapu ripiyá jiti nakówako, abóniko ayénachó ripiyá jiti mi'lirúami níima. ⁵³ A Nijeni tánasagá echi keni Onó, echali Binói tamí yuwa ku'wílanaga julama wabé simírami wikabé o'wéala Riosi kapitánawala mapuyénasí 'yémitamo ma ketasi omérabo taraya.

⁵⁴ Chopi a Nijeni echirigá olásagá, echali ketasi chirigá ikimea mapurigá chabé ki'yá osirúami níili echo'ná Riosi Ra'íchala oselíwalachi mapurigá Nijeni arigá je'ná jerigá chapirúami níima riwéali. ⁵⁵ Echali Jesusi jeaneli echi pagótami: 'Yémitamo ripiyá toga sili, kusí toga ayénachó, mapurigátamo tamí chapiboa mapurigá Nijé bilé chigórami niráa níisa. Chabé Nijé sinibí rawé 'yemi nimí yuwa binériya asali echo'ná walubé Juríosi ri-obáwalachi, chopi echali 'yémitamo ketasi chirigá tamí chapili. ⁵⁶ Chopi suwaba je'ná jeyiri jerigá olárami ju mapurigá ne galá sébali ikimea suwaba mapurigá chabé ki'yá osirúami níili mapu tamí yuwa ikimea riwéali, mapurigá echi jaré ki'yá piréami Riosi jiti nawésami osali.

Echali biché ne si'néami echi jaré mapu Jesusi binérali, ma ariwesa, miná júmsali.

Jesusi bacháami tólati echi jaré o'wéala Juríosi yuwa

(Mr. 14:53-65; Lk. 22:54-55, 63-71; Jn. 18:12-14, 19-24)

⁵⁷ Echarí Jesusi chapigá tólati echo'ná echi ne walula sacerdote Kaijasi riwéami yuwa. A'lí echi jaré nualíwami binériami, echi auché jaré o'wéala ochérami ayénachó echo'ná napawika muchili. ⁵⁸ Chopi echi Pegro pe 'naka niráa, jubá najátali echo'ná echi ne walula sacerdote kalíflachi yénasí. A'lí echo'ná pachá rapirátachi bakigá, echo'ná asíbali echi jaré kapitani yuwa, mapurigá 'nema churigá ikimea. ⁵⁹ A'lí echi jaré o'wéala sacerdote, echi jaré o'wéala ochérami ayénachó, echi auché jaré igúsuwami ayénachó, ne si'néami ne wabé wi'nijíinali echi Jesusi. Echijiti aboni bayeli jaré wabé 'yékami rijói mapurigá aboni 'yékaka wi'nijima echi Jesusi mapurigá Binói nijika mi'lirúami níima.

⁶⁰ A'lí aboni ke wesi riwali. Chopi wikabé nakili 'yékaka nawésanala, echi Jesusi sayéraga. A'lí ne jubá sili okuá rijói 'yékaka nawésami, ⁶¹ mapu jeanili: Je'ná rijói jeanili: Nijeni omero najuna echi walubé Riosi

ri'obáwala. Ayénachó nijeni omero bikiyá chi'rigá auchecho siné ku niwayá.

⁶² Echali echi ne walula sacerdote wilíbaga jeanigá rukueli: ¿Kéchami bilé namuti nijiyama? ¿Pili ju mapu je'ná jaré mujemi sayéraga nawesa? ⁶³ Chopi Jesusi arigá tarapé namuti ku nijéwali. Echali echi ne walula sacerdote ku nijéwaga jeaneli: Nijeni mi jiwéruga nulé, echi sinibí bitéami Riosi jiti, mápumi tamí ku ruyema: ¿Áchami ju echi Cristo, echi bi'nélipi Riosi Ranala?

⁶⁴ Echali Jesusi jeaneli: Ne bichíwali Nijeni ju. Ayénachó Nijeni 'yemi mi ané mapu waminánomí rawé 'yémitamo tamí riwiboa echo'ná watonachi, echi suwaba omérami Riosi yuwa atíami. Ayénachótamo tamí riwiboa echo'ná ripá riwigachi nolírali ku nolínachi. Nijeni wilárami níili mapurigá Ku'wíríami niráa. ⁶⁵ Echali echi ne walula sacerdote ne chi'wánali binói napáchala mapurigá ne wabé o'mónami niráa. Ayénachó binói jeanili: ¡Je'ná Jesusi ne wabé chati ra'íchali, Riosi sayéraga! Tamujeta ma ketasi waminabi newalé auché jaré testigo. ¡Nibira, jipi 'yémitamo ma galá námali mapurigá binói wabé chati ra'íchali, Riosi sayéraga!

⁶⁶ ¿Churigátamo mayé? A'lí si'néami aboni ku nijéwaga jeaneli: ¡Galá níima miná mi'lirúami níisa!

⁶⁷ A'lí aboni wabé kachípali Jesusi akálachi. Ayénachó aboni sikala wabé kapólaga chiwali echi Jesusi. A'lí auché jaré wabé cho'nali Binói akálachi. ⁶⁸ Ayénachó aboni jeaneli: A mujemi níisagá echi Cristo anilíwami, mapu Riosi julama riwéali jena'í wichimóbachi, mujemi galá machimée suwaba namuti. Echijiti tamujé tamí ku ruyé: ¿Chigá níili mapu mi cho'ná?

Echi Pegro 'yékaka anili mapu binói ketasi machili echi Jesusi

(Mr. 14:66-72; Lk. 22:56-62; Jn. 18:15-18, 25-27)

⁶⁹ Echali echi Pegro echo'ná machímana ri'narátachi asali. A'lí bilé tiwé pióntami echo'ná binói yuwa nawagá jeaneli: Mujemi ayénachó echi Jesusi yuwa iyénali, mapu echo'ná Galiléachi bitéami ju. ⁷⁰ Chopi echo'ná bacháami si'néami echi auché jaré yuwa, echi Pegro we 'yékaka jeanili: ¡Ketásini machí mapurigami aní! ⁷¹ A'lí mapalí echi Pegro ku machínali echo'ná yéwachi, echali binói riwirúami níili auché bilé tiwé pióntami jiti. Echali echi tiwé ayénachó aneli echo'ná muchúami pagótami jeanigá: Je'ná rijói ayénachó asali echi Jesusi yuwa, mapu echo'ná Nasarétachi bitéami ju. ⁷² Echali echi Pegro auchecho siné ne bichíwaga niráa anigá, arigá ne wabé 'yékaka jeaneli: ¡Ketásini machí echi Rijói! ⁷³ A'lí pe wilibeko echi auché jaré echo'ná muchúami, echo'ná echi Pegro yuwa mulubéanaga jeaneli: Ne bichíwali mujemi ayénachó echi auché jaré yuwa jumi mapu echi Jesusi binérali, mapujiti mujemi achigórigá ra'icha mapurigá aboni. ⁷⁴ Echali echi Pegro chótali we 'yékaka niráa ra'icha. Chopi binói bichíwaga niráa anili mapu arigá ne bichíwaga

ra'íchali. Echali echi Pegro arigá 'yéka jeanili: ¡Ketási-ni machí echi Rijói! A'lí echali we yáati kusuli echi to'lí.
⁷⁵ A'lí echi Pegro binói ku kilí niráa 'náatali mapurigá Jesusi chabénala jeaneli: Ke cho kusúwachi echi to'lí, mujemi baisá chokéami we 'yéka jeanimea mápumi ketasi tamí machí. Echali echi Pegro ku machí machínaga, ne wabé o'móniga nalali.

Jesusi tólati echi walula silíami Pilato riwéami yuwa
 (Mr. 15:1; Lk. 23:1-2; Jn. 18:28-32)

27 A'lí echali ba'alínala rawé bi'yá bijí, ne si'néami echi jaré o'wéala sacerdote napawili, si'néami echi jaré o'wéala ochérami ayénachó. Echali si'néami aboni a'nagupi katéwaga ra'íchali Jesusi sayéraga, mapujiti aboni wabé nakili mapu echi Jesusi waminá nijírami nílasa, mapurigá Binói mi'lirúami níima. ² Echali aboni bologá tosá echi Jesusi, echi walula silíami Ponkio Pilato riwéami 'yali.

Echi Júراسи a binói niráa wijaga kuséballi

³ A'lí echi Júраси níili mapu nijali echi Jesusi mapurigá echi jaré sontarsi chapimea Binói. Echali mapalí echi Júраси riwali mapurigá Jesusi arigá waminá mi'lirúami níima riwéali, echali binói wabé siwega ku pali echi jaré baisá makói chirúlami wenomí plata, echi jaré o'wéala sacerdote, echi jaré o'wéala ochérami yuwa.
⁴ Echali echi Júраси jeaneli: ¡Nijeni wabé chati ologá nijili je'ná rijói ke chibisíami, mapurigá Binói waminá mi'lirúami níima! Chopi echi jaré o'wéala sacerdote jeaneli: ¡Tamujé ketasita echo'ná así ju! ¡Mujé binói ku katewi! ⁵ A'lí echi Júраси echo'ná pachá walubé Juríosi ri'obáwalachi waminá wichí a'wali echi baisá makói chirúlami wenomí plata. Echali echi Júраси ku simigá, a binói niráa wijaga kusébagá mukuli.

⁶ Chopi echi jaré o'wéala sacerdote ku bi'nagá echi jaré chirúlami wenomí, a'lí a'nagupi jeaneli: Ketasi risensia ju máputa muchuwabo je'ná wenomí jena'í Riosi ri'obáwalachi wenomí muchuwálachi, mapujiti je'ná wenomí nijírami níili mapurigá bilé rijói waminá mi'lirúami níima. ⁷ A'lí mapalí aboni ma a'nagupi katéwaga ra'íchali, echali aboni ralali bilé kawí echi wenomí jiti, mapurigá echo'ná chu'wirótami níima echi jaré si'wina piréami pagótami, si'néami mapu ikí suwimea riwéali echo'ná walúlachi. ⁸ Echijiti echi kawí jipi rawé iyénasí: Kawí léami, anilíwami ju. A'lí echo'ná kawichí níili mapo'ná chabénala echi pagótami echo'ná joka, machí pali echi wicholí, echi sikolí niwalíwami.

⁹ Echirigá ne séballi ikili mapurigá echi walula Riosi jiti nawésami Jeramíasi riwéami anili, mapalí je'ná jerigá osali: Aboni chapili echi baisá makói chirúlami wenomí plata, mapu natétarami níili echi Binói jiti mapu echi jaré Isaeli pagótami echirigá natéami mayeli. ¹⁰ Echali aboni suwaba nijili echi kawí ralínala mapo'ná nirúali

echi wicholí, sikolí niwalíwami, mapurigá tamí nuleli echi Walubela.

Jesusi wi'nijírami níili bacháami echi Pilato yuwa
 (Mr. 15:2-5; Lk. 23:3-5; Jn. 18:33-38)

¹¹ A'lí Jesusi echo'ná bacháami wilili echi walula silíami yuwa. Echali echi walula silíami jeanigá rukueli: ¿Acha mujé ju echi jaré Juríosi pagótami walubela silínawala? Echali Jesusi jeaneli: Mujemi ne bichíwaga aní mapu Nijeni ju. ¹² A'lí echi jaré o'wéala sacerdote, echi jaré o'wéala ochérami yuwa ne wabé wi'nijili echi Jesusi. Chopi Binói tarapé namuti ku nijéwali. ¹³ A'lí echi Pilato jeaneli: Mujemi galá nami mapurigá aboni wikabé namuti rugá mi sayéraga ra'ícha. ¹⁴ Chopi Jesusi tarapé bilé ku nijéwaga ra'íchali. Echijiti echi walula silíami wabé si'winárigá 'náatali, mapujiti Binói ke bilé namuti ku nijéwali.

Echi Pilato nulali mapurigá Jesusi mi'lirúami níima
 (Mr. 15:6-15; Lk. 23:13-25; Jn. 18:38-19:16)

¹⁵ A'lí sinibí bamíballi, echali omowálawachi sébachi, echi walula silíami ku machí pali bilé Juríosi rijói mapu pachá bachárami níili, mapuyíripi echi auché jaré Juríosi pagótami bilé ku machí pánala risensia tániko.
¹⁶ A'lí echali pachá bachárami níili bilé wabé chati oláami rijói Barabasi riwéami. ¹⁷ A'lí echali rawé mapalí echi wikabé pagótami napawika muchili, echali echi Pilato jeanigá rukueli: ¿Chigá nalínatamo nakí mapu Nijeni ku machí pama? ¿Áchani ku machí pama echi Barabasi riwéami rijói, echi Jesusi kéremá, echi mapu Cristo anérami ju? ¹⁸ A'lí echi Pilato echirigá rukueli mapujiti binói galá machili mapu aboni ne wabé kichiga nijili echi Jesusi.

¹⁹ A'lí mapalí echi Pilato asali echo'ná echi walula silíami asíbalachi, echali binói upila jeanigá júuli: Ketásirapé chibi olá echi galabé oláami Rijói, mapujitini wabé risúu níili jipi rawé mapalini we rimuli echi Jesusi jiti.

²⁰ Chopi echi jaré o'wéala sacerdote, ayénachó echi jaré o'wéala ochérami 'wérarali aneli echi pagótami mapu echi Barabasi tánama. Ayénachó mapurigá echi Jesusi waminá mi'lirúami níima. ²¹ A'lí echi walula silíami ku nijéwaga jeaneli: ¿Chuyíritamo nakí echi okuá, mapu Nijeni ku machí pama? Echali aboni jeaneli: ¡Ku machí pa echi Barabasi! ²² Echali echi Pilato jeaneli: ¿Chucheni olama echi Jesusi, echi mapu Cristo anérami ju? A'lí si'néami aboni o'weli ra'íchaga jeaneli: ¡Echo'ná kúrsichi michóntami nílaga! ²³ A'lí echi walula silíami jeanigá rukueli: ¿Piri chati olali je'ná rijói? Chopi aboni waminabi o'weli ra'íchaga jeaneli: ¡Echo'ná kúrsichi michóntami nílaga! ²⁴ Echali echi Pilato ma riwisáa mapurigá binói ketasi biyiri niyúrali, chopi mapurigá echi wikabé pagótami waminabi wabé na'áwali,

echalí echi Pilato ba'wí jiti paníkali echo'ná bacháami echi wikabé pagótami yuwa. Ayénachó echi Pilato jeanili: Nijeni tarapé chokila ju a je'ná galabé oláami Rijói waminá mi'lirúami níisa. Echijiti nijeni galá paníkali bacháami 'yemi yuwa. ¡Galá machisí mapu 'yémitamo chopi chokila ju! Mapujiti je'ná rijói chopi mi'lirúami níima mapujiti 'yémitamo echirigá nakili. ²⁵ Chopi ne si'néami echi jaré wikabé pagótami ku nijéwaga jeaneli: ¡Tamujé aboni chopi chokila nílabota, mapalí Binói mi'lirúami níima! A'lí echi jaré tamujé kúchuwala ayénachó chokila níima. ²⁶ A'lí echi Pilato ku machí pali echi Barabasi. A'lí ma nulasa mapu echi Jesusi waminá wipisótami níima, a'lí ayénachó nulali mapu Binói echo'ná biléana kúrsichi michóniga mi'lirúami níima.

²⁷ A'lí jaré echi walula silíami sontársawala chapigá toli echi Jesusi echo'ná pachá walú kalírali Betório anilíwachi. A'lí echo'ná pachá ne norigá Jesusi yuwa napawili ne si'néami echi wikabé sontarsi. ²⁸ A'lí mapalí aboni ma káraga 'yeli Binói napáchala, a'lí aboni sitákami kimeli echi Binói mapurigá bilé walula silíami niráa. ²⁹ A'lí aboni bilé so'uwá niwárami koyétali echo'ná Jesusi mo'ólachi. Echali Binói ayénachó 'yárami níili bilé kusí echo'ná Binói sikálachi watoná, mapurigá bilé walula kusíwami niráa. A'lí aboni wabé tiníchaga niráa, echo'ná bacháami Jesusi yuwa chokóbaga jali. A'lí aboni jeanili: ¡Kuirá, Mujé Walubela Juríosi Silí-nawala! ³⁰ A'lí aboni wabé kachípali echo'ná Binói akálachi, ayénachó echi kusí jiti wipisoli Binói mo'ólachi. ³¹ A'lí mapalí aboni ma sunili echirigá tiníchiya, echali aboni ku 'yeli echi sitákami napácha. A'lí Binói níwala napacha ku napachátali. Echali aboni waminá toli echi Jesusi mapurigá Binói mi'lirúami níima echo'ná kúrsichi michóniga.

Jesusi clavo jiti michóntami níili echo'ná kúrsichi

(Mr. 15:21-32; Lk. 23:26-43; Jn. 19:17-27)

³² A'lí mapalí aboni ma ku 'machínaga simíbali echo'ná walúlachi jonsa, echali aboni chapili bilé rijói echo'ná Sirénachi anilíwachi bitéami, mapurigá binói matórama echi kursi. ³³ A'lí aboni sili echo'ná Gorótachi anilíwachi mapo'ná anilíwami ju: Chu'wí mo'ólachi. ³⁴ Echali Jesusi bajínala 'yálati echi uva ba'wila, bilé wabé chipúami owáami nasówaga. Chopi Binói galá machigá, ma ketasi bajínali.

³⁵ A'lí Jesusi echo'ná kúrsichi clavo jiti michónalami níili, echo'ná Binói sikálachi, Binói ronólachi ayénachó. Echali echi jaré sontarsi we rijibaka ri'yékali mapu chigá mema riwéali echi jaré namuti Binói níwala napacha. A'lí echirigá olárami níili mapurigá suwaba echirigá galá ikimea achigórigá mapurigá echi walula Riosi jiti nawésami anili, mapurigá bachá niráa je'ná jerigá osirúami níili echo'ná Riosi Ra'íchala os-elíwalachi: Aboni chapigá rojuánali suwaba namuti Nijé níwala napacha. A'lí aboni rijibaka ri'yékali mapu

chigá mema riwéali Nijé níwala kimila. ³⁶ A'lí echi jaré sontarsi echo'ná muchíbaga, galá tibúтали. ³⁷ Echali echo'ná kúrsichi ripá moba Jesusi mo'ólachi je'ná jerigá osirúami níili, mapurigá Binói je'ná jiti mi'lirúami níima riwéali: Je'ná, echi Jesusi ju, echi Walubela Juríosi Silí-nawala. ³⁸ Echali rawé okuá rijói chigórami ayénachó ko'wirúami níili Jesusi yuwa, echo'ná auché jaréana kúrsichi michóniga. Bilé echo'ná watoná kúrsichi michóntami níili. Auché bilé echo'ná o'winá kúrsichi michóntami níili.

³⁹ A'lí echi jaré pagótami echo'ná simárami, ne mo'ólaga, tiníchaga, ⁴⁰ yóniga jeaneli: ¡Mujé mápumi najunama echi walubé Juríosi pagótami ri'obáwala, mápumi bikiyá chírigá auchecho ku niwama, a binói ku'wira! ¡A mi bi'nélipi Riosi Ranala níisagá, ku rikina echo'ná kúrsichi jonsa! ⁴¹ Echirigá echi jaré o'wéala sacerdote, echi jaré nularíwami binériami ayénachó, echi jaré Bariseo anilíwami binériami ayénachó, echi jaré o'wéala ochérami asíchiko, si'néami achigórigá we kichiga tiníchaga jeanili: ⁴² Binói auché jaré ku'wiraga olali, chopi a Binói ketasi omero ku'wírriya. Je'ná, ne bichíwali níisagá tamujé Isaeli pagótami walubela silí-nawala, galá níima ku rikinsa echo'ná kúrsichi jonsa. ¡Echalíta ne galá bichíbo Binói! ⁴³ Je'ná rijói anili mapu Binói galá bichíli Riosi. Jipi galá níima Riosi ku'wirasa echi Binói, a galá nakisáagá Riosi, mapujiti je'ná rijói jeanili: ¡Nijé bi'nélipi Riosi Ranala juni! ⁴⁴ A'lí echirigá achigórigá kichiga tiníchaga ra'íchali echi okuá chigórami mapu achigórigá kúrsichi michóntami níili Jesusi yuwa.

Echi Jesusi ma mukuli

(Mr. 15:33-41; Lk. 23:44-49; Jn. 19:28-30)

⁴⁵ A'lí echali rawé ne wabé rokowáli ne buchuwí jena'í wichimóbachi, nasipa rawé jonsa, ma kisúwachi yé-nasi. ⁴⁶ A'lí echali ma pee kisúwachi alíwachi Jesusi o'weli ra'íchaga jeanili: Elí, Elí, ¿lama sabaktani? Mapu Ralámuli ra'íchali niráa, je'ná jerigá aniwáami ju: Keni Riósawa, keni Riósawa, ¿churékulami tamí bi'neli ari-weli? ⁴⁷ A'lí jaré echo'ná muchúami ma námaga mapurigá Binói ra'íchali, a'lí jeanili: ¡Je'ná Rijói, echi Elíasi bayéchani! ⁴⁸ A'lí bilé aboni we yáati 'maga sa'méchal bilé táa bo'osali echo'ná wabé chipúami uva ba'wílachi. A'lí echo'ná biléana kusírali ochogá 'yali echi Jesusi, chunugá bajínala. ⁴⁹ A'lí echi auché jaré jeanili: Ariwesi. 'Nebo acha nolínama echi Elíasi, ku'wírriya. ⁵⁰ A'lí mapalí Jesusi ma auchecho siné o'weli ra'íchali, echali ma mukuli nijaga Binói aliwala ma.

⁵¹ A'lí echali echi walubé chiní, we ru'náami, mapuyiri kimá, mapu echo'ná pachá echi walubé Juríosi ri'obáwalachi chukuli, ke sayiná ripana jonsa okoná nasipa chi'wali. A'lí echi kawí wabé nokali. A'lí wikabé rité wabé rapali. ⁵² A'lí wikanáami chu'wétachi ke sayiná ku iráparami níili. A'lí wikabé galá bichíyami pagó-

tami mapu chabé suwili, ma ku o'wínali. ⁵³ A'lí mapalí Cristo ma ku owínali, echalí aboni ku 'machínali echo'ná chu'wétachi jonsa. A'lí echo'ná galabé walúlachi sigá, wikabé jiti riwirúami níili.

⁵⁴ A'lí echi walula kapitani, bilé kiento sontarsi nuleámi, ayénachó echi auché jaré binói yuwa muchúami mapu tibuli echi Jesusi, si'néami aboni galá riwisá mapurigá wabé nokali echi kawí, ayénachó riwisá suwaba je'ná jerigá ikíachi, a'lí aboni ne wabé majaga jeanili: ¡Ne bichíwali je'ná Rijói bi'nélipi Riosi Ranala níili! ⁵⁵ A'lí echo'ná mikabé 'nagá muchili wiká muguí, echi jaré mapu Jesusi yuwa ku'wiribiya najátali echo'ná Galiléachi anilíwachi kawírali jonsa. ⁵⁶ A'lí echi María, echo'ná Makatáráchi bitéami bilé níili echi auché jaré muguí yuwa. Echi auché bilé María, echi Jakobo, echi José iyela auché bilé níili echi wiká yuwa. Echi Sibireo riwéami rijói kúchuwala iyela ayénachó bilé níili echi jaré yuwa.

Echi Jesusi chu'wirótami níili

(Mr. 15:42-47; Lk. 23:50-56; Jn. 19:38-42)

⁵⁷ A'lí echalí rawé mapalí ma alíwachi níili, echo'ná nawali bilé rijói wabé níwami, José riwéami, echo'ná Arimatéachi bitéami, echi mapu ayénachó Jesusi yuwa binéami níili. ⁵⁸ A'lí je'ná rijói nawali echo'ná mapo'ná echi Pilato asali. A'lí binói tónalaga tánali echi Jesusi mukúami sapala. A'lí echi Pilato nulali 'yánala. ⁵⁹ A'lí echi José chapigá echi mukúami sapala, a'lí bilé bi'wíami chiní kimila jiti kabili. ⁶⁰ Echalí echi José chu'wirolí Jesusi mukúami sapala echo'ná biléana chu'wechi mapo'ná bukulí iwarárami níili echo'ná ritérali mapurigá risochí niráa. A'lí bilé walú rité jiti 'yérali. Echalí echi José ku simili. ⁶¹ A'lí echo'ná bacháami chu'wechi ayénachó muchili echi María echo'ná Makatáráchi bitéami, echi auché bilé María ayénachó.

Jaré sontarsi julálati tibúnala echo'ná chu'wechi mapo'ná Jesusi chu'wirótami níili

⁶² A'lí echalí ba'alínala isábawachi rawé echi jaré o'wéala sacerdote, echi auché jaré Bariseo yuwa, si'néami napawili echo'ná bacháami echi Pilato yuwa. ⁶³ Echalí aboni jeaneli: Walula, tamujeta newalá mapu echi wabé 'yékami Rijói chabé anili mapalí Binói abijí bitéali, mapu Binói ku owínama ma bakiyá chi'rigá, mapalí Binói mi'lirúami níisa. ⁶⁴ Galá níima mujé nulasá echo'ná chu'wechi tibúnala mapu yénasí bikiyá chi'lesa, mapurigá echi jaré mapu Binói binérali ketasi rokogó niráa sigá 'wísama Binói mukúami sapala. Echalí aboni jeanema echi pagótami: ¡Ma ku owínali, mapalí ma mukúami níili! Echalí aboni wabé simírami 'yékama echi pagótami, ketasi mapurigá chabé chokichí. ⁶⁵ Echalí echi Pilato jeaneli: Echo'ná tibúnala jaré sontarsi. Ku simíbagá, ne galá tibútanarasi echo'ná

chu'wechi, mapurigátamo mayé mapu ne 'wérali ju.

⁶⁶ Echalí aboni ku simíbagá júuli echi jaré sontarsi echo'ná chu'wechi tibúnala. A'lí aboni ne galá 'yeli echo'ná chu'wechi yéwalachi, echi walubé rité jiti. Ayénachó aboni echo'ná ritérali noligá uchugá, moba oseli mapurigá ke wesi irápama.

Jesusi ku owínali mapalí ma mukúami níili

(Mr. 16:1-8; Lk. 24:1-12; Jn. 20:1-10)

28 A'lí ma simírása echalí isábawachi rawé, ba'alínala bi'yábijí mapalí ma chi'láali echalí oméachi rawé, echalí echo'ná chu'wechi 'nébiya sili echi María echo'ná Makatáráchi bitéami, echi auché bilé María ayénachó. ² A'lí ke sayiná ne wabé nokali echi kawí, mapujiti bilé walula Riosi kapitánawala ripá riwigachi jonsa rikínaga, echo'ná nawagá ri'nabuli echi walubé rité echo'ná chu'wechi yéwalachi atíami. A'lí échiko echo'ná moba asíbali. ³ A'lí echi walula Riosi kapitánawala ne wabé simírami ratábami níili mapurigá echi ukuí ni'wíami niráa. Ayénachó binói napáchala ne wabé rosákami níili mapurigá echi kupalí. ⁴ A'lí echi jaré sontarsi tibúami ne wabé majajali echi binói jiti. A'lí aboni echirigá ne wabé sayilúmaga majaga bitíbali mapurigá suwíami niráa.

⁵ Echalí echi walula Riosi kapitánawala jeaneli echi muguí: Ketasi majasi 'yemi, mapujiti nijeni galá machí máputamo amí echi Jesusi, echi mapu echo'ná kúrsichi clavo jiti michóniga mi'lirúami níili. ⁶ ¡Binói ketasi te je'na'ibi, mapujiti ma ku owínali, mapurigá Binói 'yemi mi bachá niráa aneri mapu ikimea riwéali! Wakiná simíbagá, 'nesi mapo'ná echi Walubela Jesusi rikárami níili.

⁷ Wabé sapuka simíbagá ruyébasí echi jaré mapu Binói binérali, mapurigá Binói ma ku owínali. Nibira, Binói 'yemi mi yuwa bachá simea echo'ná Galiléachi anilíwachi kawírali. Echo'nátamo riwiboa echi Binói. Nibira nijeni 'yemi mi ma echirigá ne bichíwaga ruyeli.

⁸ Echalí echi 'muguí ne wabé majaga ku simíbali echo'ná chu'wechi jonsa, chopi aboni ayénachó ne wabé kaníili. A'lí aboni ne júmaga ku simíbali, ne bukulíwami niráa ruyébiya echi jaré mapu Jesusi binérali. A'lí mapuyénasí aboni abijí echirigá sírali, ⁹ echi Jesusi ke sayiná echo'ná nawagá natépalí aboni. Echalí Jesusi jeaneli: ¡Kuirá! ¡Kanílasí! A'lí echi jaré 'muguí echo'ná sigá, bacháami Binói yuwa chokóba jagá wabé walubélagá aneli, Binói ralálachi chapigá.

¹⁰ A'lí Jesusi jeaneli: Kestasi majasi. Ma ku simíbagá ruyébasí echi jaré Nijé ritémawala je'ná jerigá mapurigá ne bukulíwami ikili. Jeanesi mapurigá aboni simama echo'ná Galiléachi anilíwachi kawírali. ¡Echo'ná aboni tamí riwimea!

Echi jaré sontarsi wabé 'yékaka nawésali

¹¹ A'lí mapuyénasí echi jaré 'muguí echirigá simíwali, echalí echi jaré sontarsi mapu tibuli echo'ná chu'wechi, abóniko echo'ná walúlachi ku ruyébiya sili echi jaré o'wéala sacerdote, ne suwaba mapurigá ikili. ¹² A'lí echi jaré o'wéala sacerdote napawili echi jaré o'wéala ochérami yuwa. A'lí mapalí aboni ma a'nagupi katéwaga ra'íchali, echalí aboni wikabé natétali wenomí echi jaré sontarsi. ¹³ Ayénachó jeaneli: Jeanési 'yemi: Echi jaré mapu Jesusi binérali, abóni rokogó niráa sigá 'wísali Binói mukúami sapala, mapalí tamujeta we kochigá bitili. ¹⁴ A'lí echi walula silíami a galá námsagá je'ná jeyiri, echalí tamujeta galá katéwaga anebi echi binói, mapurigá 'yemi ketasi echijiti kastigo 'yárami níbo. ¹⁵ Echalí echi jaré sontarsi ma naresa echi wenomí, echirigá aneli echi jaré pagótami mapurigá aboni nulérami níili. A'lí je'ná echirigá anirúami ne sébali ruyérami níili echi jaré Juríosi pagótami yuwa, echalí rawé jonsa, jipi rawé yénasí.

Jesusi nawésanala júuli echi jaré mapu Binói binérali

(Mr. 16:14-18; Lk. 24:36-49; Jn. 20:19-23)

¹⁶ A'lí echi jaré makói miná bilé binéami ku simíwali echo'ná Galiléachi, echo'ná ripá biléana rabó mapo'ná

Jesusi chabénala aneli mapo'ná aboni riwimea riwéali echi Binói. ¹⁷ A'lí mapalí aboni riwali echi Jesusi, echalí aboni bacháami Binói yuwa, wéemi raweka, chokoba jaga walubélaga aneli. Chopi jaré ketasi 'me galá bichíili. ¹⁸ Echalí Jesusi echo'ná nawagá jeaneli: Mani 'yárami ju mapurigá Nijeni ne suwaba omérami níima echo'ná ripá riwigachi, jena'í wichimóbachi ayénachó. ¹⁹ Echijiti ku simíbaga 'yemi, galá bichíiraga binérami ne si'néami echi jaré pagótami, ne suníami jena'í wichimóbachi piréami. A'lí mapalí aboni galá bichíiko, echalítamo ne si'néami pagopo aboni, mapurigá si'néami echi auché jaré pagótami ne galá machimea mapu echi jaré bichíyami galá ku'wíratami ju Riosi Onorúami jiti, echi bilepi Riosi Ranala jiti ayénachó, echi wabé Galabé Riosi Iwigala jiti asíchiko. ²⁰ Ne galá binérami echi jaré pagótami mapurigá aboni galá nijéwaga olama ne suwaba namuti mapurigá Nijeni 'yemi mi nuleli. Ayénachó ne galá machisí mapurigá Nijeni 'yemi mi yuwa atí sinibí rawé, echalí ne jubá wichimóbachi suwibáluachi rawé yénasí. ¡Echirigá níla-ga!

Márkosi

Echi Juani mapu pagóami níli we nawésali echo'ná biléana waná

(Mt. 3.1-12; Lk. 3.1-9, 15-17; Jn. 1.19-28)

1 Je'ná jerigá chótani echi we Galabé Riosi Ra'íchala osayá. Je'ná Ra'íchali 'yemi mi ruyé echi Walubela Jesucristo jiti nawésaga, mapujiti Binói ju bi'nélipi Riosi Ranala. ² Echi walula Riosi jiti nawésami Isaíasi riwéami je'ná jeanigá osali:

Waminá bacháami mapo'nami simírama, echo'ná a'láranala julámani bilé keni kapitánawa.

Échiko bachá nawésama echi jaré pagótami mapurigá aboni mi galá bichíima, echalí mapalí Mujé echo'ná nawama.

³ Bilé rijói o'weli ra'íchaga nawésama echo'ná biléana waná kawichí.

Je'ná jeanigá nawésama: Echi Walubela ke sayiná nawama jena'í wichimóbachí.

Alí mapalí bilé walula echirigá nawama, 'yémitamo we galá a'lara echi buwé mapurigá echo'ná galá simírama echi walula.

Jipi, ayena cho galá a'lárasí 'yemi aboni sulálachi, achigórigá mapurigátamo sinibí galá a'lara echi buwé.

⁴ Alí echi Juani echirigá iyénali echo'ná biléana waná kawichí. Binói galá pagoli echi jaré pagótami echo'ná síami. Alí binói bachá niráa we galá nawésali jeanigá mapurigá si'néami aboni ba'wí jiti pagótami níima, ayena cho mapurigá aboni auchecho si'winárigá, ne galabé niráa 'nátaga, ku ro'wima Riosi yuwa, mapurigá Riosi ku wikáwama suwaba mapurigá aboni chati olali.

⁵ Alí ne si'néami echo'ná Juréachi anilíwachi kawírali piréami kipúbiya simíbali echo'ná mapo'ná echi Juani nawesa asali. Alí echo'ná walúlachi Jerusalémachi anilíwachi piréami ayena cho echo'ná sili. Alí echo'ná bakochi Joránachi anilíwachi echi Juani galá pagoli echi si'néami pagótami, mapalí aboni ku rugá nawésali suwaba mapurigá aboni ma chati olali.

⁶ Alí echi Juani echi kameyo anilíwami bo'wala napacha iyénali. Ayena cho bilé wichí puka iyénali. Alí binói ko'wali echi korochi wakichéami; ayena cho ko'wali echi kolimena, echo'ná kawichí nirúami. ⁷ Echi Juani ne galá nawésali echi jaré pagótami jeanigá: Echi Walubela pe mulubé jubá tamí yuwa inaro. Nijé ketásini 'me walula ju mapurigá Binói niráa. Ketásini 'me we galá ju mapurigani murubéanama Binói yuwa. Ni-

rapeni galá ju mapurigani akarápatama Binói akalá.

⁸ Alí echi Juani ayena cho jeanigá nawésali: Nijé 'yemi nimí pagoli ba'wí jiti, chopi echi Walubela 'yemi mi 'yama echi We Galabé Riosi Iwigala.

Echi Jesusi ba'wí jiti pagótami níli

(Mt. 3.13-17; Lk. 3.21-22)

⁹ Alí echalí rawé Jesusi ku simili echo'ná Nasarétachi anilíwachi jonsa. Echo'ná Nasarétachi biléana walúlachi ju, echo'ná Galiléachi anilíwachi kawírali nirúami. Alí Jesusi nawali echo'ná bakochi Joránachi anilíwachi. Alí Juani echo'ná bakochi pagoli echi Jesusi.

¹⁰ Alí mapalí Jesusi ku machínali echo'ná ba'wírali jonsa, alí Binói riwali echo'ná ripá riwigachi, mapurigá we iráparami niráa níli. Alí echi Jesusi we yáati riwali echi Wabé Galabé Riosi Iwigala echo'ná Binóichi moba rikínami mapurigá bilé makawi niráa. ¹¹ Alí Jesusi galá námali mapalí Riosi, echo'ná ripá riwigachi jonsa, ra'íchaga jeaneli: Mujé ju bilepi keni Raná. Nijé nimí ne wabé galé. Mujemi tamí ne wabé kanírali.

Echi riablo nakili mapu Jesusi we chati olama

(Mt. 4.1-11; Lk. 4.1-13)

¹² Alí echi We Galabé Riosi Iwigala we yáati bayérali echi Jesusi echo'ná biléana waná kawichí. ¹³ Alí Jesusi tibili echo'ná waná kawichí nawosa makói rawé yénasí. Echo'ná kawichí mapo'ná Binói asali jaré jobátami namuti chopi nirúali. Alí echi riablo, Satanasi riwéami, echo'ná nawagá ra'íchali Jesusi yuwa, mapujiti echi riablo wabé nakili mapurigá Jesusi we chati olama, chopi Binói ketasi nijéwali. Alí echi jaré o'wéala Riosi kapitánawala echo'ná sigá we galá ku'wírali.

Jesusi chótali nawesa

(Mt. 4.12-17; Lk. 4.14-15)

¹⁴ Alí mapalí ma bachálati echi Juani, Jesusi nawésasiya simili echo'ná Galiléachi anilíwachi kawírali. Alí Binói nawésali echi We Galabé Riosi Ra'íchala, jeanigá mapu Riosi ne galá nulema ne si'néami pagótami. ¹⁵ Alí Binói jeanili: Ma sébali tétali. Ke 'me ayó rawé Riosi ma galá nulema si'néami pagótami. Bukulíwami galabé si'nú niráa 'natasí. Galá bichíisi je'ná Galabé Riosi Ra'íchala.

Jesusi bayeli nawó rijói mapu rochí sirúami níli

(Mt. 4.18-22; Lk. 5.1-11)

¹⁶ Alí Jesusi iyénali echo'ná walú ba'wírali suwé, echo'ná Galiléachi anilíwachi. Echo'ná riwali echi Simoni, echi binói Simoni rijimala, Antresi riwéami ayena cho. Echi mapu aboni we sirúami níli rochí. Echijiti aboni rilé ba'wírali botubuli echi walú chipérami chiní tétami, mapurigá aboni echirigá chapimea jaré rochí.

¹⁷ Alí Jesusi jeaneli: 'Yémitamo rochí sirúami ju. Jipi tamí yuwa najátasi. Nijé 'yemi nimí binérama mapurigátamo galá omérabo binériya echi auché jaré pagótami, mapurigá aboni galá tamí bichíima. ¹⁸ Alí aboni we yáa ariwesa echi walú chipérami chiní tétami, Jesusi yuwa simíwali.

¹⁹ Echo'ná jonsa, Jesusi pe minana simigá riwali echi Jakobo, echi Juani ayena cho, echi mapu okuánika najirémami níli, echi bilé rijói Sibiréo riwéami kúchuwala. Je'ná okuá najirémami muchili echo'ná pachá biléana walú barko anilíwami. Alí echi barko mapuyiri bilé walubé kajoni niwárami níli, echi mapu echo'ná walú ba'wírali moba yénali. Alí aboni pachókiya muchili echi walú chipérami chiní tétami, mapujiti aboni echi walú chipérami chiní tétami jiti chapilí echi wikabé rochí.

²⁰ Alí Jesusi bayeli echi aboni. Okuánika we yáati ariwesa kepu onó, Sibireo riwéami, Binói yuwa simíwali. Echi Sibireo echo'ná pachá bákochi tibili, echi jaré binói piónawala yuwa.

Jesusi ku sa'wali bilé rijói mapu we chati riablo aliwala aliwéami níli

(Lk. 4.31-37)

²¹ Alí aboni sili echo'ná walúlachi Kapernaúmachi anilíwachi. Alí echalí isábawachi rawé Jesusi simili echo'ná echi jaré Juríosi anilíwami pagótami ri'obáwalachi. Alí Binói galá binérali echo'ná piréami pagótami. ²² Alí mapalí Jesusi binérali echi pagótami, aboni we galá kilí kipuli, mapujiti Binói ra'ichali mapurigá bilé walula niráa. Ketasi ra'ichali mapurigá echi jaré nualíwami binériami ra'ichala. Aboni chopi binérali mapurigá echi Moisesi osogá nulali.

²³ Alí echo'ná pachá ri'obachi bilé rijói asali mapu wabé chati riablo aliwala aliwéami níli, mapu o'weli ra'ichaka, ²⁴ jeaneli: ¿Churékulami tamujé tamí kumé Mujé Jesusi, Nasarétachi bitéami? ¿Áchami nawali tamujé tamí suwábamiya? Nijé nimí galá machí. Mujé ju echi we galabé Rijói mapu mi Riosi jiti julárami ju.

²⁵ Alí Jesusi we yónali echi we chati aliwá jeanigá: ¡Kilí asá mujé we chati aliwá! ¡Ariwé echi rijói! ²⁶ Alí echi we chati riablo aliwala ne wabé jiwériga sayilúmtali echi rijói. Alí echi we chati aliwá o'weli sinaga, we yáati ku machínali echo'ná pachana echi rijói sulálachi jonsa.

²⁷ Alí si'néami echi jaré pagótami wabé majaga 'néna-

ga, aboni a'nagupi rukueli jeanigá: ¿Piri ju je'ná? ¿Churigá bukulíwami ra'ichali ju je'ná? Je'ná Jesusi we jiwériga nulé echi jaré we chati riablo aliwala. Alí aboni we galá nijéwa. ²⁸ Alí ne si'néami echo'ná Galiléachi anilíwachi kawírali piréami we yáati ikáli mapurigá Jesusi echirigá wabé jiwériga olali.

Jesusi ku sa'wali echi Pegro wasila

(Mt. 8.14-15; Lk. 4.38-39)

²⁹ Mapalí aboni ku simíwali echo'ná ri'obachi jonsa, alí Jesusi simili echo'ná kalírali mapo'ná echi Simoni, echi Antresi piréali. Ayena cho napawika simíwali echi Jakobo, echi Juani yuwa. ³⁰ Alí echi Simoni wasila we ínuwa nayú bu'wili. Alí ruyélati echi Jesusi mapurigá echi mukí we nayúami níli. ³¹ Alí Jesusi echo'ná nawagá, echi mukí nayúami sikala chapigá, ku achali. Alí echi mukí we yáati ku sa'wisá, galá ku nigúuraga nóchali.

Jesusi ku sa'wali ne wikabé nayúkami

(Mt. 8.16-17; Lk. 4.40-41)

³² Alí pe alí, ma bokowíachi rayénali, wikabé pagótami echo'ná sili mapo'ná Jesusi asali. Aboni echo'ná pali si'néami mapu iki echo'ná piréami nayúkami níli. Ayena cho echo'ná pálati echi jaré mapu wabé chati riablo aliwala aliwéami níli. ³³ Alí echo'ná walúlachi piréami ne si'néami napawili echo'ná yéachi mapo'ná Jesusi asali. ³⁴ Alí Jesusi wikabé ku sa'wali echi jaré mapu chibi yiri nayúkami níli. Ayena cho nuleli mapurigá ku machí simama wikabé wabé chati riablo aliwala mapu echo'ná pachana jaré pagótami sulálachi muchili. Alí Jesusi tarapé risénsia 'yali mapu echi jaré chati aliwá ra'ichama, mapujiti aboni galá machili mapu Binói Jesusi bi'nélipi níli Riosi Ranala.

Jesusi nawesa iyénali echo'ná Galiléachi

(Lk. 4.42-44)

³⁵ Alí ba'alínala bi'yá chónachi Jesusi ku asísali. Alí Binói simili echo'ná biléana waná kawichí, mapo'ná Binói ra'ichali Riosi yuwa. ³⁶ Alí pe wilibeko echi Simoni, ayena cho echi auché jaré binói yuwa muchúami jubáami ásaka najátali. ³⁷ Alí ma riwisá echi Jesusi, aboni jeaneli: ¡Ne si'néami pagótami mi amí! ³⁸ Alí Jesusi nijéwaga jeaneli: Ma simabo echo'ná echi auché jaréana mulubé rijówachi, mapurigani nawésama echo'ná piréami pagótami. Nijeni je'ná chopi jiti nawali, mapurigani nawésama echi jaré pagótami. ³⁹ Alí Jesusi ne suníami echo'ná Galiléachi anilíwachi kawírali iyénaga, ne galá nawésali echo'ná suníami echi jaré Juríosi ri'obáwalachi. Alí Binói ku machí a'wali echi jaré we chati riablo aliwala, echo'ná jaré pagótami sulálachi muchúami.

Jesusi ku sa'wali bilé rijói wabé chati sití cha nayúami
(Mt. 8.1-4; Lk. 5.12-16)

⁴⁰ Alí mapo'ná Jesusi asali, echo'ná nawali bilé rijói wabé chati cha nayúami. Echi rijói chokoba wiligá risúu anigá jeaneli: A Mujé nakisáagá, Mujé galá omériami ju mapurigami tamí ku sa'wama. ⁴¹ Alí Jesusi we natimaga chapisá echi nayúami rijói sikala, jeaneli: ¡Nijeni we galá nakí! ¡Mami ku sa'wárami níima! ⁴² Alí mapalí Jesusi echirigá aneli, we yáati ku sa'wili echi rijói. Ma ketasi waminabi nayúami níili. ⁴³ Alí Jesusi ku ripóraga echi rijói, ne galá jeanigá nuleli: ⁴⁴ Tarapé wesi ku ruyé mapurigami ku sa'wárami níili. Chopi ku simigá 'nérami echi sacerdote anilíwami rijói mápumi ma ku sa'wárami ju. Alí 'yami echi jaré namuti mapu Moisesi osogá nulali mapu mi 'yama riwéali mapujítimi ma ku sa'wíami ju. Echirigá olá mapurigá echi auché jaré pagótami galá machimea mápumi ma ku sa'wíami ju. ⁴⁵ Chopi echi rijói ku simigá, we yáati chótali si'néami pagótami nawésiya mapurigá Jesusi echirigá ku sa'wali binói. Echijiti Jesusi ma tarapé omérali machiná niráa iyena nibiléana walúlachi, mapujiti ne wikabé pagótami sinibí ne cha'igá napawili mapo'ná Binói asali, mapujiti si'néami pagótami wabé nakili mapu 'nema echi Binói Jesusi. Echijiti Jesusi we iyénali echo'ná jaréana waná kawichí. Chopi ne suníami piréami pagótami echo'ná sili Binói yuwa.

Jesusi ku sa'wali bilé rijói ke akáanami
(Mt. 9.1-8; Lk. 5:17-26)

2 Alí péé wakinánokuá rawé Jesusi ku nawali echo'ná walúlachi Kapernaúmachi. Alí ne si'néami echo'ná piréami galá ruyélati mapu Binói ku asali echo'ná Binói bitélachi. ² Alí we yáati wikabé pagótami ne cha'igá napawili echo'ná mapo'ná Jesusi asali, mapuyénasí auché jaré ma ketasi omérali echo'ná yéachi mulubéana. Alí Jesusi chopi echi We Galabé Riosi Ra'íchala nawésaga ruyeli echi pagótami. ³ Alí nawó rijói echo'ná pali bilé rijói ke akáanami, echi mapu tarapé omérali asísiya. ⁴ Alí echo'ná pachá kalírali mapo'ná Jesusi asali, aboni tarapé omérali mo'wiyá, mapujiti ne wikabé pagótami ne cha'igá muchili. Alí ripana kalírali irápaga, wíiti bologá simérali echi rijói ke akáanami. Echirigá echo'ná pachá rikibuli mapo'ná Jesusi asali. ⁵ Alí Jesusi galá machili mapurigá aboni galá bichíyami níilo, echijiti Binói jeaneli echi rijói ke akáanami: Keni raná, mami galá ku wikawárami ju ne suwaba mapurigami chati olali. ⁶ Alí echo'ná 'nagá muchili jaré rijói mapu Riosi nulalila binériami níili. Alí aboni je'ná jerigá 'nata muchili: ⁷ ¿Churékula echirigá ra'icha je'ná rijói? Binói ne wabé sayéraga ra'icha echi Walubela Riosi, mapujiti ke wesi rijói galá omero ku wikáwiya echi pagótami chati olalila. Chopi Riosi galá omero ku

wikáwiya. ⁸ Alí Binói Jesusi we galá machili echirigá 'natachi aboni. Alí Binói jerigá rukueli: ¿Churékulátamo echirigá 'nata? ⁹ Alí Jesusi ayena cho jeaneli: Ketasi 'me oméami ju mapurigá Nijeni jeanema je'ná rijói: Mapurigami chati olali, ma galá ku wikawárami ju. Nibilé cho oméami ju mapurigá Nijé jeanema: ¡Ku wilísaga ku simigá! ¹⁰ Alí Jesusi ayena cho jeaneli: Riosi tamí wilali mapurigá Ku'wíriami niráa. Alí Nijeni je'ná jerigá olá mapurigátamo galá machiboa mapurigá Nijé galá omero ku wikáwiya echi pagótami chati olalila. Alí Binói jeaneli echi rijói ke akáanami: ¹¹ Nijé nimí ané: ¡Ku wilísaga, ku chapisá kemi kimá, ku simigá echo'ná kemi bitélachi! ¹² Alí echi rijói ke akáanami we sapú ku wilísali. Alí ku chapigá binói níwala kimá, echo'ná abónichi jonsa ku simili. Alí echi auché jaré echo'ná muchúami ne wabé majaga 'nénaga waminabi walubéraga aneli Riosi jeanigá: ¡Tarapé sineta riwali echirigá oméraga oláami bilé rijói!

Jesusi bayeli echi Libí
(Mt. 9.9-13; Lk. 5.27-32)

¹³ Alí Jesusi auché siné simili echo'ná walú ba'wírali suwé. Si'néami pagótami echo'ná sili mapo'ná Binói asali. Alí Binói galá nawésaga binérali echi wikabé pagótami. ¹⁴ Alí mapalí Jesusi ku simili echo'ná jonsa, echo'ná riwali echi Libí riwéami rijói, echi Alibeo riwéami rijói ranala. Alí echi Libí wenomí napabuya asali mapurigá natétama echi walula silíami echo'ná nuláami. Alí Jesusi echo'ná simíraga jeaneli: ¡Tamí najató! Alí echi Libí we sapú wilísaga, echi Jesusi yuwa simili.

¹⁵ Alí echi Libí bayeli echi Jesusi mapurigá Binói echo'ná Libí bitélachi ko'mea. Auché jaré wikabé echi jaré wenomí napabúami ayena cho bayérami níili. Alí wikabé Juríosi anilíwami pagótami ayena cho bayérami níili, echi jaré mapu echi auché jaré Juríosi chati oláami niráa aneli. Je'ná pagótami, si'néami echo'ná napawika ko'yá muchili, echi Walubela Jesusi yuwa. Echi auché jaré mapu Jesusi binérali ayena cho echo'ná muchili, mapujiti wikabé pagótami Jesusi yuwa najátali. ¹⁶ Alí echo'ná muchili jaré Bariseo anilíwami binériami, ayena cho auché jaré rijói mapu Riosi nulalila binériami níili. Je'ná si'néami galá riwali mapurigá Jesusi ko'yá asali echi jaré wenomí napabúami yuwa, ayena cho echi auché jaré yuwa mapu aboni aneli chati oláami niráa. Echijiti aboni jeanigá rukueli echi jaré mapu Jesusi binérali: ¿Churékula echi Jesusi ko'wá, ayena cho bají echi jaré wenomí napabúami yuwa, ayena cho echi auché jaré yuwa mapu chati oláami anérami ju? ¹⁷ Alí Jesusi je'ná jerigá namsa, jeaneli: Echi jaré mapu ketasi nayúkako ketasi newalé bilé óyami. Chopi echi jaré nayúkami ne bichíwali newalé bilé óyami. Nijé ketásini bayémiya nawali echi jaré galabé oláami pagótami. Chópini bayémiya nawali echi jaré chati oláami pagótami.

Jesusi binérali echi jaré pagótami

(Mt. 9.14-17; Lk. 5.33-39)

¹⁸ Alí echi jaré mapu Juani binérali, aboni wi'libé niráa ketasi ko'wali mapalí aboni chopi Riosi yuwa ra'icha muchili. Echi jaré Bariseo ayena cho achigórigá olali. Alí siné rawé jaré pagótami jeaneli echi Jesusi: Echi jaré mapu Juani binérali ketasi ko'wá, wi'libé niráa, mapalí aboni chopi Riosi yuwa ra'icha. Alí echi jaré Bariseo anilíwami binériami ayena cho achigórigá olá. ¿Churékula echi jaré mapu Mujé binérali arigá sinibí wabé ko'wá? ¹⁹ Alí Jesusi jeanigá rukueli: ¿Kecha we ko'mea echi jaré pagótami mapu echi jaré bukulí niwíami yuwa muchuwi? Ayena cho jeaneli: Echi pagótami arigá ko'mea mapalí echi rijói bukulí niwíami abijí echo'ná aboni yuwa atí. ²⁰ Chopi péé waminánomí mapalí echi bukulí niwíami ketasi aboni yuwa asimea, echalí aboni wi'libé niráa ketasi ko'mea.

²¹ Alí tarapé wesi pachókama bilé luwíami napacha echi bukulíwami chiní jiti, mapujiti echirigá pachókasuwa, echi bukulíwami pachókarami we téeli nilama, ma wichósuwa. Alí echi luwíami napacha waminabi chi'wama. ²² Nirapé wesi ro'wama echi bukulíwami uva anilíwami ba'wila echo'ná pachana jaréana sití wichí chiwáwalachi. Echirigá olásagá, ma ronínasa, echi uva ba'wila we chi'wanama echi sití wichí chiwáwala. Alí káraga ku'lima echi uva ba'wila, ayena cho echi wichí chiwáwala káraga chi'wama. Echijiti galá níima ro'wasa echi bukulíwami uva ba'wila ke cho ronóami, echo'ná pachana jaréana bukulíwami wichí chiwáwalachi.

Echi jaré binéami mosika kuli turío

(Mt. 12.1-8; Lk. 6.1-5)

²³ Alí siné isábawachi rawé Jesusi simírali echo'ná mapo'ná turío ichílati, echi jaré mapu Binói binérali yuwa. Alí echi jaré mapu Binói binérali echo'ná simáraga mosika kuli turío. ²⁴ Echalí echi jaré o'wéala binériami, Bariseo anilíwami rijói jeanigá rukueli: ¿Churékula echirigá olá echi jaré mapu Mujé binérali? Mapujiti ketasi risensia ju máputa echirigá olabo jipi isábawachi rawé. ²⁵ Chopi Jesusi jeanigá rukueli: ¿Kéchatamo siné 'nénali mapurigá osirúami ju echo'ná Riosi Ra'íchala oselíwalachi mapurigá echi walula Rabiri olali mapalí binói we newaleli ko'wáami, mapalí binói we 'locheli, echi auché jaré binói yuwa muchúami ayena cho? ²⁶ Mapujiti echi Rabiri bakili echo'ná pachá Riosi ri'obáwalachi mapalí echi Abiatari riwéami rijói walula sacerdote anilíwami níili. Echalí echi Rabiri ko'wali echi jaré pani mapu echo'ná pachá, Riosi 'yárami níili. Alí ketasi risensia níili mapu echi Rabiri ko'mea. Chopi risensia níili mapu echi jaré sacerdote chopi ko'mea. Alí echi Rabiri arigá kosá ayena cho 'yali ko'nula echi auché jaré rijói mapu binói yuwa muchili.

²⁷ Echalí Jesusi ayena cho jeaneli: Riosi nuleli echi pagótami mapurigá galá isábama sinibí isábawachi rawé. Riosi ketasi niwali echi pagótami mapurigá chopi echirigá we nóchali ologá, o'wikeka isábama echalí isábawachi rawé. ²⁸ Alí Jesusi ayena cho jeaneli: Echijiti Nijé ayena cho ne Walubela ju echalí isábawachi rawé, mapujiti Riosi tamí wilali mapurigá Ku'wíriami niráa.

Bile rijói wabé nakólami sikéami ku sa'wárami níili

(Mt. 12.9-14; Lk. 6.6-11)

3 Alí Jesusi auhecho siné bakili echo'ná pachá biléana ri'obachi echi jaré Juríosi ri'obáwalachi. Alí echo'ná pachá asali bilé rijói, echi mapu biléana sikachí wabé nakólami sikéami níili. ² Alí jaré rijói echo'ná pachá muchúami wabé kichiga 'nénali echi Walubela Jesusi. Aboni jerigá 'náta muchili: ¿Acha galá ku sa'wama echi Jesusi je'ná rijói, jipi isábawachi rawé? Echirigá aboni ne wabé kichiga wi'nijíinali echi Jesusi, mapujiti aboni mayeli mapu ketasi risensia níili mapu Jesusi ku sa'wama echi rijói echalí isábawachi rawé. ³ Alí Jesusi jeaneli echi rijói biléana sikachí nakólami sikéami: ¡Ku wilísaga, wilibá jena'í nasipa tamujé yuwa! ⁴ Alí Jesusi jeaniga rukueli echi auché jaré rijói: ¿Churigá 'nalí galá risensia ju máputa galabé olabo jipi isábawachi rawé? ¿Acha risensia keremá máputa chibi yiri olabo? ¿Acha risensia ju máputa ku sa'wabo je'ná rijói? ¿Acha risensia keremá máputa miná mi'liboa je'ná rijói? Alí aboni tarapé biyiri ku nijéwali. ⁵ Alí Jesusi we yóniga 'nénali aboni, ayena cho we siweli mapujiti aboni ne wabé biwárami suléami níili. Alí Binói jeaneli echi nakólami sikéami rijói: ¡Wachiná kemi sikál! Echalí echi rijói galá ku wachínali binói sikala, mapujiti binói sikála we yáati ma galá ku sa'wárami níili. ⁶ Alí echi jaré sayérami rijói Bariseo anilíwami binériami níili. Mapalí aboni ku 'machínali echo'ná ri'obachi jonsa, aboni we yáati nakaréwaga ra'íchali echi auché jaré Erorsi riwéami rijói amígowala yuwa, mapu churigá aboni galá omérama chapiyá echi Jesusi mapurigá aboni echirigá galá omérama mi'ayá echi Binói.

Ne wikabé pagótami napawili echo'ná walú ba'wírali suwé

⁷ Chopi echi Jesusi ku simili echo'ná walú ba'wírali suwé, ayena cho simíbali echi jaré mapu Binói binérali. Echi wikabé pagótami echo'ná Galiléachi anilíwachi kawírali piréami ayena cho simíbali. ⁸ Alí mapalí echi wikabé pagótami galá machili mapurigá Jesusi wikabé namuti wabé omériga olali, mapu ke wesi auché jaré rijói omérali echirigá olayá, alí wikabé pagótami echo'ná Binói yuwa 'nébiya simíbali. Alí wikabé aboni echo'ná Juréachi anilíwachi kawírali jonsa napawíami níili. Auché jaré aboni echo'ná walúlachi Jerusalémachi

jonsa napawili. Auché jaré aboni echo'ná Iruméachi anilíwachi kawírali jonsa napawili. Auché jaré echo'ná bo'ónala walú bakochi Joránachi anilíwachi jonsa napawili. Ayena cho auché jaré echo'ná kawírali jonsa napawili mapo'ná mulubé ju echo'ná o'wéalachi Tírochi anilíwachi, Sirónachi anilíwachi. ⁹ Alí ne wikabé pagótami echirigá ne cha'igá napawili echo'ná walú ba'wírali suwé mapo'ná Jesusi asali. Echijiti Jesusi nuleli echi jaré mapu Binói binérali mapurigá echo'ná walú ba'wírali suwé uchárami níima bilé barko anilíwami, echo'ná ba'wírali moba iyénami. Alí Jesusi asináali echo'ná moba bárkochi, mapurigá echi auché jaré wikabé pagótami ketasi rachináma Binói, echo'ná walú ba'wírali suwé atíachi. ¹⁰ Echali rawé Jesusi ku sa'wali wikabé nayúkami, echijiti si'néami mapu ikí echo'ná piréami nayúkami níili ne cha'igá napawili Binói yuwa. Alí ne si'néami echi jaré nayúkami nakili mapu chachema echi Binói, mapurigá echirigá ne ibili niráa ku sa'wárami níima. ¹¹ Alí echo'ná mapo'ná Jesusi asali ayena cho sili jaré pagótami mapu wabé chati Riablo aliwala aliwéami níili. Aboni echo'ná bacháami Jesusi yuwa wéemi raweka chokoba jábali. Alí echi wikabé riablo aliwala, echo'ná pachá echi pagótami sulálachi muchúami, o'weli ra'íchali jeanigá: ¡Mujemi ju echi bilepi Riosi Ranala! ¹² Alí Jesusi we iwéami ra'amali echi jaré riablo aliwala, jeanigá mapu aboni ke wesi auché jaré pagótami ruyema mapu Binói echi bilepi Riosi Ranala níili.

Jesusi chapili makói miná okuá rijói mapurigá aboni Binói yuwa 'yénama
(Mt. 10.1-4; Lk. 6.12-16)

¹³ Alí Jesusi pe wilibeko echo'ná biléana ripá rabó simigá, echo'ná bayérali echi jaré mapu Binói nakili mapurigá Binói yuwa 'yénama. Alí aboni echo'ná Binói yuwa sili. ¹⁴ Alí chapili makói miná okuá, mapurigá aboni Binói yuwa 'yénama, ayena cho mapurigá Binói julama echi Wabé Galabé Riosi Ra'íchala nawisánala. ¹⁵ Alí Jesusi we galá iwébanali echi aboni mapurigá aboni galá omérama ku sa'wayá echi jaré wikabé nayúkami, ayena cho mapurigá aboni galá omérama ku machí a'waya echi jaré wabé chati riablo aliwala mapu echo'ná pachana jaré pagótami sulálachi muchuwi. ¹⁶ Alí je'ná ju echi jaré makói miná okuá: Echi Simoni mapu Jesusi ayena cho Pegro riwarali; ¹⁷ echi Jakobo ayena cho; echi Juani, echi mapu echi Jakobo rijimala níili, ayena cho. Je'ná okuánika echi Sibireo riwéami rijói kúchuwala níili. Alí Jesusi ayena cho jerigá rijili echi okuánika aboni: Boanesi. Echi mapu je'ná jerigá aniwáami ju: Ukuí ri'óami. ¹⁸ Alí echi Antresi bilé níili, echi Jilipi ayena cho, echi Batalomé ayena cho, echi Mateo ayena cho, echi Tomasi ayena cho, echi Jakobo, mapu echi Alibeo riwéami rijói ranala níili ayena cho, echi Tareo ayena cho, echi Simoni echo'ná Kananéachi bitéami ayena cho; ¹⁹ echi Júrsi Jiskarioti

ayena cho. Alí echi níili mapu pe kinánokuá bayébali echi jaré so'ntarsi mapurigá aboni bologá chapimea echi Jesusi, mapurigá Binói arigá mi'lirúami níima.

Jaré wabé sayérali echi we Galabé Riosi Iwigala
(Mt. 12.22-32; Lk. 11.14-23; 12.10)

Alí mapalí Jesusi ma sunili chapigá jawa aboni, alí Binói bakili echo'ná biléana kalírali si'neami aboni yuwa. ²⁰ Alí auchecho siné ne wikabé pagótami ne cha'igá napawili echo'ná Jesusi yuwa. Echijiti Jesusi, ayena cho echi jaré mapu Binói binérali ketasi chirigá omérali ko'yá. ²¹ Alí echi jaré Jesusi ritémawala je'ná jerigá machisá, aboni ku toboya sili, mapujiti jeanili: Binói ma ke newalíte nírali.

²² Alí echi jaré nulalíwami binériami, echo'ná Jerusalémachi jonsa napawíami jeanili: Echi Jesusi níwa echi Bersebubi anilíwami riablo. Binói we riablo chopi suréami ju, echijiti Binói galá omero machí a'waya echi jaré riablo aliwala. ²³ Alí Jesusi bayesa echi aboni, irétaga jeaneli: ¿Churigá omérama echi Satanasi riwéami riablo ku machí páa a binói Satanasi? ²⁴ Mapalí biléana walúlachi piréami o'wéala nuláami a'nagupi nasayérasagá, aboni tarapé omérama waminabi nulayá echo'ná piréami. ²⁵ Alí mapalí biléana kalírali piréami a'nagupi nasayérasagá, ketasi omérama waminabi napawika rijowa. ²⁶ Alí echi Satanasi a binói niráa sayérasagá, ma ketasi waminabi walula níima. Chopi a binói niráa suwábaga suwibama.

²⁷ Echi riablo, Satanasi riwéami, mapurigá bilé rijói wabé aparúami ju. Tarapé wesi galá omérama chigoya echo'ná bilé wabé aparúami rijói bitélachi, mapalí ketasi bachá bulérami níisa. Chopi bachá bulusáagá, alí echi jaré pagótami galá omérama chigoya echo'ná echi wabé aparúami rijói bitélachi.

²⁸ Ne bichíwali 'yemi nimí ané mapu Riosi galá omero ku 'wikáwiya ne suwaba mapu ikí echi jaré pagótami chati olali, ayena cho ne suwaba mapu ikí aboni we chati ra'íchali. ²⁹ Chopi mapuyíripi we chati ra'íchako echi we galabé Riosi Iwigala sayéraga, échiko tarapé siné ku wikawárami níima, chopi binói ne wabé wi'nijírami níima ne sinibí niráa. ³⁰ Alí Jesusi echirigá aneli mapujiti aboni anili mapu Binói Jesusi ne wabé chati riablo aliwala aliwéami níili.

Jesusi iyela echo'ná Binói yuwa nawali, echi jaré binói ritémawala ayena cho.
(Mt. 12.46-50; Lk. 8.19-21)

³¹ Alí pe wilibeko Jesusi iyela echo'ná nawali, echi jaré binói ritémawala ayena cho. Alí aboni echo'ná machí jaga, auché bilé júuli bayénala echi Jesusi. ³² Alí echi jaré mapu echo'ná Jesusi yuwa mulubé noligá muchili jeaneli: Mujé iyela, ayena cho echi jaré mujé ritémawala ma sisá, echo'ná machí muchuwi. Aboni

echo'ná Mujé mi bayé. ³³ Chopi Jesusi ku nijéwaga jeaneli: ¿Chigá ju Nijé iyela? ¿Chigá ju Nijé ritémawala? ³⁴ Alí galá 'néniga echi jaré mapu Binói yuwa nologá muchili, Binói jeanili: Je'ná jaré mapu tamí yuwa muchuwi, échiko mapurigá Nijé iyela niráa ju, ayena cho mapurigá Nijé ritémawala niráa ju. ³⁵ Alí mapu yíripi olako mapurigá Riosi nulá, échiko mapurigá Nijé rijimala niraa ju, ayena cho mapurigá Nijé iyela niráa ju.

Bilé rijói turío icháami

(Mt. 13.1-9; Lk. 8.4-8)

4 Alí Jesusi echo'ná walú ba'wírali suwé asagá, auchecho siné chótali nawésiya. Alí echo'ná Binói yuwa ne wikabé pagótami ne cha'igá napawili, Binói ra'íchala kipúbiya. Echijiti Binói asíbali echo'ná moba biléana bárkochi mapu echo'ná ba'wichí moba chukuli. Alí echi wikabé pagótami echo'ná ba'wírali suwé muchili. ² Alí Jesusi ne wikabé namuti irétaga nawésali echi wikabé pagótami jeanigá: ³ Galá námsi je'ná: Bilé rijói chótali turío ichayá. ⁴ Alí ma ichisuwa jaré turío echo'ná mulubé buwichí rujuili. Alí echi jaré chuluguí echo'ná sisáa káraga suwali. ⁵ Ayena cho auché jaré turío echo'ná biléana rapirúachi rujuili, mapo'ná ke 'mé wi'yéali. Alí echi jaré turío we sapú a'wili mapujiti echo'ná ke 'me wi'yéachi níili. ⁶ Chopi mapalí we ratáami rayénali, echalí echi kúuchi turío bukulí a'wiami we yáati wakicheli, mapujiti ketasi cho galá nawarali. ⁷ Ayena cho auché jaré turío rujuili echo'ná we kasaléachi. Alí echi kasalá o'weli ochérasa, ko'yali echi turío. Echijiti tarapé rakeli. ⁸ Auché jaré turío we galá wi'yéachi rujuisa, galá a'wisá, o'weli ochérasa, ne galá rakeli. Alí jaré turío baisá makói rakeli. Auché jaré usánsa makói rakeli. Auché jaré bilé kiento rakeli. ⁹ Alí Jesusi jeaneli: 'Yemi máputamo nakeko galá namsi.

Jesusi ruyegá aní mapu churékula Binói irétaga nawésali echi pagótami

(Mt. 13.10-17; Lk. 8.9-10)

¹⁰ Alí pe wilibeko echi wikabé pagótami ma ketasi Jesusi yuwa muchili. Chopi jaré pe okuá pagótami ayena mulubé Binói yuwa 'yéali, echi auché jaré mapu Binói binérali ayena cho. Alí si'néami aboni jeanigá rukueli Jesusi: ¿Churigá aniwáami ju echirigá mapurigami irétaga nawésali? ¹¹ Alí Jesusi jeaneli: 'Yémitamo ma galá machíratami ju mapu churigá Riosi nulá, chopi echi auché jaré ketasi cho echirigá machíratami ju. Abóni ketasi cho galá machí mapu churigá Riosi nulá, echijítini Nijé ne suwaba irétaga nawésama echi auché jaré ke cho galá bichíyami. ¹² Alí Nijeni irétaga nawésama echi aboni, mapurigá aboni galá 'néniga, arigá ketasi galá machimea mapurigá Nijeni nawesa. Alí aboni echirigá galá námama Nijé Ra'íchala, chopi arigá ke-

tasi galá machimea mapurigá Nijeni binéraga nawesa. Echijiti aboni arigá ketasi bukulíwami nakulíwarami níima, nirapé cho ku wikawárami níima mapurigá aboni chati olalí.

Jesusi nawésaga aní mapu churigá aniwáami ju mapurigá Binói binérali

(Mt. 13.18-23; Lk. 8.11-15)

¹³ Alí Jesusi ayena cho jeaneli: ¿Kechátamo machili mapurigá Nijé 'yemi mi irétaga nawésali? ¿Churigá bichétamo gala machiboa suwaba echi auché jaré namuti mapu Nijé 'yemi nimí irétali? ¹⁴ Echi mapu ichako echi turío, échiko mapurigá bilé rijói Riosi Ra'íchala nawésami niráa ju. ¹⁵ Alí mapurigá ikili echi jaré turío mapu echo'ná buwichí rujuili, achigorigá ikimea echi jaré pagótami mapu bachá niráa galá namsa echi Galabé Riosi Ra'íchala, arigá ketasi we yaa bichíima. Achigorigá ikiméa mapujiti echi riablo we yáati miná 'yema echi Galabé Riosi Ra'íchala mapu aboni ma námali, achigorigá mapurigá echi jaré chuluguí suwaba suwali echi jaré turío echo'ná buwichí rujuíami. ¹⁶ Alí Jesusi ayena cho jeaneli: Mapurigá ikili echi jaré turío mapu echo'ná biléana rapirúachi rujuili, echirigá achigorigá ikimea echi jaré pagótami mapu bachá niráa galá kaníliga namsa Riosi Ra'íchala, arigá ketasi galá ne sulachí niráa bichíima. ¹⁷ Abóni achigorigá ju mapurigá echi jaré turío ketasi 'me galá nawéami. Aboni bichíima pe téeli niráa. Chopi mapalí we risúu olárami níima mapujiti echirigá gala bichínali Riosi Ra'íchala, echalí aboni ma ketasi waminabi napawima echi auché jaré bichíyami yuwa, mapujiti ma ketasi waminabi galá bichíima. ¹⁸ Ayena cho mapurigá ikili echi jaré turío mapu echo'ná wabé kasaléachi rujuili, achigorigá ikimea echi auché jaré pagótami, suwaba mapu ikí galá namsa Riosi Ra'íchala, arigá ketasi galá bichíima. ¹⁹ Alí aboni chopi waminabi olama achigorigá mapurigá aboni chabénala olalí. Aboni ketasi bukulíwami nakulíwarami níima, chopi wikabé namuti wabé 'nátaga pirélama. Aboni chopi wabé koruma echi wikabé namuti jena'í wichimóbachi nirúami, ayena cho chopi ne wabé kaníliga ologá pirélanali. Echijiti aboni ketasi galá bichíinali Riosi Ra'íchala. Alí aboni ketasi galá ku'wíratami níima. ²⁰ Alí mapurigá ikili echi jaré turío, echo'ná galabé wi'yéali rujuíami, achigorigá ikimea echi auché jaré pagótami, si'néami mapu ikí galá namsa Riosi Ra'íchala ne galá sulachí niráa bichíima. Aboni ne galá nijéwaga olama mapurigá Riosi nulé, ayena cho waminabi galá bichíiga, wabé galabé ologá pirélama jena'í wichimóbachi. Jaré aboni mapuyiri echi turío ju mapu baisá makói niráa rakeli. Auché jaré mapuyiri echi jaré turío ju mapu usansa makói rakeli mapujiti aboni waminabi galabé olá. Auché jaré mapuyiri echi jaré turío ju mapu bilé kiento

rakeli mapujiti aboni waminabi wabé simírami galabé olá.

Echi jaré namuti mapu chiná nasótami ju arigá galá ku riwirúami níima
(Lk. 8.16-18)

²¹ Alí Jesusi ayena cho jeaneli: Tarapé wesi pólaga wil-ama bilé chopé rajáami echo'ná ri'lé pachá biléana sikolichi, nibilé wilama echo'ná ri'lé pachá biléana jubechi. Chopi si'néami pagótami ripabé ne galá machiná niráa wilama echi chopé rajáami mapurigá aboni echirigá ne galá machílama si'néami mapu ikí mo'wíko echo'ná pachá kalírali. Achigórigá 'wérali ju mapu Riosi Ra'íchala ne galá nawisárami níima mapurigá si'neami pagótami ne galá machimea. ²² Alí suwaba namuti mapu ikí chiná nasótami ju, échiko pe minánomí galá ku riwirúami níima. Alí suwaba echi jaré namuti mapu ikí ke machirúami ju, échiko pe minánomí galá ku machirúami níima. ²³ ¡Yemi máputamo a nakeko, ne galá namsi!

²⁴ Alí Jesusi ayena cho jeaneli: Suwaba ne galá 'natasi mapurigátamo kipunú. Átamo ne galá 'nátaga kipúsagá, 'yémitamo waminabi galabé machíami níibo, mapujiti Riosi 'yemi mi waminabi machírama.

²⁵ Mapujiti echi mapu ne galá machiko, waminabi 'yárami níima mapurigá binói waminabi galá machimea. Chopi echi mapu ketasi machiko, arigá 'yérami níima echi mapu binói machili.

Echi turío rakala galá a'wí

²⁶ Alí Jesusi ayena cho jeaneli: Mapalí echi pagótami galá nijéwaga olá mapurigá Riosi nulé aboni, echalí arigá ikimea aboni mapurigá ikí mapalí bilé rijói we ichá echi turío echo'ná wi'yérali. ²⁷ Mapujiti echi rijói rokogó chopi we kochí, alí biché sinibí bi'yá we asísimi. Chopi echi turío galá a'wisáa, walú ochero. Alí echi rijói ketasi machí churigá omero echirigá ochériya echi turío. ²⁸ Alí echi turío ne galá raké echo'ná wi'yérali ichisúwa. Alí ne bachá galá ochérasa, muréensa pe wil-ibeko echo'ná mulalachi galá raké. ²⁹ Alí ma gala rakéachi, echi mapu ichali we yáati sikirema, mapujiti ma galá sébali echi turío sikirékowachi.

Echi mostasa rakala
(Mt. 13.31-32; Lk. 13.18-19)

³⁰ Alí Jesusi jeaneli: Nijeni 'yemi mi irétaga binela mapurigátamo galá machiboa mapu churigá galá nulá Riosi. ³¹ Mapalí Riosi we nulé echi pagótami, mapuyiri echi taa mostasa anilíwami rakala ju, mapu bilé rijói echo'ná wi'yérali ichá. Mapujiti echi mostasa rakala ne wabé taa ju, alí auché bilé ne tabéala raká tarapé auché bilé nirú jena'í wichimóbachi. ³² Chopi mapalí ma ichisúwa, galá a'wisáa, walú ochérasa, o'weli

otowata. Alí echi o'weli chuluguí echo'ná ri'lé pachá galá kábama.

Mapurigá Jesusi irétaga ra'íchali
(Mt. 13.34-35)

³³ Alí Jesusi echirigá irétaga binérali Riosi Ra'íchala mapuyénasí aboni galá omérali machigá bineya.

³⁴ Binói chopi irétaga niráa ra'íchali echi jaré aboni. Alí mapalí echi jaré mapu Binói binérali waná awínali muchili, alí Binói galá ruyeli aboni mapu churigá ani-wáami níili suwaba.

Jesusi ku ra'ámali echi wabé jiwérami iká
(Mt. 8.23-27; Lk. 8.22-25)

³⁵ Echalí rawé ma alíwachi Jesusi jeaneli echi aboni: Ma echo'ná walú ba'wírali bo'ónala simabo. ³⁶ Alí ma ariwesa echi wikabé pagótami, echi jaré binéami echo'ná biléana bárkochi, echo'ná walú ba'wírali moba iyenamichi muchiga, ku simíwali. Alí aboni ayena cho toli echi Walubela Jesusi. Alí ayena cho aboni yuwa ku simíwali auché jaré kúuchi barko, echo'ná walú ba'wírali moba 'yérami. ³⁷ Chopi ke sayiná ne wabé jiwériga ikali. Echijiti echo'ná pachana bárkochi, walú ba'wírali moba yenamichi, ne noguí buchili ba'wí. ³⁸ Alí Jesusi we kochigá bu'wili echo'ná biléana mosobétachi, echo'ná bárkochi jubáami. Alí echi jaré binéami jeanigá ku achali: Binériami, ¿Kéchami tamujé tamí natimá? ¡Ma suwibóaré! ³⁹ Alí Jesusi asísaga ku ra'ámali echi iká. Alí jeaneli echi walú ba'wí: ¡Kilí asagá! Alí echi walú ba'wí we yáati ne galá siwega ku wilíwali. ⁴⁰ Alí Jesusi jeaneli echi jaré mapu Binói binérali: ¿Churékulátamo echirigá majajali? Ayena cho jeanigá rukueli: ¿Churékulátamo ketasi galá bichíli? ⁴¹ Alí aboni ne wabé majajali mapujiti aboni ketasi galá machili churigá Jesusi echirigá omérali ra'ama echi wabé iwéami iká, mapujiti echi iká arigá galá nijéwali, echi walú ba'wí ayena cho.

Jesusi ku sa'wali bilé rijói mapu wabé chati riablo ali-wala aliwéami níili
(Mt. 8.28-34; Lk. 8.26-39)

5 Alí aboni sili echo'ná walú ba'wírali bo'ónala mapo'ná Garátachi anilíwachi ju. ² Alí mapalí Jesusi ku machínali echo'ná bárkochi jonsa, we yaa echo'ná nawali bilé rijói mapu wabé chati riablo ali-wala aliwéami níili, echi mapu echo'ná jaréana risochí chu'wechi jonsa nawali. ³ Echi rijói echo'ná biléana risochí chu'wechi bitéami níili. Binói ne wabé aparúami níili. Echijiti ke wesi omérali wiya jiti bolagá achayá, ni-rapé omérali echi jiero wiya jiti bolagá achayá. ⁴ Echo'ná piréami pagótami arigá wisabé bulali echi rijói síkálachi, echi jiero wiya jiti. Ayena cho wisabé echirigá bulali binói ronólachi, chopi binói sinibí wabé

omériga ripúnali echi jjero wiya. Echijiti ke wesi galá omérali echi rijói. ⁵ Binói sinibí rawé, sinibí rokogó echo'ná kawichí wabé sinaka iyénali, echo'ná risochí chu'wéchi ayena cho. Alí a binói riteti michoka iyénali.

⁶ Alí echi rijói mikabé jonsa riwisá, we sapú echo'ná Jesusi yuwa 'maga, bacháami wéemi raweka chokoba wilíbbali. ⁷ Alí o'weli sinaga jeaneli: ¿Pírimi olama tamí yuwa, Mujé Jesusi? Mujemi echi Riosi ripabé riwigáchi atíami Ranala ju. Wabé nimí tani Riosi jiti, mapurigami ketasi tamí risúu olama. ⁸ Alí binói je'ná jerigá aníli mapujiti Jesusi ma bachá nuleli echi wabé chati riablo aliwala jeanigá: ¡Ku machínaga echo'ná pachana je'ná rijóochi jonsa, mujé wabé chati riablo aliwala! ⁹ Alí Jesusi rukueli echi rijói jeanigá: ¿Chu mi riwé? Alí echi rijói jeaneli: Wikabé sontarsi ni riwé mapujítita wikabé ju.

¹⁰ Alí echi rijói ne wabé risúu anigá tali mapurigá Jesusi ketasi miná waná julama echi jaré wikabé riablo aliwala mapu echo'ná pachana binói rijóochi muchili.

¹¹ Alí echo'ná kawichí wikabé kochi ko'yá uchúntali. ¹² Echijiti ne suwaba echi jaré isena riablo aliwala we risúu anigá tali jeanigá: Tamujé tamí echo'ná wikabé kóchichi pachana julá, mapurigata echo'ná pachana mo'wiboa. ¹³ Alí Jesusi echirigá risensia 'yali. Alí echi wikabé wabé chati riablo aliwala we yáati ku 'machínasa, echo'ná pachana echi rijóochi jonsa, we sapú mo'wili echo'ná pachana echi wikabé mapuyena okuá mili kóchichi. Echijiti echi wikabé kochi ke sayiná echo'ná ripá jonsa wabé majaga júmsaga, echo'ná biléana koláachi ri'léna rujuiga, waminá ri'lé ba'wírali silili.

¹⁴ Alí echi jaré kochi mélamí we sapú ku simíbbali, echo'ná walúlachi piréami suwaba ruyébiya mapurigá ikili. Echo'ná mulubé nologá kawichí piréami ayena cho ruyérami níli. Echijiti wikabé pagótami 'nébiya simíbbali mapurigá ikili. ¹⁵ Alí aboni echo'ná sili mapo'ná Jesusi asali. Alí aboni riwali echi rijói mapu chabénala wikabé wabé chati riablo aliwala aliwéami níli. Chopi ma galá ku 'natasa, ma galá ku napacha asali. Echijiti echi wikabé pagótami ne wabé majali. ¹⁶ Alí echi jaré mapu galá riwálíko, galá ruyeli suwaba mapurigá ikili echi rijói jiti mapu chabénala wikabé wabé chati riablo aliwala aliwéami níli. Ayena cho ku ruyeli mapurigá ikili echi wikabé kochi. ¹⁷ Alí si'néami echo'ná piréami pagótami chótali risúu anigá anée mapu echi Walubela Jesusi ma ku simea echo'ná jonsa.

¹⁸ Alí Jesusi auchécho siné 'moli echo'ná ripá moba bárkochi, mapurigá Binói echo'ná asagá ku simea echo'ná aboni kawíwalachi jonsa. Chopi echi rijói mapu chabénala wikabé wabé chati riablo aliwala aliwéami níli, risensia tánali mapurigá binói ayena cho Jesusi yuwa simea. ¹⁹ Chopi Jesusi tarapé risensia 'yasa, jerigá aneli: Echo'ná kemi bitélachi ku simigá. Ku ruyemi echi jaré kemi ritémawa mapurigá echi Walubela Riosi wabé galá natimaka olali mi yuwa. ²⁰ Alí echi rijói ku

simisá ruyeli ne si'néami echo'ná makóina o'wélachi piréami mapurigá echi Walubela Jesusi echirigá wabé omériga olali binói yuwa. Alí ne si'néami echo'ná piréami ne wabé 'nátaga kipuli mapalí echi rijói echirigá ruyeli aboni.

Jesusi ku owíntali bilé tiwé ma mukúami

(Mt. 9.18-26; Lk. 8.40-56)

²¹ Alí Jesusi ma ku simili echo'ná biléana bárkochi walú ba'wírali iyénamichi ripá moba asagá. Alí Binói ma nawasa echo'ná auché biléana waná suwé, auchécho siné ne wikabé pagótami napawili Binói yuwa.

²² Alí echo'ná nawali bilé rijói Jairo riwéami, echi mapu ayena cho walula níli echo'ná echi jaré Juríosi pagótami ri'obáwalachi. Alí biché echi Jairo riwisáa echi Jesusi, echo'ná bacháami wéemi raweka chokoba wilíbbali mapo'ná Jesusi asali. ²³ Alí we risúu anigá jeaneli: Keni malá ma mukuméaré. Wakiná tamí yuwa simí, Mujé sikala jiti nochogá ku sa'wá, mapurigá binói ketasi mukumea.

²⁴ Alí Jesusi we yáati simili binói yuwa, chopi wikabé pagótami ne cha'igá najátali Jesusi yuwa. ²⁵ Ayena cho echo'ná inárali bilé mukí mapu we léniga nayúami níli, makói miná okuá bamíbbali jonsa. ²⁶ Alí echi mukí chabé jonsa ne wabé nayúami níli. Alí wikabé óyami wisabé nakili mapu ówima, chopi tarapé ku sa'wisá, binói waminabi okoli. Alí binói ma káraga suwábbali echi jaré binói níwala namuti, echi óyami natétiya.

²⁷ Alí mapalí echi mukí námali echi pagótami Jesusi jiti rugá ra'icháchanachi, alí binói, wikabé yuwa, jubáami nawagá nochali Jesusi napáchala. ²⁸ Mapujiti binói mukí jerigá 'nátali: Chopi echi Jesusi napáchala nochásagáni, ma galá ku sa'wárami níimani. ²⁹ Alí echi mukí ma nochasa echi Jesusi napáchala, ma ke sayiná ketasi waminabi lénali, chopi binói galá machili mapu ma ku sa'wárami níli. ³⁰ Alí Jesusi we yáa machili mapurigá Binói echirigá ku sa'wali bilé. Echijiti ku kuwana 'néniga, Binói jeanigá rukueli echi jaré wikabé mapu Binói yuwa najátali: ¿Chigá nochali tamí napáchala?

³¹ Alí echi jaré mapu Binói binérali jeaneli: Mujé galá machí mapu wikabé pagótami mi wabé rachina. ¿Churékulami jeaní: Chigá tamí nochali? ³² Chopi Jesusi nologá 'nénali mapurigá galá riwimea chigá nochalo Binói. ³³ Alí echi mukí we sayirúmaga majali mapujiti binói galá machili mapurigá ma galá ku sa'wárami níli. Alí binói we yáa bacháami Jesusi yuwa wéemi raweka, chokóbaga wiligá ne bichíwali ku ruyeli suwaba mapurigá ikili. ³⁴ Alí Jesusi jeaneli: Mukí, Nijé ma nimí ku sa'wali mapujítimi galá bichíili. We kaníliga ku simigá mapujítimi ma ketasi auché siné echirigá nayuma.

³⁵ Alí Jesusi abijí ra'íchachi, jaré rijói echo'ná sili mapu echo'ná echi Jairo bitélachi jonsa simíbbami níli. Aboni jeaneli echi Jairo: Mujé malala ma mukuli. ¿Churékulami waminabi kumé echi Binériami? ³⁶ Chopi mapalí Je-

susi námali echi jaré echirigá aníachi, Binói jeaneli echi Jairo: ¡Ketasi majá! ¡Chopi galá bichíi! ³⁷ Alí Jesusi chopi risensia 'yali mapu Binói yuwa simea echi Pegro, echi Jakobo ayena cho, echi Juani, echi mapu Jakobo riji-mala níili, asíchiko. ³⁸ Alí mapalí Jesusi nawali echo'ná Jairo bitélachi, Binói riwali wikabé pagótami ne wabé buchuwí anigá o'weli nalákachi. ³⁹ Alí Jesusi galá machili mapu Binói galá ku owíntama echi tiwé mapu ma mukúami níili. Echijiti Binói jeaneli echi jaré pagótami: ¿Churékulátamo echirigá we buchuwí anigá nala-ka? Je'ná tiwé, tamí jiti ketasi mapurigá mukúami ju, chopi kochíami niráa ju. ⁴⁰ Alí echo'ná muchúami pagótami wabé kachigá tiníchali echirigá aníachi Jesusi. Alí Binói ku machí júuli ne si'néami aboni. Alí binói yuwa bayéraga echi tiwé 'wénawala, ayena cho echi jaré bikiyá Binói yuwa 'yéami, echo'ná pachá bakili mapo'ná echi mukúami tiwé bu'wíli. ⁴¹ Alí Jesusi chapigá echi mukúami tiwé sikala, Binói Jesusi ra'ícha-ga niráa jeaneli: Talita kumi. Echi mapu Ralámuli ra'íchala niráa, jerigá aniwáami ju: ¡Tiwé, ku asísaga! ⁴² Alí echi tiwé we sapú ku asísali. Ma ketasi mukúami níilasa, galá iyénali mapujiti makói miná okuá bamíba-mi níili. Alí si'néami echo'ná muchúami pagótami ne wabé majajali. ⁴³ Chopi Jesusi we iwéami nuleli mapu ke wesi ruyema mapurigá echirigá ikili. Alí nuleli mapu ko'wáami yama echi tiwé.

Jesusi ku nawali echo'ná Nasarétachi

(Mt. 13.53-58; Lk. 4.16-30)

6 Alí Jesusi echo'ná jonsa ku simisáa, echo'ná Binói kawíwalachi ku nawali. Echi jaré mapu Binói binérali ayena cho Binói yuwa sili. ² Alí mapalí isábawachi rawé níili, echalí Jesusi chótali nawésiya echo'ná echi jaré Juríosi pagótami ri'obáwalachi. Alí wikabé pagótami wabé 'nátaga, kilí kipuga, a'nagupi jeanigá rukueli: ¿Churigá galá omero je'ná rijói echirigá ne wabé galá machigá ra'icha, ne suwaba namuti jiti rugá? ¿Churigá galá omero nochogá ku sa'wayá echi jaré nayúkami? ³ Alí aboni a'nagupi jeaneli: Tamujeta galá machí je'ná rijói. Binói echi tábala sipáami ju, echi María ranala. Ayena chota galá machí echi Jakobo, echi José, echi Júراسي, echi Simoni, mapu si'néami je'ná aboni, Binói ritémawala ju. Ayena cho jena'í tamujé yuwa muchuwi Binói a'wayela. Alí echo'ná piréami ketasi bichíili mapu Jesusi bilepi Riosi Ranala níili, mapujiti aboni chabénala taa káachi galá machili echi Binói. ⁴ Alí Jesusi jeaneli: Ne si'néami pagótami galá o'wiké bilé walula Riosi jiti nawésami, chopi echo'ná binói kawíwalachi piréami ketasi o'wiké, echi jaré binói ritémawala ketasi cho, echi jaré echo'ná binói bitélachi piréami ketasi cho. ⁵ Alí mapalí Jesusi echo'ná Binói kawíwalachi iyénali Binói ketasi omérali wabé omériga olayá, chopi pe okuáa nayúkami ku sa'wali, Binói sikala jiti nochogá. ⁶ Jesusi ne wabé siwe-

ga 'nátali mapujiti aboni tarapé bichíili. Alí pe kinana Binói nawésiya iyénali echo'ná ne suníami mulubé no-ligá rijówachi.

Jesusi júuli nawísánala echi jaré makói miná okuá

(Mt. 10.5-15; Lk. 9.1-6)

⁷ Alí Jesusi bayeli echi jaré makói miná okuá mapu Binói binérali. Echalí okuá niráa nawísánala júulaga, Jesusi ne galá jiwérali mapurigá aboni omérama ku machí a'waya echi jaré we chati riablo ariwala, echo'ná jaré pagótami sulálachi muchúami. ⁸ Ayena cho nuleli mapurigá aboni tarapé biyiri tomea echo'ná buwichí simiba. Chopi nuleli mapu ibílipi bilé tisola tomea; ayena cho nuleli mapu ketasi tomea nibilé chiwáwala, ayena cho mapu ketasi tomea ko'wáami, ayena cho mapu nirapé tomea wenomí. ⁹ Ayena cho Jesusi nuleli mapu wáasi wichila chopi akarasa, ibílipi bilepi napacha napachama. ¹⁰ Ayena cho jeaneli: Mapalítamo chí'libábiya mo'wiboa echo'ná biléana kalírali, echo'ná bilénapi kalírali aripisi mapuyénasítamo ku simiba echo'ná walúlachi jonsa. ¹¹ Alí mapalí biléana piréami ketasi 'yemi mi narésagá, nirapé 'yemi mi ná-manalásagá, alí mapalítamo ku simabo echo'ná jonsa, ne galá bi'wasí echi napisó mapu ri'leka 'yemi ralálachi chukúbali. Echirigátamo ku ruyebo mapurigá aboni wabé chati oláami ju. Alí echi we chati oláami pagótami echo'ná Sorómachi anilíwachi piréami, ayena cho echo'ná Gomórachi anilíwachi piréami ne wabé wi'ni-jírami níima echalí ne jubá suwibáluwachi rawe. Chopi echi jaré pagótami mapu ke námanaliko 'yemi nawésawala ne wabé simírami wi'nijírami níima echalí rawé. ¹² Alí aboni ma simasa nawésali mapurigá echi jaré pagótami bukulíwami, galabé niráa ku 'natama. ¹³ Alí aboni ayena cho ku machí a'wali wikabé wabé chati riablo aliwala echo'ná pachana echi jaré chati oláami pagótami sulálachi muchúwamichi jonsa, ayena cho aboni akeite uchugá wikabé ku sa'wali echi jaré nayúkami.

Echi Juani mi'lirúami níili

(Mt. 14.1-12; Lk. 9.7-9)

¹⁴ Alí echi walula silíami Erorsi riwéami galá machili je'ná jeyiri, mapujiti kanápuromí piréami pagótami ma galá machili echi Jesusi jiti ra'ichálawachi. Echijiti echi Erorsi echirigá namsa jeanili: Echi Rijói echi Juani níima mapu chabénala pagóami níili. ¡Echiko ma mukúami níili, chopi ma ku owínaliré! ¡Echijiti je'ná binói ne wabé omériga olá! ¹⁵ Alí auché jaré jeanili: Je'ná Rijói echi Elíasi níimalé. Auché jaré jeanili: Bilé walula Riosi jiti nawésami ju, mapurigá echi auché jaré ki'yá piréami Riosi jiti nawésami. ¹⁶ Alí echi Erorsi je'ná jerigá namsa jeanili: Ne bichíwali je'ná rijói echi Juani níimará, echi

mapu nijé chabé nulali ripunánala binói kutálachi. ¡Binói ma mukúami níili, chopi ma ku owínaliré!

¹⁷ Echi Erorsi echirigá anili mapujiti chabénala binói nulali bachánala echi Juani, mapujiti echi Eroríasi riwéami mukí wabé sayérali echi Juani. Alí echi Eroríasi echi Jilipi riwéami rijói upila níili. Alí echi Jilipi, echi binói Erorsi rijimala níili, chopi echi Erorsi arigá chapili echi Eroríasi mapurigá binói upila niráa. Echijiti echi mukí we sayérali echi Juani. ¹⁸ Mapujiti echi Juani jeaneli echi walula Erorsi: Tarapé risensia níili mápumi chapimea kemi rijimá upila mapurigá kemi upí niráa. ¹⁹ Echijiti echi Eroríasi riwéami mukí we kichili echi Juani, ayena cho we nakili mapurigá echi Juani mi'lirúami níima, chopi ketasi omérali mi'ayá. ²⁰ Mapujiti echi walula Erorsi arigá we galá niralí echi Juani mapujiti binói galá machili mapu echi Juani wabé galabé oláami níili. Echijiti Erorsi galá tibútali echi Juani, mapurigá echi mukí ketasi nulama chibi olánala; ayena cho echi Erorsi galá námali echi Juani nawésawala, chopi ketasi 'me nijéwanali.

²¹ Alí echi mukí Eroríasi riwéami arigá 'nátaga machili mapu churigá mi'lirúami níima echi Juani, mapujiti echi Erorsi walú omáwali echalí rawé sébachi mapalí binói ranálati. Echalí binói ayena cho si'néami bayeli mapu ikí igúsuwami níili echo'ná Galiléachi piréami, echi auché jaré o'wéala ayena cho, echi jaré kapitani ayena cho. ²² Alí echo'ná pachá mapo'ná echi walula omáwali, echo'ná bakili bilé tiwé mapu echi Eroríasi riwéami mukí ranala níili. Echi tiwé we awili mapurigá echi jaré rijói we 'nema. Alí echi Erorsi we kaníliga 'nénali mapalí echi tiwé awili, ayena cho echi auché jaré o'wéala wabé kaníliga 'nénali. Alí echi Erorsi jeaneli echi tiwé: Tamí tani mapu ikí namuti mi nakí. Nijé nimí 'yama. ²³ Ayena cho jeaneli: Ne bichíwali nimí ané: Nijé nimí 'yama suwaba mapu ikimi tamí tani. Ne nasípasí nimí 'yama keremá mapu ikí nijé niwa. Alí nijeni ne wabé níwami ju, mapujítini ne walula silfami ju. ²⁴ Alí echi tiwé machí simigá jeanigá rukueli kepu iyé: ¿Pírini tánama? Alí binói iyela nijéwaga jeaneli: Tani mapurigami 'yárami níima echi Juani mo'ola, mapujiti nijeni we nakí mapu mi'lirúami níima echi Juani mapu pagóami ju. ²⁵ Alí echi tiwé we sapú ku bakili echo'ná pachá mapo'ná echi Erorsi asali. Alí jeaneli: Nijeni nakí mápumi we yáati echo'ná biléana bitólachi achagá, tamí 'yama echi Juani mo'ola, mapu pagóami ju. ²⁶ Alí echi walula Erorsi echirigá namsa ne wabé siweli. Chopi mapujiti binói ma echirigá ne bichíwaga niráa aneli echi tiwé, echijiti binói ma ketasi nakili mapu 'yékama. Echijiti binói arigá nulali olánala mapurigá echi tiwé nakili, mapujiti echi auché jaré o'wéala ayena cho galá námali mapurigá echi Erorsi echirigá bichíwaga aneli echi tiwé. ²⁷ Alí echi walula Erorsi we yáa júuli bilé sontarsi ripuna 'nolánala echi Juani mo'ola. ²⁸ Alí echi sontarsi echo'ná kumurachi simigá ripúnali echi

Juani mo'ola. Alí echo'ná biléana bitólachi achagá 'yali echi tiwé. Alí echi tiwé 'yali kepu iyé. ²⁹ Alí mapalí echi jaré mapu echi Juani binérali ma galá machisá je'ná jerigá ikíichi, aboni echo'ná sisáa ku chapili echi Juani mukúami sapala. Alí chu'wiróbiya ku toli aboni.

Jesusi kówali malí mili pagótami

(Mt. 14.13-21; Lk. 9.10-17; Jn. 6.1-14)

³⁰ Alí echi jaré mapu Jesusi júuli nawisánala, si'néami ku napawisa Binói yuwa suwaba ku ruyeli mapu ikí namuti aboni olali mapalí aboni nawésiya 'yéнали. ³¹ Alí Jesusi nijéwaga jeaneli: Auché biléana waná suwé simabo mapurigátamo galá isábabo. Binói echirigá aneli mapujiti wikabé pagótami echo'ná napawísali, alí auché jaré wabé a'yáapi ku simásali. Echijiti echi jaré mapu Jesusi binérali ketasi chirigá omérali ko'yá, mapujiti echi wikabé pagótami we kumeli. ³² Alí aboni echo'ná bo'ónala biléana waná kawichí suwé simíbali, echo'ná biléana bárkochi ba'wírali moba iyénamichi muchiga.

³³ Chopi mapalí aboni echirigá ku simíbali, echi wikabé pagótami ne suníami echo'ná o'wéalachi piréami galá riwali mapu Jesusi ayena cho simili, echi jaré mapu Binói binérali yuwa. Echijiti echi wikabé pagótami echo'ná ba'wírali suwé jonsa, wichí jaga jumsa, arigá ne bachá sili echo'ná o'ónala mapo'ná Jesusi Binói nawama riwéali. ³⁴ Alí Jesusi nawasa echo'ná waná suwé, we yáati riwali wikabé pagótami echo'ná napawika muchúami. Alí Binói we natimali echi pagótami mapujiti aboni mapurigá wikabé bo'wá níili, mapu tarapé téeli bilé mélami. Echijiti Jesusi wikabé namuti nawésali aboni. ³⁵ Alí mapalí ma we alíwachi níili, echi jaré mapu Jesusi binérali, echo'ná sisá mapo'ná Binói asali, jeaneli: Ma we aliwa. Jena'í wabé waná kawichí ju. ³⁶ Echijiti ku julá echi wikabé pagótami, mapurigá aboni echo'ná mulubé rijówachi simíbaga ralimea ko'wáami, mapujiti aboni tarapé niwa mapu ko'mea. ³⁷ Alí Jesusi jeaneli: ¡'Yemi aboni 'yasi mapurigá ko'mea! Chopi echi jaré mapu Binói binérali jeaneli: Tamujé ketásita oméрабо ko'wáami ralayá, mapuyena okuá mili peso natéami, mapurigata 'yabo echiyena wikabé pagótami. ³⁸ Alí Jesusi jeanigá rukueli: ¿Chu kíputamo ko'wáami niwa 'yémi? ¡Simíbaga 'nébasi! Alí aboni ma galá machigá jeaneli: Malí kúuchi pani nirú, ayena cho nirú okuá rochí.

³⁹ Alí Jesusi nuleli mapurigá echi wikabé pagótami echo'ná kasalátali rojuaga muchima. ⁴⁰ Alí si'néami aboni echirigá rojuaga muchíbali, bilé ciento niráa, ayena cho malisa makói niráa. ⁴¹ Alí Jesusi chapili echi malí pani, ayena cho echi okuá rochí. Alí ripá riwigachi 'nénaga, natétara agá ra'íchali Riosi yuwa. Alí rojuána-ga echi malí pani, Binói 'yali echi jaré mapu Binói binérali mapurigá nachútama echi wikabé pagótami; ayena cho rojuánaga nachútali echi okuá rochí ne

si'néami pagótami. ⁴² Alí si'néami echi wikabé pagótami ma kosá, ne galá posali. ⁴³ Alí ma sunisa ko'yá, makói miná okuá walírali ku napabuli echi kúuchi pani chi'wáami tibíami, ayena cho echi kúuchi rochí chi'wáami tibíami. ⁴⁴ Alí echi pagótami mapu galá posaka ko'wali, mapuyena malí mili rijói níili.

Jesusi echo'ná walú ba'wírali moba wiligá iyénali

(Mt. 14.22-27; Jn. 6.16-21)

⁴⁵ Echalí Jesusi we yáati bachá júuli echi jaré mapu Binói binérali mapurigá aboni bachá simama echo'ná bo'ónala walú ba'wírali suwé, mapo'ná Becháirachi anilíwachi níili. Alí aboni echo'ná pachá biléana bárkochi muchiga ku simíbali. Chopi Jesusi ketasi ku simili aboni yuwa, mapujiti Binói echi wikabé pagótami ripóriya tibili. ⁴⁶ Alí Jesusi ma ku ripórasa echi wikabé pagótami, waminá ripá rabó simili, mapurigá Binói bi'neli niráa ra'ichama Riosi yuwa. ⁴⁷ Alí mapalí ma we rokogó níili, echi barko pe bukulí echo'ná nasipa walú ba'wírali inárali. Chopi Jesusi we bi'neli asali echo'ná biléana walú ba'wírali suwé. ⁴⁸ Alí Jesusi echo'ná mikabé jonsa riwali echi jaré binéami mapu ne wabé risíami níili, mapujiti aboni wabé nóchali, kusí ku'línaga simíriya echi walú barko, echo'ná walú ba'wírali moba iyénami. Chopi echi barko arigá ketasi 'me simili, mapujiti echi iká we ku kuwana rakibuli. Alí echalí bi'yá chónachi Jesusi ba'wichí moba wiligá ináraga nawali echo'ná mapo'ná aboni sírali. Alí Binói waminá bacháami simíranaga olali. ⁴⁹ Chopi mapalí aboni riwali Jesusi echo'ná walú ba'wírali moba wiligá inárami, echalí aboni ketasi machili mapu echi Jesusi níilo. Chopi bilé chu'wí mayega, aboni wabé majaga sinákali, ⁵⁰ mapujiti si'néamika riwali echi Jesusi echo'ná walú ba'wírali moba wiligá inárami. Alí aboni riwisá, ne wabé majajali, mapujiti aboni ketasi cho machili mapu echi Jesusi níilo, chopi Binói we sapú ra'ichali echi aboni jeanigá: We kanílisi. Nijeni ju. Ketasi majasi. ⁵¹ Alí Jesusi echo'ná bárkochi walú ba'wírali moba iyénamichi bakisá, echo'ná pachá, aboni yuwa asíbalí. Alí ke sayiná ariweli ikayá. Chopi aboni ne wabé majaga 'nata muchili. ⁵² Alí aboni echirigá ne wabé majali mapujiti aboni ketasi cho machili mapu echi Jesusi ne wabé Walubela níilo. Aboni galá riwali mapalí Binói, péé okuáa ko'wáami chapigá, arigá wabé omériga olali mapurigá ne wikabé muwéwali, mapuyénasi Binói galá omérali ne wikabé pagótami kóoya; chopi aboni arigá ketasi cho machili mapu Jesusi ne suwaba omérami níilo, mapujiti aboni we biwárami suléami níili.

Jesusi ku sa'wali wikabé nayúkami echo'ná Jenesarétachi piréami

(Mt. 14.34-36)

⁵³ Alí mapalí aboni miná bo'ónala Jenesarétachi anilíwachi sili, echalí aboni echo'ná suwé buleli echi barko mapurigá echo'ná chukumea. ⁵⁴ Alí mapalí aboni ku 'machínali echo'ná bárkochi jonsa, echo'ná piréami pagótami we yáa galá machili echi Jesusi. ⁵⁵ Echalí aboni ne suníami mulubé rijówachi júmaga, echo'ná jonsa palí ne si'néami mapu ikí nayúkami níili. Alí ibili nayúami nawoka pálati echo'ná mapo'ná Jesusi asali. ⁵⁶ Alí echo'ná mapu ikínomí rijówachi iyénali Jesusi, ayena cho mapu ikínomí o'wéalachi iyénali, ayena cho mapu ikínomí ipó mapo'ná Binói iyénali, echo'ná mulubé buwichí ro'wáratí si'néami mapu ikí nayúkami níili. Alí mapalí Jesusi echo'ná simírama riwéali, aboni risensia tánali mapu ibili niráa echi jaré nayúkami galá chapimea Jesusi napáchala suwilá. Alí si'néami mapu ikí chapili echi wi'lí napáchala suwilá, we yáati ku sa'wárami níili.

Echi jaré namuti chati 'nátali ju, mapu wabé chati sulélatama echi pagótami

(Mt. 15.1-20)

7 Alí jaré o'wéala binériami rijói, Bariseo anilíwami, echo'ná sili mapo'ná Jesusi asali. Ayena cho sili jaré rijói echo'ná Jerusalémachi jonsa simíbami mapu Riosi nulalila binériami níili. ² Alí echi jaré Bariseo anilíwami binériami wabé wi'nijili echi jaré mapu Jesusi binérali, mapujiti riwali mapu echi jaré mapu Jesusi binérali, ketasi cho si'winárigá panígasa arigá ko'wali. ³ Mapujiti echi jaré Bariseo anilíwami binériami, ayena cho si'néami echi auché jaré Juríosi pagótami ke siné ko'wali, ketasi bachá niráa wisabé si'winárigá panígasagá. Alí aboni sinibí echirigá olali mapujiti aboni o'wéarawala mapu chabé ki'yá piréali sinibí echirigá olali. ⁴ Echijiti sinibí mapalí echi jaré Juríosi ku sili echo'ná aboni pirélachi, echo'ná auché jaréana rijówachi jonsa, echalí aboni ketasi ko'wali, a ketasi bachá niráa wisabé si'winárigá panígasaga. Alí aboni auché jaré wikabé echiyiri namuti olali mapurigá echi jaré chabé ki'yá piréami o'wéala olali. Alí aboni echirigá sinibí si'winárigá pabákali echi jaré labá, echi jaré sikolí ayena cho, echi jaré basi asíchiko. ⁵ Alí echi jaré Bariseo, ayena cho echi jaré nulalíwami binériami, aboni we rukueli Jesusi jeanigá: ¿Churékula echi jaré mapu Mujé binérali ketasi echirigá olá mapurigá echi jaré chabé ki'yá piréami o'wéala sinibí olali? Aboni ketasi bachá si'winárigá panígasa, arigá we ko'wá.

⁶ Alí Jesusi nijéwaga jeaneli: Echi walula Isaíasi ne bichíwaga nawésali 'yemi jiti rugá, máputamo wabé 'yékkaka oláami ju, mapalí binói je'ná jerigá osali:

Je'ná pagótami chumuchí chopi ra'íchaga aní mapu aboni wabé tamí o'wiké.

Chopi aboni arigá ketasi ne sulachí niráa, bichíwaga tamí galé.

⁷ Alí aboni ketasi bichíwali niráa tamí o'wiké, chopi nawesa mapurigá echi jaré pagótami nulá.

Alí aboni wepi 'yékkaka aní mapu Riosi achigórigá nulá.

⁸ Mapujítitamo ma ariweli Riosi nulalila. Jípitamo chopi nijéwaga olá mapurigá jaré pagótami nulá, mapujítitamo wisabé si'winárigá pabaka echi jaré sikolí, ayena chótamo wisabé echirigá pabaka echi jaré basi, ayena chótamo auché jaré echiyiri wikabé namuti olá.

⁹ Alí Jesusi ayena cho jeaneli: 'Yémitamo tarapé o'wiké Riosi nulalila. Chopi 'yémitamo si'winárigá achigórigá olá mapurigá chabé ki'yá jonsa, sinibí olali echi jaré 'yemi pagótamawala. ¹⁰ Alí echi Moisesi je'ná jerigá osali mapurigá osirúami ju echo'ná Riosi Ra'íchala osilíwalachi: Galá o'wiké kemi onó, echi kemi iyé ayena cho. Echi mapu wabé yóniga anéko kepu onó, echi kepu iyé omá, échiko waminá mi'lirúami níma. ¹¹ Chopi 'yémitamo aní mapu galá risensia ju mapu bilé rijói jeanema kepu onó, kepu iyé omá: Mani Riosi 'yali suwaba echi jaré nijé níwala namuti. Echijítini ma ketasi omero waminabi mi ku'wíriya. ¹² Alí bilé rijói echirigá anésagá kepu 'wénawa, alí 'yémitamo aní mapu ma ketasi arigá 'wérali ju mapurigá waminabi ku'wírama kepu onó, kepu iyé omá. ¹³ Alí 'yémitamo echirigá ologá tarapé galabé niralí Riosi Ra'íchala. Chópitamo nijéwaga olá mapurigá echi auché jaré pagótami binela. Echirigátamo auché jaré wikabé chibi yiri namuti olá.

¹⁴ Alí Jesusi auchecho siné bayegá echi pagótami, jeaneli: Galá namsi. Ne galá machisí Nijé ra'íchala.

¹⁵ Ayena cho jeaneli: Echi pagótami ketasi chirigá chati sulélama mapujiti aboni ko'wá echi jaré ko'wáami mapu ketasi risensia ju mapu aboni ko'mea. Chopi echi pagótami we chati sulela mapujiti aboni wabé nakí mapu chati olama. ¹⁶ ¡'Yemi máputamo galá nakéami ju, galá namsi!

¹⁷ Alí mapalí Jesusi ariweli echi wikabé pagótami, Binói echo'ná pachá kalírali ku bakili. Alí echi jaré mapu Binói binérali we rukueli mapu churigá aniwáami níili mapurigá Binói echirigá irétaga nawésali. ¹⁸ Alí Jesusi jeanigá rukueli: ¿Kéchatamo cho galá machili mapurigani irétali? ¿Kéchatamo machí mapu echi ko'wáami mapu ikí bilé rijói ko'wá, ketasi chirigá omero chati suléami niwayá echi rijói? ¹⁹ Echi ko'wáami ketasi bakí echo'ná rijói sulálachi, chopi echo'ná binói ropálachi bakisá, echo'ná jonsa we simírama. Ech'alí Jesusi echirigá anigá ruyeli mapu ne suwaba ko'wáami galá

risensia ju mapu ko'mea, mapujiti echi ko'wáami ketasi chati suréami niwá echi pagótami. ²⁰ Alí Jesusi ayena cho jeaneli: Echi jaré namuti mapu echo'ná pachana echi jaré pagótami sulálachi jonsa ku machínako, echi chopi ju mapu we chati suléami niwá echi pagótami. ²¹ Mapujiti echo'ná pachana echi pagótami sulálachi jonsa ku 'machina echi jaré wabé chati 'nátali. Ne si'néami pagótami chati suléami ju, echijiti echi jaré mapu ma niwáami ju, arigá auché jaré wiká isena yuwa kochí; echijiti echi auché jaré mapu ketasi cho niwáami ju ayena cho wabé chati ologá, wiká yuwa kochí. Echi pagótami wabé chati suléami ju, echijiti aboni wabé nakówaka ko'yáami ju; ²² echijiti aboni we chigórami ju; echijiti aboni wabé korúkami ju; echijiti aboni we chati oláami ju; echijiti aboni we ikaléami ju; echijiti aboni we chati ologá piréami ju; echijiti aboni we nakichika nakawélami ju; echijiti aboni wabé chati ra'íchami ju; echijiti aboni wabé chati 'nátaga nóchama; echijiti aboni wabé nataguésuli ju. ²³ Ne suwaba je'ná jeyili wikabé namuti chati oluwáwami ku 'machina echo'ná pachana echi chati oláami pagótami sulálachi jonsa. Echijiti echi pagótami waminabi wabé chati suléami niwáami ju.

Bilé mukí si'wína bitéami galá bichíili echi Jesusi

(Mt. 15.21-28)

²⁴ Alí Jesusi ku simisá echo'ná jonsa, echo'ná Tírochi anilíwachi simili, echo'ná Sirónachi anilíwachi ayena cho. Alí echo'ná biléana kalírali bakigá ketasi nakili mapu echo'ná piréami pagótami machimea kumi asalo Binói. Chopi jaré arigá galá machili mapo'ná Binói asali. ²⁵ Ayena cho bilé mukí, echo'ná bitéami we yámiti galá machili mapu Jesusi echo'ná asalo. Echi mukí ranala tiwé we chati riablo aliwala aliwéami níili. Echijiti echi mukí echo'ná nawagá, echo'ná bacháami wéemi raweka chokoba wilíwali mapo'ná Jesusi asali. ²⁶ Alí echi mukí ketasi Juríosi anilíwami pagótami níili, chopi si'nú ra'íchami níili, ayena cho si'wina bitéami níili. Alí echi mukí wabé risúu anigá tánali mapurigá Jesusi ku machí pama echi riablo aliwala echo'ná pachana echi tiwé sulálachi jonsa. ²⁷ Alí Jesusi jeaneli: Echi jaré Juríosi pagótami 'yemi mi ané kochí niráa, mapujítitamo isena pagótami ju. Echijiti ariwé mapu echi jaré mapu Riosi kúchuwala anérami ju, ne bachá ko'mea. Ketasi risensia ju chapisá echi jaré Riosi kúchuwala níwala ko'wáami, waminá kochí kóoluwa. ²⁸ Alí echi mukí ku nijéwaga jeaneli: Ayena, galá ju. Chopi echi kochí, ri'lé pachá mésachi uchútami, arigá galá ko'wá echi kúuchi chi'wáami ko'wáami mapu echi kúuchi kúrowi rujuina. ²⁹ Alí Jesusi jeaneli: Ne galami anili. ¡Máa ku simigá! Echi wabé chati riablo aliwala máa ku machínali echo'ná pachana mujé ranala sulálachi jonsa. ³⁰ Alí echi mukí ma ku nawagá echo'ná binói bitélachi, we yáati

riwali ku machínalo echi wabé chati riablo aliwala, chopi echi tiwé echo'ná pétachi bu'wili.

Jesusi ku sa'wali bilé rijói ke námiami, ayena cho ke ra'íchami

³¹ Alí mapalí Jesusi ku simili echo'ná Tírochi anilíwachi jonsa, echo'ná Sirónachi anilíwachi simíraga, ayena cho echo'ná makóina o'wéalachi simírali. Alí Binói ku nawali echo'ná walú ba'wírali suwé Galiléachi anilíwachi. ³² Alí echo'ná pálati bilé rijói ke námiami, mapu ayena cho ke omériami níili ra'ícha. Alí Jesusi tá-nalati mapurigá moba nochogá, ku sa'wama. ³³ Alí Jesusi waná bayéraga, pachana echi rijói nakálachi nochali, Binói sikala jiti. Alí kachípara, sa'liwá jiti ucheli echi rijói cha'méloachi. ³⁴ Alí Jesusi ripá riwigachi 'néniga, we iwiga jeaneli: ¡Ejata! Echi mapu Jesusi ra'íchala niráa, jerigá aniwáami ju: ¡Ku irápara! ³⁵ Alí echi rijói we yáati galá ku námali. Ayena cho binói cha'méloachi ma ku sa'wárami níili. Ayena cho ma ku omérali ra'ícha. ³⁶ Alí Jesusi ra'amaga nuleli mapu ke wesi ruyema mapurigá ikili. Chopi mapalí Jesusi waminabi echirigá aneli, echi pagótami waminabi nawésali mapurigá ikili. ³⁷ Alí aboni wabé 'néniga jeaneli: Je'ná Jesusi suwaba ne galá olá. ¡Binói galá ku sa'wá echi pagótami mapu ke námiami ju! ¡Ayena cho Binói galá ku ra'icháraga olá echi pagótami mapu ke omérami ju ra'ícha!

Jesusi kowa nawó mili pagótami
(Mt. 15.32-39)

8 Alí echalí rawé wikabé pagótami napawili mapo'ná Jesusi asali, chopi aboni tarapé téeli mapu ko'mea. Echijiti Jesusi bayegá jeaneli echi jaré mapu Binói binérali: ² Wabeni natimá je'ná wikabé pagótami mapujiti ma bikiyá chi'leli mapu jonsa aboni tamí yuwa muchuwi. Alí aboni ma ketasi niwa ko'wáami. ³ Alí bicheni ke kóosa, ku julásagá echo'ná aboni pirélachi, jaré aboni ketasi omérama simiba echo'ná buwichí, mapujiti jaré aboni mikabé jonsa simíbali. ⁴ Alí echi jaré mapu Jesusi binérali jeaneli: ¿Churigata kóobo je'ná wikabé pagótami jena'í mikabé kawichí? ⁵ Alí Jesusi jeanigá rukueli: ¿Chu kipu ko'wáami niwa 'yemi? Alí aboni jeaneli: ¡Chópita niwa kichao kúuchi pani! ⁶ Alí Jesusi nuleli echo'ná muchínala echi wikabé pagótami. Alí Binói chapigá echi kichao kúuchi pani, ma natétara 'yasa Riosi, galá rojuánali. Alí Binói 'yali echi jaré mapu Binói binérali mapurigá aboni nachútaga 'yama echi jaré wikabé pagótami. ⁷ Ayena cho nirúali pe okuáa rochí. Je'ná jiti Jesusi, Riosi yuwa ra'íchaga, natétara 'yasa, ayena cho nurali nachutánala. ⁸ Alí ne si'néami echi wikabé pagótami ma kosá, ne galá posali. Alí ma sunisa ko'yá, kichao walírali buchíami ku napabuli echi kúuchi chi'wáami ko'wáami

tibíami. ⁹ Echalí echi pagótami mapu ko'wali, ne wikabé, nawó mili níili. Alí Jesusi ma ripóraga, ku júuli echo'ná aboni pirélachi. ¹⁰ Echalí Jesusi ku bakili echo'ná bárkochi ba'wírali moba yénamichi. Alí echi jaré mapu Jesusi binérali ayena cho Binói yuwa mo'wisá, si'néami echo'ná muchiga, auché biléana ku simíbali mapo'ná Ramanútachi anilíwachi níili.

Echi jaré Bariseo we sayera Jesusi
(Mt. 16.1-4; Lk. 12.54-56)

¹¹ Alí jaré o'wéara binériami Bariseo anilíwami rijói, echo'ná Jesusi yuwa sigá, wabé sayéraga ra'íchali Binói yuwa, mapujiti aboni ketasi bichíili mapu Riosi ne bichíwali jiwérawa 'yari mapurigá Jesusi ne wabé omériga olama mapurigá ke wesi auché jaré pagótami omero echirigá olayá. Echijiti aboni tánali mapurigá Jesusi we yáati wabé omériga olama sinepi niráa mapurigá aboni echirigá galá machimea acha Binói ne bichíwali echirigá omérali olayá. ¹² Alí Jesusi we iwiga jeaneli: ¿Churékula je'ná pagótami we taní mápuni Nijé we omériga olama sinepi niráa? Aboni chopi we nakí mapu 'nema Nijé echirigá oláachi. ¹³ Alí Jesusi echo'ná ariwesa echi jaré o'wéala binériami Bariseo anilíwami rijói, auchécho ku bakili echo'ná pachá bárkochi, echo'ná walú ba'wírali moba iyénami.

Echi jaré Bariseo wabé 'yékaka binérali
(Mt. 16.5-12)

¹⁴ Alí echi jaré mapu Jesusi binérali ke newalali ko'wáami nutuguériya. Alí aboni pe bilepi pani chopi nutugueka sírali echo'ná bárkochi ba'wírali moba iyénamichi. ¹⁵ (Echi jaré pani echi levadura anilíwami jiti niwaliwa.) Alí Jesusi jeaneli: Ne galá 'nesa, a aboni tibusi mapurigátamo miná ariwebo echi jaré Bariseo níwala levadura anilíwami, ayena cho ariwesi echi Erorsi níwala levadura. ¹⁶ Alí echi jaré mapu Jesusi binérali a'nagupi ra'íchaga chótali jeaniyá: Binói echirigá ra'ícha mapujítita ketasi wikabé nutuguérali echi jaré pani, mapujiti echi pani echi levadura achigá niwaliwa. ¹⁷ Alí Jesusi galá machili mapurigá aboni mayeli mapu Binói echirigá ra'íchali echi pani jiti rugá; chopi Jesusi echirigá aneli mapurigá aboni ketasi olama mapurigá echi jaré Bariseo ologá binérali, nibilé mapurigá echi jaré Erorsi amígowala binérali. Echijiti Jesusi auchécho siné rukueli jeanigá: ¿Churékulátamo a'nagupi ra'íchaga aní máputamo ketasi wikabé nutuguérali echi pani? Ayena cho rukueli jeanigá: ¿Kéchatamo cho machí mapurigá Nijé wabé omériga olali? ¿Áchatamo echiyena wabé biwárami suléami ju? ¹⁸ ¿Kéchatamo busuchí jiti ritiwá? ¿Nirapéchatamo nakachí jiti nami? ¿Kéchatamo newalá? ¹⁹ Chabé mapalini rojuániga nachútali echi malí pani, echi malí mili rijói koya, ¿chukíputamo walírali ku buchíwaga napab-

uli, echi kúuchi chi'wáami pani tibíami? Alí aboni jeaneli: Echalita buchíwali makói miná okuá walírali. ²⁰ Ayena cho Jesusi jeaneli: Alí mapalini rojuániga nachútali echi kichao pani echi auché jaré nawó mili rijói koya, ¿chukíputamo walírali ku buchíwaga napabuli, echi kúuchi chi'wáami pani tibíami? Alí aboni jeaneli: Echalita buchíwali kichao walírali. ²¹ Alí Jesusi jeaneli: ¿Kéchatamo cho machí mapu Nijeni wabé omérami ju, suwaba namuti olayá?

Jesusi ku sa'wali bilé rijói ke machíliami

²² Alí aboni echo'ná bo'ónala Becháirachi anilíwachi sili. Alí mapo'ná Jesusi asali, echo'ná pálati bilé rijói ke machíliami. Alí echi jaré mapu pali, wabé risúu anigá tánali mapurigá Jesusi, Binói sikala jiti nochogá, ku sa'wama echi rijói. ²³ Alí Jesusi chapigá echi ke machíliami rijói sikala, waná toli echo'ná rijówachi jonsa. Alí Jesusi kachíwaga, sa'liwá jiti ucheli echi ke machíliami busílachi. Alí rukueli jeanigá: ¿Áchamo ma galá machili? ²⁴ Alí echi mapu ke machíliami níili, ma ku 'néniga jeaneli: ¡Mani ritiwá 'yéname echi pagótami! ¡Chopi nijeni ritiwá mapurigá jaré rojuá 'yéname niráa! ²⁵ Alí Jesusi auchecho siné sikati nochali echi rijói busílachi. Alí echi rijói galá ku 'néniga, ma ne galá machíliami níilaga, suwaba ne machiná riwali. ²⁶ Alí Jesusi, echo'ná binói bitélachi, ku júuli echi rijói, jeanigá: Ketasi simí echo'ná rijówachi, nibilé wesi ruyé mapurigami ikili.

Pegro aní mapu echi Jesusi, Walubela Cristo ju

(Mt. 16.13-20; Lk. 9.18-21)

²⁷ Alí Jesusi simili echo'ná jaréana rijówachi mapo'ná mulipi níili echo'ná walúlachi Sesarea Jirípochi anilíwachi. Echi jaré mapu Binói binérali ayena cho simíwali. Alí echo'ná buwichí síraga, Jesusi jeanigá rukueli echi aboni: Echi auché jaré pagótami, ¿Chigá tamí mayé? ²⁸ Alí aboni ku nijéwaga jeaneli: Jaré mayé mapu Mujé, echi Juani ju mapu chabénala pagoli echi pagótami. Auché jaré mayé mápumi echi Elási ju, mápumi ma ku nawali jena'í wichimóbachi. Auché jaré mayé mápumi bilé Riosi jiti nawésami ju, mápumi ki'yá bitéali jena'í wichimóbachi, chopi mápumi ma ku owínali. ²⁹ Alí Jesusi jeanigá rukueli: 'Yemi, ¿chigátamo tamí mayé? Alí echi Pegro ku nijéwaga jeaneli: Mujé ju echi Cristo anilíwami. Riosi mi wilali mapurigá Walubela Nigúurami niráa. ³⁰ Alí Jesusi we nuleli mapurigá aboni ke wesi echirigá ruyema Binói jiti.

Jesusi bachá niráa jeanigá nawésali mapu Binói mi'lirúami níima

(Mt. 16.21-28; Lk. 9.22-27)

³¹ Alí Jesusi chótali jeanigá nawésiya mapu Riosi wilali Binói mapurigá Ku'wíríami niráa. Ayena cho jeanili ma-

pu Binói ne wabé kichiga, risúu olálami níima, echi jaré o'wéala Juríosi jiti. Ayena cho jeanili mapu Binói echirigá wabé kichiga, risúu olárami níima, echi jaré o'wéala sacerdote jiti, ayena cho echi jaré nulalíwami binériami jiti. Alí Binói Jesusi ayena cho jeanili: Echi jaré pagótami tamí mi'limea, chopi mapalini ma mi'lirúami níisa, echalini bikiyá chi'ligá auchecho siné ku owína-ma. ³² Alí Jesusi je'ná jerigá ne machiná niráa, ne bichíwaga aneli. Alí echi Pegro pe waná bayéraga jeaneli mapu ketasi 'wérali níima mapurigá Jesusi echirigá olárami níima. ³³ Alí Jesusi ku kuwana 'nénali echi auché jaré mapu Binói binérali. Alí Binói jeaneli echi Pegro: ¡Miná waná simigá! ¡Mujé chopi ra'icha mapurigá echi riablo, Satanasi riwéami! ¡Mujé tarapé 'nata mapurigá Riosi 'nata, chópimi 'nata mapurigá echi auché jaré pagótami 'nata!

³⁴ Alí Jesusi bayeli echi jaré mapu Binói binérali, echi auché jaré pagótami ayena cho. Alí Binói jeaneli: A jaré 'yemi olánalasagá mapurigá Nijé nakí, ketasi waminabi olasi mapurigá 'yemi aboni chopi nakí. Chopi sinibí rawé nijéwaga olasi mapurigá Nijé 'yemi mi nulema, ayena cho arigá anachasi maparítamo risúu olárami níibo, achigórigá mapurigá Nijé anachama mapalini wabé risúu olárami níima. ³⁵ Mapujiti mapuyírípi rijói jena'í wichimóbachi chopi kaníilaga bitélanaliko, échiko chopi miná mukumea. Alí mapuyírípi rijói mapu olánaliko mapurigá Nijé nakí, ayena cho echi mapu Riosi chopi Ra'íchala jiti bichíinalaga biteko, échiko ne sinibí niráa bitélama. ³⁶ Ayena cho jeaneli: A bilé rijói ne suwaba mésagá jena'í wichimóbachi nirúami namuti, alí arigá miná mukusá, je'ná echiyiri rijói arigá tarapé chirigá ku'wíratami níima suwaba echi jaré wikabé namuti jiti. ³⁷ Mapujiti bilé rijói ma mukúami níisa ketasi omérama we yáati auchecho ku bitéliya jena'í wichimóbachi. Nibilé wesi omérama, a ne suwaba jena'í wichimóbachi nirúami wenomí jiti natétiya. ³⁸ Jena'í wichimóbachi piréami pagótami wabé chati oláami ju, ayena cho aboni tarapé galá bichiyami ju. Echijiti a bilé rijói tamí jiti riwélasagá, ayena cho riwélasagá Nijé Ra'íchala jiti, Nijé ayena choni riwíima je'ná jeyiri rijói mapalini ku nawama jena'í wichimóbachi, echi jaré o'wéala Riosi kapitánawala yuwa. Riosi tamí wilali mapurigá Ku'wíríami niráa. Alí mapalini ku nawama jena'í wichimóbachi, echalí Nijeni ne wabé Walubela níima mapurigá Nijé Onolá ne wabé simírami Walubela ju.

9 Ayena cho jeaneli: Ne bichíwali 'yemi nimí ané mapu jaré 'yemi jena'í jáwami ketasi cho suwibóatamo, ke cho 'nénasa mapurigá Riosi wabé oméraga nulá.

Jesusi si'nú nakulíwarami níili

(Mt. 17.1-13; Lk. 9.28-36)

² Alí pe kinana, ma simírasachi usani rawé, echalí Jesusi simili echo'ná waná biléana ripabé rabó. Alí Jesusi bayérali echi Pegro, echi Jakobo ayena cho, echi Juani asíchiko. Alí echo'ná bacháami aboni yuwa Jesusi ke sayiná si'nú nakulíwarami níili, ne galabé ratábami niráa. ³ Alí Jesusi napáchala we galá ratábami niwárami níili. Ne wabé simírami rosákami níili, ketasi mapurigá kipalí. Alí tarapé wesi jena'í wichimóbachi piréami galá omero echiyena wabé rosákami niwayá.

⁴ Echali ke sayiná okuá rijói echo'ná aboni yuwa jábali, echi mapu Elíasi níili, echi Moisesi ayena cho, mapu chabé ki'yá bachá piréali jena'í wichimóbachi. Alí aboni we ra'íchali Jesusi yuwa. ⁵ Alí Pegro jeaneli echi Jesusi: Binériami, ¡Ne wabé galá ju mapurigata jena'í muchuwi! Galá níima jena'í niwásata bikiyá kalí látami. Bilé Mujé níwala níima. Auché bilé echi Moisesi níwala níima. Auché bilé echi Elíasi níwala níima. ⁶ Echali echi jaré Jesusi yuwa binéami ne wabé majáratami níili. Echijiti echi Pegro ketasi machili churigá ra'íchalo. ⁷ Alí echo'ná ke sayiná ne wabé bimoli. Echali Riosi Binói ke sayiná echo'ná bimolírali jonsa ra'íchaga jeanili: Je'ná ju keni Raná, mápuni wabé galé. ¡Galá namsi Binói ra'íchala! ⁸ Echali we yáati ku kawili echi bimolí. Alí echi jaré binéami we yáati ke wesi riwali echo'ná aboni yuwa jáwami, chopi bi'neli Jesusi riwali echo'ná aboni yuwa wilíami.

⁹ Alí mapalí aboni ku tikina sírali echo'ná ripá rabó jonsa, echali Jesusi ra'amaga nuleli echi aboni mapu ke wesi ruyema mapurigá aboni riwali echo'ná ripá rabó; chopi nuleli mapurigá aboni echirigá ku ruyema mapalí Binói ma mi'lirúami níisa, auchecho ku owinsa. ¹⁰ Echijiti aboni tarapé wesi ku ruyeli, chopi aboni a'nagupi jeanigá rukueli: ¿Churigá aniwáami ju mapurigá Binói aní: Mapalini ma mi'lirúami níisa, auchecho siné ku owínama? ¹¹ Alí aboni rukueli jeanigá: ¿Churékula echirigá aní echi jaré nulalíwami binériami mapu echi Elíasi bachá niráa ku nawama jena'í wichimóbachi? ¹² Alí Jesusi ku nijéwaga jeaneli: Ne bichíwali ju mapu echi Elíasi bachá nawagá, ne bukulíwami niwama suwaba namuti; ayena cho jeaneli: Riosi tamí wilali mapurigá Ku'wíriami niráa. Alí tamí jiti rugá osirúami ju echo'ná Riosi Ra'íchala oselíwalachi mapurigani wabé risúu olárami níima, ayena cho mapurigani wabé kichírami níima. ¹³ Alí Nijé 'yemi nimí ané mapu ma nawali bilé rijói jena'í wichimóbachi mapu achigórigá jiwériga olali mapurigá echi Elíasi olali chabé ki'yá rawé. Chopi jena'í wichimóbachi piréami o'wéala ma chíbirigá olali echi rijói yuwa ne suwaba mapurigá aboni nakili, echirigá mapurigá bachá niráa osirúami níili echo'ná Riosi Ra'íchala oselíwalachi mapurigá ikimea riwéali binói.

Jesusi ku sa'wali bilé towí mapu wabé chati riablo aliwala aliwéami níili

(Mt. 17.14-21; Lk. 9.37-43)

¹⁴ Alí ku tiguínaga echo'ná ripá jonsa, echo'ná ku sili mapo'ná echi auché jaré binéami buwigá muchili. Alí wikabé pagótami napawika muchili echo'ná echi jaré binéami yuwa. Echali jaré nulalíwami binériami wabé na'áwaga ra'íchali echi aboni yuwa. ¹⁵ Alí mapalí echi wikabé pagótami riwali Jesusi, si'néami aboni echo'ná júmaga ne wabé kaníliga narépalí. ¹⁶ Alí Jesusi jeanigá rukueli: ¿Churékulátamo echirigá ra'icha aboni yuwa? ¹⁷ Echali bilé rijói echo'ná wilíami jeaneli: Binériami, nijé nimí 'yébali keni raná, mapu we chati riablo aliwala aliwéami ju, ayena cho ketasi ra'íchami ju. ¹⁸ Alí echi wabé chati riablo aliwala wabé jiwériga nulé echi keni raná. Echijiti echi keni raná wabé ronénaga, ramichí ki'lákaka, ri'lé bu'wiba. Echijiti binói tarapé jiwera. Jipi nijeni tánali echi jaré mapu Mujé binérali mapurigá aboni ku machí pama echi we chati riablo aliwala. Chopi aboni ketasi omérali. ¹⁹ Jesusi ku nijéwaga jeaneli: ¡Báa! 'Yemi pagótami ketásitamo bichíyami ju. ¿Chu yénasí arigá 'wérali ju mápuni 'yemi yuwa asimea? ¿Chu yénasí echirigani anachama 'yemi jiti, mapujítitamo ketasi bichíí? ¡Wakiná tosí echi towí! ²⁰ Alí echo'ná Jesusi yuwa pálati echi towí, echi mapu wabé chati riablo aliwala aliwéami níili. Alí echi riablo aliwala galá riwisá echi Jesusi, ne wabé jiwériga nokérali echi towí. Alí echi towí echo'ná wi'yérali ri'nagápulaga, bu'wíraga, ne wabé ronénali. ²¹ Alí Jesusi jeanigá rukueli echi towí onolá: ¿Kilíbuko jonsa je'ná jerigá risúu olárami níili? Alí binói onolá jeaneli: Chabé táaga jonsa. ²² Alí echi riablo aliwala wisabé chokéami wabé mi'linálaga, echo'ná na'írali pasá, echo'ná we rokóochi ba'wírali ayena cho. ¡A mi omérasagá tamujé tamí ku'wíriya, galá tamujé natimaka ku'wiro! ²³ Alí Jesusi nijéwaga jeaneli: ¿Kéchami bichíí mapurigani galá omero? Mapalimi galá bichíí Riosi, mujemi galá omérama ne suwaba namuti olayá. ²⁴ Alí echi towí onolá we yáati o'weli ra'íchaga jeaneli: ¡Ayénani galá bichíí Riosi! ¡Tamí ku'wiro mapurigani waminabi galá bichííma! ²⁵ Alí mapalí Jesusi riwali wikabé pagótami echo'ná napawísiami, Binói we yáati nuleli echi we chati riablo aliwala mapu echo'ná pachana towírali asali. Alí jeaneli: Mujé we chati riablo aliwala mápumi ke námtinga, ke ra'íchami niwá je'ná towí, Nijé nimí nulé: ¡Ku machínaga echo'ná pachana towírali jonsa! ¡Tarapé auché siné ku bakí echo'ná pachana towírali! ²⁶ Alí echi we chati riablo aliwala o'weli sinaga, wabé jiwériga nokérali echi towí. Alí echi riablo aliwala ma ku machínali echo'ná pachana towírali jonsa. Echali echi towí mapurigá mukúami niráa tibili. Echijiti echi jaré wikabé jeanili: ¡Ma mukúami ju! ²⁷ Chopi Jesusi chapigá echi towí sikala, galá ku achali. Alí echi towí galá ku wilíwali.

²⁸ Alí mapalí Jesusi bakili biléana kalírali. Alí Binói echo'ná bi'neli atíachi, echi jaré mapu Binói binérali jeanigá rukueli: ¿Churékula tamujé ketasi galá omérali ku machí paya echi wabé chati riablo aliwala? ²⁹ Alí Jesusi jeaneli: Je'ná jeyili riablo aliwala chopi ku machina mapalítamo we tánabo Riosi, ayena cho mapalítamo wi'libé niráa ketasi kopoa ko'wáami, mapurigátamo echirigá Riosi chópítamo yuwa ra'ichabo.

**Jesusi auchecho siné nawésaga aní mapu Binói
mi'lirúami níima**
(Mt. 17.22-23; Lk. 9.43-45)

³⁰ Alí echo'ná jonsa ku simasa, echo'ná Galiléachi anilíwachi kawírali simárali. Alí Jesusi ketasi nakili mapu echo'ná Galiléachi piréami machimea mapu Binói echo'ná iyénali. ³¹ Mapujiti Jesusi chopi binériya iyénali echi jaré mapu Binói yuwa binéami níili. Alí Binói jeanigá binérali: Riosi tamí wilali mapurigá Ku'wíríami niráa, chópini nijírami níima mapurigá echi pagótami o'wéarawala nurama tamí mi'línala, chopi mapalini ma mi'lirúami níisa, bikiyá chi'rigá auchecho ku owína-mani. ³² Alí aboni tarapé machili churigá aniwáami níili mapurigá Jesusi ra'íchaga anili, ayena cho we majali rukueya.

¿Chigá walula níima tamujé aboni yuwa?
(Mt. 18.1-5; Lk. 9.46-48)

³³ Alí aboni echo'ná Kapernaúmachi anilíwachi walúlachi sili. Alí mapalí Jesusi echo'ná pachá kalírali asali, Binói rukueli echi jaré binéami jeanigá: ¿Piri jítitamo rugá ra'íchali mapalítamo echo'ná buwíchí sírali? ³⁴ Chopi aboni wabé riwéraga, ketasi ku nijéwanali, mapujiti echo'ná buwíchí aboni chopi a'nagupi na'áwaga ra'íchaga sírali, mapujiti ibílipi niráa jerigá 'nátali: Nijé binói ne walula níimani echi auché jaré yuwa. ³⁵ Alí Jesusi echo'ná asíbaga, bayegá echi jaré makói miná okuá binéami, jeaneli: Echi mapuyíripi nakiko mapu ne walula níima echi auché jaré 'yemi yuwa, échiko ne jubá níraga mapurigá chopi ku'wíraga olama si'néami 'yemi yuwa. ³⁶ Alí Jesusi chapigá bilé taa towí, echo'ná aboni yuwa nasipa achali. Alí echo'ná Binói sikálachi mutuka, jeaneli echi jaré mapu Binói binérali: ³⁷ Echi rijói mapuyíripi kaleko je'ná jeyili kúuchi, mapujiti binói galá tamí bichíi, échiko ayena cho we tamí galé. Alí echi mapu yíripi tamí galeko, ayena cho we galé Riosi, echi mapu tamí júuli jena'í wichimóbachi.

**Echi mapu ketasi tamujé tamí sayérako, échiko tamujé
tamí yuwa ju**
(Lk. 9.49-50; Mt. 10.42)

³⁸ Alí echi Juani jeaneli: Binériami, tamujeta riwali bilé rijói mapu miná machí a'wali echi jaré riablo aliwala echo'ná jaré pagótami sulálachi jonsa mapalí binói we

ra'íchaga anili Mujé riwalá. Alí bicheta jeaneli mapu ketasi risensia níili mapurigá binói echirigá olama, mapujiti ketasi tamujé tamí yuwa iyena. ³⁹ Alí Jesusi jeaneli: Ketasi echirigá ra'amasi, mapujiti mapalí bilé rijói galá omero echirigá wabé omériga olayá mapujiti binói galá tamí bichíi, echi yiri rijói ketasi we yáati tamí sayéraga ra'ichama. ⁴⁰ Mapujiti echi mapu ketasi tamujé tamí sayérako, échiko tamujé tamí yuwa ju. ⁴¹ Ne bichíwali 'yemi nimí jeané: Mapuyíripi rijói 'yemi mi pe taa namuti 'yásagá, mapurigá pe taa ba'wí niráa bajínala, mapujítitamo Cristo níwala ju, échiko arigá galá ku natétarami níima.

Ketasi galá ju we chati olárasa echi auché jaré pagótami
(Mt. 18.6-9; Lk. 17.1-2)

⁴² Alí Jesusi ayena cho jeaneli: Mapuyíripi rijói we chati olárasagá bilé taa mapu tamí jiti bichíyami ju, échiko ne wabé simírami chati olá. Ne bachá niráa, ne galá níili echiyiri rijói miná walú ba'wírali pátami níisa, echo'ná binói kutárachi bilé matá jiti burugá, mapurigá binói ketasi echirigá chati oláriami níima echi bilé taa mapu tamí bichíi. ⁴³ Alí a kemi siká mi chati olárasagá, ¡Miná ripuná! Waminabi ne galá níima, mujé echirigá sikamochi niráa bitélasa jena'í wichimóbachi, mapurigami pe minánomí arigá sinibí niráa bitélama echo'ná ripá riwigachi. Alí ketasi galá níima echirigá mi okuá sikeka, arigá echo'ná ri'lé riáblochi pátami níisa, mapo'ná echi walubé na'í, we rajáami, tarapé siné cho'wíami níima. ⁴⁴ Mapujiti echo'ná ri'lé riáblochi nirúami kuchíwali tarapé siné suwí, ayena cho echo'ná nirúami walubé na'í tarapé siné cho'wí. ⁴⁵ Alí a kemi ronó mí chati olárasagá, ¡Miná ripuná! Waminabi ne galá níima, mujé echirigá kasi-mochi niráa bitélasa jena'í wichimóbachi, mapurigami pe minánomí arigá sinibí niráa bitélama echo'ná ripá riwigachi. Alí ketasi galá níima echirigami okuá roneka, arigá echo'ná ri'lé riáblochi pátami níisa, mapo'ná echi walubé na'í, we rajáami, tarapé siné cho'wíami níima. ⁴⁶ Mapujiti echo'ná ri'lé riáblochi nirúami kuchíwali tarapé siné suwí, ayena cho echo'ná nirúami walubé na'í tarapé siné cho'wí. ⁴⁷ Alí a kemi busí mi chati olárasagá, ¡miná machí pa! Waminabi ne galá níima, mujé echirigá bilénapi buseka bitélasa jena'í wichimóbachi, mapurigami pe minánomí arigá sinibí niráa bitélama echo'ná ripá riwigachi. Alí ketasi galá níima echirigami okuá buseka, arigá echo'ná ri'lé riáblochi pátami níisa, mapo'ná echi walubé na'í, we rajáami, tarapé siné cho'wíami níima. ⁴⁸ Mapujiti echo'ná ri'lé riáblochi nirúami kuchíwali tarapé siné suwí, ayena cho echo'ná nirúami walubé na'í tarapé siné cho'wí.

⁴⁹ Alí ne si'néami 'yemi ne wabé risúu olárami níibo, mapurigátamo waminabi galá bichíyami níibo Riosi. Alí

suwaba echi jaré namuti máputamo ko'ogá 'yabo Riosi, ne galá akáwarami níima. ⁵⁰ We galá ju echi koná, chopi a echi koná ketasi 'me akáami níisa, ketasi chirigá auhecho siné ku galá akáami niwárami níima. Echijiti ne galabé níisasi 'yemi, achigórigá mapurigá echi koná ne galabé ju, ayena cho kilí rijóisasi a'nagupi.

Jesusi binérali mapu ketasi risensia ju mapu ku rojuama echi jaré mapu ma niwámi ju
(Mt. 19.1-12; Lk. 16.18)

10 Alí Jesusi echo'ná Kapernaúmachi anilíwachi walúlachi jonsa ku simigá, echo'ná Juréachi anilíwachi kawírali ku nawali, ayena cho echo'ná bakochi Joránachi anilíwachi bo'ónala ku nawali. Alí echo'ná piréami auhecho siné napawísachi echo'ná Jesusi yuwa, Binói auhecho siné nawésali echi aboni mapurigá Binói sinibí olali. ² Echali jaré o'wéala binériami, Bariseo anilíwami rijói echo'ná sisáa, wabé wi'nijíinalaga jeanigá rukueli: ¿Acha risensia ju mapu bilé rijói upéami miná ariwema binói upila? ³ Alí Jesusi ku nijéwaga jeanigá rukueli: ¿Churigá osirúami ju mapurigá echi walula Moisesi 'yemi mi nuleli? ⁴ Alí aboni jeaneli: Echi walula Moisesi risensia nijali mapu bilé rijói arigá ariwema binói upila, mapalí echi rijói bilé osilí jeanigá niwasa mapu binói ma ariweli echi binói upila. ⁵ Alí Jesusi jeaneli: Echi walula Moisesi chopi 'yemi mi echirigá osagá nuleli mapujítamo wabé biwárami suléami ju. ⁶ Ayena cho jeaneli: Kí'yá chokichí mapalí Riosi niwali ne suwaba namuti, echali Riosi niwali bilé rijói, miná bilé mukí yuwa. ⁷ Echijiti bilé rijói ariwema kepu onó, kepu iyé omá, alí binói upema kepu upí. ⁸ Alí echi mapu okuá juko, échiko mapurigá bilepi niráa níima. Ma ketasi mapurigá okuá ju, chopi okuánika bilepi niráa ju. ⁹ Echijiti ketasi risensia ju mapu ku rojuama echi jaré mapu ma niwámi ju, mapujiti Riosi ma echirigá napabuli.

¹⁰ Alí mapalí aboni echo'ná pachá biléana kalírali muchili, echali echi jaré mapu Binói binérali galá rukueli churigá aniwáami níili je'ná. ¹¹ Alí Jesusi jeaneli: Mapuyíripi rijói ariwesa kepu upí, alí auché bilé upésagá, échiko wabé chati siti olá, mapujiti ma ariwesa echi ne binói upila, auché bilé si'nú mukí yuwa kochí. ¹² Ayena cho bilé mukí ariwesa kepu kuná, alí auché bile yuwa kunésagá, echi mukí ayena cho we chati olá, mapujiti ma ariwesa echi ne binói kunala, auché bilé si'nú rijói yuwa kochí.

Jesusi galabéraga ané echi jaré kúuchi
(Mt. 19.13-15; Lk. 18.15-17)

¹³ Alí jaré pagótami echo'ná pali jaré kúuchi mapurigá Jesusi, Binói sikala nochama echo'ná abónichi. Alí echi jaré mapu Jesusi binérali ra'ámaga aneli echi jaré pagótami mapu ketasi pama echi kúuchi. ¹⁴ Chopi

mapalí Jesusi je'ná jerigá námali, echali Binói yóniga jeaneli: Ariwesi mapu echi kúuchi wakiná tamí yuwa simama. Tarapé kumesi aboni, mapujiti Riosi galá nulé si'néami echirigá bichíyami. ¹⁵ Ne bichíwali Nijé 'yemi nimí jeané: Ne si'néami echi jaré kúuchi galá bichí Riosi. Alí echi jaré pagótami mapu ketasi echirigá bichíiko Riosi, échiko ketasi chirigá Riosi níwala níima. ¹⁶ Echali Jesusi galá mutuka echi jaré kúuchi, echo'ná moba aboni mo'ólachi nochogá, alí Riosi yuwa ra'íchaga jeaneli: Keni Onó, ne galá nisé je'ná kúuchi.

Bilé rijói wabé níwami
(Mt. 19.16-30; Lk. 18.18-30)

¹⁷ Alí mapalí Jesusi pe minabi simigá inárali, echali bilé rijói we 'maga nawali echo'ná Binói yuwa. Echi rijói echo'ná bacháami Binói yuwa wéemi raweka chokoba wiligá jeaneli: ¿Churigani ologá bitérama, mapurigá echirigani olasa, ne sinibí bitéami nímani? ¹⁸ Alí Jesusi ku nijéwaga jeanigá rukueli: ¿Churékulami tamí we galabé ané? Riosi bi'nélipi we galabé ju. ¹⁹ Mujé galá machí mapu Riosi je'ná jerigá nulá: Ketasi si'nú mukí yuwa kochí. Ketasi mi'yá auché jaré pagótami. Ketasi chigó. Ketasi ikaleka ra'ichá. Ketasi 'yéka olá. Galá o'wiké kemi onó, echi kemi iyé omá. ²⁰ Alí echi rijói ku nijéwaga jeaneli: Binériami, nijé sinibini echirigá galá nijéwaga olali, chabé chokichí jonsa mapalini ranálati. ²¹ Alí Jesusi we natimaga 'néniga jeaneli: Bilé namuti ketásimi cho olali. Jipi ku simigá rarinéami suwaba namuti mapu ikí mi niwa. Alí 'yami suwaba echi wenomí echi auché jaré we tisúwati. Echirigami wabé níwami níima echo'ná ripá riwigachi. Alí ne galá bichíga, tamí najató. ²² Alí echi rijói ne wabé siwega 'nátali mapalí binói námali je'ná jerigá ra'íchachi Jesusi. Echirigá wabé siwega ku simili, mapujiti ne wikabé namuti níwami níili.

²³ Alí Jesusi ne noligá 'néniga jeaneli echi jaré mapu Binói binérali: ¡Ne wabé nóchali ju mapurigá echi jaré wikabé namuti níwami galá nijéwaga olama mapurigá Riosi nulá! ²⁴ Alí echi jaré mapu Jesusi binérali ne wabé chami nílaga ikigá 'nátali mapalí aboni námali echirigá ra'íchachi Binói. Alí Jesusi auhecho siné ra'íchaga jeaneli: ¡Keni kúchuwa, ne wabé nóchali ju mapurigá echi jaré wikabé namuti níwami galá nijéwaga olama mapurigá Riosi nulá! ²⁵ Alí echi kameyo anilíwami namuti, walú mapurigá bilé kawé ju. Alí echi kameyo, siné káachi ketasi 'me nóchali ologá simíramiré echo'ná biléana wichárali uchíi iwáachi, chopi ne wabé simírami nóchali ju mapurigá echi jaré wikabé namuti níwami galá nijéwaga olama mapurigá Riosi nulá. ²⁶ Alí aboni je'ná jerigá námaga waminabi ne wabé chami nílaga ikigá 'nátaga, a'nagupi jeanigá rukueli: ¿Chigá 'nalina galá ku'wíratami níima? ²⁷ Alí Jesusi 'néniga jeaneli: Echi jaré pagótami ketasi omero je'ná jerigá

olayá, chopi Riosi ne galá omero, mapujiti Riosi suwaba namuti galá omérami ju.

²⁸ Alí echi Pegro jeanigá chótali ra'icha: Tamujeta ma ariweli suwaba tamujé níwala namuti. Alí bicheta mi yuwa najátali. ²⁹ Alí Jesusi jeaneli: Ne bichíwali 'yemi nimí jeané: Jaré mapu tamí bichíiko arigá ariwema kepu kalí mapurigá aboni Riosi Ra'íchala chopi nawésiya 'yénama. Echijiti auché jaré ariwema kepu ritémawa, kepu 'wénawa keremá, kepu jubí keremá, kepu kúchuwa keremá. Alí auché jaré echijiti ariwema aboni kawíwala. ³⁰ Alí ne si'néami mapuyíripi echirigá olako, aboni jena'í wichimóbachi abijí piréлага narema bilé kiento ritémawa niráa. Ayena cho narema bilé kiento iyé niráa. Ayena cho narema bilé kiento kúchuwa niráa. Ayena cho narema bilé kiento kawí niráa. Chopi ayena cho we yóniga, kichiga a'najátarami níima. Alí waminana ma suwisáa, arigá auchecho ku pirélama ne sinibí niráa. ³¹ Chopi wikabé mapu jipi rawé ne bachá o'wéala juko, aboni pe minana we kúuchala níima. Alí wikabé mapu jipi rawé wabé kúuchala juko, aboni ne bachá o'wéala níima.

Jesusi auchecho siné bachá anili mapurigá Binói mi'lirúami níima

(Mt. 20.17-19; Lk. 18.31-34)

³² Alí aboni echo'ná Jerusalémachi burúami moyena sírali. Alí Jesusi bachá inárali echi jaré mapu Binói binérali yuwa. Echalí echi jaré mapu Binói binérali ne wabé majaga najátali Binói yuwa. Alí Jesusi auchecho siné waná rojuánaga echi jaré makói miná okuá, galá ruyeli suwaba mapurigá ikimea riwéali. ³³ Alí Jesusi jeaneli: Tamí galá kipusi. Riosi tamí wilari mapurigá Ku'wíriami niráa. Chopi mata moyena echo'ná Jerusalémachi simiba. Echo'ná Nijeni echi jaré o'wéala sacerdote, echi jaré nularíwami binériami 'yárami níima. Alí aboni tamí we wi'nijiga mi'linálama. Ali echo'ná isena pagótamichi nijírami níima, mapurigá aboni tamí mi'limea. ³⁴ Alí aboni tamí we tiníchama, ayena cho ne wabé tamí wipisoma, ayena cho ne wabé tamí kachípama. Alí aboni tamí mi'limea. Chopi bikiyá chi'ligá, auchecho ku owínamani.

Echi Jakobo, echi Juani we taní mapu Jesusi olama mapurigá aboni nakí

(Mt. 20.20-28)

³⁵ Alí echi Jakobo, echi Juani napawika sisáa jeaneli: Binériami, tamujeta nakí mapurigami tamujé tamí olíima mapurigata mi tánabo. Alí je'ná okuánika Sibireo kúchuwala níili. ³⁶ Alí Jesusi jeanigá rukueli: ¿Churigátamo nakí mapurigani 'yemi mi olíima? ³⁷ Alí aboni jeaneli: Tamujé tamí 'ya máputa mi yuwa mulubé muchibo echalí mapalimi wabé walubératami níima. Tamujé tamí 'ya mapu bilé tamujé echo'ná Mujé yuwa

watoná asimea, ayena cho mapu auché bilé echo'ná Mujé yuwa o'winá asimea. ³⁸ Alí Jesusi jeaneli: 'Yemi tarapétamo machí mapurigátamo tamí tani. ¿Áchata-mo anáchaga oméramo mapurigá Nijé anachama mapalini wabé simírami risúu olárami níima? ¿Áchatamo anáchaga oméramo mapurigá Nijé anachama mapalini mi'lirúami níima? ³⁹ Alí aboni ku nijéwaga jeaneli: Ayénata galá oméramo. Alí Jesusi jeaneli: Ne bichíwali arigá 'wérali ju mapu 'yémitamo achigórigá anachabo mapurigá Nijé anachama, ayena cho 'wérali ju mapurigátamo ko'wirúami níibo, achigórigá mapurigá Nijé binói mi'lirúami níima. ⁴⁰ Chopi Nijé ketasi risensia ju máputi 'yemi mi 'yama máputamo muchibo echo'ná keni watonachi, echo'ná keni o'winachi keremá. Chopi risensia ju mapu echo'ná muchima echi jaré mapu Riosi, aboni jiti, echo'ná ma a'lárali.

⁴¹ Alí echi auché jaré makói, je'ná jerigá namsa, ne wabé na'áwali, echi Jakobo, echi Juani sayéraga. ⁴² Alí Jesusi bayegá echi jaré aboni, jeaneli: 'Yémitamo galá machí mapurigá echi jaré isena pagótami o'wéalawala ne wabé 'wérali nulé echi pagótami, ayena cho echi jaré aboni silínawala ne wabé 'wérali olá aboni yuwa. ⁴³ Chopi 'yemi tarapé echirigá olasi. Si'winárigá mapu yíripi 'yemi mapu nakiko walula nílanala 'yemi aboni yuwa, échiko galá níima mapurigá pióntami niráa níisa, mapurigá binói chopi ku'wírama echi auché jaré 'yemi. ⁴⁴ Alí mapuyíripi 'yemi máputamo nakiko wabé walula nílanala ne si'néami echi auché jaré 'yemi yuwa, échiko galá níima mapurigá si'néami 'yemi piónawala niráa níisa mapurigá binói chopi ku'wírama echi auché jaré 'yemi. ⁴⁵ Alí Jesusi auchecho siné jeaneli: Riosi tamí wilali mapurigá Ku'wíriami niráa, mapurigani galá ku'wírama echi wikabé pagótami jena'í wichimóbachi piréami. Nijé ketásini nawali jena'í wichimóbachi mapurigá echi jaré pagótami chopi tamí ku'wírama. Nijeni nawali mapurigani ku'wírama echi pagótami, ayena cho mapurigani mi'lirúami níima aboni chati olalila jiti, mapurigani echijiti galá omérama ku wikáwiya wikabé pagótami.

Jesusi ku sa'wali bilé rijói ke machíriami

(Mt. 20.29-34; Lk. 18.35-43)

⁴⁶ Alí aboni sili echo'ná Jerikochi anilíwachi walúlachi. Alí mapalí Jesusi auchecho ku simiyá inárali echo'ná walúlachi jonsa, echi jaré mapu Binói binérali ayena cho sírali. Auché jaré wikabé pagótami ayena cho sírali. Alí echo'ná mulubé buwíchí asali echi Batimeo riwéami rijói, echi mapu ke machíliami níili. Je'ná rijói echi Timeo riwéami rijói ranala níili. Alí echi Batimeo wenomí táa asali, mapujiti ke machíliami níili. ⁴⁷ Alí echi Batimeo anélati mapu echi Jesusi, echo'ná Nasarétachi bitéami echo'ná simira inárali. Alí echi Batimeo chótali o'weli ra'icha jeanigá: ¡Tamí natimá, Mujé Jesusi! ¡Mujé echi Rabili Ranala ju! ⁴⁸ Alí wikabé pagóta-

mi yóniga ra'ámali echi Batimeo mapujiti binói wisabé echirigá o'weli ra'íchali. Chopi echi Batimeo waminabi o'weli ra'íchaga jeanili: ¡Tamí natimá Mujé Jesusi, mápumi echi Rabili Ranala ju! ⁴⁹ Alí Jesusi námaga echirigá ra'íchachi, pe mikabé niráa wilíwali. Alí Binói jeaneli echo'ná mulubé Binói yuwa jáwami: ¡Wakiná bayesi echi rijói! Echirigá aboni jeanigá bayeli echi ke machíliami: ¡Kaníliga wirísaga! ¡Echi Walubela mi bayé! ⁵⁰ Alí echi Batimeo echo'ná ariwesa binói kimala, we yáati pochika wilíwali. Alí binói we yáati mulubéanali Jesusi yuwa. ⁵¹ Alí Jesusi jeaneli: ¿Piri mi nakí mapurigani mi olíma? Alí echi ke machíriami jeaneli: ¡Binériami, tamí ku machíliami niwá! ⁵² Alí Jesusi jeaneli: ¡Ku simigá! Mami galá ku machíliami ju, mapujítimi galá tamí bichíili. Alí echi ke machíliami we yáati ma galá ku omérali 'néniya, ayena cho wabé kaníliga najátali Jesusi yuwa echo'ná buwichí ináráchi.

Jesusi nawali echo'ná Jerusalémachi

(Mt. 21:1-11; Lk. 19:28-40; Jn. 12:12-19)

11 Alí mapalí aboni ma mulubé sírali echo'ná walúlachi Jerusalémachi anilíwachi, echalí mulubé simárali echo'ná rijówachi Betajechi anilíwachi, ayena cho mulubé simárali echo'ná Betániachi anilíwachi rijówachi. Alí mapalí aboni mulubé simárali echo'ná ripá rabó Olíbochi anilíwachi, Jesusi okuá júuli echi jaré mapu Binói binérali, ² jeanigá: Echo'ná mulubé rijówachi simíbaga. Echo'nátamo riwiboa bilé bulito wíira chukúami, ke cho binéami asiliwa. Botániga, wakiná tosí. ³ A jaré 'yemi mi jeanésagá: ¿Churékulátamo botana echi bulito? Alí bichétamo jeanebo: Echi Walubela Jesusi we risensia taní. Pe téliko ku nijima. ⁴ Alí aboni simasa riwali echi bulito biléana kalírali machímanamí wíira chukúami, mapo'ná walú burúuli. Alí botánali. ⁵ Echalí jaré echo'ná muchúami jeanigá rukueli: ¿Píritamo olá? ¿Churékulátamo ku botana echi bulito? ⁶ Alí echi jaré Jesusi yuwa binéami ku nijéwali mapurigá Jesusi bachá niráa aneli. Alí echo'ná muchúami risensia 'yali mapurigá aboni tomea echi bulito. ⁷ Alí aboni pali echi bulito echo'ná mapo'ná Jesusi asali. Echalí aboni kimala jiti pérasa, Jesusi aseli echi bulito. ⁸ Alí echo'ná buwichí mapo'ná Jesusi simírama riwéali, wikabé pagótami aboni kimala jiti pérali, ayena cho auché jaré rakú sawala na'línaga pérali. ⁹ Echalí echi jaré mapu Jesusi yuwa bacháami sírali, ayena cho echi jaré mapu jubáami sírali, ne si'néami o'weli ra'íchaga jeanili: ¡Tamujé tamí ku'wiro! Wabé galabé ju jená Jesusi mapu echi Walubela Riosi wilali mapurigá Walubela Nigúurami niráa. ¹⁰ Wabé galabé ju je'ná Jesusi mapu tamujé tamí nulema achigórigá mapurigá tamujé walúlawala Rabiri riwéami tamujé tamí nuleli. ¡Tamujé tamí ku'wiro, Mujé Riosi echo'ná ripabé riwigachi atíami!

¹¹ Alí Jesusi ku nawali echo'ná Jerusalémachi. Alí echo'ná walubé Juríosi ri'obáwalachi bakisá, Binói ne noligá 'néniya riwali suwaba mapu ikí echo'ná ikili. Echo'ná jonsa auchecho ku simili echo'ná Betániachi anilíwachi mapujiti ma we alí níili. Echi auché jaré mapu Binói binérali ayena cho simíbali, Binói yuwa.

Jesusi yónali bilé chuná ke rakéami

(Mt. 21:18-19)

¹² Alí ba'alínala rawé mapalí Jesusi auchecho ku simili echo'ná Betániachi jonsa, echalí Binói ne wabé 'locheli. ¹³ Alí péé mikabé riwali bilé chuná, we sawéami. Binói echo'ná simili 'néniya acha rakéami níila echi chuná. Alí echoná nawagá, sawala chopi riwali, mapujiti ketasi cho rakéachi níili. ¹⁴ Echalí Jesusi ra'íchaga jeaneli echi chuná: ¡jipi jonsa ma ke siné raké! Alí echi jaré mapu Jesusi binérali, si'néami galá námali je'ná jerigá ra'íchachi.

Jesusi machí a'wali echi jaré ralinéami echo'ná Riosi ri'obáwalachi jonsa

(Mt. 21:12-17; Lk. 19:45-48; Jn. 2:13-22)

¹⁵ Pe wilibeko aboni ku sisáa echo'ná Jerusalémachi, Jesusi ku bakili echo'ná pachá echi walubé Juríosi ri'obáwalachi. Echalí Binói chótali miná machí a'wá echi jaré pagótami mapu echo'ná pachá, namuti ralinéa 'yéniya, ayena cho ku machí a'wali echi jaré mapu ralali, ayena cho Binói miná na'mínali echi jubeli mapo'ná jaré rijói wenomí nakulíwiya muchili, ayena cho Binói miná na'mínali echi jubeli mapo'ná auché jaré rijói makawi ralinéa muchili. ¹⁶ Alí Jesusi tarapé risensia 'yali mapurigá echi pagótami wiká namuti apéraga mo'wama echo'ná pachá nasipa ri'narátachi walubé Juríosi ri'obáwalachi. ¹⁷ Alí Jesusi nawésali jeanigá: Echo'ná Riosi Ra'íchala oselíwalachi, je'ná jerigá osirúami ju: Suníami piréami pagótami jeanimea mapu echo'ná Riosi kalíflachi ju, mapo'ná echi pagótami Riosi yuwa ra'ichama; chopi 'yémitamo ma niwali je'ná Riosi kalila mapurigá biléana risochí, chigórami pirélachi niráa.

¹⁸ Alí echi o'wéala sacerdote galá námali je'ná jerigá ra'íchachi Jesusi. Echi jaré nulalíwami binériami ayena cho echirigá námali. Echalí ne si'néami aboni a'nagupi ra'íchaga 'nátali mapu churigá aboni galá omérama mi'ayá echi Jesusi. Chopi aboni arigá wabé majali, mapujiti ne si'néami echi auché jaré pagótami sinibí chopi ne wabé galá kilí kipuga muchili mapalí Jesusi binéragawésali. ¹⁹ Echalí rawé ma alíwachi Jesusi auchecho ku simili echo'ná walúlachi jonsa.

Echi chuná suwaba wakicheli

(Mt. 21.20-22)

²⁰ Alí ba'alínala bi'yá aboni auchocho siné echo'ná ku simáraga riwali echi chuná ma suwaba wakichéami ju. ²¹ Alí echi Pegro ku 'nátaga jeaneli: Binériami ¡Nibira! Echi chuná mápumi yóniga aneli, ma suwaba wakicheli. ²² Chopi Jesusi ku nijéwaga jeaneli: Galá bichíisi Riosi. ²³ Ne bichíwali 'yemi nimí jeané: Mapuyíripi jeanésagá je'ná walubé kawí chulíchi: ¡Echomí! ¡Miná tu walubé ba'wírali simigá wichimé! Alí mapuyíripi echirigá ne galá sulachí niráa bichíísagá mapu echirigá ne bichíwali ikimea mapurigá binói aneli, ayena ne suwaba ne bichíwali echirigá ikimea. ²⁴ Echijiti Nijé 'yemi nimí jeané: Ne suwaba mapu ikítamo tániko Riosi, echirigátamo suwaba ne bichíwali narepo, átamo galá bichíísagá mapu Riosi echirigá 'yemi mi 'yama. ²⁵ Alí mapalítamo Riosi yuwa ra'icha jawi, galá ku wikawasi echi auché jaré mapu 'yemi mi sayela, achigórigá mapurigá kétamo Onó, ripá riwigachi atíami, ayena cho ne galá 'yemi mi ku wikawa mapurigátamo we chati olali. ²⁶ Mapujiti ketásitamo ku wikawásagá echi auché jaré, ayena cho echi kétamo Onó, ripá riwigachi atíami, ketasi 'yemi mi ku wikawama mapurigátamo chati olali.

¿Chigá mi risensia 'yali mapurigami je'ná jerigá olama?

(Mt. 21.23-27; Lk. 20.1-8)

²⁷ Alí aboni echo'ná Jerusalémachi ku sili. Alí Jesusi echo'ná walubé Juríosi ri'obáwalachi iyénachi, echo'ná Binói yuwa sili echi jaré o'wéala sacerdote echi jaré nulalíwami binériami ayena cho, echi jaré o'wéala ochérami ayena cho. ²⁸ Alí aboni jeanigá rukueli: ¿Churékulami je'ná jerigá wabé 'wérali olá? ¿Chigá mi risensia 'yali mapurigami je'ná jerigá olama? ²⁹ Echali Jesusi ku nijéwaga jeaneli: Nijé ayena cho 'yemi nimí bilé namuti rukuema. Alí a yémitamo tamí galá ku ruyésagá, echali Nijé ayena cho 'yemi nimí galá ku ruyema chigá tamí risensia 'yali mapurigami je'ná jerigá olama. ³⁰ ¿Acha Riosi ripá riwigachi atíami nuleli echi Juani mapurigá binói pagoma echi pagótami? ¿Acha jaré pagótami nuleli, keremá? ¡Tamí ku nijéwasi! ³¹ Alí aboni a'nagupi ra'íchaga jeaneli: ¿Churigata ku nijéwabo? A tamujeta jeanésagá: Echi Riosi ripá riwigachi atíami nuleli, alí Binói tamujé tamí jeanigá ku rukuema: ¿Churékula bichétamo ketasi bichíili mapurigá echi Juani tamí jiti nawésali? ³² Ayena cho aboni a'nagupi ra'íchaga jeaneli: Ketasi galá níimiré tamujé jeanésagá mapu echi jaré pagótami chopi nuleli echi Juani echirigá pagónala, mapujiti ne si'néami pagótami mayé mapu echi Juani ne bichíwali Riosi jiti nawésami níili. Echijiti aboni wabé majali echirigá ku nijéwiya. ³³ Alí aboni jeaneli: Ketásita machí chigá nuleli echi

Juani, echirigá pagónala. Echali Jesusi jeaneli: Nijé ketasi cho 'yemi nimí ruyema chigá tamí risensia 'yali mapurigami je'ná jerigá olama.

Jaré pagótami chati oláami

(Mt. 21.33-46; Lk. 20.9-19)

12 Alí Jesusi chótali irétaga ra'icha jeanigá: Bilé rijói ichali wikabé rakéami namuti, uva anilíwami; ayena cho echi rijói we galá 'yérali echo'ná mapo'ná binói ichali echi uva anilíwami, ayena cho ri'lé joka riwali mapo'ná kamínali, echi uva rakala ba'wila machí paya, ayena cho echo'ná niwali bilé ripá wilíami kalí, mapurigá echo'ná jonsa galá omériga 'nénama suwaba echo'ná ichirúami. Alí echi uva níwami, jaré pioni tibútasa, auché biléana mikabé simili. ² Alí pe kinana mapalí ma sébali echi uva rakala ripunálawachi, echali echi uva níwami rijói echo'ná júuli auché bilé binói pió-nawala, mapurigá rojuana 'nolama mapu ikí binói níwala níima riwéali. ³ Chopi echi auché jaré pióntami mapu echo'ná tibua muchili, chapigá wipisoli echi pióntami mapu julárami níili rojuana 'nolánala. Alí tarapé biyiri 'yasa, ku júuli. ⁴ Alí echi uva níwami rijói, auchocho bilé pioni júuli. Chopi aboni we basibuka, binói mo'ólachi chi'wánali. Alí echirigá wabé chibirigá olasa, ku júuli. ⁵ Alí pe jubáami auchocho bilé júuli, chopi échiko aboni waminá mi'yali. Alí auchocho siné pe kinana wisabé, wikabé júuli. Alí aboni chi'wánali jaré, ayena cho ko'yali auché jaré. ⁶ Alí abijí tibili bilepi ne jubáwala echi uva níwami ranala, mapu ne wabé galérami níili binói onolá jiti. Alí echi uva níwami ne jubáami júuli echi kepu raná, jeanigá mapu aboni we galá o'wikémiré keni raná. ⁷ Chopi echi jaré pióntami galá riwisá echi ranarúami, aboni a'nagupi jeaneli: Je'ná bilepi ju echi uva níwami ranala. Je'ná ju mapu pe minana ne suwaba níwami níima, je'ná wikabé uva ichirúami. Echijiti miná mi'lliboa. Alí ne suwaba je'ná ichirúami tamujé níwala níima. ⁸ Alí aboni chapigá mi'yali echi uva níwami ranala. Alí aboni, ma mi'lisáa, echo'ná ichirúamichi jonsa miná machí pali echi mukúami sapara.

⁹ ¿Piri olama echi uva níwami? We yáati nawagá suwábamilé echi jaré chati oláami pióntami. Alí binói tibútama auché jaré galá oláami pióntami, mapurigá aboni we galá nochama echo'ná ichirúachi. ¹⁰ Ayena cho Jesusi jeanigá rukueli: ¿Kéchatamo siné 'nénali echo'ná Riosi Ra'íchala osilíwalachi mapurigá tamí jiti rugá, je'ná jerigá osirúami ju:

Echi Rité mapu echi jaré kalí niwáami miná chakena pali, mapurigá ketasi galabé niráa, je'ná Rité echo'ná sitocho, ma bachá niráa achárami ju;

¹¹ Echi Walubela Riosi je'ná jerigá olali; tamujeta ne galá machí mapurigá Binói echirigá ne wabé jiwériga olali?

¹² Alí echi jaré Juríosi o'wéalawala nakili mapurigá chapigá pachá bachárami níima echi Jesusi, mapujiti aboni galá machili mapu Jesusi echirigá irétaga sayérali echi aboni. Chopi aboni ketasi chirigá chapili, mapujiti aboni wabé majali echi auché jaré pagótami. Alí aboni ma ariwesa ku simíbbali.

¿Acha risensia ju natétawa echi walula silfami?

(Mt. 22.15-22; Lk. 20.20-26)

¹³ Alí pe wakinana echo'ná mapo'ná Jesusi asali, jaré o'wéala Bariseo anilíwami binériami julálati, ayena cho julálati echi auché jaré mapu echi walula silfami Erorsi riwéami apanérawala níili. Je'ná pagótami kipúnala julálati Jesusi ra'íchala, mapurigá siné káachi echijiti galá omérama wi'nijiya echi Jesusi. ¹⁴ Alí aboni echo'ná Jesusi yuwa sisá jeaneli: Tamujeta galá machí mápumi ne bichíwaga ra'íchami ju. Ayena chota machí mápumi ketasi nijéwaga olá mapurigá echi jaré pagótami chopi mi nulé, mapujítimi ne si'néami pagótami a'nawí niráa galé. Alí bichemi ne bichíwali galá nawésaga binera mapurigata we galá bichíiga najátabo Riosi yuwa. Echijítita jipi tamujé mi rukué: ¿Acha risensia ju Riosi yuwa máputa wenomí natétabo echi walula silfami Sésara anilíwami? ¿Áchata natétabo? Siné káachi ketasi risensia keremá máputa natétabo. ¹⁵ Alí biché Jesusi galá machili mapurigá aboni wabé 'yéka ra'íchali. Echijiti Binói jeanigá rukueli: ¿Churékulátamo nakí mapurigani sayéraga ra'ichama echi walula Sésara? Ayena cho jeaneli: ¿Wakiná tosí bilé wenomí chitúlami mapurigani galá 'nema! ¹⁶ Alí mapalí aboni echo'ná pali, Jesusi 'néniga rukueli: ¿Chigá ju jena'í wenomírali atíami? ¿Chigá riwalá ju echo'ná osirúami? Alí aboni jeaneli: Echi walula Sésara ju. ¹⁷ Alí Jesusi ku nijéwaga jeaneli: Galá natétasi suwaba mapu ikí echi walula Sesara anilíwami taní, chopi ayena cho 'yasi Riosi suwaba mapu ikí Binói taní.

¿Churigá ku o'wínama echi jaré ma suwíami?

(Mt. 22.23-33; Lk. 20.27-40)

¹⁸ Alí jaré Saruseo anilíwami rijói echo'ná sili mapo'ná Jesusi asali. Je'ná aboni we binérali mapu echi pagótami ma suwíami níisa, ketasi auchecho ku o'wínama. Aboni echo'ná sisáa jeanigá rukueli: ¹⁹ Binériami, echi ki'yá bitéami Moisesi tamujé tamí osogá nuleli mapu a bilé rijói mukusáagá, alí echirigá mukugá ariwésagá kepu upí, chopi ketasi kúchuwami níisagá, alí arigá 'wérali ju mapu echi rijói rijimala upema echi mukí kunámami, mapurigá kúchalama. Alí echi jaré kúcharami mapurigá echi mukúami rijimala kúchuwala níima. ²⁰ Alí aboni jeanili: Kichao najirémami níili. Echi bachirúami ne bachá upeli. Alí pe kinana tarapé cho kúcharasa mukuli. ²¹ Alí echi bonirúami echirigá upeli echi mukí, chopi ayena cho tarapé cho

kúcharasa mukuli. Alí auché bilé pe jubáwala bonirúami upeli echi mukí. Je'ná ayena cho tarapé kúcharasa mukuli. ²² Echirigá kichao najirémami ibíli yuwa kuneli echi mukí. Alí ibili niráa aboni echirigá tarapé kúcharasa suwili. Ayena cho echi mukí ne jubá mukuli. ²³ Alí echi Saruseo anilíwami rijói jeaneli: Mapalí echi jaré ma suwíami ku o'wínamiré ¿Chigá 'nalí níimare echi mukí kunala? Mapujiti echi jaré kichao rijói ibili niráa upeli echi mukí.

²⁴ Alí Jesusi ku nijéwaga jeaneli: 'Yémitamo wabé 'yékarami ju, mapujítitamo ketasi galá machí mapurigá echo'ná Riosi Ra'íchala Osilíwalachi osirúami ju, ayena cho mapujítitamo ketasi galá machí mapurigá Riosi wabé omérami ju. ²⁵ Alí Jesusi jeaneli: Mapalí echi jaré ma suwíami ku o'wínama, echalí aboni tarapé wesi jubema, nirapé wesi kunema, chopi mapurigá echo'ná ripá riwigachi muchúami Riosi kapitánawala níima.

²⁶ Alí Jesusi ayena cho jeaneli: Echi jaré ma suwíami ne bichíwali ku o'wínama. ¿Kechátamo siné 'nénali mapurigá echo'ná Riosi Ra'íchala Osilíwalachi osirúami ju? Echo'ná osirúami ju mapurigá Riosi, echi Moisesi yuwa ra'íchali echo'ná biléana ku'wíchali rajáamichi jonsa. Echalí Riosi Binói jeaneli echi Moisesi: Nijé ju echi Walubela Riosi, ayena cho Nijé abijí ju echi ki'yá bitéami Abrami Riósawala. Ayena cho Nijé abijí ju echi Isaka Riósawala, echi mapu echi Abrami ranala níili. Ayena cho Nijé abijí ju echi chabé ki'yá bitéami Jakobo Riósawala. Aboni sinibí piré tamí yuwa echo'ná ripá riwigachi. ²⁷ Echi jaré mapu ikí galá bichíiko Riosi, ketasi mapurigá ma suwíami niráa ju, chopi aboni ne sinibí piréami ju, mapujiti aboni galá bichíi Riosi. 'Yémitamo we si'winárigá bichíi, echijítitamo wabé 'yékarami ju.

¿Chuyiri 'nalí ju mapurigá ne bachá nulá Riosi?

(Mt. 22:34-40)

²⁸ Alí bilé rijói echo'ná nawali mapu Riosi nularila binériami níili. Je'ná rijói galá námali Jesusi ra'icháchanachi echi auché jaré yuwa. Alí ne galá machigá mapurigá Jesusi ne galabé niráa ku nijéwali, je'ná rijói jeanigá rukueli: ¿Chu yiri 'nalí ju mapurigá ne bachá nulá Riosi? ²⁹ Alí Jesusi jeaneli: Ne bachá niráa Riosi je'ná jerigá nulá: Galá namsi 'yemi Isaeli kúchuwala, echi Walubela tamujé Riósawala echi bilepi bi'nélipi Walubela Riosi ju. ³⁰ Ne sulachí niráa ne wabé galesi echi Walubela kétamo Riósawa. Ayena cho ne suwaba kétamo iwigá niráa ne galá galési Riosi. Ayena cho ne suwaba kétamo 'nátawa niráa ne galá galesi Riosi. Ayena cho ne suwaba kétamo jiwérawa niráa ne galá galesi Riosi. ³¹ Alí Riosi pe jubáami niráa, achigó yiri je'ná jerigá nulá: Ne wabé galé echi auché jaré pagótami, achigórigá mapurigami a mujé binói niráa galé. ³² Alí echi rijói Riosi nularila binériami jeaneli: Binériami, galá mi ne bichíwaga aní mapu bilepi nirú

Riosi, ayena cho mapu tarapé auché bilé nirú. ³³ Ayena chomi ne bichíwaga aní mapu Riosi ne bachá niráa tamujé tamí nulé máputa echirigá ne simírami galebo Binói Riosi ne sulachí niráa, ayena cho ne suwaba keta iwigá niráa, ayena cho ne suwaba keta 'nátawa niráa, ayena cho ne suwaba keta jiwérawa niráa; ayena cho máputa wabé galebo echi auché jaré pagótami achigórigá mapurigata galé a tamujé aboni niráa. Ayena cho ne bichíwali ju máputa ayena echirigá wabé simírami niráa galésagá Riosi, alí bicheta ne bichíwali nijéwaga olabo mapurigá Riosi tamujé tamí nulé. Chopi ayénata wikabé namuti ko'yagá, ikósaga, olásagá mapurigá Riosi ayá, echirigata ketasi chirigá olabo mapurigá Riosi tamujé tamí nulé, a ketásita ne sulachí niráa galésaga Riosi. ³⁴ Alí mapalí Jesusi námali mapurigá echi rijói ne galabé niráa ku nijéwali, alí Jesusi jeaneli: Pée ke 'me ayó ju mapalimi galá nijéwaga bitélama mapurigá Riosi mi nulé. Alí si'néami echi auché jaré ne wabé majali waminabi rukueli.

¿Chigá Ranala ju echi Cristo?

(Mt. 22.41-46; Lk. 20.41-44)

³⁵ Echali Jesusi echo'ná walubé Juríosi ri'obáwalachi nawésaga jeanigá rukueli: ¿Churékula aní echi jaré nulalíwami binériami mapu echi Cristo anilíwami, echi walula Rabiri riwéami ranala ju? ³⁶ Mapujiti mapalí echi Wabé Galabé Riosi Iwigala galá nuleli echi Rabiri, echali echi Rabiri binói jeanigá osali:

Echi Walubela Riosi Onorúami aneli echi keni Walubélawa Cristo jeanigá:

Tamí yuwa asagá jena'í keni watonachi, mapuyénasí Nijé nimí jiwératama mapurigami gala omérama si'néami echi jaré mapu ikí mi sayera.

³⁷ Jesusi ayena cho jeaneli: Echi Rabiri binói echirigá anili mapu echi Cristo anilíwami, binói Walubélawala ju. ¿Churigá echirigá kepu raná niráa níima?

Alí echi auché jaré wikabé pagótami wabé kaníliga námali Jesusi nawésawala.

Jesusi we wi'nijí echi jaré rijói nulalíwami binériami

(Mt. 23.1-36; Lk. 11.37-54; 20.45-47)

³⁸ Alí Jesusi nawésaga jeaneli: Ne galabé niráa 'natasí mapurigá echi jaré nulalíwami binériami ketasi 'yemi mi 'yéka. Aboni chopi i'weli napáchaga 'yénanali, ayena cho aboni ne wabé nakí mapu echi auché jaré pagótami sinibí ne wabé o'wikeka narepama. ³⁹ Alí echo'ná aboni ri'obáwalachi, aboni chopi we nakí mapu echo'ná ne wabé galabéalachi muchima, mapurigá o'wéala niráa; ayena cho mapalí aboni bayérami ju ko'núula echo'ná auché jaré pagótami pirélachi, aboni chopi we nakí mapu bachá niráa ko'mea. ⁴⁰ Alí aboni arigá miná 'yesa echi jaré muguí kunámami kalila, alí echo'ná ri'obachi wi'lí niráa amachika olá, mapurigá

echi auché jaré pagótami mayema mapu aboni ne wabé galabé oláami ju. Echijiti aboni waminabi wabé kastigo 'yárami níima.

Bilé mukí kunámami muchúwali wenomí

(Lk. 21.1-4)

⁴¹ Siné rawé Jesusi asali echo'ná pachá walubé Juríosi ri'obáwalachi, echo'ná bacháami mapo'ná echi wenomí muchuwálawachi níili. Alí Binói riwali mapalí echi pagótami echo'ná muchúwali wenomí. Echali wikabé echi jaré wabé níwami wikabé wenomí muchúwali. ⁴² Alí wabé risúwati mukí kunámami echo'ná nawagá, okuá kúuchi wenomí muchúwali. ⁴³ Alí Jesusi bayegá echi jaré mapu Binói binérali, jeaneli: Ne bichíwali 'yemi nimí ané mapu Nijeni ne wabé simírami nilá mapurigá je'ná wabé risúwati mukí kunámami muchúwali, chópini ketasi 'me simírami nirá mapurigá echi auché jaré wabé níwami muchúwali. ⁴⁴ Mapujiti si'néami echi auché jaré we níwami, abijí wikabé wenomí tibíika muchúwali. Chopi je'ná risúwati mukí kunámami suwaba muchúwali mapu ikí wenomíwaga, binói ko'ogá bitélama riwéali.

Jesusi bachá niráa nawésali jeanigá mapu echi walubé Juríosi ri'obáwala suwaba miná najunárami níima riwéali

(Mt. 24.1-2; Lk. 21.5-6)

13 Alí mapalí Jesusi ku machínali echo'ná pachá walubé Juríosi ri'obáwalachi jonsa, echali echi bilé mapu Binói binérali, jeaneli: Binériami ¡Nibira! ¡Je'ná ri'obá ne wabé galabé niráa nóchaga niwárami ju! ¡Ne wabé walubé ju! ² Alí Jesusi jeaneli: 'Yémitamo wabé ba'yóriga 'neni je'ná walubé ri'obá, chopi Nijé 'yemi nimí ané mapu ne suwaba waminá najunárami níima. Jena'í tarapé bilé rité tigótami ripima.

Mapurigá ikimea echali ne jubá rawé

(Mt. 24.3-28; Lk. 21.7-24; 17.22-24)

³ Alí aboni echo'ná ripá rabó Olíbochi anilíwachi simíbali, mapu echo'ná bacháami echi walubé Juríosi ri'obáwarachi ju. Alí mapalí Jesusi echo'ná asíbali, echi Pegro echo'ná Binói yuwa nawali, echi Jakobo ayena cho, echi Juani ayena cho, echi Antresi asíchiko. Alí aboni jeanigá rukueli: ⁴ ¿Kilíbuko je'ná jerigá ikimea? ¿Churigata galá machiboa mapalí ma mulubé sebama echali mapalí je'ná jerigá suwaba ikimea?

⁵ Alí Jesusi jeaneli: Ne galá tibuka 'natasí 'yemi aboni, mapurigá ke wesi 'yemi mi 'yéka. ⁶ Mapujiti pe minana wikabé ibili niráa nolnana mapu wabé 'yéka niráa jeanimea: Nijé binói ju echi Walubela Cristo. Alí echirigá anigá, wabé 'yéka wikabé pagótami.

⁷ Chopi ketasi majasi mapalítamo námabo ne wikabé sontarsi nakóami ra'ichálawachi, nirapé majasi mapalí-

tamo námabo wikanáami nakónalawachi, mapujiti arigá 'wérali ju mapu echirigá ikimea, chopi echalí ke cho sebama echalí ne jubá suwibálawachi rawé. ⁸ Mapujiti bilé walula silíami kawíwalachi piréami wabé nakoma auché bilé walula silíami kawíwalachi piréami sayéraga. Alí biléana kawírali piréami pagótami wabé nakoma auché biléana kawírali piréami pagótami sayéraga. Alí wikanáami wabé nokomea je'ná kawí. Ayena cho wisabé ne wabé 'lochema jena'í wichimóbachí piréami pagótami. Ayena cho wikabé pagótami a'nagupi na'áwaga we nakichima. Alí je'ná jerigá chotama jena'í wichimóbachí piréami pagótami we risúu níliya, chopi pe minánomí ne wabé simírami risúu nílama.

⁹ Chopi ne galá tibusí 'yemi aboni niráa, mapujiti echi auché jaré pagótami 'yemi mi bologá tomea echo'ná bacháami echi jaré o'wéala yuwa. Ayena cho echo'ná aboni ri'obáwalachi 'yemi mi wabé wipisoma, ayena cho echi jaré o'wéala 'yemi mi bayegá, ne wabé oyérama mapujítitamo tamí bichiyami ju. Chopi je'ná jerigá ikimea mapurigá 'yémitamo galá omérago nawésiya Nijé Ra'ichala echi aboni. ¹⁰ Alí ke cho sébachi echalí ne jubá rawé, arigá 'wérali ju mapurigá je'ná Galabé Riosi Ra'ichala ne suníami jena'í wichimóbachí piréami pagótami nawésalami níima. ¹¹ Alí mapalí echi auché jaré pagótami 'yemi mi bologá tomea echo'ná bacháami echi jaré o'wéala yuwa, echalí ketasi wiká namuti bachá 'natasí mapu churígátamo nijéwaga ra'ichabo. Chopi echalí rawé ra'ichasi mapurigá echi We Galabé Riosi Iwigala 'yemi mi ruyema, mapujiti ketasi 'yemi chopi ju máputamo ra'ichabo, chopi echi We Galabé Riosi Iwigala 'yemi jiti ra'ichama. ¹² Alí echalí rawé jaré nijima aboni ritémawala mapurigá aboni miná ko'wirúami níima. Ayena cho jaré onorúami nijima aboni kúchuwala mapurigá miná ko'wirúami níima. Ayena cho jaré kúcharami wabé sayéraga kepu 'wé-nawa, miná ko'wimea. ¹³ Echalí ne suwaba echi auché jaré pagótami 'yemi mi ne wabé kichima mapujítitamo tamí bichiyami ju. Chopi ne si'néami 'yemi máputamo arigá waminabi galabé bichíiibo echalí ne jubá rawé yé-nasí, 'yémitamo galá ku'wíratami níibo.

¹⁴ (Ne si'néami 'yemi máputamo ne galá machí oselí 'néniya, ne galá machisí mapurigá aniwáami ju je'ná jeyiri.) Echi walula Riosi jiti nawésami Ranieli riwéami osali echi bilé namuti wabé chati nosobúami jiti rugá. Alí mapalí 'yémitamo ritiwá je'ná bilé namuti wabé chati nosobúami echo'ná atíami mapo'ná ketasi risensia ju, echalí ne si'néami 'yemi mapu ikítamo echo'ná Juréachi anilíwachi kawírali pireko, ne galá níima miná echo'ná jaréana ripá rabó júmsasa. ¹⁵ Echalí rawé sébachi arigá 'wérali níima máputamo miná júmsabo. Echijiti a jaré 'yemi echo'ná 'yemi kalíachi mulubé muchísagá, ketasi auchecho ku mo'wisí echo'ná pachá kalírali, jaré namuti uboya, chopi we yáati miná júm-

sasi. ¹⁶ Ayena cho a jaré 'yemi waminá jaréana waná kawichí muchísagá, ketasi ku ro'wisi echo'ná kétamo pirélachi, ku chapiboya kétamo kimá. ¹⁷ Alí Jesusi wabé natimaga jeanili: Echalí rawé ne wabé simírami risúu olárami níima si'néami muguí mapu ikí pocháami níimako, ayena cho ne wabé risúu olárami níima echi auché jaré muguí mapu kúuchi kúchuwami níimako. ¹⁸ Ne wabé tansi Riosi mapurigá ketasi ne wabé rulála-ma echalí mapalí arigá 'wérali níima máputamo waminá júmsabo. ¹⁹ Mapujiti echalí rawé jena'í wichimóbachí piréami ne wabé simírami risúu nílama. Kí'yá chokichí jonsa ke wesi siné echiyena risúu olárami níili, mapu jonsa Riosi niwali je'ná wichimoba. Alí pe minana rawé ke siné auché echiyena risúu olárami níima. ²⁰ Chopi a echi Walubela Riosi ariwésagá mapurigá echi jaré jena'í wichimóbachí piréami pagótami ne wi'libé bamíbalí echiyena risúu olárami níima, alí ne si'néami miná suwábarami níimiré. Chopi Riosi ma nualali mapurigá echi pagótami pe téeli bamíbalí echirigá risúu olárami níima mapujiti Riosi we natimali echi jaré Binói níwala pagótami mapu ikí Binói chapili.

²¹ Echalí rawé a jaré 'yemi mi jeanésagá: ¡Galá 'nesi! ¡Jena'í atí echi Cristo anilíwami! A jeansa keremá: ¡Galá 'nesi! Echo'ná biléana atí. Ketasi bichíisi echirigá ra'ichaga aniwáachi. ²² Mapujiti jaré wabé 'yékami rijói jeanísiya nolínama: Nijé ju echi Walubela Cristo. Ayena cho nolínama auché jaré wabé 'yékaka nawésami rijói mapu wabé omériga olama wikabé namuti mapu ke wesi auché jaré pagótami omero echirigá olaya. Alí aboni chopi echirigá olama mapujiti aboni we nakimea mapurigá we si'wináriga bichíirama echi jaré mapu Riosi ma chapili. Chopi aboni ketasi echirigá omérama. ²³ 'Yemi aboni galá 'nátaga muchisi. Nijé ma suwaba 'yemi nimí bachá niráa aneli.

Jesusi ku nolínama jena'í wichimóbachí

(Mt. 24:29-35, 42-44; Lk. 21:25-36)

²⁴ Alí ma sunisa echalí rawé mapalí jena'í wichimóbachí piréami ne wabé risúu olárami níima, echalí we rokowama echi rayénali, ayena cho echi michá ketasi waminabi rajamea. ²⁵ Ayena cho echalí echi sopolí we rujuima echo'ná ripá riwigachi jonsa. Ayena cho ne wabé nokomea suwaba namuti rajáami echo'ná riwigáchi nirúami. ²⁶ Alí Jesusi ayena cho jeaneli: Riosi tamí wilali mapurigá Ku'wíríami niráa. Ayena cho echalí ne jubá rawé echi pagótami jena'í wichimóbachí piréami tamí galá riwimea echo'ná ripana nolírali inárami. Echalí Nijeni ne wabé omérami níima, ayena choni ne wabé walubératami níima. ²⁷ Alí echalí rawé Nijeni julama echi keni o'wéala kapitánawa napabúnala echi jaré pagótami mápuni ma chapili. Alí echi wikabé keni kapitánawa napabuma ne si'néami Nijé níwala pagótami mapu ikí ne suníami jena'í

wichimóbachi muchuwi, ayena cho ne si'néami mapu ikí ne suníami echo'ná ripá riwigachi muchuwi.

²⁸ Alí Jesusi ayena cho jeaneli: Nijé 'yemi nimí bilé chuná jiti rugá binérama: Mapalí echi chuná ma chota sawarásiya, echalítamo galá machí mapu ma mulubé kuwesámiré. ²⁹ Echirigá ayena cho mapalítamo ritiwá je'ná jerigá ikíachi, echalí ne galá machisí mapu máa mulubé sébachi ju mapalí Nijeni ku nawama. ³⁰ Ne bichíwali 'yemi nimí ané mapu ke cho suwisáa je'ná pagótami, suwaba je'ná jerigá ikimea. ³¹ Mapu ikita ritiwá echo'ná wabé ripá suwaba suwibama, ayena cho jena'í wichimóba suwaba suwibama; chopi Nijé Ra'íchala tarapé siné suwibama.

³² Chopi ke wesi galá machí chu kilíbuko rawé echirigá ikimea. Echi o'wéala Riosi kapitánawala ripá riwigachi muchúami tarapé machí. Ayena cho Nijé bi'néripi Riosi Ranala ketásini machí. Chopi echi Onorúami bi'nélipi galá machí chu kilíbuko níima.

³³ Echijiti 'yemi aboni galá 'nátaga muchisi. Sinibí tibusi aboni niráa. Sinibí tániga ra'ichasi Riosi yuwa, mapujiti 'yémitamo ketasi machí chu kilíbuko sebama echalí rawé. ³⁴ Echirigá ikimea mapurigá mapalí bilé wabé níwami rijói mikabé auché biléana si'wina kawírali inámiya simea. Echijiti echi rijói galá nulé ibili niráa binói piónawala, ayena cho ibili niráa 'ya nóchali, ayena cho ne galá nulé echo'ná binói kalíachi tibúami mapurigá ne galá tibuma. ³⁵ Echijiti galá 'nátaga muchisi, mapujítitamo ketasi machí chu kilíbuko ku nolínama echi Walubela kalí níwami. 'Yémitamo ketasi machí acha ku nolínama pe alí chónachi, acha ku nolínama nasipa rokogó keremá, acha ku nolínama ba'alí bi'yá tolí kusúwachi keremá, acha ku nolínama ba'alí bi'yá rawéwachi keremá. ³⁶ Sinibí galá 'nátaga muchisi mapurigá mapalí Binói ke sayiná ku nolínasa, echalí Binói ketasi 'yemi mi kochigá bitíami riwimea. ³⁷ Alí mapurigá Nijé 'yemi nimí ané, echirigani ané ne si'néami pagótami. ¡Galá 'nátaga muchisi!

Jesusi ma chapigá mi'linálati

(Mt. 26.1-5; Lk. 22.1-2; Jn. 11.45-53)

14 Alí wakiná waniwínara echi Juríosi pagótami omáwala sébachi níili mapalí aboni ko'yali echi jaré kúuchi bo'wá, ayena cho mapalí aboni ko'wali echi jaré pani, ketasi nasówarami echi levadura anilíwami, echi mapujiti echi pani galabé niwaliwa. Echalí rawé echi jaré o'wéala sacerdote, ayena cho echi jaré nulalíwami binériami si'néami wabé sayérali Jesusi. Alí aboni 'yéka niráa chapínalaga mi'lináali Jesusi. ² Chopi aboni a'nagupi jeaneli: Ketásita chapiboa echi Jesusi mapuyénasí abijí omoálawachi rawé ju, mapurigá echi jaré pagótami ketasi ne wabé simírami na'áwama.

Bilé mukí ucheli Jesusi mo'ólachi

(Mt. 26.6-13; Jn. 12.1-8)

³ Alí Jesusi echo'ná Betániachi anilíwachi asali. Echalí echo'ná Simoni bitélachi ko'yá asali, echi mapu chabé-nala wabé chati cha nayúami níili. Alí bilé mukí echo'ná nawagá, bilé limeta rité niwárami pali, akeite we júkami maníami. Alí echi akeite ne wabé natéami níili, chopi echi mukí ma kasinasa echi rité limeta, suwaba ucheli echo'ná Jesusi mo'ólachi. ⁴ Alí jaré echo'ná muchúami wabé na'áwaga jeaneli: ¿Churékula echirigá ri'ichárami níili echi wabé su'weti júkami akeite? ⁵ Echi akeite ralinéate riwéali, simírami bikiyá mili peso natéami niráa. Rarinéaga, echi jaré we tisúwati ku'wírasa echi wenomí jiti, ne galá níimili. Echirigá aboni a'nagupi ra'íchali echi mukí sayéraga. ⁶ Alí Jesusi jeaneli echi jaré aboni: ¡Ariwesi! ¿Churékulátamo we kumé echi mukí? Binói we galabé tamí olali. ⁷ Arigá ne sinibí niráa nirúlama jaré wabé tisúwati pagótami jena'í 'yemi yuwa. Ne sinibí mapalítamo nakí ku'wíranala echi jaré we tisúwati, echarítamo galá oméramo ku'wíriya. Chopi Nijé mápuni 'yemi mi yuwa atí jipi rawé, ketásini ne sinibí niráa 'yemi mi yuwa asimea. ⁸ Je'ná mukí ne sébali tamí galabé olali mapuyénasí binói omérali. Binói bachá niráa tamí wabé su'weti júkami ucheli Nijé sapálachi, mapurigá echi pagótami pe minánomí tamí uchema mapalini ma mukusáa, chu'wirótami níima. ⁹ Ne bichíwali 'yemi nimí jeané: Ne suníami jena'í wichimóbachi, echo'ná kanápuromí mapo'ná je'ná Galabé Riosi Ra'íchala nawisárami níima, echo'ná ibílana ayena cho galá irétarami níima suwaba mapu ikí olali je'ná mukí, mapurigá wikabé pagótami galá machimea mapu churigá binói tamí galabé olali.

Echi Júrsi we nakili nijínala Jesusi mapurigá Binói mi'lirúami níima

(Mt. 26:14-16; Lk. 22:3-6)

¹⁰ Alí echi Júrsi Jiskarioti riwéami rijói ra'íchamiya simili echi jaré o'wéala sacerdote yuwa. Je'ná rijói katéwaga ra'íchali echi jaré o'wéala yuwa, mapu churigá binói galá omérama nijiya echi Jesusi, mapurigá aboni echirigá galá chapimea Binói. Echi Júrsi Jiskarioti bilé níili echi jaré makói miná okuá mapu Jesusi binérali. ¹¹ Alí echi jaré o'wéala wabé kaníliga ná-mali mapurigá echi Júrsi katéwaga ra'íchali. Alí aboni wenomí 'yabo ruyeli. Echalí jonsa echi Júrsi we 'nátali mapu churigá binói omérama nijiya echi Jesusi, ayena cho mapu kilíbuko echirigá nijima.

Jesusi ko'wali echi jaré bichíyami yuwa

(Mt. 26.17-29; Lk. 22.7-23; Jn. 13.21-30; 1 Cor. 11.23-26)

¹² Alí ma sébachi níili echalí bachá rawé mapalí echi jaré Juríosi omáwaga ko'wali echi jaré pani ke nasówarami echi lewadula anilíwami, ayena cho mapalí aboni ko'yali echi jaré kúuchi bo'wá. Echalí rawé echi jaré mapu Jesusi binérali jeanigá rukueli: ¿Kumi mi nakí máputa a'lárabo mapurigami ko'mea echi kúuchi bo'wá sapala, jipi omowálawachi rawé? ¹³ Alí Jesusi okuá rijói jeanigá júuli mapu Binói binérali: Echo'ná walúlachi simíbaga. Echo'nátamo riwiboa bilé rijói ba'wí tuka inárami. Echi rijói yuwa simasi. ¹⁴ Echo'ná kalírali mapo'ná echi rijói bakimea, echo'ná echi kalí níwami jeanesi: Echi Binériami mi rukué jeanigá: ¿Chuyiri kalírali ju mapo'nani ko'mea jipi alí omowálawachi rawé, echi jaré mapu Nijé binérali yuwa? ¹⁵ Alí echo'ná kalí níwami 'yemi mi 'nérama bilé walú kalí, ripá okuá anamótami, mapo'ná ma galá pichítami níima. Echo'ná a'lárasi mapurigata kopoa téliko alí. ¹⁶ Alí echi okuá mapu Jesusi binérali ma simasa, echo'ná walúlachi sili. Alí aboni riwali ne suwaba mapurigá Jesusi bachá niráa aneli. Alí echo'ná kalírali aboni a'lárali mapurigá si'néami aboni echo'ná ko'mea echalí omowálawachi rawe.

¹⁷ Alí echalí ma alíwachi Jesusi echo'ná nawali, echi jaré makói miná okuá yuwa. ¹⁸ Alí mapalí aboni echo'ná ko'yá muchili, Jesusi jeaneli: Ne bichíwali 'yemi nimí jeané: Bilé 'yemi mapu tamí yuwa ko'yá atí, échiko tamí sayéraga nijima. ¹⁹ Alí aboni je'ná jerigá namsa, ne wabé o'mónali. Aboni ibili niráa jeanigá rukueli: ¿Acha nijé níimaré? Echalí ne si'néami ibili niráa chópírigá rukueli. ²⁰ Alí Jesusi ku nijéwaga jeaneli: 'Yémitamo makói miná okuá ju. Si'néami 'yémitamo tamí yuwa bilénapi bitólachi pakega ko'wá pani; chopi bilé 'yemi arigá tamí nijima mapurigani mi'lirúami níima. ²¹ Nijeni wilárami níili mapurigá Ku'wíriami niráa. Chopi suwaba tamí yuwa ikimea achigórigá mapurigá bachá niráa osirúami níili echo'ná Riosi Ra'íchala oselíwalachi mapurigá ikimea waminánomí. Alí echi rijói mapu tamí nijima, ne wabé risúu nílama. Ne wabé simírami galá níimilé ketasi ranarúami níisa echi rijói.

²² Alí mapuyénasí aboni ko'yá muchili, Jesusi chapili bilé walú pani. Alí ma natétara 'yasa Riosi, rojuánaga nachútali. Alí jeaneli: Chapigátamo kopoa. Je'ná ju Nijé sapala. ²³ Ayena cho Binói chapili bilé baso ne buchíwaga ro'wárami echi uva anilíwami ba'wila. Alí ma natétara 'yasa Riosi, si'néami 'yali bajínala. Echirigá aboni ibili kúuchi niráa bajili. ²⁴ Alí Jesusi ayena cho jeaneli: Je'ná ju Nijé lalá. Echi Nijé lalá 'yemi mi binera mapurigá Nijé ma 'yemi mi aneli, mapurigá Nijé 'yemi mi ku'wírama mapalí Nijé ne wabé léntiga mi'lirúami níima. Alí ne wikabé pagótami galá ku wikawárami níima, mapalí aboni galá bichíima mapu Nijé lalá echi

aboni jiti ku 'luwárami ju. ²⁵ Ne bichíwali 'yemi nimí ané mapurigá jipi jonsa ketásini auché siné bajima echi uva anilíwami ba'wila, chópini bukulíwami bajima mapalí Riosi ma galá nulá jena'í wichimóbachi.

Jesusi bachá niráa anili mapurigá echi Pegro animea riwéali mapu binói ketasi machili echi Jesusi

(Mt. 26.30-35; Lk. 22.31-34; Jn. 13.36-38)

²⁶ Alí ma nawajisa, aboni echo'ná ripá rabó Olíbochi anilíwachi simíbali. ²⁷ Alí Jesusi jeaneli: Téliko rokogó si'néami 'yémitamo wabé riwélabo tamí jiti, mapurigá echo'ná Riosi Ra'íchala osilíwalachi tamí jiti rugá, jerigá osirúami ju: Echi bo'wá niséami mi'lirúami níima. Alí echi bo'wá miná wigáami niráa 'yénama. ²⁸ Alí ma mukusáa ku owinsa, bachá siméani echo'ná Galiléachi anilíwachi kawírali. ²⁹ Alí echi Pegro jeaneli: Ne si'néami echi auché jaré arigá mi jiti riwélasagá, nijeni ke siné riwélama mi jiti. ³⁰ Chopi Jesusi ku nijéwaga jeaneli: Ne bichíwali nimí ané mapu jipi rokogó, ke cho osá kusúachi echi tolí, mujemi baisá chokéami 'yékaka animea mápumi ketasi tamí machí. ³¹ Chopi echi Pegro wisabé echirigá ne wabé bichíwaga jeaneli: Arigani mi yuwa mi'lirúami níisagá, nijé ketasi 'yékaka animea mápumi ketasi mi machí. Alí echi auché jaré si'néami achigórigá aneli.

Jesusi ra'icha Riosi yuwa

(Mt. 26.36-46; Lk. 22.39-46)

³² Alí aboni echo'ná Jechamanichi anilíwachi sili. Alí Jesusi jeaneli echi aboni: Jena'í muchisi mapuyénasí Nijé pe minana simigá, Riosi yuwa ra'ichama. ³³ Alí Jesusi pe minana bacháami bayérali echi Pegro, echi Jakobo ayena cho, echi Juani asíchiko. Alí Jesusi chótali ne wabé siwega o'mona. ³⁴ Alí Binói jeaneli: Nijé, ne sulachí niráa, ne wabé simírami o'mona. Mani ne mukuméaré. Jena'í buwesi. Ne galá 'nagá muchisi. ³⁵ Alí waminá pe bacháami simigá, Jesusi akaná bu'wíwaga tánali Riosi mapurigá a echirigá nakisáagá Riosi, Binói ketasi risúu olárami nílama. Chopi arigá 'wérali níili mapurigá Jesusi wabé risúu olárami níima echalí rawé. ³⁶ Ayena cho Binói, Riosi yuwa ra'íchaga jeaneli: Keni onó, Mujé ne suwaba omérami ju. A Mujé nakisáagá, tamí ku'wiro mapurigani ketasi risúu olárami níima. Chopi ketasi tamí yuwa olá mapurigá Nijé binói chopi nakí. Ne suwaba tamí yuwa olá mapurigá Mujé Binói chopi nakí.

³⁷ Alí Jesusi ku nawali mapo'ná echi auché jaré buweli. Alí we kochigá bitíami riwali. Echalí Jesusi jeaneli echi Pegro: Simoni, ¿Kochigáchami bu'wí? ¿Kéchami olasa níili, pe téeli niráa ke kochiyá? ³⁸ Galá 'nagá buwesi. Sinibí Riosi yuwa tániga ra'ichasi, mapurigátamo ketasi chati olabo mapalí echi riablo 'yemi mi chati olánalama. Ne bichíwali 'yémitamo sulachi

niráa, ne galabé olánali, chopi 'yemi aboni ketasi omérami ju galabé olayá.

³⁹ Alí Jesusi auchecho siné waná simigá, achigórigá ra'íchali Riosi yuwa. ⁴⁰ Pe wilibeko auchecho siné ku nawali mapo'ná aboni buweli. Chopi auchecho siné riwali kochigá bitíami, mapujiti aboni ne wabé simírami kochináali. Alí aboni ma busuresa ne wabé riwélaga, tarapé omérali ku nijéwaga ra'íchiya. ⁴¹ Alí Jesusi auchecho siné simili Riosi yuwa ra'ichámiya. Echirigá Binói baisá chokéami ku nawagá mapo'ná aboni buweli, echalí jeaneli: ¡Ma galá isábaga kochisí! Ma galá ju, mapujiti ma sébali tétali. Riosi tamí wilali mapurigá Ku'wíríami niráa, chopi echi jaré tamí sayérami ma tamí nijima mapurigá echi auché jaré chati oláami pagótami tamí chapimea. ⁴² ¡Jáasi! Ma simabo. Echi mapu tamí nijima ma ne mulubé inaro.

Jesusi borogá tórtati

(Mt. 26.47-56; Lk. 22.47-53; Jn. 18.2-11)

⁴³ Alí Jesusi abijí echirigá ra'íchachi, echalí echi Júrsi we yáati echo'ná nawali, echi mapu bilé níili echi jaré makói miná okuá mapu Jesusi binérali; ayena cho wikabé pagótami echi Júrsi yuwa sili. Jaré ripiyá kami níili, auché jaré kusí kami níili, mapujiti aboni chapiboya sili echi Jesusi, mapujiti echi jaré o'wéala sacerdote echirigá júuli echi Jesusi chapínala. Echi auché jaré nualíwami binériami ayena cho júuli. ⁴⁴ Alí echi Júrsi echi Jesusi nijímiya nawali, mapurigá aboni echirigá galá chapimea. Echijiti Júrsi bachá niráa galá ruyeli echi auché jaré, jeanigá: Echi mapu nijé naripama, echi níima. Chapigá, ne galá bologá tosi.

⁴⁵ Alí echi Júrsi echo'ná nawagá, mulubé nawíili mapo'ná Jesusi wilili. Alí jeanigá wabé kaníliga naré-pali: ¡Kuirá! ¡We kaníliga, Mujé tamí binériami! ⁴⁶ Alí echi auché jaré mapu binói yuwa sili, we chapigá echi Jesusi, bologá toli.

⁴⁷ Alí bilé rijói Jesusi yuwa iyénami machí pali kepu ripiyá. Alí biléana nakálachi ripúnali echi bilé walula sacerdote piónawala. ⁴⁸ Alí Jesusi jeaneli echi auché jaré: 'Yémitamo we ripiyá togá sili, kusí ayena chótamo togá sili. ¿Áchatamo tamí echirigá chapiboa mapurigá Nijé bilé chigórami niráa? ⁴⁹ Sinibí rawé Nijé 'yemi nimí yuwa binériya iyénali echo'ná echi walubé Juríosi ri'obáwalachi. Echalí ketásitamó tamí chapili. Chopi jipi rawé ma suwaba je'ná jerigá ikimea mapujiti echo'ná Riosi Ra'íchala osilíwalachi echirigá bachá niráa osirúami níili tamí jiti rugá, mapurigá je'ná jerigá suwaba ikimea riwéali. ⁵⁰ Alí echi jaré mapu Jesusi binérali, ne si'néami miná júmsali. Echirigá Binói bi'neli tibili, echi jaré Binói sayela yuwa.

Bilé ri'malí miná másami

⁵¹ Alí bilé ri'malí Jesusi yuwa najátali, echi mapu chopi bilé kimila napáchami níili. Alí echi auché jaré rijói wabé chapínalaga chapilí binói chiníwala. ⁵² Chopi ariwesa echi chiní kimila, miná machí sapeka másali.

Jesusi ma torúami níili echo'ná bacháami echi jaré o'wéala yuwa

(Mt. 26.57-68; Lk. 22.54-55, 63-71; Jn. 18.12-14, 19-24)

⁵³ Alí Jesusi tólati echo'ná mapo'ná echi ne walula sacerdote asali. Alí echo'ná napawili ne si'néami echi jaré o'wéala sacerdote, echi auché jaré o'weala ochérami ayena cho, echi auché jaré nualíwami binériami ayena cho. ⁵⁴ Alí echi Pegro pe 'naka niráa jubá najátali mapalí echi Jesusi echo'ná echi jaré o'wéala yuwa pálati. Echirigá echi Pegro echo'ná pachá echi ne walula sacerdote kalílachi ri'narátachi nawagá, echo'ná sokuala asali echi jaré kapitani yuwa. ⁵⁵ Alí echi jaré o'wéala sacerdote ne wabé wi'nijíinali echi Jesusi. Ne suwaba echi auché jaré Juríosi o'wéalawala ayena cho we winijíinali. Echijiti aboni bayeli jaré wabé 'yékami rijói mapurigá aboni wabé 'yéka wi'nijima mapurigá Jesusi echijiti miná mi'lirúami níima. Chopi echi jaré rijói arigá ketasi chópírigá a'nawí niráa anili. ⁵⁶ Ne wikabé níili mapu 'yéka chopi wi'nijili echi Jesusi, chopi ke wesi a'nawí niráa chópírigá wi'nijili.

⁵⁷ Echalí auché jaré jásaga 'yéka niráa sayéraga wi'nijiri jeanigá: ⁵⁸ Tamujeta námali echi Jesusi jeaníami: Nijeni najunama je'ná walubé Juríosi ri'obáwala mapu echi pagótami jiti niwárami níili. Alí bichéni bikiyá chí'ligá auché bilé ri'obá ku niwama mapu ketasi pagótami jiti niwárami níima. ⁵⁹ Chopi echi jaré abijí ketasi chirigá chópírigá anili.

⁶⁰ Echalí echi ne walula sacerdote wilíbagá, jeanigá rukueli echi Jesusi: ¿Kéchami tarapé tamí ku nijéwama? ¿Acha bichíwali ju echirigá mapurigá aboni mi wabé wi'nijí? ⁶¹ Chopi Jesusi arigá tarapé namuti ku nijéwali. Alí echi walula sacerdote auchecho siné jeanigá rukueli: ¿Mujecha aní mapu mi echi Wabé Galabé Riosi Ranala ju, mapu Riosi mi wilali Walubela Nigúurami niráa, echi mapu Cristo anilíwami ju? ⁶² Alí Jesusi ku nijéwaga jeaneli: Ayena, Nijeni ju. Alí 'yémitamo tamí riwiboa echo'ná echi suwaba omérami Riosi watonachi atíami. Ayena cho 'yémitamo tamí riwiboa ripana nolírali inárami, mapalini ku nawama, jena'í wichimóbachí.

⁶³ Echalí echi ne walula sacerdote ne wabé chí'wánali binói napáchala mapurigá ne wabé o'mónami niráa. Alí jeanigá rukueli echi auché jaré: ¿Churékuláta waminabi wi'nijibo? ⁶⁴ 'Yémitamo ma galá námali mapurigá je'ná rijói Riosi sayéraga ra'íchali. ¿Churigátamo

aní? Echali ne si'neami echi jaré o'wéala jeanili mapu galá níima miná mi'lirúami níisa echi Jesusi.

⁶⁵ Alí jaré chótali kachípiya Jesusi. Alí ma pólasa Binói busíłachi, wabé cho'nali Binói banalachi jeanigá: Tamujé tamí ruyé: ¿Chigá mi cho'nali? Echali echi jaré kapitani ayena cho cho'nali.

Echi Pegro 'yékaka aní mapu binói ketasi machí echi Jesusi

(Mt. 26.69-75; Lk. 22.56-62; Jn. 18.15-18, 25-29)

⁶⁶ Alí echi Pegro echo'ná machí ri'lé ri'narátachi asali, mapalí bilé tiwé, echi ne walula sacerdote yuwa nóchami, echo'ná nawali. ⁶⁷ Alí echi tiwé riwisáa echi Pegro echo'ná sokuáliya atíami, jeaneli: Mujé ayena cho echi Jesusi Nasarétachi bitéami yuwa iyénami jumi. ⁶⁸ Chopi echi Pegro 'yékaka jeaneli: Tarapeni machí echi Jesusi, nirapeni machí mapurigami aní. ⁶⁹ Alí pe wilibeko echi tiwé auhecho siné riwali echi Pegro. Echali echi tiwé jeaneli echi auché jaré echo'ná muchúami: Je'ná rijói ayena cho echi Jesusi yuwa iyénami ju. ⁷⁰ Chopi echi Pegro auhecho siné 'yékaka jeanili mapu binói ketasi machili echi Jesusi. Pe wilibeko echi auché jaré echo'ná muchúami auhecho siné jeaneli echi Pegro: Ne bichíwali mi aboni yuwa iyénami ju. Tamujéta galá machí mápumi echo'ná Galiléachi bitéami ju, mapujítimi achigórigá ra'icha mapurigá echo'ná Galiléachi piréami. ⁷¹ Echali echi Pegro chótali jeanigá ra'icha: ¡Galá níima Riosi tamí kastigo 'yasa, a ketásini bichíwaga anisáagá! Chopi binói arigá we yáati 'yékaka ra'ichali jeanigá: ¡Nijé ketásini machí echi rijói máputamo 'yemi rugá ra'icha! ⁷² Alí we yáati echi tolí osá chokéami kusuli. Alí echi Pegro 'nátaga newalali mapurigá Jesusi bachá niráa jeaneli: Ke cho osá chokéami kusúachi echi tolí, mujemi baisá chokéami 'yékaka animea mápumi ketasi tamí machí. Alí echirigá 'nátaga echi Pegro wabé nalali.

Jesusi tólati echo'ná bacháami echi walula silíami Pilato riwéami yuwa

(Mt. 27.1-2, 11-14; Lk. 23.1-5; Jn. 18.28-38)

15 Alí ba'alínala bi'yábijí echi jaré o'wéala sacerdote napawili echi jaré o'wéala ochérami yuwa, ayena cho echi jaré nulalíwami binériami yuwa, ayena cho ne suwaba echi jaré o'wéala Juríosi yuwa. Echali aboni bologá togá echi Jesusi, echi walula silíami Pilato riwéami 'yali. ² Alí echi Pilato jeanigá rukueli: ¿Acha mi echi jaré Juríosi pagótami silínawala ju? Alí biché Jesusi jeaneli: Ayena. Ne bichíwali Nijeni ju. ³ Alí echi jaré o'wéala sacerdote wikabé namuti jiti ne wabé 'yékaka wi'nijili echi Jesusi. ⁴ Alí echi Pilato auhecho siné jeanigá rukueli: ¿Kéchami nijiyama? ¡Nibira! ¡Wikabé namuti jiti mi wi'nijiwa! ⁵ Chopi Jesusi tarapé biyiri ku

nijéwali. Echijiti echi Pilato ketasi machili piri jiti ke nijéwali.

Echi silíami ma nulá mapu Jesusi mi'lirúami níima

(Mt. 27.15-31; Lk. 23.13-25; Jn. 18.38-19.16)

⁶ Alí sinibí bamíwali echali omowálawachi sébachi echi Pilato ku machí pali bilé Juríosi rijói mapu pachá bachara asali, mapuyíripi echi auché jaré Juríosi bilé ku machí pánala risensia taniko. ⁷ Alí echali rawé bachara asali bilé rijói, Barabasi riwéami. Je'ná rijói bachara asali auché jaré yuwa mapujiti aboni nakówaka ko'yali auché jaré. ⁸ Alí echi pagótami echi Pilato yuwa sigá tá-nali mapurigá binói ku machí pama bilé Juríosi pachá bachara atíami, mapurigá binói olali sinibí bamíwali. ⁹ Echali echi Pilato jeanigá rukueli: ¿Áchatamo nakí mápumi ku machí pama echi 'yemi Juríosi pagótami níwala Walubela Silíami? ¹⁰ Echirigá anili mapujiti binói galá machili mapu echi jaré o'wéala sacerdote chopi wabé kichiga nijili echi Jesusi. ¹¹ Alí echi o'wéala sacerdote galá ruyeli echi pagótami mapurigá aboni tama mapurigá bachá ku machí pátami níima echi Barabasi. ¹² Alí echi Pilato jeanigá rukueli: ¿Churigá bichétamo nakiko mápumi olama echi rijói yuwa mapu 'yémitamo echi Walubela Juríosi Silínawala ané? ¹³ Echali aboni o'weli ra'íchaga jeaneli: ¡Kúrsichi michoné! ¹⁴ Alí echi Pilato jeanigá rukueli: ¿Churikóriaba? ¿Churigá chati sití olali? Chopi aboni auhecho siné wabé o'weli ra'íchaga jeaneli: ¡Kúrsichi michoné! ¹⁵ Alí Pilato ku machí pali echi Barabasi mapujiti binói we nakili mapu echi jaré Juríosi pagótami we kanílama. Alí ma nulasa mapu Jesusi wipisótami níima, ayena cho nulali mapu Binói echo'ná biléana kúrsichi michóniga mi'lirúami níima.

¹⁶ Alí jaré sontarsi toli echi Jesusi echo'ná pachá biléana walubé kalírali, Betorio anilíwachi, mapo'ná echi walula silíami bitélachi níili. Echali ne si'neami echi wikabé sontarsi echo'ná pachá napawili. ¹⁷ Alí aboni sitákami chomítawami napachátali echi Jesusi, mapurigá walula silíami niráa. Ayena cho bilé so'uwá niwárami koyétali echo'ná Binói mo'ólachi. ¹⁸ Alí aboni chótali o'weli ra'íchaga jeanigá: ¡Kuirá, mujé Walubela Juríosi Silínawala! ¹⁹ Alí bilé kusí jiti aboni we wipisoli Binói Jesusi mo'ólachi, ayena cho we kachípali. Alí echi jaré sontarsi we tiníchaga, echo'ná bacháami wéemi raweka chokoba jábali. ²⁰ Alí ma sunisa echirigá tiníchaga oloyá, aboni ku 'yeli echi pe sitákami chomítuami napacha. Alí a Binói napáchala ku napachátali. Alí pe wilibeko ku machí pálati echi Jesusi, mapurigá Binói mi'lirúami níima, echo'ná kúrsichi michóniga.

Jesusi mi'lirúami níili echo'ná kúrsichi michóniga

(Mt. 27.32-44; Lk. 23.26-43; Jn. 19.17-27)

²¹ Alí aboni chapili bilé rijói echo'ná inárami mapurigá matórama echi kursi. Echi rijói echo'ná biléana kawichí

jonsa inárami níili, echi mapu Simoni riwéami níili. Alí echi Lijanto onolá níili, echi Rujo ayena cho. ²² Alí echi jaré sontarsi toli echi Jesusi echo'ná mapo'ná Gorótachi anilíwachi níili, mapo'ná je'ná jerigá aniwáwami ju: Chuwí mo'ólachi. ²³ Alí Jesusi bajínala 'yálati echi uva anilíwami ba'wila, echi wabé chokówami mira anilíwami namuti nasówarami, mapurigá Binói ke 'me okoma. Chopi ketasi bajili. ²⁴ Alí Jesusi echo'ná kúrsichi, klavo jiti, michónalati echo'ná Binói sikálachi, ayena cho echo'ná Binói ronólachi. Echali echi jaré sontarsi rijibaka ri'yékali mapu chigá mema riwéali echi jaré namuti Jesusi napáchala. ²⁵ Alí pe bi'yá ratabáachi níili mapalí Jesusi echo'ná kúrsichi michónalati. ²⁶ Alí echo'ná ripá kúrsichi osirúami níili mapu piri jiti Jesusi echirigá klavo jiti michóntami níili echo'ná kúrsichi. Alí echi osirúami je'ná jerigá aniwáami níili: Je'ná ju echi Walubela Juríosi Silínawala. ²⁷ Alí mapalí Jesusi mi'lílati, echali okuá chigórami ayena cho ko'wirúami níili. Bilé aboni Jesusi yuwa echo'ná auché biléana waná watoná kúrsichi michónarami níili. Echi auché bilé echo'ná biléana o'winá kúrsichi michónarami níili. ²⁸ Echirigá ne bichíwali ikili mapurigá echo'ná Riosi Ra'íchala osilíwalachi osirúami níili mapurigá ikimea riwéali, mapujiti je'ná jerigá osirúami ju: Echi jaré pagótami mayeli mapurigá Binói chati oláami níili, mapujiti Binói mi'lirúami níili echi auché jaré chati oláami yuwa.

²⁹ Alí echi jaré pagótami mapu echo'ná simárali ne mo'ólaga, ne wabé kichiga ra'íchaga jeaneli: ¡Bajil! Mujemi anili mápumi najunama echi walubé Juríosi ri'obáwala, alí bichemi bikiyá chi'rigá ku niwama. ³⁰ ¡Mujé binói niráa ku ku'wira! ¡Ku rikina echo'ná kúrsichi jonsa! ³¹ Alí echi jaré o'wéala sacerdote, ayena cho echi jaré nulalíwami binériami achigórigá tiníchali Jesusi mapalí aboni a'nagupi jeaneli: Je'ná Jesusi auché jaré galá ku'wirarilé. ¡Chopi a binói, ketasi omero a ku ku'wíriya! ³² Jipi ayénata riwisáagá ku rikínami echo'ná kúrsichi jonsa, ayénata galá bichíibi mapu je'ná echi Walubela Cristo ju, echi Walubela Juríosi Silínawala niráa. Ayena cho echi jaré okuá mapu Jesusi yuwa achigórigá echo'ná auché jaréana kúrsichi michónarami níili, ayena cho ne wabé chati anigá ra'íchali Binói Jesusi sayéraga.

Jesusi ma mukuli

(Mt. 27.45-56; Lk. 23.44-49; Jn. 19.28-30)

³³ Alí mapalí ma nasipa rawé níili, ne suníami echo'ná kawírali ke sayiná ne wabé rukuáwali. Alí ma pe alíwachi galá ku rayénali. ³⁴ Echali echi Jesusi we yaa o'weli ra'íchaga jeaneli: Eloi, Eloi, ¿Lama sabatani? mapu je'ná jerigá aniwáami ju: Keni Riósawa, Keni Riósawa, ¿Churékulami tamí bi'neli aliweri? ³⁵ Alí jaré echo'ná jáwami echirigá ra'íchami namsa, jeaneli: Namsi. Binói echi Elíasi bayé chaní. ³⁶ Echali bilé rijói echo'ná we 'maga, pagueli pe táa bo'osali echo'ná

maníami wabé chokóami ba'wílachi. Alí echo'ná biléana kusírali ochogá 'yali echi Jesusi chunugá bajínala. Ayena cho echi rijói jeaneli: Ariwesi. Galá 'nebo acha nolínama echi Elíasi ku rikibúmiya echo'ná ripá kúrsichi jonsa.

³⁷ Alí Jesusi ma o'weli ra'ichasa, alí mukuli. ³⁸ Echali we yámiti echi walú chiní, wabé runáami, mapuyiri kimá, echo'ná pachá echi walubé Juríosi ri'obáwalachi chukúami, ke sayiná, ripana jonsa nasipa chi'wali. ³⁹ Alí echi bilé walula kapitani mapu echo'ná bacháami wilili mapo'ná Jesusi kúrsichi michónalati, je'ná binói riwisáa mapurigá Jesusi echirigá o'weli ra'íchaga mukuli, alí jeaneli: Ne bichíwali je'ná rijói Riosi Ranala níili.

⁴⁰ Echali jaré muguí ayena cho echo'ná pe 'naka niráa, 'nagá jali. Bilé, echi María níili, mapu echo'ná Makatálachi anilíwachi bitéali. Auché bilé ayena cho María riwéami níili, echi mapu echi José iyela níili, ayena cho echi Jakobo, echi mapu tabéala anélati, iyela níili. Alí auché bilé mukí Salomé riwéami níili.

⁴¹ Alí je'ná muguí Jesusi yuwa ku'wíraga 'yéami níili mapalí Binói echo'ná Galiléachi iyénali. Alí auché jaré wikabé muguí ayena cho echo'ná jali mapu pe chabénala echo'ná ripáami Jerusalémachi ayena cho simíbali Jesusi yuwa.

Jesusi chu'wirótami níili

(Mt. 27.57-61; Lk. 23.50-56; Jn. 19.38-42)

⁴² Echali ma alíwachi níili. Ayena cho ba'alínala rawé isábawachi rawé níili. ⁴³ Echijiti echi José, echo'ná Arimatéachi bitéami, echo'ná nawali echi Jesusi sapala mukúami a'lárami. Alí echi José ayena cho pe walula níili echi jaré Juríosi yuwa, mapu binói ayena cho we buweli mapurigá Riosi ne galá nulema jena'í wichimóbacha piréami pagótami. Echali echi José tarapé majaga bakili echo'ná mapo'ná echi walula silíami Pilato riwéami asali. Alí risensia tánali echi Jesusi mukúami sapala, mapuriga ku tomea. ⁴⁴ Echali echi Pilato ketasi mayeli mapu ma mukúami níili echi Jesusi. Echijiti binói rukuénalaga bayeli echi walula kapitani, acha ne bichíwali mukúami níili. ⁴⁵ Mapalí echi walula kapitani aneli mapu Jesusi ma mukúami níili, alí echi Pilato risensia 'yali echi José mapurigá binói tomea echi Jesusi sapala mukúami. ⁴⁶ Echali echi José ralali bilé chiní kimila we natéami. Alí echo'ná kúrsichi ku rikibuka echi Jesusi mukúami sapala, echi chiní kimila jiti kabika, echo'ná biléana risochí rikali, mapo'ná niwárami níili mapurigá chu'wirówami niráa. Alí echo'ná yéachi 'yérali bilé walú rité jiti. ⁴⁷ Alí echi María, echo'ná Makatárachi bitéami galá riwali mapo'ná chu'wirótami níili echi Jesusi. Echi auché bilé María riwéami mukí, echi mapu echi José iyela níili, ayena cho galá riwali mapo'ná chu'wirólati.

Jesusi ma ku owínali

(Mt. 28.1-10; Lk. 24.1-12; Jn. 20.1-10)

16 Alí mapalí ma simírali echalí isábawachi rawé, echalí echi María, echo'ná Makatálachi bitéami, ayena cho echi auché bilé María, echi mapu echi Jakobo iyela níili, ayena cho echi auché bilé mukí, Salomé riwéami, aboni je'ná muguí ralali jaré wabé su'weti júkami namuti mapurigá echi Jesusi sapala mukúami uchema. ² Alí bi'yá bijí echalí oméachi rawé pe bukúlí machínachi rayénali echi muguí echo'ná risochí chu'wirótachi sili. ³ Alí echo'ná buwichí síraga aboni a'nagupi jeanigá rukueli: ¿Chigá tamujé tamí chakena pásama echi walubé rité, mapu echo'ná risochí chu'wechi 'yéachi 'yératami níili? ⁴ Chopi mapalí aboni ma mulubé 'nénali, alí riwali mapu echi walubé rité ma chakena ri'nabura atíami níili. ⁵ Alí echo'ná pachá risochí mo'wisá, aboni riwali bilé walula Riosi kapitánawala echo'ná watoná atíami, echi mapu wilibé napacha, we rosákami napáchami níili. Echijiti ne wabé majajali echi muguí. ⁶ Chopi echi walula Riosi kapitánawala jeaneli: ¡Ketasi majasi! 'Yémitamo amí echi Jesusi echo'ná Nasarétachi bitéami, mapu echo'ná kúr-sichi mi'lílati. ¡Binói ma ku owínali! ¡Tarapé te jena'íbi! ¡'Nesi mapo'ná rikálati! ⁷ Ku simíbagá ruyébasi echi jaré mapu Binói binérali, echi Pegro ayena cho. Jeanébasí mapu Jesusi Binói 'yemi yuwa bachá siméa echo'ná Galiléachi. Echo'nátamo riwiboa mapurigá Binói bachá niráa 'yemi mi aneli. ⁸ Alí echi muguí echo'ná chu'wechi jonsa ne wabé júmaga ku simíbalí, mapujiti aboni we sayilúmaga majajali. Alí aboni ke wesi ruyeli mapurigá ikili, mapujiti aboni ne wabé majali.

Echi María echo'ná Makatárachi bitéami bachá riwali ku bitéami niráa echi Jesusi

(Jn. 20.11-18)

⁹ Echalí bi'yá oméachi rawé mapalí Jesusi ku owínali, echi María, echo'ná Makatárachi bitéami, bachá riwali ma ku bitéami niráa. Alí echi María níili mapu Jesusi chabénala niráa ku machí a'wali kichao wabé chati riablo aliwala echo'ná pachana binói María sulálachi jonsa. ¹⁰ Alí je'ná María ma riwisáa ku bitéami niráa echi Jesusi, we yáati ku simigá ruyeli echi auché jaré mapu chabénala Jesusi yuwa 'yénali. Alí mapalí echi María echo'ná ku ruyémiya nawali, aboni we siwega nalaka muchili. ¹¹ Chopi mapalí aboni námali mapu Jesusi ma ku bitéami níili, ayena cho mapu echi María ma riwali ku bitéami niráa, echalí aboni arigá tarapé bichíili.

Echi okuá mapu Jesusi binérali ma riwali echi Binói ma ku bitéami niráa echo'ná biléana buwichí

(Lk. 24:13-35)

¹² Alí pe wilibeko auché jaré okuá aboni galá riwali ma ku bitéami niráa echi Walubela Jesusi. Echalí aboni riwali mapalí echo'ná biléana buwichí sírali, echo'ná biléana kawichí simiba. ¹³ Alí aboni we yáati ku ro'wili echi auché jaré bichíyami ku ruyésiya. Chopi mapalí echirigá ruyélati, echalí aboni ketasi cho bichíili mapurigá Jesusi ma ku bitéami níili.

Jesusi júuli nawesánala echi jaré mapu Binói binérali

(Mt. 28:16-20; Lk. 24:36-49; Jn. 20:19-23)

¹⁴ Alí pe wilibeko Jesusi auchecho siné ke sayiná nawali echo'ná pachá mapo'ná echi jaré makói miná bilé ko'yá muchili. Echalí Binói péé oyérali echi aboni mapujiti aboni ketasi 'me galá bichíyami níili, ayena cho mapujiti aboni we biwárami suléami níili, mapujiti aboni ketasi bichíili echi auché jaré mapu bachá riwisáa, ku ruyeli mapu Jesusi ma ku owínami níili. ¹⁵ Alí Jesusi jeaneli: Ne suníami jena'í wichimóbachi simíbagá nawisasi je'ná galabé Riosi Ra'íchala, mapurigá ne si'néami pagótami galá machimea. ¹⁶ Alí echi jaré mapu galá bichíiko, echi mapu pagótami juko omá, echiko galá ku'wíratami níima, chopi echi jaré mapu ketasi bichíiko, echijiti aboni sinibí kastigo 'yárami níima. ¹⁷ Alí echi jaré mapu galá bichíiko, aboni galá machirúami níima mapujiti aboni, Nijé iwérawala jiti, ku machí a'wama echi jaré riablo aliwala. Ayena cho galá machirúami níima mapujiti aboni auché si'nú ra'íchali ra'ichama. ¹⁸ Alí aboni galá chapimea echi jaré sinowi. Alí a bajisa jaré namuti mukuwáwami, tarapé namuti chibi ikimea. Ayena cho echo'ná echi jaré nayúkamichi a moba nochasa aboni sikala, galá ku sa'wimea echi jaré nayúkami.

Jesusi ku moyénali echo'ná ripá riwigachi

(Lk. 24.50-53)

¹⁹ Alí ma sunisa echirigá ra'icha, echi Walubela Jesucristo echo'ná ripá riwigachi ku torúami níili. Alí Binói ech'ná Riosi yuwa, watonachi asíbali. ²⁰ Alí aboni ne suníami wichimóbachi nawisásiya simíbalí. Alí echi Walubela Jesucristo echirigá sinibí ku'wírali echi aboni, ayena cho Binói Jesucristo galá machírali echi auché jaré pagótami mapu echi nawisálawami ne bichíwali níili. Binói 'yali mapurigá echi jaré bichíyami wisabé wabé omériga olama mapurigá ke wesi auché jaré pagótami omero olayá. ¡Echirigá nílaga!

Lúkasi

Lúkasi nakili Riosi Ra'íchala osénala

1 Wikabé echi auché jaré ritémtami ma chótali uchúchaga osoyá ne suwaba namuti jiti, mapurigá ma ikili tamujé tamí yuwa máputa ma galá bichííli Jesucristo niráa. ² A'lí aboni ma suwaba osali achigórigá mapurigá echi auché jaré galá riwali, si'néami mapu ikí chabé chokichí jonsa galá riwali echirigá ikíachi. A'lí aboni mapu echirigá osali, aboni níili mapu wabé ku'wírali, je'ná Galabé Riosi Ra'íchala nawésiya. ³ A'lí mujé galabé oláami Tiójilo riwéami, nijeni ayena cho ma ne galá rukugá machili suwaba echi jaré namuti jiti mapurigá ikili chabé chokichí jonsa. ⁴ Echijiti jipi nijeni mi jerigá osé mapurigami ne galá machimea mapu suwaba je'ná namuti ne bichíwali ju, achigórigá mapurigami ayena cho ma galá binératami níili.

Bilé Riosi kapitánawala bachá niráa nawésali jeanigá mapu echi Juani pe minana ranarúami níima

⁵ Chabé ki'yá mapalí echi Erorsi riwéami rijói ne walula silíami níili echo'ná Juréachi anilíwachi kawírali, echalí bilé rijoy, Sakaríasi riwéami bitéali, echi mapu sacerdote niráa nóchali echo'ná walubé Juríosi ri'obáwalachi. A'lí je'ná Sakaríasi bilé níili echi auché jaré wikabé sacerdote mapu napawika achigórigá olali mapurigá echi ki'yánala bitéami Abíasi riwéami sacerdote olali. A'lí echi Sakaríasi upila Elisabeti riwéami níili. Echi Elisabeti onolá ayena cho sacerdote níili, achigórigá mapurigá echi Aroni riwéami rijói ayena cho sacerdote níili chabé ki'yá. ⁶ A'lí echi Sakaríasi galabé oláami níili Riosi yuwa, echi Elisabeti ayena cho echirigá galabé oláami níili. Ayena cho okuánika ne galá nijéwami níili suwaba echi Walubela Riosi nulalila. Echijiti ketasi wesi chibi yiri jiti omérali wi'nijiya aboni. ⁷ Chopi aboni ketasi kúchuwami níili, mapujiti echi Elisabeti ketasi ranáami níili. Ayena cho echi okuánika aboni ma ne wabé o'chérami níili.

⁸ Siné rawé echi Sakaríasi nochama riwéali echo'ná pachá echi walubé Juríosi ri'obáwalachi, echi auché jaré binói yuwa nóchami sacerdote yuwa. ⁹ Echalí rawé echi Sakaríasi chapirúami níili echi auché jaré sacerdote jiti, mapurigá binói molémiya bakimea echo'ná ne wabé pachánala echi Walubela Riosi ri'obáwalachi, mapujiti aboni sinibé rawé chapili bilé aboni echirigá

olánala. ¹⁰ Echalí mapuyénasí echi Sakaríasi echo'ná ne wabé pachánala iyénali echi moliwá molémiya, ne si'néami echi auché jaré pagótami echo'ná machímana, Riosi yuwa tániga ra'icha jali. ¹¹ A'lí echo'ná pachá ri'obachi ke sayiná wilíbali bilé walula Riosi kapitánawala. A'lí echi Sakaríasi galá riwali echi Riosi kapitánawala echo'ná watonachi wilíami mapo'ná echi moliwá molélachi níili. ¹² A'lí mapalí echi Sakaríasi echirigá riwali echi walula Riosi kapitánawala, echalí binói ne wabé majaga 'nénali. A'lí echi Sakaríasi ketasi machili piri olama. ¹³ Chopi echi walula Riosi kapitánawala jeaneli: ¡Mujé Sakaríasi, ketsi majá! Chopi ne galá bichíí, mapujiti Riosi ma galá námali mapurigami tániga ra'íchali Binói yuwa. Echijiti echi mujé upila, Elisabeti riwéami, ma nawárama bilé táa towí. A'lí bichemi Juani riwarama. ¹⁴ Echalimi ne wabé kanílama, ayena cho auché jaré wikabé wabé kanílama mapalí echi táa towí ranarúami níima; ¹⁵ mapujiti echi mujé ranala, ma ochérasa, ne wabé walula níima bacháami Riosi yuwa. Binói tarapé bajima echi uva ba'wila, nibilé bajima auché jaré namuti rikúkuwami. A'lí echi mujé ranala ne galá nulérami níima echi wabé Galabé Riosi Iwigala jiti, echalí jonsa mapalí binói ne bukulí ranarúami níima. ¹⁶ Ayena cho echi mujé ranala galá nawésaga bichíírama wikabé echi jaré Isaeali pagótami, mapurigá aboni wikáwali tánama Riosi, ayena cho mapurigá aboni ku ro'wima echi Walubela aboni Riósawala yuwa. ¹⁷ A'lí echi walubela Riosi kapitánawala ayena cho jeaneli: Echi Juani ayena cho bachá niráa nawésama echi pagotami mapalí ma mulubé ke 'me ayó sébachi níima mapurigá echi Walubela nawama jena'í wichimóbachi. A'lí mapurigá echi Elíasi ne wabé jiwériga ologá nawésali echi jaré ki'yá piréami pagótami, echirigá echi Juani achigórigá nawésama mapurigá echi jaré 'wéntami galá bichííga kilí rijóilama aboni kúchawala yuwa, ayena cho mapurigá echi jaré ke nijéwami ku galá nijéwaga olama. A'lí echi Juani echirigá nawésaga ne galá a'lárama echi jaré pagótami mapurigá aboni ne galá bichííma echi Walubela niláa.

¹⁸ A'lí echi Sakaríasi jeanigá rukueli echi walubela Riosi kapitanáwala: ¿Churigá ne bichíwali abijí kúchabota? Nijé ma we chérami ju, ayena cho nijé upila ma wikabé bamíbami ju.

¹⁹ Echalí echi walula Riosi kapitánawala ku nijéwaga jeaneli: Nijeni Gabraeli riwé. Nijeni we nigúurami ju

Riosi yuwa. Ayena cho Riosi tamí júuli mi yuwa ra'ichánala, mapurigá nijeni mi ra'íchama je'ná wabé galabé ra'íchali. ²⁰ Chopi jípimi ketasi námami níima, ayena chomi ketasi omérama ra'icha mapuyénasí ma ranarúami níima echi mujé ranala, echi mapu arigá ranarúami níima. Chopi ne suwaba mapurigá nijeni mi aneli arigá achigórigá ikimea mapalí ma echirigá sébachi níima.

²¹ A'lí echo'ná machímana walubé ri'obachi echi wikabé pagótami buwigá muchili echi Sakaríasi mapuyénasí échiko echo'ná pachá ri'obachi iyénali echi moliwá moleya. A'lí echi pagótami wabé majaga 'nátali mapujiti wi'libé niráa echi Sakaríasi ketasi cho ku machínali echo'ná pachá ri'obachi jonsa. ²² Chopi pe wilibeko mapalí echi Sakaríasi ma ku machínali, binói ma ketasi omérali ra'icha. Echali echi jaré pagótami echo'ná machímana muchúami galá machili mapu Riosi ma galá riwírali echi Sakaríasi jaré wabé omériga ikíami namuti mapalí binói iyénali echo'ná pachá ri'obachi. Mapalí echi Sakaríasi ku machínali binói ne wabé nakili ra'ichánala aboni yuwa, chopi binói ma ketasi omérali ra'icha. Echali echi Sakaríasi chopi binói sikala jiti jówali, mapujiti binói ma ketasi omérali ra'icha.

²³ A'lí echi Sakaríasi nulérami níili nochánala pe wikabé rawé niráa, echo'ná echi walubé Juríosi ri'obáwalachi. A'lí mapalí binói ma nóchali echikí rawé echali binói ku simili echo'ná binói bitélachi. ²⁴ A'lí pe kinana echi Sakaríasi upila, Elisabeti riwéami, ma bochátali. A'lí echali jonsa echi Elisabeti ketasi ku machínali echo'ná pachá binói bitélachi jonsa malí michá iyénasí. Echali echi Elisabeti chopi je'ná jerigá 'nátali: ²⁵ Echi Walubela Riosi ne wabé galabé ju, mapujiti Binly ma tamí 'yali mapurigani raméa bilé táa múchali, mapurigá echi auché jaré pagótami ma ketasi waminabi tamí anema ke ranáami niraá.

Bachá niráa nawésarami níili mapu Jesusi ranarúami níima

²⁶ A'lí pe wakinánokuá usani michá Riosi júuli kepu kapitánao Gabrieli riwéami echo'ná biléana walúlachi Nasarétachi anilíwachi, echo'ná Galiléachi anilíwachi kawírali nirúami. ²⁷ Echali échiko echo'ná julárami níili bilé mukí 'némiya, echi mapu María riwéami níili. Echi María tarapé siné cho kunéami níili, nirapé cho bilé rijói yuwa kochíami níili. Chopi echi María ma bilé rijói yuwa kunema riwéali, echi mapu José riwéami níili. A'lí echi José bilé níili echi ki'yá bitéami Rabili riwéami rijói kúchala kúchwala niráa. ²⁸ A'lí echi walubela Riosi kapitánawala bakili echo'ná pachá mapo'ná echi María asali. A'lí echi Riosi kapitánawala jeaneli: ¡Kuiira! Riosi mi wabé galé. Echi Walubela mi yuwa ju. Echi Walubela Riosi ma mi wabé simírami ku'wírali, ketasi mapurigá Binói ku'wírali echi auché jaré muguí.

²⁹ Chopi echi María ne galá riwisáa echi walula Riosi kapitánawala, ne wabé majajali, mapujiti binói ma galá námali echirigá ra'íchachi echi walula Riosi kapitánawala. Echali echi María wabé 'nátaga tibili, mapu churigá echirigá kuíraga ra'íchali echi walula Riosi kapitánawala. ³⁰ Echali echi walula Riosi kapitánawala jeaneli:

María, ketasi majá, mapujiti Riosi mi wabé galé. ³¹ Jipi jonsa mujemi ma bocháami níima. A'lí pe minánomí mujemi ranamea bilé táa towí. A'lí bichemi JESUSI riwarama. ³² A'lí echi Jesusi ma ochérasa, ne wabé Walubela níima. Binói anérami níima echi Ripá Riwigachi Atíami Riosi Ranala. A'lí echi Walubela Riosi wilama echi Jesusi mapurigá Walubela silíami niráa, mapurigá Binói arigá nulema echi jaré Isaeli pagótami mapurigá aboni Silínawala niráa, achigórigá mapurigá echi walula silíami Rabiri riwéami ayena cho nuleli aboni chabé ki'yá. A'lí echi Rabiri arigá pe ritémtami níili echi Jesusi yuwa. ³³ A'lí echi Jesusi ne sinibí niráa echirigá nulema echi jaré Isaeli pagótami. Ayena cho Binói ne sinibí niráa aboni silínawala níima.

³⁴ Echali echi María ku nijéwaga jeaneli echi walula Riosi kapitánawala: ¿Churigá echirigá ikimea? ¡Nijeni ke wesi siné bilé rijói yuwa napeli!

³⁵ A'lí echi walula Riosi kapitánawala ku nijéwaga jeaneli: Echi wabé Galabé Riosi Iwigala mi galá omératama, ayena cho echi Ripabé Atíami Riosi mi galá jiwératama, echijiti echi towí mápumi ranamea Riosi níwala níima. A'lí Binói echi bi'nélipi Riosi Ranala anérami níima. ³⁶ Ayena cho echi walula Riosi kapitánawala waminabi jeaneli: Mujemi pe rijimala ju echi Elisabeti riwéami mukí yuwa. Échiko ma wiláarasa ayena cho ranamea bilé táa towí. Chabé jonsa echi Elisabeti ke ranáami anélati. Chopi échiko ma bochátali chabénala usani micha jonsa. ³⁷ Mapujiti echi Walubela Riosi ne wabé omérami ju, ne suwaba namuti olayá.

³⁸ A'lí echi María ku nijéwaga jeaneli echi Riosi kapitánawala: Nijeni ne suwaba galá nijéwaga olama mapurigá echi Walubela Riosi tamí nulema. Nijeni chopi mapurigá Binói piónawala níima. Ne galá níima Riosi ne suwaba tamí echirigá olasa achigórigá mapurigá mujemi tamí aneli. Echali echi walula Riosi kapitánawala ma ku simili.

Echi María kólamiya simili echi Elisabeti

³⁹ Echali rawé echi María we sapunú simili echo'ná ripáami wérachi, echo'ná biléana walúlachi mapo'ná echi jaré Jurá kúchala kúchwala kawíwarachi ju.

⁴⁰ Echali echi María nawali echo'ná echi Sakaríasi bitélachi. A'lí echo'ná pachá bakigá, echi María kuíraga narépali echi Elisabeti. ⁴¹ A'lí mapalí echi Elisabeti námali echi María echirigá kuíraga narépachi, echali echi

táa múchali mapu ketasi cho ranarúami níili, arigá ne wabé nokuali echo'ná pachá echi Elisabeti ropálachi; ayena cho echalí echi Wabé Galabé Riosi Iwigala ne galá nuleli echi Elisabeti. ⁴² Echalí echi Elisabeti o'wali ra'íchaga jeaneli echi María: Echi Walubela Riosi ma mi wabé simírami ku'wírali, ketasi mapurigá Binói ku'wírali echi auché jaré muguí; ayena cho Riosi ne wabé simírami ku'wírali echi táa towí mapu mi ranamea. ⁴³ Ayena cho echi Elisabeti waminabi jeaneli: Nijeni ne wabé kaníili mapujiti mujemi ma tamí 'némiya nawali, mapujiti echi táa towí mápumi ranamea, échiko nijé Walubélawala níima. ⁴⁴ Ayena cho echi Elisabeti waminabi jeaneli: Ne galani machili je'ná jeyiri mapujiti mapalini bachá niráa gala námali maparimi kuíruga narépage anili, echalí echi táa towí ke cho ranarúami, wabé kanílaga nokuali jena'í pachá nijé ropálachi. ⁴⁵ Mujemi wabé kaníratami ju mapujítimi galá bichíili mapurigá Riosi kapitánawala mi aneli, mapujiti ne suwaba arigá ikimea, achigórigá mapurigá echi walula Riosi kapitánawala mi ne bichíwaga aneli.

⁴⁶ Echalí echi María ku nijéwaga jeanili:

Ne wabeni kaníili pachana nijé sulálachi niráa, echijiti wabeni nakí waminabi walubéraga aneya echi Walubela Riosi.

⁴⁷ Ayena cho echi María jeanili:

Ne wabeni kaníili nijé sulálachi niráa, mapujítini ne galá bichíi Riosi, echi mapu tamí Ku'wíimi ju.

⁴⁸ Mapujiti nijeni mapurigá echi wabé tabéala Binói piónawala ju, chopi Riosi tamí wabé natimali; echijiti jipi jonsa echalí ne jubá rawé iyénasi, ne si'néami pagótami tamí ne wabé kaníliami anema.

⁴⁹ A'lí echi María ayena cho jeanili:

Ne wabeni kaníili mapujiti echi suwaba omérami Riosi ma ne wabé omériga olali tamí yuwa. Binói ne wabé Galabé ju.

⁵⁰ Ayena cho jeanili:

Echi Walubela Riosi sinibí ne wabé natimama si'néami echi jaré pagótami mapu ikí galá o'wikeko Binói Riosi.

⁵¹ Echi Walubela Riosi ne wabé omériga olali. Binói ma wabé omérali echi jaré mapu ne wabé 'nóchaga níliami ju, aboni sulálachi niráa.

⁵² Ayena cho echi Walubela Riosi ma ku machí a'wali echi jaré mapu o'wéala niráa jawárami níili, ayena cho Binói auché jaré jáwali mapu kilí oláami níili.

⁵³ Ayena cho echi María jeanili:

Riosi ma galabé niráa kóoli echi jaré wabé 'lochéami, ayena cho Binói we yiri niráa ku júuli echi auché jaré mapu wabé níwami níili.

⁵⁴ Riosi ma galá ku'wírali echi jaré Binói níwala pagótami, Israeli anilíwami. Riosi sinibí natimali aboni.

⁵⁵ Riosi ma tamujé tamí ku'wírali achigórigá mapurigá Binói bichíwaga aneli echi jaré ki'yá piréami tamujé níwala pagótami.

Chabé ki'yá Riosi echirigá bichíwaga aneli echi Abra-mi. Echalí Riosi bichíwaga anili mapurigá Binói sinibí niráa ku'wírama riwéali echi auché jaré wikabé Abrami kúchala kúchuwala.

⁵⁶ Echalí echi María echo'ná tibili echi Elisabeti yuwa bikiyá michá yénasi. A'lí ma ku simili echo'ná binói bitélachi.

Ma ranálati echi Juani mapu pagóami níima riwéali

⁵⁷ Mapalí ma sébali echalí rawé mapalí echi Elisabeti ranamea riwéali bilé táa múchali, echalí binói ranamea bilé táa towí. ⁵⁸ Echalí mapalí si'néami echi jaré mulubé piréami pagótami galá námali mapurigá Riosi echirigá wabé natimaga ku'wírali echi Elisabeti, ayena cho mapalí echi auché jaré Elisabeti ritémawala echirigá námali, echalí ne si'néami aboni ne wabé kaníili binói yuwa.

⁵⁹ Echalí jonsa wakinánokuá osá naó rawé echo'ná sili echi jaré pagótami mapurigá aboni noligá sikirema echi táa towí, mapurigá echi jaré Juríosi pagótami sinibí olali. Echalí echi auché jaré pagótami nakili riwaránala echi táa towí, Sakaríasi niráa, mapurigá binói onolá riwéali. ⁶⁰ Chopi echi táa towí iyela ku nijéwaga jeaneli: Ketasi echirigá riwarasi. Juani riwéami níima.

⁶¹ Echalí aboni jeanigá rukueli: ¿Churékula echirigá riwéami níima? Tarapé wesi te 'yemi ritémawala echirigá riwéami.

⁶² A'lí aboni sikati jówaga rukueli echi towí onolá mapu churigá binói nakili riwaránala, mapujiti binói abijí ke námiami níili, ayena cho ketasi cho omérali ra'icha.

⁶³ Echalí echi towí onolá, bilé oselí tasa, echo'ná jeanigá osali: Juani riwéami ju. Echalí si'néami echi auché jaré echo'ná jáwami chopi ne wabé kilí 'nátaga tibili. ⁶⁴ Echalí we yáati echi Sakaríasi ma ku omérali ra'icha. A'lí binói chótali jeanigá mapu Riosi ne wabé Walubela ju. ⁶⁵ Echijiti si'néami echi jaré pagótami echo'ná mulubé piréami ne wabé 'nátaga tibili. Ayena cho si'néami pagótami echo'ná ripáami wérachi, Juréachi anilíwachi kawírali piréami, a'nagupi rugá wé ra'íchali mapurigá je'ná jerigá ikili. ⁶⁶ A'lí ne si'néami echi jaré pagótami mapu ikí galá námali je'ná jerigá ikíachi, abóniko ibili niráa ne wabé kilí 'nátaga muchili. Echalí aboni a'nagupi jeanili:

Je'ná towí ne wabé walula níimiré mapalí binói ma ochérasa. Aboni echirigá anili mapujiti si'néami galá machili mapurigá Riosi wabé karigá ku'wírali echi táa towí.

Echi Sakaríasi ne galá nawesa

⁶⁷ A'lí echi Wabé Galabé Riosi Iwigala ne galá nuleli echi towí onolá, Sakaríasi riwéami. Echalí binói we ra'íchali mapurigá Riosi 'yali ra'ichánala, mapalí binói jeanili:

⁶⁸ Ne galá níima ne si'néami pagótami jeanigá mapu echi tamujé Isaeli pagótami Riósawala ne Walubela Riosi ju;

mapujiti tamujé Riósawala ma tamujé tamí ku'wírali máputa Binói níwala pagótami ju, ayena cho Binói tamujé tamí ma ku wikáwali.

⁶⁹ Echi tamujé Riósawala ma tamujé tamí 'yali bilé wabé omérami Ku'wíimi.

Échiko bilé ju echi ki'yá bitéami Rabiri riwéami rijói kúchala kúchuwala.

A'lí echi Rabiri riwéami rijói Riosi piónawala niráa níili.

⁷⁰ Chabé ki'yá Riosi nulali echirigá bichíwaga anénala, mapalí Binói nawésanala júuli echi jaré galabé oláami rijói mapu Binói jiti nawésami níili.

⁷¹ Riosi echirigá tamujé tamí bichíwaga aneli, mapurigá Binói tamujé tamí ku'wírama riwéali mapurigá echi jaré mapu tamujé tamí sayérami ju ketasi tamujé tamí omérama, ayena cho mapurigá echi jaré mapu tamujé tamí wabé kichí, arigá ketasi tamujé tamí omérama.

⁷² Ayena cho Riosi echirigá waminabi tamujé tamí natimali achigórigá mapurigá Binói wabé natimali echi jaré ki'yá piréami tamujé níwala pagótami. Riosi sinibí 'natama mapurigá Binói bichíwaga aneli aboni.

⁷³ Riosi je'ná jerigá ne bichíwaga aneli echi Abrami, echi mapu tamujé onolá niráa níili, mapu chabé ki'yá bitéali:

⁷⁴ Mapu Riosi Binói tamujé tamí ku'wírama riwéali, mapurigá echi jaré tamujé sayera ketasi tamujé tamí omérama,

ayena cho mapurigá tamujeta tarapé majaga, galá nijéwaga olabo mapurigá Riosi tamujé tamí nulé.

⁷⁵ Chopi mapurigata galabé níibo, ayena cho mapurigata chopi olabo mapurigá Riosi tamujé tamí nulé ne sinibí mapuyénasíta piré jena'í wichimóbachí.

⁷⁶ Echali echi Sakaríasí jeaneli echi táa towí: Mujé mápumi táa nijé ranala ju, mujemi bilé walula Riosi jiti nawésami anérami níimami, mapujiti echi Walubela Ripá Riwigachi Atíami Riosi mi julama nawísanala.

A'lí mujemi bachá niráa nawésama echi jaré pagótami, mapurigá aboni galá bichíima echi Walubela Jesu-cristo, mapalí Binói pe waminánomí galá nawésama aboni.

⁷⁷ Echali mujemi nawésama echi jaré Binói níwala pagótami mapurigá aboni galá ku'wíratami níima, ayena cho mapurigá aboni chati olalila galá ku wikawárami níima.

⁷⁸ Ne bichíwali ju mapu echi Walubela Riosi echo'ná ripá riwigachi atíami tamujé tamí wabé ku'wírali, mapujiti Binói tamujé tamí wabé natimaka galeli.

Ayena cho Riosi Binói júuli echi Walubela Ku'wíimi mapurigá Binói tamujé tamí machírama suwaba namuti.

A'lí echi rayénali chopi tamujé tamí rayénata sinibí rawé mapurigata galá riwiboa suwaba namuti jena'í wichimóbachí nirúami.

⁷⁹ Jena'í wichimóbachí tamujé chopi mapurigá echo'ná rokowárali niráa piré, ayena chota pe waminánomí arigá suwiboa;

chopi echi Walubela Ku'wíimi tamujé tamí galá machíratama mapurigata galá machiboa Riosi Ra'íchala, ayena cho Binói tamujé tamí binérama mapurigata kilí ologá pirélabo.

⁸⁰ A'lí echi táa towí Juani riwéami galá ochérali. Ayena cho binói galá bichíili Riosi. A'lí echi Juani bitéali echo'ná jaléana waná kawichí, echali rawé yénasí mapalí ma sébachi níili mapurigá Riosi julama echi binói nawésanala echi jaré Isaeli anilíwami pagótami.

Echi Jesusi ranarúami níili

(Mt. 1:18-25)

2 Echali ki'yá rawé echi walula silíami Augusto riwéami we nuláami níili ne suníami jena'í wichimóbachí. A'lí échiko nulali mapu ne suníami jena'í wichimóbachí piréami pagótami oserichi ro'ogá tarárami níima. ² Echali bamíbali ne chokichí níili mapalí echi walula silíami echirigá nulali taránala si'néami pagótami. Echali echi Sirénio riwéami rijói walula silíami níili echo'ná Síriachi anilíwachi kawírali. ³ Echali ne si'néami pagótami arigá simíbali echo'ná ibílana aboni o'wéalawalachi mapurigá aboni riwalá echo'ná oselichi osilúami níima.

⁴ A'lí echi José echo'ná Nasarétachi, echo'ná Galiléachi anilíwachi kawírali jonsa simili, echo'ná Juréachi anilíwachi kawírali simiyá, echo'ná mapo'ná echi Rabiri riwéami rijói walúlawachi níili, mapo'ná Belenchi anérati, mapujiti binói José bilé níili echi ki'yá bitéami Rabiri kúchala kúchuwala. ⁵ Echi José echo'ná simili, echi binói upila María riwéami yuwa, mapurigá aboni riwalá ayena cho echo'ná oselichi ro'ogá tarárami níima. A'lí echi María níili mapu chabé jonsa kunema riwéali echi José yuwa. A'lí ma bocháami níili. ⁶ Echali rawé mapalí aboni echo'ná Belenchi muchili, ma sébali mapalí echi María ranamea riwéali bilé táa múchali.

⁷ A'lí echi María ranali bilepi táa towí 'múchali ne bachá. Echali jaré chiní kimíllachi kabili. A'lí echo'ná sonórali rikali mapo'ná biléana wáasi sonó koolachi níili, mapujiti ketasi nirúali mapo'ná aboni pachá muchima echo'ná biléana kalírali pagótami kochíllachi.

Jaré Riosi kapitánawala echo'ná sili

⁸ Echali ki'yá rokogó echo'ná kawichí mapo'ná mulubé níili echo'ná Belenchi jaré bo'wá niséami galá tibuka muchili echi wikabé aboni pugula bo'wá. ⁹ A'lí ke sayiná bilé walula Riosi kapitánawala echo'ná moba echi jaré bo'wá niséami yuwa nawali. Echali ne wabé

simírami ratábali echo'ná ne noligá aboni yuwa mapujiti Riosi ne wabé Walubela ju. A'lí aboni ne wabé majajali. ¹⁰ Chopi echi walula Riosi kapitánawala jeaneli: ¡Ketasi majasi! Nijeni 'yemi mi ruyema echi ne galabéala mapurigá bukúl ikili. Je'ná jiti ne si'néami pagótami ne wabé kanílama. ¹¹ Jipi rokogó echo'ná echi Rabiri walúlawalachi ma ranálati bilé taa towí, echi mapu Walubela Ku'wími níima 'yemi pagótami yuwa. Échiko echi Walubela Cristo níima, echi mapu Riosi wilama ruli mapurigá Walubela Ku'wíriyami niráa. ¹² 'Yémitamo galá machiboa chuyiri ju echi taa towí, mapujítitamo galá riwiboa chiní kimíachi kabita bu'wíami, echo'ná biléana sonórali, wáasi kóolachi.

¹³ Echál ke sayiná echo'ná pe ripana niráa, wikabé o'wéala Riosi kapitánawala jábali echi auché bilé Riosi kapitánawala yuwa. A'lí ne si'néami aboni waminabi walubéraga aneli Riosi mapalí aboni jeanili:

¹⁴ ¡Waminabi wabé walubéлага anérami níлага Riosi, echo'ná ripá riwigachi atíami!

¡Kilí pirélasí 'yemi pagótami jena'í wichimóbachi piréami! ¡A'nagupi galesi! Riosi 'yemi mi ne wabé galé.

¹⁵ Echál mapalí echi jaré o'wéala Riosi kapitánawala ma ku simíbali echo'ná ripá riwigachi, echál echi jaré bo'wá niséami we yáati chótali a'nagupi ra'íchaga jeaniyá: Ma simabo echo'ná Belenchi, je'ná jerigá ikíami 'nébiya, mapurigá tamujé Walubélawala ma tamujé tamí ruyeli. ¹⁶ Echál aboni we sapú simíbali echo'ná Belenchi. A'lí aboni echo'ná riwáli echi María, echi José ayena cho, echi taa towí asíchiko, echi mapu echo'ná biléana sonórali wáasi kóolachi bu'wíami níili. ¹⁷ Mapalí aboni ma riwáli echi taa towí, a'lí aboni galá nawésaga ku ruyeli mapurigá echi walubela Riosi kapitánawala ma aneli aboni, echi taa towí jiti rugá. ¹⁸ Echál ne si'néami mapu ikí echirigá námaliko, si'néami we galá kilí 'nátaga kipuli mapurigá echi jaré bo'wá niséami anili. ¹⁹ Chopi echi María sinibí, suláchí niráa, 'nátaga newalali ne suwaba echi jaré namuti mapurigá ikili. ²⁰ A'lí echi jaré bo'wá niséami ku simíbaga nawésali echi auché jaré pagótami jeanigá mapurigá Riosi ne wabé Walubela ju, mapujiti Binói suwaba galá olali achigórigá mapurigá Binói bachá niráa ruyegá 'nérali aboni mapu ikimea riwéali.

Echi taa towí Jesusi párami níili echo'ná echi warubé Juríosi ri'obáwalachi

²¹ Mapalí ma simírali osá naó rawé, echál echi jaré Juríosi noligá sikireli echi taa towí, mapurigá aboni sinibí olali echi jaré kúuchi kúrowi yuwa. A'lí echi taa towí Jesusi riwarálati, achigórigá mapurigá echi walubela Riosi kapitánawala bachá niráa aneli echi María, mapalí binói ke cho bocháami níili. ²² Ma sébali echál rawé mapalí aboni ma ku bi'wárami níima riwéali, mapurigá echi Moisesi osogá nulali. Echál rawé

echo'ná Jerusalémachi tólati echi taa towí Jesusi mapurigá Binói echi walubela Riosi 'yárami níima. ²³ Echál echi taa towí 'wénawala echirigá olali mapujiti echi Walubela Riosi echirigá nulali, mapurigá je'ná jerigá osirúami ju echo'ná Riosi Ra'íchala oselíwalachi: Ne si'néami echi jaré kúuchi kúrowi mapu ikí ne bachá niráa, ranarúami níima, mapalí aboni iyela ne bachá niráa ranáli bilé taa, abóniko 'yárami níima echi Walubela Riosi. ²⁴ A'lí echi taa towí echirigá tólati echo'ná Jerusalémachi mapalí Binói 'wénawala echo'ná simíbali mapurigá aboni suwaba nijéwaga olama mapurigá je'ná jerigá osirúami ju mapurigá jaré namuti 'yárami níima riwéali Riosi: 'Yémitamo ko'ogá 'yabo Riosi okuá makawi echo'ná kawichí nirúami, auché jaré okuá makawi echo'ná bitichí nirúami keremá, mapalí bilé mukí bachá niráa raná bilé taa towí 'múchali.

²⁵ A'lí echál bilé rijói Simioni riwéami echo'ná Jerusalémachi bitéali. Échiko galabé oláami níili, ayena cho binói galá bichíyami níili Riosi. Ayena cho echi Simioni bichíiga buweli echál rawé sébachi mapalí echi jaré Isaeli anilíwami pagótami galá ku'wíratami níima riwéali. Échiko galá nulérami níili echi wabé galabé Riosi Iwigala jiti. ²⁶ A'lí echi Galabé Riosi Iwigala chabénala ma ruyeli echi Simioni mapurigá binói ketasi cho mukumea riwéali, a ketasi cho riwisá echi Cristo, echi mapu echi Walubela Riosi wilama riwéari mapurigá Walubela Ku'wíriyami niráa. ²⁷ Pe wakinana siné rawé echi Wabé Galabé Riosi Iwigala júuli echi Simioni echo'ná echi walubé Juríosi ri'obáwalachi. Echál rawé níili mapalí echi taa towí 'wénawala echo'ná pali echi taa towí Jesusi, mapurigá Binói galá olárami níima mapurigá echi jaré Juríosi nulérami níili olánala si'néami echi jaré kúuchi kúrowi yuwa. ²⁸ Echál echi Simioni echo'ná binói sikálachi mutuli echi taa towí Jesusi. A'lí echi Simioni waminabi walubéraga aneli Riosi mapalí binói jeaneli:

²⁹ Keni Walubérawa, nijeni chopi mapurigá Mujé pió-nawala ju.

Jipi ma ariwé mapuriga nijeni ma galá bichíiga mukumea, mapujítimi ma ne sébali olali mapurigami bachá niráa tamí ne bichíwaga aneli.

³⁰ Mapujiti nijé binói ma galá riwáli echi Ku'wíriyami, ³¹ mapu Mujemi wilali mapurigá Binói ku'wírama ne si'néami pagótami.

³² Echi Walubela Ku'wíriyami, ayena cho galá machílama echi auché jaré isena pagótami mapu ketasi Juríosi pagótami ju;

ayena cho Binói waminabi o'wéalatama echi jaré Mujé níwala Isaeli anilíwami pagótami.

³³ Echál echi José, echi Jesusi iyela ayena cho, ne wabé kilí 'nátaga kipuli mapurigá echi Simioni nawésaga anili echi taa towí jiti rugá. ³⁴ Echál echi Simioni ne wabé karigá ra'íchali aboni. Binói ayena cho aneli echi Jesusi iyela, María riwéami, jeanigá: Nibira,

je'ná taa towí ma ochérasa ne wabé Walubela níima. Binói jiti wikabé echi jaré Isaeli pagótami miná chake-na rujuima. Chopi auché jaré wikabé aboni, Binói jiti ku jawásarami níima. Binói ayena cho jurárami ju mapurigá wikabé pagótami galá machíratami níima. Chopi wikabé arigá wabé kichima echi Binói. ³⁵ Ayena cho echi mujé Ranala galá machírama mapurigá echi jaré pagótami ibili niráa 'nata echo'ná aboni sulálachi niráa; ayena cho mujé binói ne wabé simírami o'monáratami níima mapurigá mapalí bilé wi'llibé ripiyá ichesa mujé sulálachi niráa.

³⁶ Echali rawé bilé mukí Ana riwéami ayena cho asali echo'ná walubé Juríosi ri'obáwalachi. Echi Ana we nawésami níili mapurigá Riosi nuleli binói nawésanala, échiko bilé rijói Janueli riwéami malala níili. A'lí echi Janueli bilé níili echi jaré Aseri aniríwami rojuáami, echi jaré Juríosi pagótami. Echi Ana ne wabé wiláami níili. Chabénala echi Ana wabé tiwé ká kuneli. Echali jonsa binói bitéali kepu kuná yuwa kichao bamíbalí niráa, chopi binói kunala echali ma mukuli. ³⁷ A'lí echi Ana ma kunámami níili osá nawosa makói miná naó bamíbalí jonsa. A'lí echi Ana sinibí rawé, sinibí rokogó asali echo'ná pachá echi walubé Juríosi ri'obáwalachi. Ayena cho echi Ana wi'llibé niráa ketasi ko'wali mapalí binói chopi Riosi yuwa tániya asali. ³⁸ Echali rawé echi Ana ayena cho nawali echo'ná walubé Juríosi ri'obáwalachi mapalí echi taa towí Jesusi echo'ná pálati. A'lí echi Ana ayena cho we yáati walú natétara 'yali Riosi, ayena cho binói chótali ra'icha echi taa towí Jesusi jiti rugá ne si'néami pagótami mapu ikí galá bichíga buweli mapurigá echo'ná Jerusalémachi piréami galá ku'wiratami níima.

Aboni ku simíbalí echo'ná Nasarétachi

³⁹ A'lí aboni echirigá ma sebárali suwaba namuti olayá echi taa towí yuwa, mapurigá echi jaré Juríosi nulérami níili olánala mapurigá osirúami ju echo'ná echi Walubela nulalila oseríwalachi. A'lí aboni ma ku simíbalí echo'ná Galiléachi anilíwachi kawírali, echo'ná aboni walúlawalachi mapo'ná Nasarétachi anilíwachi ju. ⁴⁰ Echali jonsa echi taa towí Jesusi galá ochéraga, waminabi jiwérali, ayena cho waminabi wabé 'nátami níili. A'lí Riosi wabé galigá ku'wirali echi binói.

Echi towí Jesusi tibili echo'ná pachá echi walubé Juríosi ri'obáwalachi

⁴¹ Sinibí bamíbalí Binói 'wénawala simíbalí echo'ná Jerusalémachi mapalí omáwalachi sébachi níili mapalí echi jaré Juríosi omáwaga ko'yali echi jaré kúuchi bo'wá. ⁴² A'lí mapalí echi Jesusi makói miná okuá bamíbami níili, echali bamíbalí si'néami aboni muyé-nali echo'ná ripáami Jerusalémachi, mapurigá aboni olali sinibí bamíbalí echali omowáluachi rawé sébachi.

⁴³ A'lí ma sunisa echirigá omawa, echali aboni ma ku simíbalí. A'lí echi towí Jesusi echo'ná Jerusalémachi ripili, chopi echi José ketasi machili mapu Jesusi echo'ná ripili. Echi Jesusi iyela nirapé machili. ⁴⁴ Chopi aboni mayeli mapu echi towí Jesusi ayena cho yuwa simili echo'ná buwechí iyénaga, echi auché jaré wikabé pagótami yuwa mapu ku simiba 'yé-nali. A'lí aboni echirigá pe mikabé 'yé-nali, siné rawé inárawami niráa. Echali ma alíwachi aboni ari echo'ná aboni rité-mawalachi, echo'ná aboni amígowalachi ayena cho.

⁴⁵ Chopi aboni ketasi riwali. A'lí ba'alínala rawé aboni ku ro'wili echo'ná Jerusalémachi echi towí Jesusi ásiya. ⁴⁶ A'lí wakinánokuá baikiyá chi'rigá aboni ma riwali echi towí Jesusi echo'ná pachá echi walubé Juríosi ri'obáwalachi atíami. Echali echi towí Jesusi echo'ná nasipa asali echi jaré nulalíwami binériami yuwa. Echali Binói galá kipuli aboni nawésawala, ayena cho Binói wikabé namuti rukueli aboni. ⁴⁷ Echali ne si'néami pagótami mapu ikí námali mapurigá echi towí Jesusi echirigá galá machigá ku nijéwali, abóniko anili mapu Binói ne wabé machíami níili. Ayena cho aboni anili mapu Binói sinibí ne wabé simírami galá machigá ku nijéwali. ⁴⁸ A'lí mapalí echi Jesusi 'wénawala ma echirigá riwali echi jaré o'wéali yuwa ra'íchachi, echali aboni ma riwisá ne wabé kilí 'nátali. A'lí Binói iyera jeaneli: Keni raná, ¿churékula mi ketasi tamujé tamí yuwa simili? Kemi onó, nijé ayena cho, wabeta o'móniga 'yé-nali mi aya. ⁴⁹ Echali Jesusi ku nijéwaga jeaneli: ¿Churékulátamo tamí ali? ¿Kéchatamo machili mapu arigá 'wérali ju mapu Nijeni ologá inama Nijé Onolá olalila? ⁵⁰ Chopi aboni ketasi galá machili mapurigá Binói ra'íchaga aneli.

⁵¹ Echali echi towí Jesusi ma ku simili Binói 'wénawala yuwa. A'lí aboni ku sili echo'ná Nasarétachi. A'lí echi towí Jesusi ne galá nijéwami níili aboni yuwa. A'lí Binói iyela ne sulachí niráa ne galá 'nátali suwaba je'ná namuti jiti. ⁵² Echali echi towí Jesusi waminabi galá ochéraga, waminabi wabé machíami níili. A'lí Riosi ne galá nirali echi Jesusi. Ayena cho echi jaré pagótami ne galá nirali Binói.

Echi Juani mapu pagóami níili we nawésali echo'ná biléana waná kawichí

(Mt. 3:1-12; Mr. 1:1-8; Jn. 1:19-28)

3 Mapalí echi walula Tibério ma ne walubela nuráami níili echo'ná Rómachi anilíwachi makói miná malí bamíbalí jonsa, echali bamíbalí echi Ponkio Pilato ayena cho silíami níili echo'ná Juréachi. Ayena cho echi Erorsi walula silíami níili echo'ná Galiléachi. Echali echi Erorsi rijimala, Jiripi riwéami, ayena cho silíami níili echo'ná Ituréachi, echo'ná Trakonítachi ayena cho. A'lí echali bamíbalí echi Lisánia riwéami rijói walula silíami níili echo'ná Abilíniachi. ² Ayena cho echali bamíbalí echi Anasi, echi Kaijasi o'wéala sacerdote níili echi jaré

Juríosi pagótami yuwa. Echali bamíbali níili mapalí Riosi nawísánala júuli echi Juani, echi Galabé Riosi Ra'íchala. Echi Juani níili echi Sakaríasi ranala. Ayena cho echi Juani bi'neli bitéali echoná biléana waná kawichí. ³ Echali echi Juani nawésasiya simili echo'ná suníami ne nologá rijówachi, echo'ná bakóchi Joránachi anilíwachi. Echali echi Juani nawésali echi pagótami jeanigá mapu aboni ba'wí jiti pagótami níima, ayena cho mapu si'néami aboni si'nú, galabé niráa 'nátaga, ku ro'wima Riosi yuwa mapurigá aboni ku wikawárami níima mapurigá aboni chati olali. ⁴ Ne suwaba je'ná jerigá ikili mapurigá echi walula Riosi jiti nawésami, Isaíasi riwéami bachá niráa jeanigá osali:

Bilé rijói o'weli ra'íchaga nawisama echo'ná biléana waná kawichí. Échiko jeanigá nawésama:

Echi Walubela ke sayiná nawama jena'í wichimóbachi. Echijiti ne galá a'lárasí 'yemi aboni sulálachi mapurigátamo ayena cho we galá a'lara echi buwé mapalí bilé walula echo'ná simíraga nawama.

⁵ Echali ne suníami ri'lé komichi we galá ku buchíwarami níima, ne suníami galá ri'narátami níima mapurigá ipó niráa.

Echali ne suníami ripabé rabó ayena cho miná najunárami níima; ne suníami galá ri'narátami níima.

A'lí echo'ná suníami wabé nakólami buwichí galá ku wachinárami níima.

Ayena cho ne suníami buwichí wabé charikáachi galá ku a'láratami níima.

⁶ Echali ne si'néami pagótami galá riwimea echi Ku'wíríami mapu Riosi julama jena'í wichimóbachi.

⁷ Echali mapalí echi wikabé pagótami simíbali echo'ná waná kawichí mapurigá echi Juani ba'wí jiti pagoma aboni, echali echi Juani jeaneli: ¡'Yemi pagótami mapurigá jaré sinowi kúchuwala ju máputamo wakíná júmsali mapujítitamo wabé majali! ¿Chigá 'yemi mi ruyeli máputamo waminá júmsabo, mapurigátamo ketasi kastigo 'yárami níibo waminanomí rawé? ⁸ Ne galabé olasi, mapurigátamo echirigá galá 'nérafo echi auché jaré pagótami máputamo ma ne bichíwari ku galabé niráa 'nátaga, ma ku ro'wili Riosi yuwa. Ketasi chopi 'natasí mapu 'yemi aboni we galabé oláami ju, mapujítitamo echi Abrami pagótamawala ju. Nijé 'yemi nimí ané mapu Riosi wabé omérami ju, je'ná wikabé rité nakulíwiya, mapurigá je'ná wikabé rité ma nakulíwasa, wikabé Abrami pagótawala niráa níima.

⁹ Jípiko echi ripulá ma ne echo'ná masana chokilachi uchárami ju; ayena cho ne suwaba masana mapu ikí ketasi galabé rakeko, échiko arigá ripúnaga, echo'ná na'írali pátami níima. Riosi ayena cho achigórigá kastigo 'yama echi jaré pagótami, si'néami mapu ikí ketasi galabé olako.

¹⁰ Echali echi jaré pagótami jeanigá rukueli: ¿Churigá biché olabo tamujé? ¹¹ A'lí echi Juani ku nijéwaga jeaneli: Galá níima ibili 'yemi máputamo ikí okuá

napáchako, pe bilé 'yasa echi auché jaré mapu ketasi bilé niwa. A'lí 'yemi máputamo niwa ko'wáami, galá níima 'yemi kóosa echi auché jaré mapu ketásirapé niwa.

¹² Echali echo'ná sili jaré rijói mapu wenomí bujea 'yé-nali, echo'ná nuláami walula silíami 'yánala. A'lí aboni nakili mapu echi Juani ba'wí jiti pagoma ibili aboni. Echali aboni jeanigá rukueli: Binériami, ¿churigata olabo tamujé? ¹³ A'lí echi Juani jeaneli: Ketasi waminabi simírami niráa nipasi. Chopi ibili niráa nipasi mapurigátamo risénsia nulérami ju. ¹⁴ A'lí jaré sontarsi ayena cho jeanigá rukueli: ¿Churigata olabo tamujé? A'lí echi Juani ku nijéwaga jeaneli: Ketasi wesi majáraga 'yesi aboni níwala namuti. Nibilé wesi 'yéka wi'ni-jisi mapurigátamo echirigá 'yebo jaré aboni níwala namuti. Chopi ne galá kanílasi mapurigátamo natétalawa.

¹⁵ Echali echi jaré Juríosi pagótami we buwigá muchili mapurigá Riosi julama bilé Walubela Ku'wíríami jena'í wichimobachi, echi mapu Cristo anérami níima riwéali. Echijiti ne si'néami aboni ayena cho je'ná jerigá 'nátaga muchili: ¿Acha echi Juani ju echi mapu Cristo anérami níima? ¹⁶ Chopi echi Juani ku nijéwaga jeaneli echi si'néami pagótami: Nijeni ne bichíwali 'yemi mi pagóli ba'wí jiti. Chopi echi Cristo anilíwami mapu ne bichíwali ke 'me ayó nawama 'yemi yuwa, échiko 'yemi mi 'yama echi Wabé Galabé Riosi Iwigala. A'lí echi Galabé Riosi Iwigala mapurigá na'í niráa nawama jena'í wichimóbachi. Chopi echi Walubela Cristo ne wabé simírami Walubela ju, ketasi mapurigá nijé. Mapujiti nijeni ketasi 'me galabé oláami ju, mapurigani echijiti omérama ku'wíríya echi Binoy, nibilé mapurigani ku akaráptama Binói akalá. ¹⁷ Echi Binói ma galá kasúwama binói níwala turío, ayena cho Binói gará katiwama echi turío echo'ná pachá Binói níwala rikówachi. Echali Binói waminá ikósama echi kajela echo'ná na'írali mapo'ná tarapé siné cho'wimea. Echirigá ayena cho Riosi achigórigá kastigo 'yama echi jaré chati oláami pagótami, sinéami mapu ikí ketasi ku wikawárami ju.

¹⁸ A'lí echi Juani je'ná jerigá wabé galá nawésali echi pagótami. Ayena cho binói auché jaré wikabé namuti aneli aboni mapalí binói echirigá nawésali echi Galabé Riosi Ra'íchala. ¹⁹ Echi Juani ayena cho ruyeli echi walula silíami Erorsi riwéami mapu ketasi risénsia níili mapu binói chapimea echi Eróríasi riwéami mukí mapurigá binói upila niráa, mapujiti echi mukí chopi echi Jilipi upila níili, echi mapu echi Erorsi rijimala níili. Chopi echi Erorsi arigá chapili echi Jiripi upila mapurigá binói upila niráa. Ayena cho echi Juani ruyeli echi Erorsi mapurigá binói auché jaré wikabé namuti chati olali. ²⁰ Chopi echi Erorsi ketasi wikáwali tánali. A'lí echi Erorsi waminabi chati olali mapalí binói nulali pachá bachánala echi Juani.

Jesusi pagótami níili ba'wí jiti

(Mt. 3:13-17; Mr. 1:9-11)

²¹ Chopi chabé bachánala je'ná jerigá ke cho ikíachi, echalí echi Juani pagoya iyénali echi jaré pagótami. Echalí echi Jesusi echo'ná nawagá ayena cho pagótami níili. A'lí Jesusi abijí Riosi yuwa ra'íchaya wilili mapalí Binói riwali mapurigá echo'ná ripá riwigachi ke sayiná iráparami niráa niili. ²² Echalí echi Wabé Galabé Riosi Iwigala riwirúami níili echo'ná moba echi Jesusi yuwa rikínami mapurigá bilé makawi niráa. A'lí echi Walubela Riosi echo'ná ripá riwigachi atíami we ra'íchali jeanigá: Mujé ju bilepi keni Raná. Nijé nimí wabé galé. Mujé tamí wabé ganílatali.

Echi jaré ki'yá piréami Jesusi pagótamawala

(Mt. 1:1-17)

²³ A'lí echalí mapalí echi Jesusi chótali nawésiya, Binói mapuyena baisá makói bamíbami níili. A'lí echi auché jaré pagótami mayeli mapu Jesusi echi José ranala níili, echi mapu Elí ranala níili, ²⁴ échi mapu Matata ranala níili, échi mapu Libí ranala níili, echi mapu Melchí ranála níili, echi mapu Jána ranala níili, echi mapu José ranala níili, ²⁵ echi mapu Matatási ranala níili, echi mapu Amosi ranala níili, echi mapu Naúmi ranala niili, echi mapu Islí ranala níili, echi mapu Nagái ranala níili, ²⁶ echi mapu Mata ranala níili, echi mapu Matatási ranála níili, echi mapu Semeí ranála níili, echi mapu auché bilé rijói José riwéami ranala níili, echi mapu Jurá ranala níili, ²⁷ echi mapu Juani ranala níili, echi mapu Resa ranala níili, echi mapu Sorobabéli ranála níili, echi mapu Sareteli ranala níili, echi mapu Neria ranala níili, ²⁸ echi mapu Melchí ranala níili, echi mapu Abiri ranala níili, echi mapu Kosami ranala níili, echi mapu Ilmorámi ranala níili, echi mapu Ere ranala níili, ²⁹ echi mapu Jusué ranala níili, echi mapu Elieseri ranala níili, echi mapu Joremi ranala níili, echi mapu Matata ranala níili, ³⁰ echi mapu Libí ranala níili, echi mapu Simioni ranala níili, echi mapu Jurá ranala níili, echi mapu auche bilé baisá rijói José riwéami ranala níili, echi mapu Jonani ranala níili, echi mapu Iliakími ranala níili, ³¹ echi mapu Milea ranala níili, echi mapu Mainani ranala níili, echi mapu Matata ranala níili, echi mapu Natani ranala níili, ³² echi mapu Rabiri ranala níili, echi mapu Isaí ranala níili, echi mapu Obeli ranala níili, echi mapu Bosi ranala níili, echi mapu Salomoni ranala níili, echi mapu Nasoni ranala níili, ³³ echi mapu Aminarabi ranala níili, echi mapu Arami ranala níili, echi mapu Isoromi ranala níili, echi mapu Párisi ranala níili, echi mapu Jurá ranala níili, ³⁴ echi mapu Jakobo ranala níili, echi mapu Isaka ranala níili, echi mapu Abrami ranala níili, echi mapu Taré ranala níili, echi mapu Nachori ranala níili, ³⁵ echi mapu Serubi ranala níili, echi mapu Rakau

ranala níili, echi mapu Paleka ranala níili, echi mapu Eberi ranala níili, echi mapu Sala ranala níili, ³⁶ echi mapu Kainani ranala níili, echi mapu Arpásali ranala níili, echi mapu Semi ranala níili, echi mapu Noé ranala níili, echi mapu Lamechi ranala níili, ³⁷ echi mapu Matúsara ranala níili, echi mapu Enochi ranala níili, echi mapu Jareri ranala níili, echi mapu Malaleri ranala níili, echi mapu Kainani ranala níili, ³⁸ echi mapu Enosi ranala níili, echi mapu Seta ranala níili, echi mapu Arani ranala níili, echi mapu Riosi jiti niwárami níili.

Echi riablo nakili mapurigá Jesusi we chati olama.

Chopi Jesusi ketasi chirigá chati olali

(Mt. 4:1-11; Mr. 1:12, 13)

4 Echalí echi wabé Galabé Riosi Iwigala galá nureli echi Jesusi echo'ná Binói sulálachi niráa. A'lí Binói ku simili echo'ná bakochi Joránachi anilíwachi jonsa. A'lí echi wabé Galabé Riosi Iwigala júuli echi Jesusi echo'ná biléana waná kawichí. ² Echalí Jesusi echo'ná waná kawichí asali nawosa makói rawé yénasí. Echalí echi riablo echo'ná nawagá ra'íchari Jesusi yuwa mapujiti echi riablo wabé nakili mapurigá Jesusi we chati olama, chopi Binói ketasi nijéwali. A'lí echalí nawosa makói rawé yénasí echi Jesusi ketasi biyili namuti ko'wali. Echijiti péé wakinana ne wabé 'locheli.

³ Echalí echi riablo jeaneli: A mi ne bichíwali echi bilepi Riosi Ranala níisagá, galá nulé je'ná wikabé rité mapurigá wikabé pani nílama, mapurigami galá bosama. ⁴ A'lí Jesusi ku nijéwaga jeaneli: Echo'ná Riosi Ra'íchala oselíwalachi jerigá osirúami ju: Echi pagótami ketasi chopi ko'wáami jiti pirélama, chopi ayena cho arigá 'wérali ju mapu aboni galá bichíima suwaba Riosi Ra'íchala, mapurigá aboni ne bichíwali sinibí niráa pirélama.

⁵ A'lí echi riablo toli echi Jesusi echo'ná biléana wabé ripabé rabó. A'lí sinepi niráa 'nérali suníami kawichí walula nulálachi jena'í wichimóbachi nirúami. ⁶ Echalí echi riablo jeaneli: Nijé ne wabé omérami ju mapurigá nijeni mi 'yama mapurigami ne walubela nuláami níima ne suníami jena'í wichimóbachi. Nijeni ayena cho wabé omérami ju mapurigá nijeni mi wilama jena'í wichimóbachi mapurigá ne wabé walubela niráa. Echirigá nijé 'yárami níili; ayena cho jipi nijeni ne walubela niráa wilama mapuyiripi rijói mapu nijé binói nakí. ⁷ Echalí echi riablo waminabi jeaneli: Jipi nijé nimí 'yama ne suwaba je'ná walubélala, a mi jena'í bacháami tamí yuwa, wéemi raweka, chokoba wiliságami. Nijé nimí wilama wabé walubela niráa, a mi tamí jeanésagá mapu nijé binói wabé simírami walubela ju, ketasi mapurigá mujé. ⁸ Chopi Jesusi ku nijéwaga jeaneli: Waminá waná simigá mujé Satanasi riwéami riablo, mapujiti echo'ná Riosi Ra'íchala oselíwalachi jerigá osirúami ju: Chopi echi bilepi mujé Riósawala chokoba wiligá walubélaga ané mujé; ayena cho chopi

nijéwaga olá mapurigá echi Walubela mujé Riósawala nakí mápumi olama.

⁹ A'lí echi riablo toli echi Jesusi echo'ná Jerusalémachi anilíwachi walúlachi. Echálí binói ne wabé ripabé wilali echi Jesusi echo'ná ripá moba echi walubé Juríosi ri'obáwalachi. A'lí echi riablo jeaneli: A mi ne bichíwali echi bi'nélipi Riosi Ranala níisagá, jena'í ripabé jonsa echo'ná ri'lé pochí, ¹⁰ mapujiti Riosi mi galá tibuma mapujiti echo'ná Riosi Ra'íchala oselíwalachi je'ná jerigá osirúami ju:

Riosi nulema echi jaré kepu kapitánawa mapurigá aboni mi ne galá tibuma.

¹¹ A'lí echi riablo waminabi jeanelí:

Ayena cho jerigá osirúami ju:

Echi jaré Riosi kapitánawala mi mutuma echo'ná aboni sikálachi mapurigá mi ketasi chi'wama mujé ralálachi echo'ná biléana ritérali.

¹² Echálí Jesusi ku nijéwaga jeaneli: Ayena cho je'ná jerigá osirúami ju echo'ná Riosi Ra'íchala oselíwalachi:

Ketasi mi nulé mapurigá echi kemi Riósawa chati olama.

¹³ A'lí mapalí Jesusi tarapé chirigá nijéwali mapurigá echi riablo nuleli, echálí echi riablo miná ariweli pe téeli niráa.

Jesusi chótari nawésiya

(Mt. 4:12-17; Mr. 1:14-15)

¹⁴ Echálí Jesusi ku simili echo'ná Galiléachi anilíwachi kawírali. A'lí echi Wabé Galabé Riosi Iwigala suwaba nuleli Jesusi. A'lí si'néami pagótami echo'ná noligá Galiléachi piréami ra'íchaga anili mapurigá Jesusi ne wabé Walubela níili. ¹⁵ A'lí Jesusi binéraga nawésali echo'ná suníami echi jaré Juríosi pagótami ri'obáwalachi. Echálí si'néami aboni walubéraga aneli echi Binoy.

Jesusi ku machí pátami níili echo'ná Nasarétachi jonsa

(Mt. 13:53-58; Mr. 6:1-6)

¹⁶ Echálí rawé Jesusi ku simili echo'ná Nasarétachi mapo'ná Binói ochérali. A'lí echálí isábawachi rawé Jesusi bakili echo'ná pachá echi jaré Juríosi pagótami ri'obáwalachi, mapujiti Binói sinibí echirigá olali, ne sinibí mapalí isábawachi rawé níili. Echálí Jesusi echo'ná nasipa wilíwali mapujiti Binói we nakili echi Riosi Ra'íchala oselíwalachi 'nénala. ¹⁷ A'lí Binói 'yárami níili echi Riosi Ra'íchala oselíwala, mapo'ná osirúami ju mapurigá echi walula Isaíasi riwéami rijói osali. Échiko walula Riosi jiti nawésami níili. Echálí Jesusi ku ra'lána-ga echi oselí, we yáati riwari mapo'ná je'ná jerigá osirúami ju:

¹⁸ Echi Wabé Galabé Riosi Iwigala tamí yuwa pachana atí.

Binói tamí wilali mapurigani galabé nawésama echi Galabé Riosi Ra'íchala, echi jaré wabé tisúwati pagótami.

Echi Wabé Galabé Riosi Iwigala ayena cho tamí júuli ku kanílatamiya si'néami echi auché jaré mapu ikí wabé o'mónami ju sulachí niráa.

Ayena cho Binói tamí júuli ruyénala echi auché jaré mapu pachá mo'wárami niráa ju, mapu aboni ku machí a'wátami níima, ayena cho tamí júuli mapurigá echi auché jaré ke 'machíliami galá ku 'machílatami níima.

Ayena choni julálami níili mapurigani ku'wírama echi jaré mapu wabé risúu olálami níili.

¹⁹ Ayena choni julálami níili mapurigani ruyema si'néami pagótami mapu jipi rawé ma sébachi ju mapalí Riosi ku wikawama si'néami mapu ikí galá bichíma.

²⁰ Echálí Jesusi ma ku romínaga echi oselí, ku 'yali echi oselí tibúami. A'lí Jesusi ku asíbali. Echálí ne si'néami pagótami echo'ná pachá ri'obachi muchúami ne wabé 'nigá muchili echi Jesusi. ²¹ Echálí Jesusi chótali jeanya: Jipi rawé ma echirigá sébali ikili mapurigá chabé ki'yá bachá niráa osirúami níili tamí jiti rugá, echo'ná Riosi Ra'íchala oselíwalachi. ¡Echirigá ma sébali ikili mapuyénasi 'yémitamo námali Nijé Binói echirigá ra'íchachi! ²² A'lí ne si'néami aboni a'nagupi ra'íchali jeanigá mapu Jesusi wabé galabé oláami níili. Ayena cho aboni ne wabé ba'yóriga 'nátali mapujiti Binói echirigá ne wabé galabé niráa ra'íchali. Chopi aboni ayena cho a'nagupi jeanigá rukueli: ¿Kecha je'ná ju echi José ranala? ²³ A'lí Jesusi ku nijéwaga jeaneli: 'Yémitamo arigá je'ná jerigá tamí jeanebo: ¡Mujé mápumi ku sa'wá echi auché jaré, galá ku sa'wá a mujé binói niráa! Ayena cho 'yémitamo tamí jeanebo: Tamujé ma námali mapurigami wikabé namuti wabé omériga olali echo'ná Kapernaúmachi anilíwachi walúlachi. Jipi, echirigá achigórigá olá jena'í mujé binói kawíwalachi. ²⁴ A'lí Jesusi waminabi nijéwaga jeaneli:

Ne bichíwali Nijé 'yemi nimí jeané: Mapalí Riosi júula nawísánala bilé rijoy, echo'ná binói kawíwalachi, echálí echi auché jaré pagótami ketasi galá nilama echi rijói mapurigá bilé walula Riosi jiti nawésami niráa, mapujiti aboni ma galá machili echi rijói chabé jonsa. ²⁵ Ayena cho Jesusi jeaneli: Nijé 'yemi nimí ne bichíwaga ané mapu nirúali wikabé kunámami echo'ná echi jaré Isaeli pagótami yuwa mapalí Riosi júuli echi Elíasi riwéami rijói nawésanala aboni. Echálí rawé níili mapalí ketasi ukuli baikiyá bamíwali miná nasipa yénasi. Echálí echo'ná kawírali piréami pagótami ne wabé 'locheli.

²⁶ Chopi echálí rawé Riosi ketasi júuli echi Elíasi echo'ná echi jaré Isaeli pagótami pirélachi, jaré Isaeli pagótami muguí kunámami yuwa. Chopi Riosi si'wina júuli echo'ná Sarépachi anilíwachi, mapo'ná mulubé ju Sirónachi, mapo'ná bilé mukí kunámami bitéali, echi

mapu ketasi Isaeli pagótami níili. ²⁷ Ayena cho ne wik-abé echi jaré Isaeli pagótami wabé chati cha nayúkami níili echalí chabé ki'yá mapalí Riosi júuli nawésanala echi Eliseo riwéami rijoy. Echali tarapé wesi aboni ku sa'wárami níili, chopi echi Na'amani riwéami rijói ku sa'wárami níili. A'lí échiko ketasi Isaeli pagótami níili, chopi binói echo'ná Síriachi anilíwachi kawírali bitéami níili. ²⁸ A'lí mapalí echi pagótami je'ná jerigá námali, echali ne si'néami aboni mapu ikí echo'ná aboni ri'obáwalachi muchili, ne si'néami ne wabé na'áwali, echi Jesusi sayéraga, mapujiti si'néami aboni Isaeli pagótami níili. ²⁹ A'lí si'néami aboni wabé sapú jásaka waminá machí toli echi Jesusi echo'ná aboni walúlawachi jonsa. A'lí echo'ná walúlachi biléana suwé wabé kowata níili. Echijiti aboni toli echi Jesusi echo'ná biléana waná kowata niráa, mapujiti aboni nakili ri'lena pa mapurigá Binói echirigá mi'lirúami níima. ³⁰ Chopi Jesusi nasipa simíraga echo'ná abónichi, arigá ku simili.

Bile rijói wabé chati riablo aliwala aliwéami níili

(Mr. 1:21-28)

³¹ Echali Jesusi ku rikínali echo'ná Kapernaúmachi anilíwachi mapo'ná biléana walúlachi níili echo'ná Galiléachi anilíwachi kawírali. A'lí Binói we binérali echo'ná piréami pagótami sinibí isábawachi rawé. ³² A'lí echo'ná piréami pagótami wabé kilí 'nátaga kipuli Jesusi nawésawala mapujiti Binói ra'íchali mapurigá bilé walula niráa. ³³ Echali rawé echo'ná aboni ri'obáwalachi asali bilé rijói mapu wabé chati riablo aliwala aliwéami níili, echi mapu wabé o'weli ra'íchaga ³⁴ jeaneli: ¡Tamujé tamí ariwé, Mujé Jesusi mápumi echo'ná Nasarétachi bitéami ju! ¿Churékulami tamujé tamí kumé? ¿Áchami nawali, tamujé tamí suwábamiya? Nijé nimí galá machí. Riosi mi júuli jena'í wichimóbachi. ³⁵ Echali Jesusi we yónaga jeaneli echi riablo ariwala: ¡Cha nakátaro! ¡Ku machínaga echo'ná pachana echi rijói sulálachi jonsa! Echali echi wabé chati riablo aliwala wabé iwéami rikábali echi rijoy, a'lí we yáati ku machínali echo'ná binói sulálachi jonsa. A'lí tarapé chibi ikili echi rijoy. ³⁶ Echali si'néami echi jaré pagótami wabé majaga a'nagupi jeanigá rukueli: ¿Churigá bukulíwami ra'íchali ju je'ná, mapurigá je'ná rijói we jiwériga nulé echi jaré wabé chati riablo aliwala? ¡Nibira mapurigá echi jaré riablo aliwala we yáati galá nijéwaga ku 'machina echo'ná pachana echi jaré pagótami sulálachi jonsa! ³⁷ A'lí ne suníami echo'ná noligá piréami pagótami a'nagupi wabé ra'íchali echi Jesusi jiti rugá.

Jesusi ku sa'wali echi Pegro wasila

(Mt. 8:14-15; Mr. 1:29-31)

³⁸ Echali Jesusi wilíska ku machínali echo'ná ri'obachi jonsa. A'lí Binói bakili echo'ná Simoni bitélachi. Echali rawé echi Simoni wasila ne wabé inuwami nayú bu'wili. Echijiti aboni we yáati tali mapurigá Jesusi ku sa'wama echi mukí. ³⁹ Echali Jesusi echo'ná mulubé yólaga, wabé yónali echi nayulí. A'lí echi mukí we yáati ma galá ku sa'wárami níili. Echali echi mukí we yáati ku wilíska ku nigúuraga nóchali.

Jesusi ku sa'wali wikabé nayúkami

(Mt. 8:16-17; Mr. 1:32-34)

⁴⁰ Echali rawé ma bokowíachi rayénali, echo'ná piréami pagótami echo'ná Jesusi yuwa toli echi auché jaré aboni pagótamawala, si'néami mapu ikí nayúkami níili, mapu chubiyiri nayulí níili. Echali Jesusi echo'ná ibílana abónichi, Binói sikala jiti moba nochogá, galá ku sa'wali si'néami aboni. ⁴¹ Ayena cho wikabé echi jaré riablo aliwala ku 'machínali echo'ná pachana jaré pagótami sulálachi jonsa, mapalí Jesusi echirigá nuleli. Echali echi jaré riablo aliwala we o'weli ra'íchaga aneli echi Jesusi jeanigá: ¡Mujemi ju echi bilepi Riosi Ranala! Chopi Jesusi wabé yóniga aneli mapu echi jaré riablo aliwala ketasi waminabi echirigá ra'ichama, mapujiti aboni galá machili mapu echi Jesusi níili echi Walubela Cristo anilíwami, echi mapu Riosi ki'yá chokichí jonsa julama riwéali jena'í wichimóbachi.

Jesusi we nawésiya iyena echo'ná Galiléachi

(Mr. 1:35-39)

⁴² A'lí ba'alínala rawé bukulí ch'ilásiachi Jesusi ku simili echo'ná jonsa, echo'ná biléana waná kawichí simiyá. Chopi echi auché jaré pagótami wabé ali echi Jesusi. A'lí aboni sili echo'ná waná kawichí mapo'ná Jesusi asali. A'lí aboni ketasi nakili mapurigá Jesusi miná waná simea echo'ná abónichi jonsa. ⁴³ Chopi Jesusi ku nijéwaga jeaneli: Arigá 'wérali ju mapurigá Nijeni ayena cho nawésama echo'ná auché jaréana o'wéalachi piréami pagótami, jeanigá mapu Riosi wabé galá nulé si'néami pagótami. Mapujiti Riosi Binói tamí júuli echirigá nawésanala. ⁴⁴ A'lí Jesusi echirigá nawésali echo'ná suníami echi jaré Juríosi pagótami ri'obáwalachi echo'ná Galiléachi anilíwachi kawírali nirúami.

Ne wikabé rochí chapflati

(Mt. 4:18-22; Mr. 1:16-20)

5 Siné rawé mapalí Jesusi echo'ná walú ba'wírali suwé asali mapo'ná Jenesarétachi anilíwachi níili, mapo'ná ayena cho Galiléachi anilíwachi níili, echali ne wikabé pagótami napawili Binói yuwa mapujiti aboni

wabé nakili echi wabé Galabé Riosi Ra'íchala kipúnala. A'lí echalí rawé echo'ná ba'wírali suwé aboni ne cha'íká jábali, mapuyénasí aboni ne noguí rachínali echi Walubela Jesusi. ² Echalí Jesusi riwali okuá barko anilíwami echo'ná walú ba'wírali suwé uchúami. A'lí ke wesi asali echo'ná pachá bárkochi mapujiti echi jaré rochí sirúami ma tikinsa, echo'ná suwé 'yéнали. A'lí aboni echo'ná ba'wechi suwé pagueka achápali echi jaré o'weli tétami namuti mapuyiri jalé chiní. A'lí echi jaré namuti níili mapu aboni echijiti chapili echi wikabé rochí. ³ Echalí Jesusi moba asíbalí echo'ná biléana bárkochi, echi mapu echi Simoni níwala níili. A'lí Binói tániga aneli echi Simoni mapu pe minana ba'wechi moba uchama echi barko echo'ná suwé jonsa. A'lí Jesusi echo'na bárkochi asibaga chótali nawésiya echi wikabé pagótami echo'ná ba'wechi suwé jáwami.

⁴ A'lí mapalí Jesusi ma sunili ra'icha, a'lí Binói jeaneli echi Simoni: Pe waminabi wabé rokóachi moba uchá je'ná barko. Echo'ná ri'léna ba'wírali botobú echi walú tétami namuti mapuyili bilé walú chiní mapurigami chapimea wikabé rochí. ⁵ A'lí echi Simoni ku nijéwaga jeaneli: Binériami, bi'yá rokogó, sinibí rokogó tamujeta wabé nóchali. Chópita tarapé bilé rochí chapili. Arigá a Mujémi echirigá nakisáagá, nijeni auchecho siné ri'léna botobuma echi walú tétami namuti mapuyiri bilé walú chiní. ⁶ Chopi mapalí aboni echirigá ri'léna ba'wírali botobuli echi walú namuti mapuyiri bilé walú chiní, echalí aboni we yáati rakoka chapili ne wikabé rochí, mapuyénasí echi walú namuti mapuyiri chiní ma chótali chi'wásiya. ⁷ A'lí aboni sikati jówaga bayeli echi auché jaré apanero mapu echo'ná auché biléana bárkochi muchili, mapurigá si'néami aboni echo'ná sigá ayena cho nigúurama. Echalí echi auché jaré we yáati echo'ná sili. A'lí si'néami aboni okonáchana bárkochi buchíwali echi rochí, mapuyénasí okuánika barko ma ne noguí botowili mapujiti ne wabé simírami buchíami níili. ⁸ A'lí mapalí echi Simoni Pegro je'ná jerigá riwali, echalí binói echo'ná bacháami Jesusi yuwa chokóbaga wilíbalí. A'lí jeaneli: Keni Walubélawa, Mujemi ne wabé simírami Walubela ju, chopi nijeni wabé chati oláami ju. ¡Echijiti galá níima Mujé waminá waná simigá jena'í tamí yuwa jonsa! ⁹ A'lí echi Simoni echirigá ra'íchali mapujiti binói ne wabé majali, ma riwisáa mapurigá aboni chapili echiyena ne wabé wikabé rochí. Ayena cho echi auché jaré mapu binói yuwa 'yéнали, si'néami ne wabé majali mapujiti chabé chokichí jonsa aboni tarapé siné chapili echiyena wikabé rochí. ¹⁰ Ayena cho achigórigá majali echi Jakobo, echi Juani, echi mapu echi Sibireo kúchuwala níili. Aboni echi Simoni apanérawala níili. A'lí Jesusi jeaneli echi Simoni: ¡Ketasi majá! Jipi jonsa 'yémitamo ketasi waminabi sirubo echi rochí, chópitamó binébo echi auché jaré pagótami mapurigá aboni galá bichíima Nijé Ra'ichala. ¹¹ A'lí mapalí aboni ku sili echo'ná walubé

ba'wechi suwé, echalí aboni echo'ná ariweli echi jaré barko mapurigá aboni chopi echi Jesusi yuwa najátaga simama.

Jesusi ku sa'wali bilé rijói wabé chati cha nayúami

(Mt. 8:1-4; Mr. 1:40-45)

¹² A'lí siné rawé Jesusi asali echo'ná biléana walúlachi. Echalí rawé echo'ná nawali bilé rijói mapu wabé chati cha nayúami níili. A'lí mapalí echi rijói riwali echi Jesusi, echalí binói chokoba wilíbalí echo'ná bacháami Jesusi yuwa. A'lí echi nayúami ri'lé yólaga, we risúu anigá jeaneli: Walubela, Mujemi galá omérami ju tamí ku sa'wayá, ámi galá nakisáagá. ¹³ A'lí Jesusi, Binói sikala jiti nochogá, jeaneli: Nijeni we galá nakí mi ku sa'wamá. ¡Mami galá ku sa'wárami ju! A'lí mapalí Jesusi echirigá aneli echi rijoy, echalí we yáati ma galá ku sa'wárami níili. ¹⁴ Echalí Jesusi nuleli echi rijói ketasi wesi ruyénala mapurigá ikili. A'lí Jesusi jeaneli: Chopi simigá echo'ná walubé Juríosi pagótami ri'obáwalachi, mapurigá bilé sacerdote anilíwami rijói galá riwimea mapurigami ma ku sa'wíami ju. Ayena cho 'yami echi jaré namuti mapurigá Moisesi osogá nulali 'yánala, mapujítimi ma ku sa'wíami ju. Ne suwaba echirigá olami mapurigá echi auché jaré pagótami galá machimea mapurigami ma ku sa'wíami ju. ¹⁵ Chopi ne si'néami pagótami arigá waminabi galá ruyérami níili mapurigá Jesusi echirigá wabé omériga olali. Sinibí rawé ne wikabé pagótami napawili echi Jesusi yuwa, mapujiti aboni we nakili Jesusi nawésawala kipúnala, ayena cho mapujiti aboni nakili mapurigá Jesusi ku sa'wama echi jaré aboni mapu ikí nayúkami níili. ¹⁶ Chopi Jesusi echo'ná biléana waná kawichí simigá, Riosi yuwa ra'íchali.

Jesusi ku sa'wali bilé rijói mapu ketasi omérami níili asísiya

(Mt. 9:1-8; Mr. 2:1-12)

¹⁷ Siné rawé Jesusi binériya asali echo'ná pachá biléana kalírali. Echalí ne wikabé pagótami nologá muchili Jesusi yuwa, mapujiti si'néami aboni we kipúnali Binói ra'íchala. A'lí jaré Bariseo anilíwami rijói ayena cho echo'ná muchili, jaré nulalíwami binériami ayena cho. A'lí aboni ne suníami rijówachi echo'ná Galiléachi anilíwachi kawírali jonsa síami níili, ne suníami rijówachi echo'ná Juréachi anilíwachi kawírali jonsa ayena cho, echo'ná Jerusalémachi jonsa asíchiko. Echalí Jesusi wabé omériga ku sa'wali echi jaré nayúkami mapurigá Riosi omératali Binói olayá. ¹⁸ Echalí rawé naó rijói echo'ná pali auché bilé rijói nayúami, echo'ná biléana kimachí rikagá, mapujiti échiko ketasi omérami níili asísiya. A'lí aboni nakili echo'ná pachá kalírali mo'wináliya, mapo'ná Jesusi binériya asali. ¹⁹ Chopi aboni ketasi omérali mo'wiyá, mapujiti echi jaré wik-

abé pagótami ne wabé cha'iká muchili echo'ná pachá kalírali. Echijiti aboni ripana irápaga simérali, echo'ná biléana kimachí rikagá. Echirigá aboni wiya jiti bulugá, ku wichí pali echi nayúami, echo'ná pachá kalírali mapo'ná Jesusi asali. Echirigá echi nayúami echo'ná bacháami Jesusi yuwa rikálati. ²⁰ A'lí mapalí Jesusi ne galá machili mapurigá aboni galá bichíili mapu Binói we omérami níili ku sa'wayá echi rijói mapu ketasi omérali asísiya, echalí Jesusi jeaneli echi rijoy: ¡Rijoy, mami ku wikawárami ju suwaba mapurigami chati olali! ²¹ Echalí echi jaré nulalíwami binériami, echi auché jaré Bariseo anilíwami binériami yuwa, ne si'néami chótali je'ná jerigá 'nátaga: Je'ná rijói mayé mapurigá Binói galá omero ku wikáwiya mapurigá echi jaré pagótami chati olali. Binói chopi wabé sayéraga ra'ícha Riosi, mapujiti Riosi Binói chopi galá omero echirigá ku wikáwiya echi jaré pagótami chati olalila. ²² Chopi Jesusi ne galá machili mapurigá aboni 'nátali. Echijiti Binói jeanigá rukueli: ¿Churékulátamo echirigá 'nata? ²³ Echalí Jesusi ayena cho jeaneli: Ketasi 'me oméami ju mapurigá Nijeni jeanema je'ná rijoy: ¡Mapurigami chati olali mami galá ku wikawárami ju! Nibilé cho 'me oméami ju mapurigá Nijeni jeanema: ¡Ku wilísaga, ku simigá! ²⁴ Echalí Jesusi waminabi jeaneli: Riosi tamí wilali mapurigá Ku'wíríami niráa. Chopi Nijeni nakí mapu 'yémitamo ne galá machiboa mapurigá Nijé Binói galá omérami ju ku wikáwiya jena'í wichimóbachi piréami pagótami chati olalila. Echijiti Nijeni jeané je'ná rijói mapu ketasi omero asísiya: Nijeni mi jeané: ¡Ku wilísaga, ku chapisá kemi kimá, ku simigá echo'ná kemi bitélachi! ²⁵ Echalí si'néami aboni galá riwali mapurigá echi rijói we sapú galá ku wilísali. A'lí ku chapisá binói kimala, échiko ma galá ku iyéna-ga, ku simili echo'ná binói bitélachi; ayena cho echi rijói waminabi walubélaga aneli Riosi. ²⁶ Ne si'néami echo'ná muchúami pagótami ne wabé kilí 'nátaga 'né-nali mapalí Jesusi ku sa'wali echi rijói mapu ketasi omérami níili asísiya. Echalí aboni ne wabé walubéraga aneli Riosi. Ayena cho aboni ne wabé majaga a'nagupi jeaneli: Jipi rawé tamujeta ma riwali mapurigá echi Jesusi wabé omériga olá mapurigá ke wesi auché jaré pagótami omero olayá.

Jesusi bayeli echi Libí mapurigá échiko inama Binói yuwa

(Mt. 9:9-13; Mr. 2:13-17)

²⁷ Pe wilibeko Jesusi ma ku simili echo'ná jonsa. Echalí Binói riwali bilé rijoy, Libí riwéami, mapu wenomí napabúami níili, echi walula silíami natétalawami. A'lí Jesusi jeaneli: ¡Tamí najató! ²⁸ Echalí echi Libí ma ariwesa suwaba binói nóchala, we yáati wiliska najátali echi Jesusi yuwa.

²⁹ Pée wakinánokuá echi Libí bayeli echi Jesusi mapurigá Binói ko'mea echo'ná binói Libí bitélachi. Echalí

auché jaré wikabé pagótami ayena cho echo'ná bayérami níili, echijiti echo'ná Jesusi yuwa ko'yá muchili wikabé echi auché jaré mapu wenomí napabúami níili, echi walula silíami natétalawami, ayena cho auché jaré wikabé pagótami Binói yuwa ko'yá muchili. ³⁰ Echalí echi jaré Bariseo anilíwami binériami, echi auché jaré nulalíwami binériami ayena cho, si'néami chótali sayéraga ra'icha echi auché jaré yuwa mapu Jesusi binérali. Aboni jeanigá rukueli echi jaré mapu Jesusi binérali: ¿Churékulátamo echirigá ko'wá, ayena chótamo bají echi uva anilíwami ba'wila, echi auché jaré wenomí napabúami yuwa, ayena cho echi auché jaré chati oláami pagótami yuwa? ³¹ Chopi Jesusi Binói ku nijéwaga jeaneli: Echi jaré mapu ketasi nayúkami ju, aboni tarapé newalé bilé óyami; chopi echi jaré nayúkami ne wabé newalé bilé óyami. ³² Nijé ketasi nawali mapurigani bayema echi jaré mapu aboni mayé we galabé oláami ju. Nijeni chopi nawali mapurigani bayema echi jaré chati oláami pagótami, mapurigá aboni ku ro'wima Riosi yuwa, ayena cho mapurigá aboni ku wikáwali tánama.

Jesusi wi'nijírami níili mapujiti echi jaré mapu Binói binérali sinibí we ko'wali

(Mt. 9:14-17; Mr. 2:18-22)

³³ Echalí aboni, Jesusi yuwa ra'íchaga, jeaneli: Echi jaré mapu echi Juani binérali wi'libé niráa ketasi ko'wá mapalí aboni chopi Riosi yuwa ra'icha muchuwi. Ayena cho echi jaré mapu tamujé Bariseo anilíwami binérali echirigá achigórigá olá. Chopi echi jaré mapu Mujé binérali sinibí wabé ko'wá, ayena cho aboni sinibí bají echi uva anilíwami ba'wila. ³⁴ Echalí Jesusi ku nijéwaga jeaneli: Ne si'néami pagótami arigá we kaníliga ko'wá, mapalí aboni bilé rijói bukulí niwíami yuwa muchuwi. ³⁵ Chopi pée minánomí mapalí echi bukulí niwíami rijói ketasi aboni yuwa asimea, echalí aboni ne bichíwali, wi'libé niráa ketasi ko'mea, mapalí aboni chopi Riosi yuwa ra'íchaga muchima. Echirigá achigórigá echi jaré mapu Nijé binérali pée minánomí ketasi ko'mea wi'libé niráa mapurigá aboni chopi Riosi yuwa ra'ichama mapalí Nijeni ketasi aboni yuwa asimea.

³⁶ Echalí Jesusi ayena cho je'ná jerigá irétaga nawésali: Tarapé wesi pée taa chi'wanama bilé bukulíwami napacha, auché bilé echi ma luwíami napacha pachókamiya. A echirigá olásagá echi bukulíwami napacha ma chi'wanárami níima, ayena cho echi pachókala ketasi a'nawí níima echi luwíami napacha yuwa. Nijeni bukulíwami niráa binera echi ne bichíwali, echijiti arigá 'wérali ju máputamo bichíibo mapurigá Nijeni binera, ketasi mapurigátamo waminabi nijéwaga olabo mapurigá echi auché jaré binériami chabénala niráa 'yemi mi binérali. ³⁷ Ayena cho ke wesi ro'wama echi bukulíwami uva ba'wila echo'ná pachana echi jaré sití, ma ocháarami wichí chiwáwalachi. A

echirigá olásagá, ayena cho a galá bulésagá echi wichi chiwáwalachi, echalí echi bukuliwami uva ba'wila, ma galá ronínsa, wabé cha'isa, waminá chi'wanama echi jaré ocháarami wichi chiwáwalachi. Echali echi ba'wila suwaba miná ku'lima. Ayena cho echi wichi chiwáwala suwaba miná nosowima. ³⁸ Echijiti galá níima ro'wasa echi ne bukuliwami uva ba'wila echo'ná jaréana bukuliwami wichi chiwáwalachi. A'lí a echirigá olásagá, echi ba'wila galá nutétami níima, ayena cho echi jaré wichi chiwáwala ketasi miná chi'wama. Echirigá achigórigá ma ketasi waminabi arigá 'wérali ju mapurigá echi jaré mapu galá bichíiko mapurigá Nijeni binera arigá olama mapurigá echi auché jaré binériami chabénala niráa binélali. ³⁹ Ayena cho ma galá bajisa echi bamíbami ba'wila, ke wesi we yáati jubáami nakimea bajínala echi bukuliwami ba'wila; mapujiti si'néami jeaní: Echi bamíbami ba'wila ne wabé simírami galabé ju.

Echi jaré mapu Jesusi binérali mosika kumili echi turío echalí siné isábawachi rawé

(Mt. 12:1-8; Mr. 2:23-28)

6 A'lí auché siné isábawachi rawé Jesusi simírali echo'ná mapo'ná echi turío ma galá wáami níili. A'lí echi jaré mapu Jesusi binérali ayena cho simárali. Echali aboni echi turío mulalá ripúnaga, we mosika kumísiya simárali echi turío rakala. ² Chopi jaré rijói Bariseo anilíwami binériami jeanigá rukueli aboni: ¿Churékulátamo echirigá olá mapurigá ketasi risénsia ju oluwáwa jipi rawé, mapujiti isábawachi rawé ju? ³ A'lí Jesusi ku nijéwaga jeanigá rukueli: ¿Kechátamo siné 'néniga riwali mapurigá osirúami ju echo'ná Riosi Ra'íchala oselíwalachi mapurigá echi Rabiri riwéami rijói olali siné rawé mapalí binói we 'locheli, echi auché jaré mapu binói yuwa 'yéнали ayena cho? ⁴ Echali rawé echi Rabiri bakigá echo'ná pachá Riosi ri'obáwalachi, a'lí chapigá ko'wali echi jaré pani mapu Riosi 'yárami níili; echali binói ayena cho 'yali echi auché jaré rijói mapu binói yuwa 'yéнали. A'lí tarapé wesi risénsia níili aboni echi jaré pani ko'mea; chopi echi jaré sacerdote risénsia níili. ⁵ Echali Jesusi ayena cho jeaneli: Riosi tamí wilali mapurigá Ku'wíriami niráa, ayena cho Nijeni ne Walubela ju echali isábawachi rawé.

Bilé rijói biléana sikachí ke akánami galá ku sa'wárami níili

(Mt. 12:9-14; Mr. 3:1-6)

⁶ Ayena cho auché siné isábawachi rawé Jesusi echo'ná pachá echi jaré Juríosi pagótami ri'obáwalachi bakigá, we binérali echi pagótami. Echali echo'ná pachá ri'obachi asali bilé rijói biléana sikachí watoná ke akánami. ⁷ Echali echi jaré nulalíwami binériami we 'nigá muchili, mapujiti aboni chopi we 'nátaga buweli

acha ku sa'wama Jesusi echi rijói mapu ke akánami níili biléana sikachí. Echali rawé isábawachi rawé níili, echijiti aboni chopi we wi'nijínali echi Jesusi, mapujiti aboni mayeli mapu ketasi risénsia níili mapurigá Jesusi ku sa'wama echi jaré nayúkami echali mapalí siné rawé isábawachi níili. ⁸ Chopi Jesusi galá machili mapurigá aboni echirigá 'nata muchili. A'lí Binói jeaneli echi rijói ke akánami biléana sikachí: ¿Ku wirísaga, echo'ná nasipa wilibá! A'lí echi rijói ku wilísaga, echo'ná wilfbali. ⁹ Echali Jesusi jeaneli echi auché jaré pagótami: Sinibí risénsia ju máputa we galá olabo mapalí siné isábawachi rawé ju. Ketasi risénsia ju máputa wabé chati olabo. Echijiti ayena risénsia ju máputa ku sa'wabo echi jaré nayúkami jipi isábawachi rawé, achigórigá mapurigá ketasi risénsia ju máputa waminá mi'liboa echi jaré pagótami. ¹⁰ Echali Jesusi galá 'nénali echo'ná noligá Binói yuwa muchúami pagótami. A'lí Binói jeaneli echi rijói ke akánami biléana sikachí: ¿Ku wachiná kemi síká! Echali binói we yáati wachínali binói síkala. A'lí binói síkala ke sayiná ma galá ku sa'wárami níili. ¹¹ Echali echi jaré nulalíwami binériami ne wabé na'áwali. A'lí aboni chótali a'nagupi ra'íchaga katewa mapu churigá aboni galá omérama echi Jesusi sayériya.

Jesusi chapili makói miná okuá rijói mapurigá Binói julama aboni nawisánala

(Mt. 10:1-4; Mr. 3:13-19)

¹² Echali rawé Jesusi simili echo'ná biléana ripá rabó, mapurigá Binói echo'ná waná niráa ra'ichama Riosi yuwa. A'lí echali rokogó Jesusi Riosi yuwa ra'icha chí'léballi. ¹³ A'lí ba'alínala rawé bi'yá chí'ráachi Jesusi ku bayeli echi jaré mapu Binói binérali. Echali Jesusi chapili makói miná okuá aboni mapurigá Binói juláma aboni nawisánala. A'lí Jesusi aneli aboni: Riosi jiti julárami niráa. ¹⁴ A'lí je'ná níili echi makói miná okuá: Echi Simoni, echi mapu Jesusi ayena cho Pegro riwarali; echi Antresi ayena cho, echi mapu echi Pegro rijimara níili; echi Jakobo; echi Juani ayena cho; echi Jilipi; echi Batalomé ayena cho; ¹⁵ echi Mateo; echi Tomasi ayena cho; echi auché bilé Jakobo ayena cho, echi mapu echi Alibeo riwéami rijói ranala níili; echi auché bilé Simoni, echi mapu ayena cho Selote anérati; ¹⁶ echi Júrasí, echi mapu Jakobo rijimara níili ayena cho; echi Júrasí Jiskarioti ayena cho, echi mapu péé wak-inánokuá bayérali echi jaré sontarsi mapalí aboni bologá chapili echi Walubelá Jesusi.

Echi Walubela Jesusi binérali wikabé pagótami

(Mt. 4:23-25)

¹⁷ A'lí Jesusi ku rikínali echo'ná ripá rabó jonsa, ne si'néami aboni yuwa. Echali Jesusi nawali echo'ná biléana ipó, echi jaré mapu Binói binérali yuwa. A'lí

auché jaré wikabé pagótami ayena cho echo'ná napawili. A'lí aboni echo'ná Juréachi anilíwachi kawírali jonsa síami níili, echo'ná Jerusalémachi jonsa ayena cho, echo'ná tu walú ba'wírali suwé jonsa ayena cho, mapo'ná Tírochi anilíwachi ju, Sirónachi anilíwachi ayena cho. A'lí si'néami je'ná jaré echo'ná napawili mapurigá aboni galá kipuma Jesusi nawésawala, ayena cho mapurigá Binói ku sa'wama si'néami mapu ikí nayúkami níili. ¹⁸ A'lí auché jaré pagótami mapu wabé chati isena riablo aliwala aliwéami níili ayena cho galá ku sa'wárami níili. ¹⁹ A'lí si'néami echi jaré pagótami wabé nakili echi Jesusi nochánala, mapujiti Jesusi wabé omériga ku sa'wali si'néami mapu ikí nocháliko echi Binoy.

Jaré wabé kaníliami ju, chopi auché jaré wabe risúu nílama
(Mt. 5:1-12)

²⁰ Echali Jesusi galá 'néniga echi jaré mapu Binói binérali, a'lí jeaneli: 'Yemi wabé tisúwati arigá wabé kaníliami ju, mapujiti Riosi 'yemi mi ne gala nulé. ²¹ 'Yemi máputamo jipi ne wabé 'loché, arigá wabé kaníliami ju, mapujiti pe minánomí 'yémitamo arigá ne wabé posáami níibo. A'lí 'yemi máputamo jipi ne wabé nalákako, arigá ne wabé kaníliami ju mapujiti pe minánomí 'yémitamo ne wabé kachiboa.

²² Ayena cho 'yémitamo ne wabé kaníliami níibo mapalí echi auché jaré pagótami 'yemi mi kichima, ayena cho mapalí aboni 'yemi mi waminá machí a'wama echo'ná aboni ri'obáwalachi jonsa. Ayena chótamo kaníliami níibo mapalí aboni 'yemi mi wabé kichiga ra'íchama, ayena cho mapalí aboni 'yemi mi ne wabé kichima mapujítitamo tamí bichíyami ju. ²³ Echali rawé ne wabé simírami kanílasí 'yemi, mapujiti Riosi 'yemi mi echijiti ne wabé simírami 'yama mapalítamo sebasea echo'ná ripá riwigachi. Chabé ki'yá echi jaré aboni pagótamawala, achigórigá risúu olali echi jaré mapu Riosi jiti nawésali echali ki'yá rawé.

²⁴ Chopi 'yemi máputamo wikabé namuti niwa, arigátamo ne wabé o'mónami ju, mapujítitamo ma wabé kaníli jena'í wichimóbachí, chópitamo ketasi waminabi 'yárami níibo echo'ná ripá riwigachi. ²⁵ A'lí 'yemi máputamo jipi ne galá posáami ju, 'yémitamo pe minánomí ne wabé o'mónami níibo, mapujítitamo ne wabé 'lochébo. Ayena cho 'yemi máputamo jipi ne wabé kaníruga achí, 'yémitamo pe minánomí ne wabé o'mónami níibo, mapujítitamo ne wabé risúu anigá nalákabo. ²⁶ A'lí mapalí ne si'néami echi auché jaré pagótami aniko mapu 'yémitamo ne wabé galabé oláami ju, echali galá níima 'yemi ne wabé o'monasa, mapujiti echi jaré ki'yá piréami aboni pagótamawala ayena cho we galabé oláami aneli jaré rijói mapu ne wabé 'yékami nawésami níili.

Galá galesi echi auché jaré mapu ikí 'yemi mi kichí
(Mt. 5:38-48; 7:12)

²⁷ A'lí 'yemi máputamo tamí námiko, nijé 'yemi nimí jeané: Galá galesi echi auché jaré mapu ikí 'yemi mi sayera. Wabé galá olasi echi auché jaré mapu ikí 'yemi mi kichí. ²⁸ Ne galabé ra'íchasi echi auché jaré mapu ikí 'yemi mi we chati ra'íchaga ané; ayena cho tansi Riosi mapurigá Binói ku'wírama echi auché jaré, si'néami mapu ikí 'yemi mi wabé risúu olako. ²⁹ A'lí a bilé rijói mi cho'nisáagá echo'ná biléana mujé banalachi, ketasi yona; chopi ayena cho ariwé mapurigá binói mi cho'nimea echo'ná auché biléana mujé banalachi. A'lí a bilé rijói mi 'yésagá kemi kimá, ayena cho ariwé mapurigá binói tomea kemi napacha. ³⁰ Galá kowa mapuyíripi mi tániko. A'lí a bilé rijói mi 'yésagá jaré mujé níwala namuti, ariwé mapurigá binói arigá tomea. Ketasi auchécho ku tani echi jaré mujé níwala namuti.

³¹ Sinibí galabé olasi echi auché jaré pagótami yuwa, achigórigá mapurigá 'yémitamo wabé nakí mapu aboni sinibí wabé galabé olama 'yemi aboni yuwa.

³² 'Yémitamo ketasi wabé simírami galabé olá, átamo chopi wabé kalésagá echi auché jaré pagótami mapu ikí ayena cho 'yemi mi wabé galé, mapujiti echi jaré chati oláami pagótami ayena cho wabé galé echi auché jaré mapu ikí wabé galé aboni. ³³ Nirapétamo wabé simírami galabé olá, átamo chopi galabé olásagá echi auché jaré pagótami, si'néami mapu ikí ayena cho 'yemi mi galabé olá. Mapujiti echi jaré chati oláami pagótami ayena cho galabé olá echi auché jaré, si'néami mapu ikí galabé olá aboni yuwa. ³⁴ Nirapétamo wabé simírami galabé olá, átamo chopi tanéwasagá echi auché jaré pagótami, si'néami mapu ikí 'yémitamo mayé galá ku kuwana natétama. Mapujiti echi auché jaré chati oláami pagótami ayena cho we tanewi echi auché jaré chati oláami pagótami, si'néami mapu ikí aboni mayé galá ku kuwana natétama.

³⁵ Echijiti galá galesi 'yemi ne si'néami echi auché jaré pagótami mapu ikí 'yemi mi sayera. Ne galabé olasi echi auché jaré pagótami, ayena cho galá tanéwasi echi auché jaré newaléami. A'lí ketasi buwesi mapurigá aboni 'yemi mi ku kuwana natétama. Átamo echirigá olásagá, Riosi Binói 'yemi mi galá ku natétama, ayena cho 'yémitamo ne bichíwali echi Ripá Riwigachi bitéami Riosi kúchuwala níibo, mapujiti Riosi ayena cho wabé galabé olá echi jaré mapu ketasi ku natétara 'ya; ayena cho Binói galabé olá echi auché jaré chati oláami pagótami. ³⁶ Ne galabé natimáami níisi 'yemi, achigórigá mapurigá 'yemi Onolá ne galabé natimáami ju.

Ketasi wi'nijisi auché jaré pagótami

(Mt. 7:1-5)

³⁷ Ketasi wi'nijisi auché jaré pagótami. A'lí Riosi ketasi 'yemi mi wi'nijima. Ketasi anesi mapu auché jaré pagótami wabé sití ju. A'lí Riosi ketasi anema mapu 'yemi mi wabé sití ju. Galá ku wikawasi echi auché jaré pagótami mapu ikí 'yemi mi chati olá, a'lí Riosi ayena cho 'yemi mi ku wikawama. ³⁸ Galá 'yasi echi auché jaré we tisúwati suwaba mapu ikí aboni newalé. A'lí Riosi ayena cho 'yemi mi 'yama suwaba mapu ikí 'yemi aboni newalé. Echali Riosi 'yemi mi ne wabé simírami niráa 'yama, átamo ayena cho galá 'yásagá echi auché jaré pagótami. Chopi átamo péé okuabi 'yásagá echi auché jaré pagótami, echali Riosi ayena cho péé okuabi niráa 'yemi mi 'yama.

³⁹ A'lí Jesusi irétaga jeaneli: Bilé rijói ke machíliami ketasi omero bayériya auché bilé rijói ke machíliami. A echirigá olásagá, siné káachi okuánika rujuima echo'ná biléana jochi. ⁴⁰ Echi bilé mapu binératami níli ketasi bachá walula ju echi binériami yuwa mapu ma galá binérali binoy. Chopi mapalí échi ma sébali galá binératami níima, binói ayena cho ma galá machíami níima achigórigá mapurigá echi binériami mapu ma galá binérali binoy.

⁴¹ Mujemi we galá omero 'néniya bilé taa namuti busuékowami mapu echo'ná echi auché bilé ritémtami busílachi chukú. Chópitamó ketasi nakí 'nénala echi walú namuti kusí mapu echo'ná mujé binói busílachi bu'wí. Echirigá ayena cho 'yémitamo we wi'nijí auché jaré pagótami mapurigá chati oláami niráa, chópitamó ketásirapé ku ruyé mapu 'yemi aboni waminabi wabé simírami chati oláami ju. ⁴² A'lí bichemi we nakí jeané-nala echi auché bilé mujé rijimala: Keni rijimá, tamí risénsia 'ya mapurigá nijeni mi machí pásama echi taa namuti busuékowami mapu echo'ná mujé busílachi chukú. Chópi mujemi tarapé chirigá omero 'nénia mapurigá bilé walú namuti, mapurigá bilé kusí, arigá bu'wí echo'ná mujé binói busílachi. ¡Mujé chopi wabé 'yékami niráa ju! Ne bachá niráa ku machí pa echi kusí, echo'ná mujé binói busílachi jonsa. Echalimi galá omérama 'nénia mapurigami galá ku machí pama echi taa namuti busuékowami mapu echo'ná mujé rijimala busílachi chukú.

Mapalí echi jaré masana ma raké, echali ibili masana galá machirúami níima, acha galabé ju

(Mt. 7:17-20; 12:34-35)

⁴³ Echi jaré galabé masana chopi raké echi galabé masana rakala, ayena cho echi jaré sití masana chopi raké echi sití masana rakala. ⁴⁴ Ibili rakéami namuti galá machirúami níima acha galá ju, mapalí echi rakéami namuti ma galá raké. Echijiti echi jaré chuná

ketasi chirigá ripunárami níima echo'ná biléana so'uwárali; nibilé cho ripunárami níima echi jaré uva anilíwami namuti echo'ná biléana i'wíchalachi.

⁴⁵ Echirigá achigórigá ibili rijói galá machirúami níima, acha galabé oláami ju, mapalí echi auché jaré pagótami ma galá machí churigá ologá bité echi rijoy. Bilé wabé galabé rijói arigá wabé galabé olá, mapujiti binói galabé suléami ju; ayena cho auché bilé chati oláami rijói arigá we chati olá mapujiti binói we chati suléami ju. A'lí si'néami pagótami chopi ra'íchaga aní echi jaré namuti, suwaba mapu ikí nirú echo'ná pachana aboni sulálachi niráa; echijiti jaré pagótami ra'icha echi jaré galabé namuti, chopi auché jaré pagótami we ra'icha echi jaré wabé sití namuti.

Arigá 'wérali ju galabé niráa ri'lé bachá tigótami níisa ibili kalí

(Mt. 7:24-27)

⁴⁶ Echali Jesusi waminabi jeanigá rukueli: ¿Churékulátamo wisabé tamí jeané: ¡Walubela! Maparítamo ketasi nijéwaga olá mapurigá Nijé 'yemi nimí ané? ⁴⁷ Ayena cho Jesusi jeaneli: Echi jaré pagótami mapu tamí yuwa siko, si'néami mapu ikí galá kipuko Nijé Ra'íchala, ayena cho si'néami mapu ikí galá nijéwaga olako mapurigá Nijeni nulá, ⁴⁸ aboni mapuyiri bilé rijói ju mapu we galabé niráa kalirali. Echi rijói wabé ri'lé joka, bachá tigoli echo'ná rapichí. A'lí mapalí echo'ná kalírali walú bu'wíbali ba'wí, echali echi kalí ketasi najuili mapujiti ne wabé galabé tigótami níli echo'ná rapichí jonsa. ⁴⁹ Chopi echi auché jaré pagótami mapu tamí kipuko, echi jaré mapu ketasi nijéwaga olako mapurigá Nijeni nulá, abóniko mapuyiri bilé rijói ju, echi mapu echo'ná wi'yérali moba kalirali, echi mapu ketasi bachá tigoli echo'ná ri'lé rapichí. A'lí echali mapalí echo'ná walú bu'wíbali ba'wí, echi rijói níwala kalí káraga najuili.

Echi Walubela Jesusi ku sa'wali echi walula sontarsi piónawala

(Mt. 8:5-13)

7 Mapalí Jesusi ma sunili echi pagótami nawésiya, a'lí Binói ku simili echo'ná Kapernaúmachi anilíwachi. ² A'lí echo'ná Kapernaúmachi bitéali bilé walula sontarsi, echi mapu Romano anilíwami pagótami níli. A'lí echi walula sontarsi ne wabé galeli bilé rijói mapu binói piónawala níli. Echali rawé echi binói piónawala ne wabé nayú bu'wili, echi mapu ma ne mulubé mukumea riwéali. ³ A'lí mapalí echi walula sontarsi námali ehi Jesusi jiti ra'ichálawachi, echali échiko júuli jaré o'wéala ochérami Juríosi echi Jesusi bayénala, mapurigá Jesusi ku sa'wama echi binói piónawala. ⁴ Echali echi jaré mapu jurárami níli we yáati simíbali echo'ná mapo'ná Jesusi asali. A'lí aboni, Jesusi yuwa mulubéanaga, wabé tániga jeaneli mapu galá níima

Jesusi ku'wírasa echi walula sontarsi. ⁵ Ayena cho aboni jeaneli: Galá níima mápumi ku'wírama echi walula sontarsi, mapujiti binói ne wabé galé tamujé Juríosi pagótami, ayena cho binói nulali niwánala tamujé ri'obáwala. ⁶ Echali Jesúsusi ku simili aboni yuwa. A'lí mapalí aboni ma ne mulubé sírali echo'ná echi walula sontarsi bitélachi, echali echi walula sontarsi jeanigá júuli jaré binói amígowala: ¡Walubela, ketasi nóchali olá! Ketasi arigá 'wérari ju mapu Mujemi bakimea jena'í nijé kalíflachi, mapujiti Mujé ne wabé simírami galabé oláami ju, ketasi mapurigá nijé. ⁷ Ayena cho echijiti nijé binói ketásini simili mi bayémiya. Jipi, chopi ra'íchaga niráa galá nulá mapurigá echi nijé piónawala ma ku sa'wárami níima. A'lí échiko ne bichíwali ku sa'wimea. ⁸ Mapujiti echi jaré nijé o'wéalawala ayena cho tamí we jiwériga nulé. Ayena cho nijeni jiwériga nulé echi auché jaré péé kuchípala sontarsi. Ayena cho mapalini bilé je'ná jerigá ané: ¡Echo'ná auché biléana simigá! Echali échiko ne bichíwali echo'ná simea. Ayena cho mapalini bilé je'ná jerigá ané: ¡Wakiná simí! Echali échiko ne bichíwali wakiná simí. Ayena choni echi keni piónawa jerigá anésuwa: ¡Je'ná jerigá olá! Echali échiko ne bichíwali echirigá olá. Nijeni bichíi mapu Mujé ayena cho wabé omérami ju echirigá nulayá mapurigá ma ku sa'wárami níima echi nijé piónawala mapalimi arigá mikabé niráa atí. ⁹ A'lí mapalí Jesúsusi námali je'ná jerigá aníachi, echali Binói ne wabé galabé nirali echi rijoy. A'lí Binói aneli echi jaré pagótami Binói yuwa síami, jeanigá: Ne bichíwali Nijé 'yemi nimí jeané: Je'ná rijói mapu si'nú pagótami ju, ne wabé galabé niráa tamí bichíi. Ke wésini riwáli 'yemi Isaeli pagótami mapu je'ná jerigá ne galabé bichiyami ju. ¹⁰ Echijiti Jesúsusi ketasi simili echo'ná echi walula sontarsi bitélachi. Binói chopi nulali mapurigá echo'ná bitichí bu'wíami pioni ma galá ku sa'wárami níima. A'lí mapalí echi jaré mapu jurárami níili Jesúsusi bayénala ma ku sili echo'ná echi walula sontarsi bitérachi, echali aboni riwáli mapurigá echi pioni ma galá ku sa'wíami níili.

Jesusi ku owíntali bilé ri'malí mapu ma mukúami níili

¹¹ A'lí pe wakinana Jesúsusi inárali echo'ná biléana walúlachi mapo'ná Naínachi anilíwachi níili. Echali wikabé mapu Jesúsusi binérali ayena cho así simíbalí Jesúsusi yuwa, wikabé auché jaré pagótami ayena cho. ¹² A'lí mapalí Jesúsusi ma ne mulubé inárali echo'ná walúlachi, echali Binói riwáli jaré pagótami mapu bilé mukúami chu'wiróbiya sírali. Échiko bilé ri'malí níili, echi mapu bilepi níili bilé mukí ranala, echi mapu ma kunámami níili. A'lí wikabé auché jaré pagótami ayena cho sírali echi mukí yuwa, echi binói ranala chu'wiróbiya. ¹³ A'lí mapalí echi Walubela Jesúsusi riwáli echi mukí, echali Binói ne wabé galá natimaga jeaneli: ¡Ketasi waminabi nalá! ¹⁴ A'lí Jesúsusi mulubé nawagá nocháli echi kajoni.

A'lí echi jaré tóami echo'ná jábali. Echali Jesúsusi ra'íchaga jeaneli echi ri'malí mapu ma mukúami níili: ¡Ri'marí! ¡Ku wilísaga! ¹⁵ Echali echi ri'malí mapu mukúami níili, ma ku asiska, ku ra'íchali. A'lí Jesúsusi echi iyela ku 'yali. ¹⁶ A'lí si'néami echo'ná 'yéami ne wabé majali. Ayena cho aboni waminabi walubéлага aneli Ríosi, jeanigá mapu bilé walubela Ríosi jiti nawésami ma nawali jena'í tamujé yuwa. A'lí aboni ayena cho anili mapu Ríosi ma nawagá jena'í wichimóbachi, ma wabé natimali Binói pagótamawala. ¹⁷ Echali ne suníami echo'ná Juréachi anilíwachi kawírali piréami ne galá ikíali mapu Jesúsusi je'ná jerigá wabé omériga olali. A'lí ne suníami echo'ná noligá piréami ayena cho echirigá ikíali.

Echi Juani júuli rukuénala echi Jesúsusi

(Mt. 11:2-19)

¹⁸ A'lí echi jaré mapu echi Juani binérali, aboni galá ruyeli echi Juani ne suwaba je'ná jeyili. Echali echi Juani bayegá okuá aboni, ¹⁹ jeanigá júuli rukuénala echi Jesúsusi: ¿Áchami ne bichíwali ju echi mapu Ríosi wilama riwéali mapurigá Walubela Nigúurami niráa, echi Cristo anilíwami? ¿Acha buwebo mapurigá auché bilé nawama, kéramá? ²⁰ A'lí mapalí echi jaré mapu jurárami níili, ma sili mapo'ná Jesúsusi asali, echali aboni jeaneli: Echi Juani mapu pagóami ju, ma tamujé tamí júuli mi yuwa jerigá rukuénala: ¿Áchami ne bichíwali ju echi mapu Ríosi wilama riwéali mapurigá Walubela Nigúurami niráa, echi Cristo anilíwami? ¿Acha buwebo mapurigá auché bilé nawama kéremá? ²¹ Chopi echali rawé mapalí aboni echo'ná sili, echali Jesúsusi sinepi niráa ku sa'wali ne wikabé nayúkami mapu wikabé nayulí jiti nayúkami níili. Echali Binói ayena cho ku sa'wali echi auché jaré nayúkami mapu we chati nachútaga nayútali auché jaré; ayena cho Binói ku machí a'wali echi jaré chati riablo aliwala echo'ná jaré pagótami sulálachi jonsa; ayena cho Binói galá ku 'machíliami niwáli wikabé auché jaré mapu ke 'machíliami níili. ²² Echali Jesúsusi ku nijéwaga jeaneli echi jaré mapu Juani rukuénala júuli: Ma ku simíbaga, ku ruyébasi echi Juani suwaba mapurigátamo riwáli jipi rawé, ayena cho suwaba mapurigátamo námali. Galá ku ruyébasi mapurigá echi jaré ke 'machíliami ma galá ku 'machíliami niwálali, ayena cho mapurigá echi jaré ke akánami ma galá ku 'yena, ayena cho mapurigá echi auché jaré wabé chati cha nayúkami galá ku sa'wárami níili, ayena cho mapurigá echi jaré ke námiami galá ku námiami niwálali, ayena cho mapurigá echi jaré suwíami ku o'wíntarami níili, ayena cho mapurigá echi Galabé Ríosi Ra'íchala ma galá nawésarami ju echi jaré we tisúwati. ²³ Ayena cho Jesúsusi jeaneli: Ne wabé kaníliami ju ne si'néami echi jaré mapu sinibí galá tamí bichíi.

²⁴ A'lí ma ku simíbalí echi jaré mapu echi Juani júuli rukuénala echi Jesúsusi. Echali Jesúsusi chótali ra'ícha echi

auché jaré pagótami, echi Juani jiti rugá. A'lí Jesusi jeaneli: 'Yémitamo ne bichíwali echo'ná biléana waná kawichí simíbali mapurigátamo 'nebo echi Juani. Chopi 'yémitamo ketasi echo'ná simíbali mapurigátamo 'nebo bilé rijói mapu ketasi sinibí gala bichíyami níli. Echiyili rijói mapuyiri bilé namuti wilfami ju mapu echi iká jiti nokérami ju, chopi echi Juani ne galá jiwériga bichíyami níli. ²⁵ 'Yémitamo ketasi echo'ná simíbali mapurigátamo riwiboa bilé rijói wabé galá simati napáchami. 'Yémitamo galá machí mapu echiyiri napáchami rijói chopi muchúwi echo'ná echi jaré o'wéala nuláami walubé kalíllachi, mapo'ná ayena cho piré echi jaré mapu chopi wabé nakí kaníliga piréranala sinibí rawé. ²⁶ Chopi 'yémitamo ne bichíwali echo'ná simíbali bilé walula Riosi jiti nawésami 'nébiya. Jipi Nijé 'yemi nimí ne bichíwaga ané mapu echi Juani ne wabé simírami walula ju, ketasi mapurigá echi auché jaré o'wéala Riosi jiti nawésami niráa. ²⁷ Ne bachá niráa je'ná jerigá osirúami níli echo'ná Riosi Ra'íchala oselíwalachi, echi Juani jiti rugá, mapurigá Riosi jeaneli kepu Raná:

Waminá bacháami mapo'ná Mujemi simírama, echo'ná Nijeni a'láranaga julama bilé nawésami. Échiko bachá nawésama echi jaré pagótami, jeanigá mapu aboni mi galá narema, echalí mapalí Mujemi echo'ná nawama.

²⁸ Ayenacho Jesusi jeaneli echi jaré pagótami: Nijé 'yemi nimí ané mapu ke wesi auché bilé Riosi jiti nawésami waminabi wabé walubela níli, ketasi mapurigá echi Juani mapu pagóami ju. Chopi echi mapu wabé tabéala ju echi jaré yuwa mapu Riosi galá nulé, échiko arigá bachá walula ju echi Juani yuwa.

²⁹ Echalí ne si'néami echi jaré pagótami mapu ikí echi Juani chabénala galá pagoli echo'ná ba'wírali, abóniko ma galá námali Jesusi nawésawala. Ayena cho echi jaré mapu wenomí napabúami níli, echi walula silíami natétanala, si'néami galá námali Jesusi nawésawala. A'lí ne si'néami aboni galá bichíli Riosi. ³⁰ Chopi echi jaré Bariseo anilíwami binériami, echi auché jaré nulalíwami binériami ayena cho, si'néami mapu ikí ketasi nakili mapurigá aboni echirigá ba'wí jiti pagótami níma echi Juani jiti, abóniko echirigá wabé kichili mapurigá Riosi we nakili olánala aboni yuwa.

³¹ Echalí echi Walubela Jesusi jeaneli: Nijeni 'yemi mi irétaga binéraga ruyema je'ná jipi piréami pagótami jiti. ³² Aboni chopi mapuyiri jaré kúrowi ju, mapu echo'ná ri'narátachi ri'yékaka, a'nagupi o'weli ra'íchaga jeaní: Tamujé 'yemi mi tákali echi kusela, chópitamo ketasi awili; ayena cho tamujé 'yemi mi wabé o'móniga nawajili, chópitamo arigá ketasi nalákali. ³³ Echalí echi Walubela Jesusi ayena cho jeaneli: Nijé 'yemi nimí echirigá aneli mapujiti chabénala mapalí echi Juani nawali mapu pagóami ju, échiko ketasi ko'wali echi pani nibilé bajili echi uva anilíwami ba'wila. Chopi

'yémitamo arigá jeaní: ¡Echi Juani we riablo aliwala aliwéami ju! ³⁴ A'lí Riosi arigá tamí wilali mapurigá Ku'wíríami niráa; chopi mapalí Nijeni nawali 'yemi yuwa, 'yémitamo anili mapu Nijeni we ko'wéami ju, ayena cho mapu Nijeni we bajiami ju echi uva ba'wila. Ayena chótamo anili mapu Nijeni chopi apanero ju echi jaré wenomí napabúami yuwa, ayena cho echi auché jaré yuwa mapu 'yémitamo chati oláami ané. ³⁵ Chopi si'néami pagótami galá machíami ju mapu ikí galá bichíli Riosi, ayena cho abóni galá machila auché jaré mapu Riosi ne galá bichíwaga olá.

Jesusi bayérami níli mapu ko'mea

³⁶ A'lí bilé rijói Bariseo anilíwami binériami bayeli Jesusi mapurigá ko'mea binói yuwa. Echijiti Jesusi simili echo'ná echi rijói bitélachi. Chopi echalí ki'yá rawé echi pagótami sinibí wabé bitigá niráa ko'wali echo'ná mésachi. ³⁷ Echalí rawé mapalí Jesusi echirigá bitigá niráa ko'wali echo'ná kalírali, echalí bilé mukí echo'ná walúlachi bitéami galá machili mapu Jesusi echo'ná ko'yá asali. Echijiti echi mukí echo'ná toga nawali bilé limeta, rité niwárami, echi mapu aceite ne wabé su'weti júkami ro'wárami níli, chopi echi mukí chabénala wabé chati oláami níli. ³⁸ Echijiti echi mukí ne wabé o'móniga nalali mapujiti binói ma ketasi nakili waminabi echirigá chati olánala. Echalí echi mukí echirigá ne wabé nalaka, ne wabé simírami ukuénali. A'lí binói ukuénawala we pachuli echo'ná Jesusi ronólachi. A'lí echi mukí ku bi'wali Jesusi ronólachi binói kupala jiti. A'lí echi mukí ne wabé kaníli, echijiti binói chumilá jiti we chu'mili echi Jesusi ronólachi. Ayena cho binói ucheli echi wabé su'weti júkami aceite echo'ná Jesusi ronólachi. ³⁹ Echalí echo'ná 'nigá asali echi rijói Bariseo mapu bayeli Jesusi mapurigá ko'mea binói yuwa; chopi mapalí echi rijói galá riwali suwaba je'ná jeyiri, echalí échiko je'ná jerigá 'nátali: Echi mukí ne wabé chati oláami mukí ju. A je'ná Jesusi ne bichíwali Riosi jiti nawésami níisagá, echalí binói ne bichíwali machimé mapu je'ná mukí wabé chati oláami ju; ayena cho machimé mapu ketasi risensia ju mapu echi yiri mukí nochama binói ronólachi. ⁴⁰ Chopi Jesusi ku nijéwaga jeaneli; Simoni, bilé namuti nimí anema. Echalí échiko ku nijéwaga jeaneli: Binériami, tamí ané. ⁴¹ A'lí Jesusi jeaneli: Okuá rijói wikabé wenomí wikeli mapu echi auché bilé rijói tanéwaga 'yali. A'lí echi bilé je'ná rijói wikeli malí mili peso. A'lí echi auché biléala chopi wikeli malí kiento peso. ⁴² A'lí okuánika tarapé biyiri níwali, echijiti aboni tarapé omérali ku natétiya echi auché bilé rijói tanéwiami. Echijiti echi rijói tanéwiami arigá su'lánaga, okuánika waminá wikáwali suwaba mapu ikí aboni wikali. Echalí Jesusi ayena cho ra'íchaga echi Simoni yuwa, jeaneli: Jipi tamí ku nijéwaga ané mapurigá mujemi mayé: ¿Chuyiri 'nalina je'ná

okuá rijói waminabi ne wabé simírami karema echi auché bilé rijói mapu echirigá waminá wikáwaga ariweli suwaba mapu ikí okuánika wikali? ⁴³ A'lí echi Simoni ku nijéwaga jeaneli: Nijeni mayé mapu echi rijói mapu waminabi wikabé ku wikawárami níili, ayena cho waminabi wabé simírami galema echi rijói mapu ku wikáwali ne suwaba. Echali Jesusi jeaneli: Ne bichíwali mi anili. ⁴⁴ A'lí Jesusi auchécho galá 'néniga echi mukí, echali Binói jeaneli echi Simoni: Mujemi galá riwali mapurigá je'ná mukí olali. Chopi mapalí Nijé Binói bakili jena'í pachá mujé kalíflachi, echali mujemi ketasi tamí pabákali ba'wí jiti echo'ná Nijé ralálachi mapurigá tamujé Juríosi pagótami sinibí olá. Chopi je'ná mukí wabé nalaka, ne wabé ukuénali. A'lí binói ukuénawala pachuli echo'ná Nijé ralálachi. Echali binói ku bi'wali Nijé ralálachi binói kupala jiti. ⁴⁵ A'lí mujemi ketasi tamí kaníliga narépalí, chopi je'ná mukí chótali wabé kaligá chu'miyá Nijé ralálachi mapalí jonsa Nijeni bachá nawali jena'íbi, mapujiti binói wabé tamí galé. ⁴⁶ A'lí mujemi ketasi tamí ucheli echi aceite echo'ná Nijé mo'ólachi. Chopi je'ná mukí tamí ralálachi ucheli echi wabé su'weti júkami aceite jiti. ⁴⁷ A'lí Jesusi waminabi jeaneli: Echijiti Nijé nimí ané mapu ma ku wikawárami ju suwaba mapurigá je'ná mukí wabé chati olali, mapujiti je'ná mukí wabé tamí galeli; chopi echi jaré mapu péebi jiti ku wikawárami ju, abóniko péebi niráa tamí galé. ⁴⁸ Echali Jesusi jeaneli echi mukí: Mapurigami chati olali mami galá ku wikawárami ju. ⁴⁹ A'lí mapalí echi auché jaré echo'ná ko'yá muchúami je'ná jerigá námari, a'lí aboni je'ná jerigá 'nátali: ¿Churékula echirigá aní je'ná rijói mapu binói galá oméro ku wikáwiya mapurigá auché jaré pagótami chati olali? ⁵⁰ Echali Jesusi jeaneli echi mukí: Mujemi ma galá ku wikawárami ju, mapujítimi galá tamí bichíili. Kaníliga ku simigá echo'ná mujé bitélachi.

Jaré muguí we ku'wírari echi Jesusi

8 A'lí péé wakinánokuá Jesusi nawisásiya simili echo'ná wikanáami o'wéalachi, wikanáami rijówachi ayena cho. A'lí Binói nawisásiya simili jeanigá mapu Riosi ne galá nuléami ju si'néami pagótami yuwa. A'lí echi jaré makói miná okuá mapu Jesusi júuli nawisánala ayena cho así simíwali. ² A'lí jaré muguí ayena cho así simíwali. A'lí aboni níili echi jaré mapu Jesusi chabénala ku sa'wali. Jaré aboni we nayúkami níili, chopi Jesusi ma ku sa'wali aboni. Auché jaré aboni wabé chati riablo aliwala ariwéami níili, chopi Jesusi ma ku machí a'wali echi jaré isena riablo aliwala echo'ná aboni sulálachi jonsa. A'lí echi María echo'ná Makatárachi bitéami bilé níili mapu así simili. A'lí echi María níili mapu chabénala echi Jesusi ku machí a'wáli kichao wabé chati riablo aliwala echo'ná pachana binói sulálachi jonsa. ³ Ayena cho echi Juana así simili.

Échiko echi Chusa riwéami rijói upila níili, echi rijói mapu walula nigúurami níili echi walula sílami Erorsi riwéami yuwa. A'lí echi Susana riwéami mukí ayena cho así simili, auché jaré wikabé muguí ayena cho así simíwali, echi jaré mapu aboni níwala namuti galá agá, echirigá ku'wírari echi Jesusi.

Echi turío icháami

(Mt. 13:1-23; Mr. 4:1-20)

⁴ A'lí ne wikabé pagótami napawili echi Jesusi 'nébiya. A'lí aboni echo'ná suníami rijówachi jonsa síami níili. A'lí Jesusi irétaga binérali echi wikabé pagótami jeanigá mapu Riosi Ra'íchala mapuyiri echi jaré turío rakala ju. Echali Jesusi jeaneli:

⁵ Siné rawé bilé rijói ichayá iyénali echi turío. Echali jaré turío rakala rujuili echo'ná biléana buwichí, mapo'ná echi jaré pagótami we rikeka simárali. A'lí echi jaré chuluguí káraga suwali echo'ná rujuíami turío rakala. ⁶ A'lí auché jaré turío rakala rujuili echo'ná biléana rapirúachi mapo'ná ketasi 'me wi'yéali. A'lí ma a'wisáa, suwaba káraga wakicheli mapujiti echo'ná ketasi 'me sa'mili. ⁷ A'lí auché jaré turío rakala echo'ná we kasaléachi rujuili, chopi echi kasalá o'weri ochérasa, waminá napolíbanali echi turío. ⁸ Chopi auché jaré turío rakala rujuili echo'ná we galabé wi'yérali mapo'ná ma ochérasa wabé galá rakeli. Jaré echi turío rakala bilé kiento niráa rakeli, chopi auché jaré ketasi 'me wiká rakeli. A'lí Jesusi ma je'ná jerigá anesa, echali Binói ayena cho o'weli ra'íchaga jeaneli: ¡'Yemi máputamo nakeko ne galá namsi mapurigá Nijeni aní!

⁹ Péé wilibeko echi jaré mapu Jesusi binérali we rukueli mapu churigá aniwáami níili mapurigá Binói echirigá irétaga binérali echi pagótami. ¹⁰ Echali Jesusi ku nijéwaga jeaneli: Riosi ma 'yemi mi 'yali mapurigá 'yémitamo galá machiboa mapurigá Binói galá nulé echi jaré pagótami, chopi echi auché jaré pagótami ketasi cho galá machí mapurigá Riosi nulé aboni. Echijiti Nijeni irétaga nawesa echi auché jaré pagótami mapurigá aboni galá kipuma Nijé nawésawala, chopi aboni arigá ketasi cho galá machimea echi ne bichíwali, ayena cho mapurigá aboni galá kipuma Nijé nawésawala chopi aboni arigá ketasi cho galá machimea chu aniwáami ju mapurigá Nijeni irétaga binera aboni.

¹¹ Chopi mapurigá Nijeni irétaga binérali, je'ná jerigá aniwáami ju: Echi turío rakala mapuyiri Riosi Ra'íchala ju. ¹² A'lí mapurigá ikili echi jaré turío rakala mapu echo'ná biléana buwichí rujuili, echirigá achigórigá ikimea echi jaré pagótami mapu bachá niráa galá namsa echi Riosi Ra'íchala, arigá ketasi we yáati bichíima, mapujiti echi riablo we yáati miná 'yema echi Galabé Riosi Ra'íchala mapu aboni ma námali, achigórigá mapurigá echi jaré chuluguí suwaba suwali echi jaré turío rakala mapu echo'ná buwichí rujuili. A'lí echi ri-

ablo chopi echirigá olá mapurigá echi jaré pagótami ketasi galá bichíima Riosi Ra'íchala, ayena cho mapurigá aboni ketasi galá ku wikáwarami níima. ¹³ A'lí mapurigá ikili echi jaré turío rakala mapu echo'ná biléana rapirúachi rujuili, echirigá achigórigá ikimea echi jaré pagótami, si'néami mapu ikí bachá niráa galá kaníliga namsa Riosi Ra'íchala, arigá ketasi galá ne sulachí niráa bichíima. Abóniko achigórigá ju mapurigá echi jaré turío mapu ketasi galá nawéami ju. Abóniko péé téeli niráa bichíima, chopi mapalí aboni risúu oláлами níima mapujiti aboni echirigá bichíinali Riosi Ra'íchala, echalí aboni ma ketasi waminabi napawima echi auché jaré bichíyami yuwa, a'lí aboni ma ketasi waminabi galá bichíima. ¹⁴ A'lí mapurigá ikili echi jaré turío rakala mapu echo'ná wabé kasaréachi rujuili, echirigá achigórigá ikimea echi auché jaré pagótami, si'néami mapu ikí galá namsa Riosi Ra'íchala, arigá ketasi galá bichíima. A'lí aboni chopi waminabi ologá pirélama achigórigá mapurigá aboni chabénala ologá piréali. Abóniko ketasi bukulí nakulíwarami níima, mapujiti aboni chopi wikabé namúti wabé níлага 'nata. Ayena cho aboni chopi wabé koruma echi wikabé namuti jena'í wichimóbachi nirúami. Ayena cho aboni chopi wabé chuwé ologá pirélanala, echijiti aboni ketasi galá bichíinali Riosi Ra'íchala, ayena cho aboni ketasi galá ku'wíratami níima. ¹⁵ A'lí mapurigá ikili echi jaré turío rakala mapu echo'ná galabé wi'yérali ichirúami níili, echirigá achigórigá ikimea echi auché jaré pagótami, si'néami mapu ikí galá namsa Riosi Ra'íchala ne galá sulachí niráa bichíima. Aboni ne galá nijéwaga olama mapurigá Riosi nulé aboni, ayena cho aboni waminabi galá bichíiga, wabé galabé ologá pirélama jena'í wichimóbachi. Echirigá aboni achigórigá ju mapurigá echi jaré turío rakala mapu we galabé rakeli.

Arigá 'wérali ju mapu Riosi Ra'íchala galá nawisárami níima

(Mr. 4:21-25)

¹⁶ Jesusi ayena cho jeanigá irétaga binérali echi jaré pagótami: Tarapé wesi póлага rikama bilé chopé rajáami echo'ná ri'lé pachá biléana sikolichí, nibilé cho echo'ná ri'lé pachá biléana jubechi, keremá. Chopi si'néami pagótami ripabé, ne galá machiná niráa rikama echi chopé rajáami, mapurigá echirigá ne galá machírama si'néami mapu ikí mo'wiko echo'ná pachá kalírali. Echirigá achigórigá arigá 'wérali ju mapu Riosi Ra'íchala ne galá nawisárami níima, mapurigá si'néami pagótami ne galá machimea. ¹⁷ A'lí péé waminánomí suwaba namuti ne galá machirúami níima, mapujiti ne suwaba galá machiná niráa riwíratami níima; ayena cho echi jaré namuti mapu ke wesi galá machí jipi rawé, suwaba ne galá riwíratami níima. ¹⁸ Echijiti ne galá námiga bichíisi Nijé Ra'íchala, mapujiti átamo ne galá bichíisagá Nijé Ra'íchala, Nijé 'yemi nimí

waminabi galabé binérama. Chopi átamo ketasi galá bichíisagá mapurigá Nijé 'yemi nimí binera, echalí 'yémitamo arigá 'yérami níibo suwaba mapurigá Nijé ma 'yemi nimí binérali.

Echi Jesusi iyela, echi jaré Jesusi ritémawala ayena cho, echo'ná sili Jesusi yuwa

(Mt. 12:46-50; Mr. 3:31-35)

¹⁹ A'lí echi Jesusi iyela, ayena cho echi jaré Jesusi ritémawala echo'ná sili Jesusi yuwa. Chopi aboni tarapé chirigá omérali mulubé siyá echo'ná Jesusi yuwa, mapujiti ne wikabé pagótami ne cha'iká nologá muchili Binói yuwa. ²⁰ Chopi bilé rijói jeanigá ruyeli echi Jesusi: Kemi iyé echo'ná machíami atí, echi jaré kemi ritémawala ayena cho. Aboni we nakí mi 'nénala. ²¹ Chopi Jesusi ku nijéwaga jeaneli: Echi jaré mapu galá námiko Riosi Ra'íchala, si'néami mapu ikí galá bichíiga olako mapurigá Riosi ané, abóniko mapurigá Nijé iyela ju, ayena cho abóniko mapurigá nijé ritémawala ju.

Jesusi ku wilábalí echi wabé iwéami iká

(Mt. 8:23-27; Mr. 4:35-41)

²² Siné rawé Jesusi moka asíbali echo'ná biléana bárkochi, echi auché jaré mapu Binói binérali yuwa. Echalí Jesusi jeaneli: Echo'ná walú ba'wechi bo'ónala simabo. A'lí aboni echirigá echo'ná bárkochi muchiga ku simíbali. ²³ A'lí mapuyénasí aboni echo'ná nasipa walú ba'wechi 'yérali, echi Jesusi we kochigá bu'wili echo'ná pachá bárkochi. Chopi echo'ná walú ba'wechi ke sayiná ne wabé iwéami ikali, echijiti echo'ná pachá bárkochi ne noguí buchili ba'wí. Echalí echi jaré mapu Jesusi binérali ne wabé majali mapujiti aboni ne noguí suwimea riwéali. ²⁴ A'lí aboni we yáati ku busurébanali echi Jesusi. Echalí aboni jeaneli: ¡Binériami, suwibóaréta! Echalí Jesusi ku asiska, ku wilábalí echi wabé iwéami iká, echi walú ba'wí ayena cho. A'lí we yáati echi walú ba'wí galá ku kilí siwega wilíbalí. ²⁵ Echalí Jesusi jeaneli echi jaré mapu Binói binérali: ¿Churékulátamo echirigá majali? ¿Kéchatamo bichíili mapurigá Nijé 'yemi nimí ku'wírama riwéali? Chopi aboni wabé majaga 'nátaga muchili. A'lí aboni chopi a'nagupi rukueli jeanigá: ¿Kecha je'ná Jesusi echi bilepi Riosi Ranala ju? ¡Nibira mapurigá echi wabé iwéami iká wabé yáati ku wilíbalí mapalí Binói nuleli ku wilábanala! ¡Nibira mapurigá echi walú ba'wí ayena cho we yáati ku siwega wilíbalí!

Echi bilé rijói echo'ná Garáráchi bitéami mapu wabé chati riablo aliwala ariwéami níili

(Mt. 8:28-34; Mr. 5:1-20)

²⁶ Pe wilibeko aboni echirigá sébali echo'ná bo'ónala walú ba'wírali mapo'ná Garáráchi anilíwachi kawírali ju, echo'ná mapo'ná Galiléachi anilíwachi kawírali jon-

sa waminá bo'ónala ju. ²⁷ A'lí mapalí Jesusi nawali echo'ná suwé, echalí we yáati echo'ná natipámiya nawali bilé rijói echo'ná bitéami, echi mapu wi'libé bamíwali jonsa wabé chati riablo aliwala aliwéami níli. Échiko we machí sapeka iyénali, ayena cho binói ketasi siné bitéali echo'ná biléana kalírali, chopi binói sinibí bitéali echo'ná jaréana risochí chu'wétachi. ²⁸ Chopi mapalí echi rijói riwali echi Jesusi, echalí echo'ná bacháami Jesusi yuwa nawagá, binói we yáati chokoba wilíwali. A'lí o'weli ra'íchaga jeanigá rukueli: ¿Piri mi olama tamí yuwa, Mujé Jesusi, mápumi echi Ripabé Riwigachi Atíami Riosi Ranala ju? ¿Wabé nimí tani mapurigami ketasi tamí risúu olama! ²⁹ Chopi echi rijói echirigá anili mapujiti Jesusi ma bachá nuleli echi wabé chati si'nú riablo aliwala ku machínala echo'ná pachana echi rijói sulálachi jonsa. Chabé jonsa echi si'nú riablo aliwala echirigá ne wabé omériga nuleli echi rijoy, echijiti échiko sinibí wabé chati olali. A'lí echo'ná piréami pagótami we nakili bologá tibú echi rijoy; ayena cho binói wisabé bulílati binói sikálachi echi jiero wiya jiti, echo'ná binói ronólachi ayena cho. Chopi echi rijói sinibí we ripúnali echi jiero wiya, ayena cho echi riablo aliwala wisabé nuleli echi rijói másanala echo'ná jaréana waná kawírali. ³⁰ Echalí Jesusi jeanigá rukueli: ¿Chu mi riwé? A'lí echi rijói jeaneli: Wikabé sontarsi ni riwé. A'lí echi rijói echirigá ku nijéwali mapujiti wikabé isena riablo aliwala muchili echo'ná pachana binói sulálachi. Ali echi wikabé isena riablo aliwala nuleli echirigá ra'ichánala. ³¹ Echalí echi jaré isena riablo aliwala we ra'íchaga tánali mapurigá Jesusi ketasi julama aboni echo'ná ri'lé riáblochi, mapurigá aboni ketasi kastigo 'yárami níima.

³² Echalí rawé echo'ná kawichí wikabé kochi ko'yá uchúwali. Echijiti echi wikabé isena riablo aliwala we risúu anigá tali mapurigá echi Jesusi risensia 'yama mapurigá aboni echo'ná pachana echi wikabé kóchichi mo'wimea. A'lí Jesusi risensia 'yali. ³³ Echalí echi wikabé isena riablo aliwala we yáati ku 'machínali echo'ná pachana echi rijói sulálachi jonsa. A'lí aboni we yáati mo'wili echo'ná pachana echi wikabé kóchichi. Echalí echi jaré wikabé kochi ke sayiná miná júmsali. A'lí ne suwaba echo'ná ripá biléana kowata jonsa ri'lé rujuili echo'ná walú ba'wírali. A'lí ne suwaba si'rili echo'ná ba'wírali.

³⁴ A'lí mapalí echi jaré kochi méлами galá riwali echirigá ikíachi, echalí aboni we yáati wabé majaga ku ruyébiya simíbali. A'lí aboni ruyeli echo'ná walúlachi piréami suwaba mapurigá ikili, ayena cho aboni echirigá ruyeli suníami echo'ná mulubé rijówachi piréami. ³⁵ Echalí ne si'néami echo'ná piréami pagótami we 'nébiya simíbali mapurigá ikili. A'lí mapalí aboni sili echo'ná mapo'ná Jesusi asali, echalí aboni riwali echi rijói mapu echo'ná pachana binói sulálachi jonsa 'machínali echi wikabé riablo aliwala. Chopi échiko ma

galá ku napáchaga, ne galá ku 'nátaga asali echo'ná Jesusi yuwa. Echalí echi jaré pagótami, echirigá riwisá, ne wabé majali. ³⁶ Chopi echi jaré pagótami mapu galá riwali echirigá ikíachi, aboni ku ruyeli echi auché jaré pagótami ne suwaba mapurigá echi wikabé isena riablo aliwala ku a'wátami níli echo'ná pachana echi rijói sulálachi jonsa mapu chabénala wikabé chati riablo aliwala aliwéami níli. ³⁷ Chopi mapalí echo'ná Garáachi anilíwachi piréami pagótami galá machili mapurigá ikili, echalí si'néami aboni wabé tánali mapurigá Jesusi we yáati ku simea echo'ná aboni kawíwalachi jonsa, mapujiti aboni ne wabé majali. A'lí Jesusi echo'ná bárkochi asíbaga, echirigá ku simili echo'ná jonsa. ³⁸ Chopi mapalí Jesusi ke cho ku simili, echalí echi rijói mapu echo'ná pachana binói sulálachi jonsa ma ku 'machínali echi wikabé wabé chati riablo aliwala, échiko ne wabé tánali mapurigá Jesusi risensia 'yama mapurigá binói ayena cho así simea Jesusi yuwa; chopi Jesusi ketasi risensia 'yali. Echalí Jesusi ku ripórali echi rijói jeanigá: ³⁹ ¿Ku simigá echo'ná kemi bitélachi! Ne suwaba galá ku ruyemi mapurigá Riosi mi ku'wírali. Echalí echi rijói ku simili echo'ná binói bitélachi. A'lí binói galá nawésaga ruyeli si'néami echo'ná noligá piréami mapurigá Jesusi echirigá wabé omériga ku'wírali binoy.

Jesusi ku owíntali echi Jáiro marala mapalí ma mukúami níli

(Mt. 9:18-26; Mr. 5:21-43)

⁴⁰ Chopi mapalí Jesusi auchecho ku nawali echo'ná bo'ónala mapo'ná jonsa Binói simili echalí bi'yá, a'lí echo'ná piréami pagótami ne wabé kaníriga nareli echi Jesusi, mapujiti si'néami aboni chopi wabé buweli mapurigá Binói echirigá ku nawama echo'ná aboni yuwa. ⁴¹ Echalí bilé rijói Jáiro riwéami echo'ná Jesusi yuwa nawali. A'lí echi Jairo ne walula nuláami níli echo'ná echi jaré Juríosi pagótami ri'obáwalachi. Échiko echo'ná nawagá we yáati, wéemi raweka, chokóbagawilíwali echo'ná bacháami Jesusi yuwa. Echalí binói wabé risúu anigá tánali mapurigá Jesusi we yáati simea echo'ná binói Jairo bitélachi, ⁴² mapujiti binói marala ne wabé nayú bu'wili, ayena cho echi tiwé ma ne mukumea riwéali. A'lí echi Jairo pe bilepi maléali, echi mapu makói miná okuá bamíbami níli; chopi mapalí Jesusi ku simili echi Jairo yuwa, ne wabé wikabé pagótami así simíbali. A'lí echo'ná buwichí echi wikabé pagótami ne wabé cha'igá 'yéali Jesusi yuwa.

⁴³ Echalí echo'ná echi jaré wikabé pagótami yuwa ayena cho simili bilé mukí mapu makói miná okuá bamíbali jonsa ne wabé léniga nayúami níli. A'lí echi mukí ma suwaba suwábali binói níwala namuti, echi jaré óyami natétiya, mapu ikí ówali binoy. Chopi ketasi wesi omérali ku sa'wayá echi mukí. ⁴⁴ Echalí rawé echi mukí jubáami niráa mulubéanaga Jesusi yuwa, we

nochali Binói napáchala suwilá. A'lí echi mukí ke sayiná ma ku sa'wárami níili, mapujiti binói ma ketasi waminabi lénali. ⁴⁵ A'lí Jesusi we yáati jeanigá rukueli: ¿Chigá tamí nochali? Chopi mapalí ne si'néami aneli mapu ketasi wesi nochali, echalí echi Pegro, echi auché jaré binói apanérawala yuwa, si'néami jeaneli: Binériami, echi wikabé pagótami mi noligá we cha'íraga rachina. ¿Churékulami jeanigá rukue: ¿Chigá tamí nochali? ¿Ne wikabé pagótami ma mi nochárilé!

⁴⁶ Chopi Jesusi jeaneli: Ne bichíwali bilé tamí nochali. Nijeni galá machili mapurigani ne wabé omériga ku sa'wali echi bilé. ⁴⁷ Echalí echi mukí galá machili mapu Jesusi ma galá machilo mapurigá binói mukí olali. Echi-jiti échiko ne sayilúmaga, wéemi raweka, chokóbagá wilíwali echo'ná bacháami Jesusi yuwa. A'lí ne suwaba ku ruyeli echi Jesusi mapu piri jiti binói nochali Jesusi napáchala suwilá, ayena cho mapu churigá binói we yáati galá ku sa'wárami níili, ayena cho ne si'néami echi auché jaré pagótami echirigá galá námali. ⁴⁸ A'lí Jesusi jeaneli: Mukí, mami ku sa'wárami ju mapujítimi galá tamí bichíili. Ne galá kanílaga ku simigá.

⁴⁹ A'lí Jesusi abijí echirigá ra'íchachi, echalí nawali bilé rijói echo'ná echi Jairo bitélachi jonsa simíami. Échiko jeaneli echi Jairo: Mujé malala ma mukuli. Ketasi waminabi kumé echi Walubela. ⁵⁰ Chopi mapalí Jesusi námali echirigá anéachi, echalí Binói jeaneli echi Jairo: ¡Ketasi majá! Chopi galá tamí bichíi. A'lí mujé malala arigá ku bitélama. ⁵¹ A'lí mapalí Jesusi nawali echo'ná Jairo bitélachi, echalí Binói chopi risénsia 'yali mapu Binói yuwa pachá mo'wimea echi Pegro, echi Jakobo ayena cho, echi Juani ayena cho, echi tiwé 'wénawala asíchiko. ⁵² Echalí ne si'néami echo'ná muchúami pagótami ne wabé o'móniga, o'weli nalákali mapujiti echi tiwé ma mukuli. A'lí Jesusi galá machili mapurigá Binói ku owíntama riwéali echi tiwé mapu ma mukúami níili. Echijiti Binói jeaneli echi jaré pagótami: Ketasi echirigá nalákasi. Je'ná tiwé, tamí jiti, ketasi mapurigá mukúami niráa ju, chopi mapurigá kochíami niráa ju. ⁵³ Chopi aboni we achili mapalí Jesusi echirigá aneli, mapujiti aboni galá machili mapurigá echi tiwé ma mukúami níilo. ⁵⁴ Echalí Jesusi, echi tiwé sikálachi chapigá, o'weli ra'íchaga jeaneli: ¡Tiwé, ku asísaka! ⁵⁵ A'lí ke sayiná echi tiwé auchecho siné ma ku bitéali. A'lí binói we yáati ku wilísali. Echalí Jesusi nuleli aboni ku kónala echi tiwé. ⁵⁶ Echalí echi tiwé 'wénawala ne wabé cha nílaga, ne wabé kaníili; chopi Jesusi nuleli aboni ketasi wesi ruyénala mapurigá Binói olali.

Jesusi júuli nawisánala echi jaré makói mina okuá mapu Binói binérali
(Mt. 10:5-15; Mr. 6:7-13)

9 A'lí Jesusi napabuli echi jaré makói miná okuá mapu Binói binérali. A'lí Binói iwératali aboni mapurigá aboni galá omérama miná machí a'waya echi

jaré isena riablo aliwala echo'ná jaré pagótami sulálachi jonsa. A'lí Jesusi ayena cho we galá iwératali aboni mapurigá aboni galá omérama ku sa'wayá echi jaré nayúkami. ² Echalí Jesusi júuli aboni nawisánala mapurigá aboni jeanimea mapu Riosi wabé galá nulé si'néami echi jaré jena'í wichimóbachí piréami pagótami mapu ikí galá bichíyami ju; ayena cho Jesusi júuli aboni ku sa'wánala echi jaré nayúkami. ³ A'lí Jesusi jeaneli aboni: Tarapebi yiri namuti tosí echo'ná buwichí. Nirapé bilé kusí tisola tosí, ni bilé maleta, ni ko'wáami tosí, ni wenomí ketasi cho tosí. A'lí ibili 'yemi chopi bilepi napacha tosí. ⁴ A'lí mapuyiripi kalírali mapo'nátamo mo'wí chi'lebánala, echo'ná bilénapí kalírali ripisi mapuyénasítamo ma ku simabo echo'ná rijówachi jonsa. ⁵ Ayena cho Jesusi jeaneli: A jaré pagótami ketasi 'yemi mi narésagá, a'lí maparítamo ku simabo echo'ná aboni rijówalachi jonsa, echalí ne galá asáwaga bi'wasi echi napisó, echo'ná 'yémi ralálachi chukúbami. Echirigátamo ku ruyebo echo'ná piréami pagótami mapurigá aboni ketasi galabé olali, mapalí aboni ketasi kipúnali 'yemi nawésawala. ⁶ A'lí aboni nawisésiya simíwali echo'ná ne suníami rijówachi. A'lí aboni nawésali echi wabé Galabé Riosi Ra'ichala. Ayena cho aboni ku sa'wali echi jaré nayúkami.

Echi walula silíami Erorsi riwéami we nakili echi Jesusi 'nénala

(Mt. 14:1-12; Mr. 6:14-29)

⁷ A'lí echi walula silíami Erorsi riwéami suwaba galá machili mapurigá Jesusi olali. Echalí echi Erorsi wabé 'nátali mapu churigá Jesusi galá omérali echirigá olayá, mapujiti auché jaré pagótami aneli mapu echi Juani mapu pagóami níili, ma ku owínaliré. Ayena cho aboni aneli mapu echi Jesusi níili echi Juani mapu ma ku owínaliré. ⁸ Ayena cho auché jaré pagótami jeanili: Echi Jesusi ju echi ki'yá bitéami Elíasi mapu ma ku nawáliré jena'í wichimóbachí. Auché jaré jeanili: Bilé chabé ki'yá bitéami Riosi jiti nawésami ju, mapu ma ku owínaliré. ⁹ Chopi echi Erorsi jeanili: Nijé binói ma nulali kutachí ripunánala echi Juani. Échiko ma mi'lirúami níili. ¿Chigá biché níima je'ná rijoy? Nijeni ma námali mapurigá Binói wikabé namuti wabé omériga olali. A'lí echi walula Erorsi wabé nakili echi Jesusi 'nénala.

Jesusi kówali echi jaré malí mili rijói

(Mt. 14:13-21; Mr. 6:30-44; Jn. 6:1-14)

¹⁰ A'lí ma ku sili echi jaré julárami mapu Jesusi chabénala júuli nawisánala. Echalí aboni galá ku ruyeli echi Jesusi suwaba mapu ikí aboni olali mapalí aboni nawésiya 'yéneli. A'lí Jesusi bayérali aboni echo'ná biléana waná kawichí mapo'ná mulipi ju biléana walúlachi mapo'ná Becháirachi anilíwachi ju. ¹¹ Chopi mapalí echi wikabé pagótami galá machili mapo'ná Je-

susi siméa olali, echalí aboni ayena cho echo'ná así simíbali. A'lí Jesusi auchécho galá nareli echi wikabé pagótami, ayena cho Binói galá nawésali aboni, jeanigá mapu Riosi ne galá nulé si'néami pagótami mapu ikí galá bichiyami ju. Echalí Binói ayena cho ku sa'wali echi jaré nayúkami.

¹² Echalí rawé ma alíwachi, echi jaré makói miná okuá mapu Jesusi binérali, ne si'néami echo'ná Binói yuwa sili. Echalí aboni jeaneli: Ma ku julá echi wikabé pagótami mapurigá aboni echo'ná mulubé rijówachi simíbaga riwimea mapo'ná chi'libama, ayena cho mapurigá aboni echo'ná ralimea ko'wáami, mapujiti jena'í waná kawichí tarapé te ko'wáami. ¹³ Chopi Jesusi jeaneli: 'Yemi aboni 'yasi mapurigá aboni galá ko'mea. Echalí echi jaré makói miná okuá jeaneli: Tamujeta chopi pe malipi pani niwa, okuá rochí ayena cho. Echi-jiti tamujeta ketasi omérabo kóoya je'ná wikabé pagótami, ayena ketasi auchecho siné ku simásagá, auché jaré wikabé ko'wáami raliboya. ¹⁴ A'lí echi wikabé pagótami mapuyena malí mili rijói níili. Chopi Jesusi ayena cho jeaneli echi jaré makói miná okuá: Echo'ná rojuaga muchínalasi echi wikabé pagótami, malisa makói iyénasí niráa. ¹⁵ A'lí aboni echirigá olali. Ayena cho echi wikabé pagótami echirigá rojuaga muchíbali. ¹⁶ Echalí Jesusi chapili echi malí kúuchi pani, echi okuá rochí ayena cho. A'lí Binói 'néniga echo'ná ripá riwigachi, natétara 'yali Riosi. Echalí Jesusi galá rojuániga 'yali echi jaré mapu Binói binérali, mapurigá aboni nachútama echi jaré wikabé pagótami. A'lí mapalí Jesusi echirigá olali, echalí echi jaré pani wikabé muwéali. ¹⁷ A'lí si'néami echi jaré wikabé pagótami galá ko'wali, ayena cho aboni ne galá posali. A'lí ma sunisa ko'yá, aboni ku napabuli suwaba echi jaré kúuchi chi'wáami ko'wáami mapu ikí tibili. A'lí aboni echirigá galá buchíwali makói miná okuá walírali.

Echi Pegro galá nawesa mapu Riosi ma wilali echi Jesusi mapurigá Walubela Ku'wíriami niráa, echi Cristo anilíwami

(Mt. 16:13-20; Mr. 8:27-29)

¹⁸ Siné rawé Jesusi waminá waná simili mapurigá Binói bi'neli niráa ra'ichama Riosi yuwa. Echalí chopi Binói yuwa muchili echi jaré makói miná okuá mapu Binói binérali. Echalí Jesusi jeanigá rukueli aboni: ¿Churigá aní echi auché jaré pagótami? ¿Chigá tamí mayé mapu Nijé ju? ¹⁹ Echalí aboni ku nijéwaga jeaneli: Jaré pagótami aní mapu Mujé ju echi Juani mapu pagóami níili, mápumi ma ku owínali mapalí mi ma mi'lirúami níili. Auché jarecho aní mápumi echi Elfasi ju, mápumi ma ku nawali jena'í wichimóbachí. Auché jarecho aní mápumi bilé ki'yá bitéami Riosi jiti nawésami ju, mápumi ma ku owínali. ²⁰ A'lí Jesusi jeanigá rukueli: ¿'Yémitamo, chigá tamí mayé? Echalí echi Simoni Pegro ku nijéwaga jeaneli: ¡Mujé ju echi Cristo!

¡Riosi mi wilali mapurigá Walubela Ku'wími niráa!

²¹ Chopi Jesusi wabé nuleli mapu aboni ketasi wesi je'ná jerigá ruyema.

Jesusi bachá niráa nawesa jeanigá mapu Binoyko mi'lirúami níima

(Mt. 16:20-28; Mr. 8:30-9:1)

²² A'lí Jesusi jeaneli: Riosi ne bichíwali tamí wilali mapurigá Ku'wíriami niráa. Ayena cho arigá 'wérali ju mapuriganí ne wabé risúu olárami níima. A'lí echi jaré o'wéala ochérami Juríosi tamí kichima, echi jaré o'wéala sacerdote ayéna cho, echi jaré nulalíwami binériami asíchiko. A'lí Nijeni arigá mi'lirúami níima, chopi Nijeni baikiyá chi'ligá auchecho ku owínama.

²³ A'lí Jesusi jeanigá ruyeli si'néami aboni: A jaré 'yemi nakisáagá olánala mapurigá Nijeni nakí máputamo olabo, ketasi waminabi olasi mapurigá 'yemi aboni chopi nakí olánala. Sinibí rawé chopi galá nijéwaga olasi mapurigá Nijé 'yemi nimí nulé, ayena cho arigá anachasi maparítamo risúu olárami níibo, achigórigá mapurigá Nijeni anachama mapalí Nijeni wabé risúu olálami níima. ²⁴ Mapuyíripi rijói chopi kaníлага bitélanaliko jena'í wichimóbachí, échiko chopi miná mukumea. Chopi mapuyíripi rijói chopi olánaliko mapurigá Nijeni nakí, arigá siné káachi waminá mi'lirúami níisa, échiko ne sinibí niráa ku bitélama. ²⁵ A'lí Jesusi jeaneli: A bilé rijói ne suwaba mésagá jena'í wichimóbachí nirúami wikabé namuti, chopi a échiko arigá miná mukusáagá, echalí suwaba echi jaré wikabé namuti tarapé ku ku'wírama echi yiri rijoy. ²⁶ Mapujiti mapuyíripi rijói tamí jiti riwélasagá, Nijé Ra'íchala jiti riwélasagá omá, Nijeni ayena cho riwélama echiyiri rijói jiti mapalí Nijeni wabé omériga ku nawama jena'í wichimóbachí mapurigá ne wabé Walubela niráa. Riosi tamí wilali mapurigá Ku'wíriami niráa. A'lí echalí mapalini ku nawama jena'í wichimóbachí, Riosi Onorúami waminabi tamí walubérama, ayena cho echi jaré Riosi kapitánawala tamí walubérama. ²⁷ Ayena cho Jesusi jeaneli: Nijé 'yemi nimí ne bichíwaga ané mapu jaré 'yemi jena'í jáwami ketasi cho suwibóatamo, átamo ketasi cho riwisáagá mapurigá Riosi ne wabé omériga nulé jena'í wichimóbachí piréami pagótami, si'néami mapu ikí galá bichiyami ju.

Echi Jesusi niwárami níili ne wabé ratábami niráa

(Mt. 17:1-8; Mr. 9:2-8)

²⁸ A'lí pe wakinánokuá osá naó rawé yénasí mapalí jonsa Jesusi je'ná jerigá anili, echalí Jesusi moyénali echo'ná biléana wabé ripabé rabó, mapurigá Binói echo'ná ra'ichama Riosi yuwa. A'lí Jesusi ayenacho toli echi Pegro, echi Jakobo ayena cho, echi Juani asíchiko. ²⁹ A'lí mapalí Jesusi, Riosi yuwa ra'íchali, echalí Binói akala si'nú nakulíwarami níili. A'lí Binói napáchala

ayena cho ne wabé rosákami nakulíwarami níili, ne wabé ratábami ayena cho. ³⁰ Echali ke sayiná echo'ná Jesusi yuwa jábali okuá rijói mapu Binói yuwa ra'íchali. A'lí echi okuá echi Moisesí níili, echi Elíasi ayena cho. Okuánika chabé ki'yánala piréali jena'í wichimóbachi. ³¹ Chopi echali rawé aboni echo'ná ripá riwigachi jonsa síami níili, echijiti okuánika ne wabé ratábami níili. A'lí aboni, Jesusi yuwa, ra'íchaga anili mapu churigá echi Jesusi mi'lirúami níima riwéali echo'ná Jerusalémachi. ³² Echali echi Pegro ne wabé kochináali, echi auché jaré binói yuwa muchúami ayena cho. Chopi aboni arigá ketasi kochili. Echali aboni galá riwali mapurigá Jesusi ne wabé ratábami niráa nakulíwarami níili; ayena cho aboni galá riwali echi auché okuá rijói mapu Jesusi yuwa muchili. ³³ A'lí mapalí echi okuá rijói ma ku simiba 'yéali echo'ná jonsa mapo'ná Jesusi wilili, echali echi Pegro jeaneli echi Jesusi: ¡Binériami, ne wabé galá ju mapu tamujeta jena'í muchuwi! Jena'í ni-wabo bikiyá kalí látami. Bilé kalí Mujé níwala níima, auché bilé echi Moisesí níwala níima, auché bilé echi Elíasi níwala níima. Chopi echi Pegro ne wabé maja-járatami níili, echijiti binói ketasi machili mapurigá binói ra'íchaga anili. ³⁴ A'lí mapalí echi Pegro abijí echirigá ra'íchali, echali ke sayiná echo'ná ne wabé simírami bimoli mapu yénasí aboni ma ke machíili. A'lí aboni ne wabé majali mapalí echirigá ikili. ³⁵ Echali Riosi Binói echo'ná bimolírali jonsa ra'íchaga jeanili: Je'ná Jesusi ju keni Raná mápuni ne wabé kalé. Wabé galá namsi Binói Ra'íchala. ³⁶ Chopi mapalí Riosi ma sunili echirigá ra'icha, echali echi bimolí ma ku kawili. A'lí mapalí echi jaré binéami auchecho galá 'néali, echali aboni riwali mapu echi Jesusi we bi'neli tibili; chopi echali rawé aboni ke wesi ku ruyeli mapurigá aboni riwali.

Jesusi machí pali bilé riablo aliwala echo'ná pachá bilé towí sulálachi jonsa

(Mt. 17:14-21; Mr. 9:14-29)

³⁷ A'lí ba'alínala rawé mapalí aboni auchecho ku tiguínali echo'ná ripá rabó jonsa, echali wikabé pagótami simíbali Jesusi natipábiya. ³⁸ Echali bilé rijói echo'ná wikabé pagótamichi inárali mapu o'weli ra'íchaga jeaneli: Binériami, ne wabé nimí tani mapurigami ku sa'wama keni raná, mapujiti échiko bilepi ju keni raná. ³⁹ Ayena cho binói wabé risúu olárami ju, mapujiti bilé wabé chati riablo aliwala bakí echo'ná pachana binói sulálachi. Echali echi riablo aliwala ne wabé o'weli sinata echi nijé ranala, ayena cho echi riablo aliwala olá mapurigá echi keni raná wabé umukúsuwami niráa níima mapuyénasí binói ne wabé simírami ronena. A'lí echi wabé chati riablo aliwala sinibí echirigá wabé risúu olá echi nijé ranala; chopi mapalí echi riablo aliwala ma suní ne wabé simírami risúu olayá, echali échiko ma ariwé echi keni raná. ⁴⁰ Jipi nijeni wabé tá-

nali echi jaré mapu Mujé binériali mapurigá aboni ku machí pama echi riablo aliwala, chopi aboni ketasi omériali. ⁴¹ Echali Jesusi jeaneli echi jaré mapu Binói binériali: ¡Mbá! ¡'Yémitamo ketasi galá bichiyami ju! ¡'Yémitamo chopi wabé nakólaga oláami ju! ¿Kilíbuko yénasí arigá 'wériali ju mapu Nijeni 'yemi nimí yuwa asimea? ¿Chu yénasí 'wériali ju mapu Nijeni echirigá anachama mapujítamo ketasi galá tamí bichii? Echali Jesusi jeaneli echi towí onolá: ¡Wakiná to echi mujé ranala! ⁴² Chopi mapalí echi towí murubéanali Jesusi yuwa, echali echi wabé chati riablo aliwala auchecho siné rikábali echi towí. Echali echi si'nú aliwá auchecho wabé rikúmtali echi towí. Chopi Jesusi wabé iwéami nuleli echi riablo aliwala mapu ku machínama echo'ná pachana echi towí sulálachi jonsa. A'lí mapalí échiko ma ku machínali, echali echi towí ma ku sa'wíami níili. A'lí Jesusi auchecho ku 'yali echi onolá. ⁴³ A'lí si'néami echi jaré pagótami chopi wabé 'nátaga muchili mapurigá Riosi ne wabé Walubela ju.

Jesusi auchecho bachá niráa ruyé mapurigá Binói mi'lirúami níima riwéali

(Mt. 17:22-23; Mr. 9:30-32)

A'lí mapuyénasí si'néami pagótami echirigá wabé 'náatali mapurigá Jesusi wabé omériaga olali, echali Jesusi jeaneli echi jaré mapu Binói binériali: ⁴⁴ Ne galá kipusi je'ná jeyili, ayena cho ketasi ku wikawasi mapurigá Nijé 'yemi nimí jeané: Echi auché jaré pagótami tamí bologá tomea mapurigá aboni tamí mi'limea. Nijeni wilárami níili mapurigá Ku'wíríami niráa. ⁴⁵ Chopi echi jaré mapu Jesusi binériali ketasi galá machili mapurigá binói ra'íchaga aneli aboni, mapujiti aboni ketasi 'yárami níili mapurigá aboni echirigá galá machimea; ayena cho aboni wabé majali rukuénala mapu churigá aniwáami níili mapurigá Binói ra'íchaga anili.

¿Chigá 'nalí tamujé ne wabé simírami walula ju?

(Mt. 18:1-5; Mr. 9:33-37)

⁴⁶ Echali echi jaré mapu Jesusi binériali wabé yáati chótali a'nagupi ra'íchaga nasayérasiya mapalí aboni a'nagupi ra'íchaga rukueli mapu chigá 'nalí aboni ne walula níima echi auché jaré aboni yuwa. ⁴⁷ Chopi Jesusi ne galá machili mapurigá aboni 'náatali. Echali Binói chapigá bilé táa towí, echo'ná Binói yuwa achali. ⁴⁸ Echali Jesusi jeaneli echi jaré mapu Binói binériali: Je'ná towí wabé tabéala ju, chopi átamo tamí kalésagá, arigá 'wériali ju máputamo ayena cho kalebo echiyiri kúuchi. A'lí echi mapu tamí kaleko, échiko ayena cho wabé galé Riosi, mapu tamí júuli jena'í wichimóbachi. Ayena cho Nijé 'yemi nimí ané mapu echi bilé 'yemi mapu waminabi tabéala ju, échiko arigá ne walula ju si'néami echi auché jaré 'yemi yuwa.

Echi mapu ketasi tamujé tamí sayérago échiko tamujé tamí yuwa ju
(Mr. 9:38-40)

⁴⁹ A'lí echi Juani jeaneli: Binériami, tamujeta riwali bilé rijói mapu miná machí a'wali echi jaré riablo aliwala echo'ná jaré pagótami sulálachi jonsa, mapalí binói Mujé riwalá jiti rugá nuleli echi jaré riablo aliwala mapurigá aboni echirigá ku 'machínama. A'lí tamujeta ra'ámali mapu ketasi echirigá olama, mapujiti échiko ketasi tamujé tamí yuwa najata. ⁵⁰ A'lí Jesusi jeaneli: Ketasi echirigá ra'amasi, mapujiti echi mapu ketasi tamujé tamí sayérago, échiko tamujé tamí yuwa ju.

Jesusi péé oyérali echi Jakobo, echi Juani

⁵¹ A'lí mapalí ma sebama riwéali echalí rawé mapalí Jesusi echo'ná ripá riwigachi ku torúami níima, echalí Jesusi tarapé majaga chótali echo'ná Jerusalémachi ku simiyá. ⁵² A'lí Jesusi echo'ná bacháami a'láranala júuli jaré rijoy. Echali aboni bachá simíwali echo'ná biléana walúlachi, echo'ná Samáriachi anilíwachi kawírali nirúami. A'lí aboni tali bilé kalí mapo'ná Jesusi kochimea riwéali echalí rokogó. ⁵³ Chopi echo'ná piréami pagótami tarapé risénsia 'yali mapurigá Jesusi echo'ná kochimea, mapujiti aboni galá machili mapu Binói echi jaré Juríosi pagótami níili, ayena cho mapu Binói echo'ná Jerusalémachi simíami níili. ⁵⁴ A'lí echi Jakobo, echi Juani ayena cho, Jesusi yuwa binéami níili. Chopi mapalí aboni riwali mapu echo'ná piréami pagótami ketasi risénsia 'yali mapurigá Jesusi echo'ná kochiméa, echalí aboni we na'áwali. Echijiti aboni jeanigá rukueli echi Jesusi: Walubela, ¿kechami nakí máputa nulabo mapu echi na'í rikínama echo'ná ripá riwigachi jonsa, mapurigá aboni káraga suwábarami níima, achigórigá mapurigá echi walula Elíasi olali chabé ki'yá rawé? ⁵⁵ Echali Jesusi ku kuwana 'néniga péé oyérago jeaneli: 'Yémitamo mayé mapu echi Wabé Galabé Riosi Iwigala 'yemi mi nulé echirigá olánala. Chopi 'yémitamo echirigá olánali achigórigá mapurigá echi auché jaré chati oláami pagótami nakí olánala. ⁵⁶ Nijeni wilárami níili mapurigá Ku'wíríami niráa. A'lí Nijeni ketasi nawali jena'í wichimóbachí mapurigani suwábama echi jaré pagótami. Chópini nawali mapurigani wabé ku'wíríama aboni, ayena cho mapurigani ku wikawama mapurigá aboni chati olali. Echali si'néami aboni waminá simíwali echo'ná auché biléana rijówachí yénasí, mapurigá aboni echo'ná chi'libama.

Jaré nakili Jesusi yuwa najátanala
(Mt. 8:19-22)

⁵⁷ A'lí mapalí aboni echo'ná buwichí sírali, echalí bilé rijói jeanigá jeaneli echi Jesusi: ¡Walubela, nijé nimí sinibí najátama echo'ná kanápuromí mapo'ná mi

simea! ⁵⁸ Echali Jesusi ku nijéwaga jeaneli: Echi jaré kiyochi echo'ná iwárali piré; ayena cho echi jaré chuluguí niwa aboni rosolá. Chopi Nijeni ketasi niwa bilé kalí mapo'nani bu'umea. Nijeni wirárami níili mapurigá Ku'wíríami niráa. ⁵⁹ Ayena cho Jesusi jeaneli auché bilé rijói jeanigá: ¡Tamí najató! Chopi echi rijói ku nijéwaga jeaneli: Walubela, nijé onolá ke 'me ayó mukuméaré mapujiti ma we ochérami ju. Abijí tamí ariwé mapuyénasí nijeni ma wi'yérali toma echi nijé onolá. Echali nijé nimí najátama. ⁶⁰ Chopi Jesusi jeaneli: Echi jaré pagótami mapu ikí ketasi bichíyami ju, ma mapurigá suwíami niráa ju. Ariwé mapurigá aboni toma echi auché jaré aboni níwala suwíami. Chopi mujé we yáati simigá, nawisá mapurigá Riosi galá nulé echi jaré pagótami mapu ikí galá bichíyami ju. ⁶¹ A'lí auché bilecho jeaneli: Walubela, nijeni nakí mi yuwa najátanala, chopi abijí tamí ariwé mapurigani ku simigá, galá ku ripórama echi auché jaré echo'ná nijé bitélachi muchúami. ⁶² Echali Jesusi jeaneli: Jaré pagótami bachá niráa we nakí Nijé nóchala olayá, chopi aboni ketasi sinibí niráa tamí yuwa nocha mapujiti aboni chopi we 'nata muchuwi mapurigá aboni ma ariweli wikabé namuti. A'lí aboni ketasi galabé nocha Nijé nóchala olayá, achigórigá mapurigá bilé rijói ketasi galá nocha mapalí binói sinibí ku kuwana 'neni mapalí binói wasaraya iyena. Echijiti echiyiri bichíyami ketasi chirigá galabé nocha Nijé nóchala olayá.

Jesusi júuli nawisánala kicháosa makói rijói

10 Pe wakinánokuá echi Walubela Jesusi ayena cho chapili auché jaré kicháosa makói rijói bichíyami, mapurigá Binói nawisánala julama, mapurigá aboni, okuá niráa bachá simama echo'ná ne suníami o'wéalachi, ayena cho ne suníami rijówachí mapo'ná Jesusi Binói nawama riwéali. ² Echali Jesusi jeaneli aboni: Ne wikabé pagótami ketasi cho galá bichíi Riosi Ra'íchala, chopi Nijeni arigá nakí mapu aboni galá bichíiima. A'lí pe okuáa pagótami ju mapu nawesa Riosi Ra'íchala. Echijiti tansi mapurigá echi Walubela Riosi waminabi wikabé nawésanalaga julama, mapurigá echi auché jaré pagótami galá bichíiima Riosi Ra'íchala. ³ Arigá simíbaga nawisábasi echi Galabé Riosi Ra'ichala. Nijeni 'yemi mi jula mapurigátamo kilí ologá pirélabo mapurigá jaré 'méchuli niráa, chópitamo nawésabo jaré pagótami mapu ne wabé jobátami níima mapurigá echi jaré nalíwali niráa. ⁴ Echali ketasi tosí bilé chiwáwala mapalítamo simabo echo'ná buwichí. Nirapé tosí bilé maleta. Ayena cho galá akarasa, ketasi tosí auché jaré aká. Ketasi wi'libé niráa ra'ichasi, mapalítamo naripabo auché jaré pagótami echo'ná buwichí, chopi we sapú simasi. ⁵ Ayena cho mapalítamo chi'libábiya mo'wiboa echo'ná jaléana kalírali, we yáati ripórago jeanesi echo'ná piréami: Tán-

abota Riosi mapurigátamo kilí ologá pirélabo. ⁶ A'lí a echo'ná muchísagá jaré pagótami mapu we nakí kilí ologá pirélanala, aboni ne galá nijéwaga olama mapurigá 'yémitamo nawésabo aboni. Echali aboni ne bichíwali galá kilí ologá pirélama, chopi a echi jaré pagótami ketasi nakisáagá echirigá kilí ologá pirélanala, echali abóniko ketasi nijéwaga olama mapurigá 'yémitamo nawésabo aboni. ⁷ Ayena cho mapalí jaré pagótami 'yemi mi nalema echo'ná aboni pirélachi, echo'ná bilénapi kalírali tibisi. Galá kosí mapu ikí echo'ná piréami 'yemi mi kowa. Galá níima echirigá ologá, mapujiti galá ju mapu si'néami echi jaré nóchami galá ku natétarami níima. Ketasi simasi echo'ná suníami kalírali echi ko'wáami tásiya. ⁸ A'lí echo'ná kanápuromí o'wéalachi mapo'nátamo sebabo mapo'ná echo'ná piréami pagótami 'yemi mi risénsia 'yama tibínala echo'ná aboni kalíflachi, echo'ná galá kosí mapu ikí aboni 'yemi mi kowa. ⁹ Ayena cho galá ku sa'wasi si'néami echi jaré nayúkami mapu ikí muchuwi echo'ná o'wéalachi. Echali jeanigá ruyesi echo'ná piréami pagótami: Ke 'me ayó rawé Riosi 'yemi mi galá nulema, átamo galá bichíisagá. ¹⁰ Chopi átamo sisáagá echo'ná biléana walúlachi mapo'ná echo'ná piréami pagótami ketásirapé kipúnali 'yemi nawésawala, echali mapalítamo ku simiba echo'ná jonsa, je'ná jeanigá nawésasi: ¹¹ Tamujé ma ku bi'wabo ne suwaba 'yemi walúlawalachi nirúami napisó mapu jena'í tamujé ronólachi chukúbali. Tamujé echirigá olabo mapujiti 'yémitamo ketasi bichíinali tamujé nawésawala. Chopi arigá machisí 'yemi, mapu ma sébali tétali mapalí Riosi we nakí nulénala 'yemi, echo'ná 'yemi sulálachi niráa. ¹² Echali Jesusi aneli echi jaré mapu Binói júuli nawisánala, jeanigá: 'Yémi nimí ané mapu echali ne jubá rawé, echo'ná walúlachi piréami pagótami ne wabé simírami walubé kastigo 'yárami níima, chopi echo'ná Sorómachi anilíwachi chati oláami pagótami ketasi 'me walú kastigo 'yárami níima mapurigá aboni.

Jaréana o'wélachi piréami ketasi bichíili

(Mt. 11:20-24)

¹³ 'Yemi pagótami echo'ná Korasínchi anilíwachi piréami ne wabé risúu olárami níibotamo, 'yémi pagótami echo'ná Becháirachi anilíwachi piréami ayena cho. Nijeni wisabé wabé omériga ologá iyénali echo'ná 'yémi, chopi 'yémitamo arigá ketasi tamí bichíili. Chopi a Nijeni echirigá wabé omériga ologá inásagá echo'ná Tírochi anilíwachi, echo'ná Sirónachi anilíwachi ayena cho, mapo'ná we pilé echi jaré isena pagótami, echali aboni chabénala niráa ma wikáwali tánami Riosi, ne wabé chajótami napáchaga, ayena cho ne wabé napisó uchérami níisa, mapujiti aboni ma ne wabé o'mónami níimi mapujiti aboni echirigá chati olali. ¹⁴ Echijiti echali ne jubá rawé 'yémitamo ne wabé simírami walubé kastigo 'yárami níibo, chopi echo'ná

Tírochi piréami ketasi 'me kastigo 'yárami níima, echo'ná Sirónachi piréami ketasi cho. ¹⁵ A'lí 'yemi echo'ná Kapernaúmachi piréami we mayé máputamo wabé ripabé jawárami níibo. Chópitamó arigá miná ri'lé riáblochí a'wátami níibo.

¹⁶ A'lí Jesusi jeaneli echi jaré kicháosa makoy: Echi jaré mapu galá bichíiko 'yemi nawésawala, aboni ayena cho galá tamí bichíi. A'lí echi jaré mapu 'yemi mi we kichiko, aboni ayena cho tamí wabé kichí. A'lí echi jaré mapu tamí kichiko, aboni ayena cho wabé kichí Riosi mapu tamí júuli jena'í wichimóbachi.

Echi jaré kicháosa makói ma ku sili

¹⁷ Echali pe wakinánokuá echi jaré kicháosa makói ma ku sili. A'lí aboni ne wabé kaníliga jeaneli: ¡Walubela! ¡Tamujeta nuleli echi jaré chati riablo aliwala mapurigá aboni ma ku 'machínama echo'ná echi jaré pagótami sulálachi jonsa, a'lí aboni arigá tamujé tamí nijéwali, mapalita ra'íchali Mujé Riwalá jiti!

¹⁸ Echali Jesusi jeaneli: Nijeni ma riwali echi Satanasi riwéami riablo echo'ná ripá riwigachi jonsa wichíami mapurigá bilé ukuí ni'wíami niráa. ¹⁹ Ayena cho Nijé 'yemi nimí jiwérali mapurigátamo arigá oméрабо rikeya echi jaré sinowi, echi jaré machila ayena cho. 'Yémitamo arigá oméрабо echi riablo, ayena cho binói ma ketasi omérama 'yemi mi chati olíriya. ²⁰ Chopi ketasi kanílasí 'yemi mapujiti echi jaré riablo aliwala galá nijewi mapalí 'yémitamo wabé nulé. ¡Chopi wabé kanílasí mapujiti 'yemi riwalá ma osirúami ju echo'ná ripá riwigachi mapurigá Riosi níwala niráa!

Jesusi ne wabé kaníili

(Mt. 11:25-27; 13:16-17)

²¹ Echali Jesusi ne wabé simírami kaníili, mapujiti echi wabé Galabé Riosi Iwigala ne wabé kanírali Binoy. A'lí Jesusi, Riosi yuwa ra'íchaga jeaneli: Nijé nimí waminabi wabé walubéraga ané, Mujé Onorúami, mápumi ne wabé Walubela ju echo'ná ripá riwigachi, jena'í wichimóbachi ayena cho, mapujítimi chinásali suwaba je'ná we galabé namuti mapurigá echi jaré wabé 'nátami pagótami ketasi machimea, ayena cho mapurigá echi jaré wabé machíami pagótami ketasi cho machimea. Chópimi je'ná jerigá ma galá riwírali echi jaré kúuchi mapujítimi echirigá nakili.

²² Echali Jesusi ayena cho jeanigá aneli echi jaré pagótami: Echi keni Onó ma tamí 'yali ne suwaba namuti. Ke wesi galá machí mapu Nijé Binói bi'nélipi Riosi Ranala ju; chopi echi Walubela Onorúami galá machí, ayena cho ke wesi galá machí echi Onorúami, chopi Nijeni galá machí Binoy. Nijeni bi'nélipi Riosi Ranala ju; ayena cho echi jaré pagótami galá machí echi Onorúami, si'néami mapu ikí aboni Nijeni nakili machíranala echi Onorúami.

²³ Echali Jesusi galá 'néniga jeaneli echi jaré mapu Binói binérali: 'Yémitamo ne wabé kaníliami ju mapu-jítitamo galá ritiwá suwaba je'ná jeyiri namuti mapurigá Nijeni olá. ²⁴ Mapujiti Nijé 'yemi nimí ané mapu wikabé echi jaré ki'yá piréami Riosi jiti nawésami, ayena cho wikabé echi jaré o'wéala silíami ne wabé nakili 'nénala mapurigá 'yémitamo ma riwali mapu Nijeni wabé omériga olali, chopi aboni ketasi chirigá riwali. Ayena cho aboni wabé nakili námanala mapurigá 'yémitamo ma námali mapurigá Nijeni nawésali, chopi aboni arigá ketasi echirigá námali.

Jesusi irétaga nawésali bilé galabé oláami rijói jiti rugá, mapu echo'ná Samáriachi bitéami níli

²⁵ Echali bilé rijói nuralíwami binériami we nakili machinala mapurigá Jesusi binérali. Echijiti echi rijói jeanigá rukueli: ¿Churigani olama mapurigá nijeni galá ku bitélama Riosi yuwa, ne sinibí niráa? ²⁶ A'lí Jesusi jeanigá rukueli: ¿Churigá osirúami ju echo'ná Riosi nualilala oselíwalachi? Mujé binói galá machí mapurigá echo'ná osirúami ju. ²⁷ Echali echi rijói nuralíwami binériami ku nijéwaga jeaneli: Ne sulachí niráa ne wabé galesi echi Walubela kétamo Riósawa, ayena cho ne suwaba kétamo iwígá niráa ne galá galesi Riosi, ayena cho ne suwaba kétamo jiwérawa niráa ne galá galesi Riosi. A'lí ne suwaba kétamo 'nátawa niráa ne galá galesi Riosi; ayena cho ne wabé galesi echi auché jaré pagótami achigórigá mapurigami a mujé binói niráa galé. ²⁸ Echali Jesusi jeaneli: Mujemi ne galá ku nijéwaga anili. Echirigami olásagá, a'lí bichemi sinibí bitéami níima.

²⁹ Echali echi nuralíwami binériami we nakigá mapu a binói niráa galabéalama, a'lí jeanigá rukueli: ¿Chigá biché 'nalina galema echi auché jaré pagótami? ³⁰ Jesusi ku nijéwaga jeaneli: Siné rawé bilé rijói rikínaga inárali echo'ná ripáami Jerusalémachi jonsa, echo'ná tu Jerikochi simiyá. Chopi echo'ná buwichí inárami jaré chigórami waminá chapili, echi jaré mapu káraga chigosa echi rijói níwala namuti, waminá 'yeli binói napáchala. A'lí wabé chi'wanasa, echo'ná buwichí ariweli, ma ne noguí mukúami niráa. ³¹ Echali rawé bilé sacerdote anilíwami rijói ayena cho simíraga inárali echo'ná buwichí, echi mapu ma riwisáa echi rijói mapu wabé chi'wanárami níli, arigá ketasi ku'wírali, chopi waminá chakena simírali. ³² Ayena cho echo'ná simírali bilé Levita anilíwami rijói echi mapu echo'ná ri'obachi nóchami níli. Échiko ayena cho mulubéanaga, galá riwali echi rijói mapu chi'wanárami níli. Chopi binói ayena cho chakena simíraga, ketásirapé ku'wíraga, arigá waminá mikabé simili. ³³ Chopi bilé rijói echo'ná Samáriachi bitéami ayena cho echo'ná buwichí inárali, echi mapu ma riwisáa echi rijói mapu chi'wanárami níli, ne wabé natimali. ³⁴ A'lí echo'ná mulubé binói

yuwa nawagá, échiko aceite uchugá ówali mapo'ná chi'wanárami níli. Ayena cho echi uva anilíwami ba'wila uchugá, echali chiní jiti buleli. A'lí echo'ná binói bukúlachi ripá achagá, echo'ná biléana kalírali tosá, ne galá niseli echali rawé. ³⁵ Ayena cho ba'alínala rawé mapalí echo'ná Samáriachi bitéami rijói ma ku simili, echali échiko 'yali osámakóy peso echo'ná kalíwami, ayena cho jeaneli: Ne galá tibú je'ná rijoy. A'lí ami waminabi suwábasagá wenomí, nijé nimí ku natéta-ma, auchocho ku nawasa. ³⁶ Echali Jesusi jeanigá rukueli: ¿Churigami mayé? ¿Chu yiri nalina echi jaré bikiyá rijói galá kaleli echi auché bilé rijói mapu chi'wanárami níli? ³⁷ Echali echi nuralíwami binériami ku nijéwaga jeaneli: Nijeni mayé mapu echi mapu ne galá natimali, waminabi galá galeli. A'lí Jesusi jeaneli: Ayena cho ku simigá mujé, achigórigá galéami nílaga si'néami echi auché jaré pagótami mapu ikí mujemi natepa.

Jesusi nawali echo'ná echi Marta, echi María pirélachi

³⁸ A'lí Jesusi waminabi simigá echo'ná buwichí, echali sébali biléana rijówachi mapo'ná bilé mukí, Marta riwéami, galá nareli echi Jesusi echo'ná binói bitélachi. ³⁹ A'lí echi Marta ayena cho rijiméali binói binirá, echi mapu María riwéami níli, echi mapu mulubé Jesusi yuwa asíbali mapujiti binói we nakili kipúnala Jesusi ra'íchala. ⁴⁰ Chopi echi Marta wabé níliami níli, mapujiti binói we nóchali echi ko'wáami niwayá. Echali echi Marta murubéanaga Jesusi yuwa, jeaneli: Walubela, ¿Kéchami machí mapu echi nijé binilá tamí ariweli mapurigani bi'neli nochama? ¡jeané mapu tamí ku'wírama! ⁴¹ Chopi Jesusi ku nijéwaga jeaneli: Mujé Marta wabemi níliami ju, mapujítimi wikabé namuti nóchali 'nátami ju. ⁴² Chopi bilepi namuti arigá 'wérali ju máputamo olabo. A'lí echi María chopi nakili olánala echi ne galabéala; ayena cho ketasi wesi omérama jiwériga olayá mapuyénasí echi María ma ketasi echirigá binema Nijé Ra'íchala.

Jesusi we binera churigá galá ju Riosi yuwa ra'ícha
(Mt. 6:9-15; 7:7-11)

11 Siné rawé Jesusi, Riosi yuwa, ra'ícha asali echo'ná biléana waná. A'lí mapalí Binói ma sunili, echali bilé mapu Binói binérali je'ná jerigá aneli: Walubela, tamujé tamí binera Riosi yuwa ra'ícha, mapurigá echi Juani ayena cho binérali echi auché jaré mapu binói yuwa binéami níli. ² Echali Jesusi jeaneli: Mapalítamo Riosi yuwa ra'ícha, je'ná jerigá anesi: Tamujé Onolá mápumi echo'ná ripá riwigachi atí, waminabi ne wabé galabé anérami nílaga Mujé riwalá. Ne galá nulé Mujé, jena'í wichimóbachí piréami pagótami. Ne suwaba galá olárami nílaga jena'í wichimóbachí, mapurigá Mujemi chopi nakí, echo'ná

ripá riwigachi ayena cho. ³ Tamujé tamí 'ya echi ko'wáami máputa newalé jipi rawé. ⁴ Tamujé tamí ku wikawi mapurigata we chati olali, mapujiti tamujé ayena cho ku wikáwala ne si'néami echi auché jaré mapu tamujé tamí chati olali. Ketasi ariwé Mujé mapu tamujeta chati olántarami níibo. Chopi tamujé tamí ku'wira mapurigata ketasi chati olabo.

⁵ Echali Jesusi ayena cho jeaneli: Siné káachi bilé 'yemi níwasagá bilé amígowa, echi mapu nasipa rokogó jeanigá nawasa echo'ná echi bilé 'yemi bitélachi: Keni amígowa, tamí tanewi bikiyá pani, ⁶ mapujiti auché bilé nijé amígowala mikabé jonsa simíami, bukúlí nawali echo'ná nijé bitélachi. Chópini ketasi te ko'wáami mapu nijeni kóoma binoy, ⁷ echali Nijeni mayé mapu echi bilé 'yemi echo'ná pachá jonsa ku nijéwaga jeanema: Ketasi tamí kumé. Echi 'yera ma 'yeta wilí. Ayena cho keni kúchuwa ma tamí yuwa bití jena'í pétachi. Ma ketásini omero asísiya, mapurigá nimí 'yama ko'wáami. ⁸ Echali Jesusi waminabi jeaneli: Nijé 'yemi nimí ané mapu échiko ketasi 'yánalaga asísima mapujiti binói amígowala ju, chopi a échiko waminabi tanéwaga kumésagá, echi rijói arigá asísiga 'yama ne suwaba mapu ikí binói amígowala newalé. ⁹ Echirigá Nijé 'yemi nimí jeané: Galá tansi Riosi, a'lí Binói 'yemi mi 'yama. Waminabi galá asi, a'lí bichétamo riwiboa. Waminabi bayesi echo'ná yéachi, a'lí echo'ná yéachi 'yemi mi galá iráparami níima. ¹⁰ Mapujiti si'néami mapu ikí tániko, ne galá narema; ayena cho si'néami mapu ikí amiko, ne galá riwimea, ayena cho si'néami mapu ikí bayeko echo'ná yéachi, galá iráparami níima. ¹¹ Ke wesi 'yemi onorúami arigá 'yama bilé rité mapalí 'yemi kúchwala tani bilé rimé. Nibilé wesi 'yama bilé sinowi, mapalí aboni tani bilé rochí. ¹² Nibilé wesi 'yama bilé machila mapalí aboni tani bilé tolí ka'wala. ¹³ A'lí 'yemi máputamo chati oláami ju, arigá machiságá galabé namuti koya echi jaré 'yemi kúchwala, echi 'yemi Onolá echo'ná ripá riwigachi atíami waminabi galabé nijima echi Wabé Galabé Riosi Iwigala echi jaré mapu tániko.

Jesusi wi'nijírami níili mapurigá echi ne walula riablo aliwala omérawala níwami niráa

(Mt. 12:22-30; Mr. 3:19-27)

¹⁴ Siné rawé Jesusi ku machí pánalaga olali bilé wabé chati riablo aliwala echo'ná pachá bilé rijói sulálachi jonsa. A'lí echi rijói ke ra'íchami níili mapujiti binói níwali echi wabé chati riablo aliwala; chopi mapalí echi riablo aliwala ma ku machínali, echali echi rijói ma ku omérrari ra'icha. Echali echi pagótami echijiti wabé walubélaga aneli echi Jesusi, ¹⁵ chopi jaré jeaneli: Je'ná Jesusi chopi ku machí a'wasa echi jaré riablo aliwala, echo'ná pachana echi pagótami sulálachi jonsa mapujiti binói níwa echi Berseubi riwéami walubela riablo aliwala omérawala. ¹⁶ Ayena cho auché jaré we tánali mapurigá Jesusi sinepi niráa wabé omériga olama ma-

purigá ke wesi auché jaré pagótami omérali olayá, mapurigá Riosi chopi 'yali Binói olánala. Echali aboni chopi nakili machinala acha Jesusi ne bichíwali omérali echirigá wabé omériga olayá. ¹⁷ Chopi Jesusi galá machili mapurigá aboni 'nátali. Echijiti Binói jeaneli: Mapalí biléana walúlachi piréami a aboni niráa a'nagupi nasayéraga, wikanáami niráa rojuasa, echali echo'ná walúlachi piréami ma ketasi waminabi omérama napawika piréliya mapurigá biléana walúlachi piréami niráa. Ayena cho a bilé rijói kúchwala a'nagupi nasayérasagá, aboni ma ketasi omérama napawika piréliya mapurigá bilé rijói kúchwala niráa. ¹⁸ A'lí Jesusi ayena cho jeaneli: Echirigá ayena cho a echi Satanasi riwéami riablo a binói kapitánawala waminá sayérasagá, echali echi Satanasi ma ketasi waminabi mapurigá bilé walubela níima. Echali Jesusi waminabi jeaneli: Nijé 'yemi nimí je'ná jerigá aneli, mapujiti 'yémitamo anili mapu Nijeni chopi omero ku machí a'wayá echi jaré riablo aliwala, mapujítamo aní mapu Nijeni niwa echi ne walula riablo aliwala omérawala. ¹⁹ Chopi a Nijeni echijiti omérasagá ku machí a'wayá echi jaré riablo aliwala, ¿churigá echi 'yemi pagótamawala ayena cho omérama ku machí a'wayá echi riablo aliwala? ¿Echijiti 'yemi aboni pagótamawala echirigá galá machila mapurigá 'yémitamo ne wabé 'yékarami ju maparítamo aní mapu Nijeni niwa echi ne walula riablo aliwala omérawala! ²⁰ Chopi Nijeni ne bichíwali ku machí a'wá echi jaré riablo aliwala, mapujiti Nijeni niwa Riosi níwala omérawala. Echirigá ju mapu Riosi ma galá nulá jena'í 'yémitami.

²¹ Mapalí bilé jiwérami rijoy, bilé wi'lí ripiyá ka, galá tibusa echo'ná binói bitélachi, echali suwaba binói níwala namuti galá tibútami ju. ²² Chopi siné káachi echo'ná nawásagá bilé chigórami ne wabé simírami jiwérami, échiko waminá niyúrama. A'lí echi chigórami suwaba 'yema echo'ná kalíwami rijói níwala wi'lí ripiyá, echi mapujiti echi kalíwami rijói tarapé majáami níili. Echali echi chigórami suwaba 'yesa echo'ná kalíwami níwala namuti, suwaba nachutama mapu ikí binói echirigá chigoka 'wísali.

²³ Echi mapu ketasi tamí yuwa juko, échiko tamí sayérami ju. Ayena cho echi mapu ketasi tamí yuwa napabuko echi auché jaré pagótami, échiko chopi waná chijana echi jaré aboni.

Echi chati riablo aliwala mapu ku nawáli echo'ná mapo'ná jonsa échiko machí pátami níili

(Mt. 12:43-45)

²⁴ Ayena cho Jesusi jeaneli: Mapalí bilé wabé chati riablo aliwala ku machinsa echo'ná pachana bilé rijói sulálachi jonsa, echali echi riablo aliwala echo'ná auché jaréana wakichéachi aya iyena mapo'ná binói bitélama, chopi ketasi riwísáa, echali je'ná jerigá 'nata-ma: Echo'ná nijé bitélachi ku siméani mapo'ná jonsa

nijeni bukulí ku machínali. ²⁵ Chopi mapalí echi riablo aliwala ku nawá echo'ná pachá echi rijói sulálachi mapo'ná jonsa binói bukulí chabénala ku machínali, echalí binói riwimea echi rijói sulálachi ne galá a'láratami mapurigá bilé kalí ne galá pichítami, ne galá a'láratami niráa. ²⁶ Echalí echi bilé wabé chati riablo aliwala bayérama, mapu waminabi wabé chati oláami níima, ketasi mapurigá binói niráa. Echalí ne si'néami echo'ná pachá echi rijói sulálachi mo'wisáa, echo'ná pirélama. Echirigá ikimea mapu echi rijói waminabi wabé simírami risúu olárami níima, ketasi mapurigá ne bachá rawé.

Echi ne bichíwali kanílawami

²⁷ Chopi mapalí Jesusi je'ná jerigá nawésali, echalí bilé mukí echo'ná echi wikabé pagótami yuwa 'yéami, o'weri ra'íchaga jeaneli: Ne wabé kaníriami ju echi Mujé iyela mapu mi ranali, echi mapu mi chi'írali mapalimi táa níili. ²⁸ Chopi Jesusi ku nijéwaga jeaneli: ¡Waminabi ne wabé kaníriami ju si'néami echi jaré mapu ikí galá kipusa Riosi Ra'íchala, echirigá ne galá nijéwaga olako!

Echi jaré chati oláami pagótami we nakili 'nénala mapurigá Jesusi wabé omériga olama mapurigá ke wesi auché jaré pagótami omero olayá

(Mt. 12:38-42; Mr. 8:12)

²⁹ Echalí rawé waminabi wikabé pagótami napawísali echo'ná nologá Jesusi yuwa. A'lí Binói jeanigá nawésali: Je'ná jipi piréami pagótami wabé chati oláami ju. Echijiti aboni chopi taní mapurigá Nijeni wabé omériga olama mapurigá ke wesi auché jaré pagótami omero olayá, mapurigá aboni chopi tamí riwimea echirigá oláachi, chopi Nijeni ketasi echirigá olama bacháami aboni yuwa. Pe minana aboni arigá riwimea tamí yuwa ne wabé omériga oláachi mapurigá olárami níili echi walula Riosi jiti nawésami Jonasi riwéami yuwa. ³⁰ Mapujiti achigórigá mapurigá echi jaré ki'yá piréami pagótami echo'ná Nínibichi piréami riwali mapurigá ne wabé omériga olárami níili echi Jonasi riwéami yuwa, echirigá ayena cho je'ná jipi piréami pagótami galá riwimea mapurigá achigórigá wabé omériga olárami níima tamí yuwa. Nijeni wilárami níili mapurigá Ku'wíriami niráa. ³¹ Ayena cho Jesusi jeanili: Echalí ne jubá wi'nijíwachi rawé, mapalí je'ná jipi piréami pagótami wi'nijírami níima, echalí echi mukí walula siríami mapu echo'ná mikabé 'naka bitéami níili, arigá wi'nijímiya ku asísima je'ná jipi piréami pagótami. Echalí echirigá ikimea mapujiti echi mukí walula siríami ne wabé mikabé jonsa kipúmiya simili mapurigá echi walula silíami Salomoni riwéami ne wabé machíami niráa nawésali; chopi Nijé mápuni jipi rawé jena'í 'yemi yuwa atí, ne wabé simírami Walubela juni, ketasi

mapurigá echi walula silíami Salomoni riwéami. A'lí 'yémitamo arigá ketasi nijewa mapurigá Nijeni 'yemi mi nawesa. ³² Ayena cho echalí ne jubá wi'nijíwachi rawé echi jaré ki'yá piréami pagótami mapu echo'ná Nínibichi anilíwachi piréami níili, si'néami wi'nijíbiya ku 'muchísama je'ná jipi piréami pagótami sayériya, mapujiti ne si'néami aboni galá bichíiga ku ro'wili Riosi yuwa mapalí echi Jonasi nawésali aboni mapurigá Riosi nuleli nawésanala. Chopi Nijé mápuni jipi rawé 'yemi mi yuwa nawésiya atí, ne wabé simírami Walubela juni ketasi mapurigá echi Jonasi. Chopi 'yémitamo arigá ketasi nijewa mapurigá Nijeni 'yemi mi nawesa.

Bilé na'í rajáami niráa, echo'ná pachana echi pagótami sulálachi nirúami

(Mt. 5:15; 6:22-23)

³³ Echalí Jesusi ayena cho nawésaga jeaneli: Tarapé wesi nasoka rikama bilé chopé rajáami, nirapé wesi póлага rikama echo'ná ri'lé pachá biléana kajónchi, keremá. Chopi si'néami pagótami ripabé ne galá machiná niráa rikama echi chopé rajáami, mapurigá echirigá ne galá machírama si'néami mapu ikí mo'wiko echo'ná pachá kalírali. ³⁴ Mujé busila mapurigá bilé na'í rajáami ju, echo'ná mujé sapálachi nirúami. A'lí mapalí mujé busila ne galabé níisagá, echalí mujemi galá machíliami níima, ayena chomi ne galá kónami níima. Ayena cho Riosi galá machírama echo'ná pachana mujé sulálachi, mapurigami galá machimea Riosi Ra'íchala. Chopi mapalí mujé busila wabé chati níisagá, echalí mujemi mapurigá ke machíliami niráa níima, ayena chomi ne wabé risirúami níima. Echalí Riosi ma ketasi machírama echo'ná pachana mujé sulálachi, echijítimi ketasi galá machimea Riosi Ra'íchala. ³⁵ Echijiti ne galá 'nagá tibú mapurigami ketasi rokowáratami níima, chopi mapurigami galá machimea Riosi Ra'íchala. ³⁶ A'lí ami ne suníami echirigá galá rajérami níisagá, ayena cho ami tarapé rukuwáwami níisaga, echalimi ne suwaba galá riwimea mapurigá mapalí bilé na'í rajáami mi we galá rajérama.

Jesusi we oyérali echi jaré Bariseo anilíwami binériami, echi jaré nulalíwami binériami ayena cho

(Mt. 23:1-36; Mr. 12:38-40; Lk. 20:45-47)

³⁷ Mapalí Jesusi ma sunili echirigá ra'icha, echalí bilé rijói Bariseo anilíwami binériami we bayeli, binói yuwa ko'wánala echo'ná binói bitélachi. Echalí Jesusi ma echo'ná bakigá, echo'ná mésachi asíbali. ³⁸ Chopi echi Bariseo anilíwami binériami rijói ma riwisá mapu Jesusi ketasi bachá niráa wisabé paníkali mapalí ma ko'méa riwéali, mapurigá echi auché jaré Juríosi pagótami sinibí olali, echalí echi Bariseo mayeli mapu echi Jesusi ketasi galabé oláami níili. ³⁹ Chopi echi Walubela

Jesusi jeaneli: 'Yemi Bariseo anilíwami binériami ne bichíwali mapurigá jaré pagótami ju mapu moba chopi pabaka echi jaré vaso, echi jaré bitoli ayena cho, chopi aboni ketasi pabaka echo'ná pachana. Echirigá achigórigá 'yémitamo chopi wikabé namuti olá mapurigá echi auché jaré pagótami mayema máputamo wabé galabé oláami ju. Chopi echo'ná pachana 'yemi sulálachi niráa, 'yémitamo wabé korúkami ju, ayena chótamo wabé chati oláami ju. ⁴⁰ ¡'Yémitamo tarapé 'nátami ju! Echi Walubela Riosi mapu niwari ne suwaba namuti, ayena cho galá machí ne suwaba namuti. Riosi galá machí echi jaré namuti mapu echo'ná pachana 'yemi sulálachi nirú. ⁴¹ Chopi ne wabé galabé oláami níyasi 'yemi, a'lí bichétamo echirigá ne galá bi'wíami níisa echo'ná pachana 'yemi sulálachi niráa, ayena cho echi jaré namuti mapu machímana nirú ne galá bi'wíami níima.

⁴² ¡'Yemi Bariseo anilíwami binériami wabé kastigo 'yárami níibo. 'Yémitamo ibílana makói napawíkami, pe bilé 'yeka 'yátamo Riosi suwaba namuti bawena mapu ikí 'ochera echo'ná 'yemi kawíwalachi. Ayena chótamo ibílana makói napawíkami, pe bilé 'yeka 'yátamo Riosi suwaba namuti ruta anilíwami mapu ikí 'ochera echo'ná 'yemi kawíwalachi. Ayena chótamo echirigá olá suwaba echi auché jaré namuti kilibá yuwa. Chópitamo ketasi chirigá galabé olá echi auché jaré pagótami, mapurigá Riosi 'yemi mi nulé olánala, nirapétamo galéami ju mapurigá Riosi nakí máputamo galéami níibo. Arigá 'wérali ju máputamo galabé olabo echi auché jaré pagótami, ayena cho máputamo galéami níibo. Chopi ayena cho 'wérali ju máputamo ibílana makói napawíkami, pe bilé 'yeka 'yábotamo Riosi suwaba namuti mapu ikí 'ochera echo'ná 'yemi kawíwalachi. ⁴³ ¡'Yemi Bariseo anilíwami binériami wabé kastigo 'yárami níibo! mapujiti 'yémitamo chopi nakí echo'ná ne bacháami, ne wabé galabéalachi, muchínala echo'ná pachana 'yemi ri'obáwalachi. Ayena chótamo chopi nakí mapu echi auché jaré pagótami 'yemi mi ne wabé walubéraga anega naripama echo'ná walúlachi ri'nalátachi. ⁴⁴ ¡'Yemi nulalíwami binériami wabé kastigo 'yárami níibo, 'yemi Bariseo anilíwami binériami ayena cho! ¡'Yémitamo ne wabé 'yékami ju! 'Yémitamo chopi mapuyiri jaléana chu'wéchi ju, mapo'ná ketasi machiná ju. A'lí echi jaré pagótami mapu echo'ná moba rikeka 'yena ketasi machí mapu chu'wechi ju. ⁴⁵ Echálí bilé echi jaré nulalíwami binériami ku nijéwaga jeaneli: Binériami, mapalimi je'ná jerigá aní, Mujemi ayena cho tamujé tamí wabé oyerá. ⁴⁶ Echálí Jesusi jeaneli: ¡'Yémi nulalíwami binériami ayena cho ne wabé kastigo 'yárami níibotamo! mapujítitamo chopi nulé echi auché jaré pagótami olánala ne wikabé namuti mapurigá echi Moisesi nulali. A'lí mapurigá 'yémitamo nulé echi jaré pagótami, mapuyiri jaré wabé bitéami muruka ju, mapu 'yémita-

mo uché echi auché jaré pagótami, mapuyénasí aboni ma ketasi omérama apeya. Chopi 'yémitamo tarapé chirigá nakí ku'wiránala echi jaré aboni. ⁴⁷ ¡'Yémitamo wabé kastigo 'yárami níibo mapujítitamo wabé 'yékaka olá, mapujiti 'yemi pagótamawala níili mapu waminá ko'yali echi jaré ki'yá piréami o'wéala mapu Riosi jiti nawésami níili, chopi jipi rawé 'yémitamo wabé o'wikeka niráa niwá jaré kalí chu'wiróami, mapo'nátamo wabé o'wikeka niráa chu'wiró echi jaré nawésami ochilá. ⁴⁸ Echirigá ologá 'yémitamo galá ku ruyé máputamo achigórigá nakili olánala mapurigá echi jaré ki'yá piréami 'yemi pagótamawala olali. Echi jaré aboni ne bichíwali ko'yali echi jaré Riosi jiti nawésami, chopi jipi rawé 'yémitamo we niwá echi jaré kalí chu'wiróami mapo'nátamo chu'wiró echi jaré ki'yá piréami nawésami ochilá. ⁴⁹ Echi Walubela Riosi ne galá machili suwaba je'ná jeyiri, echijiti Riosi bachá niráa jeaneli: Echo'ná aboni yuwa nawésanalaga julámani jaré o'wéala mapu tamí jiti nawésama, ayena cho aboni yuwa julámani auché jaré o'wéala mapu Riosi jiti julálami anérami níima. Chopi echi jaré pagótami ko'wimea jaré echi nawésami, ayena cho aboni wabé kichiga a'najátama auché jaré mapu Nijeni echirigá julama nawésanalá. ⁵⁰ Ne bichíwali Nijé 'yemi nimí ané mapu je'ná jipi piréami pagótami ne wabé wi'nijírami níima mapurigá ko'yáami niráa, mapurigá ko'wílati ne si'néami echi jaré o'wéala Riosi jiti nawésami mapu ikí ko'wirúami níili ki'yá chokichí jonsa mapalí jonsa Riosi niwali je'ná kawí. ⁵¹ Aboni echirigá wi'nijírami níima mapurigá mi'yáami niráa mapurigá mi'lílati echi ki'yá bitéami Abeli riwéami rijói echi mapu mi'lirúami níili chabé ki'yá rawé. Ayena cho aboni wi'nijírami níima mapurigá ko'yáami niráa, mapurigá ko'wílati ne si'néami echi auché jaré Riosi jiti nawésami mapu ikí ko'wirúami níili; mapuyénasí mi'lirúami níili echi Sakaríasi riwéami rijoy, echi mapu aboni wakinana mi'yali echo'ná Riosi ri'obáwalachi machímana, echo'ná bacháami mapo'ná echi jaré bo'wá sinibí ko'wirúami níili.

⁵² Echálí Jesusi ayena cho jeaneli: ¡'Yémi nulalíwami binériami ne wabé risúu olálami níibo, mapujiti 'yémitamo galá machili Riosi Ra'íchala osirúami, chópitamo ketasi nakili bichíinala mapurigá Riosi Ra'íchala 'yemi mi binela, tamí jiti rugá. Nibilé chótamo ariweli mapu echi auché jaré pagótami bichíima, si'néami mapu ikí we nakili bichíinala.

⁵³ Chopi mapalí Jesusi je'ná jerigá anili, echálí echi jaré nulalíwami binériami ne wabé na'áwali Jesusi sayéraga, ayena cho echi jaré Bariseo anilíwami binériami echirigá na'áwali. Echálí si'néami aboni chótali wikabé namuti rukugá, mapujiti aboni we nakili mapu Jesusi jaré namuti sayéraga ku nijéwama. ⁵⁴ Echálí aboni chopi wabé sayéraga kipuli mapurigá Jesusi nawésali, mapujiti aboni chopi nakili mapurigá aboni galá

omérama wi'nijiya echi Jesusi, jaré namuti jiti mapurigá Binói ra'íchali.

Ariwesi echi 'yékalawami

12 Echali mapali ne wabé wikabé pagótami napawísali echo'ná Jesusi yuwa, echi pagótami ne wabé rachínaga napawili mapuyénasi aboni a'nagupi rukeli. Echali Jesusi bachá niráa chótali nawésiya echi jaré mapu Binói binérali jeanigá: Ne galá 'nesa, a aboni tibusi mapurigátamo waminá ariwebo echi jaré Bariseo níwala levadura anilíwami. ¡Ketasi 'yékami níisi mapurigá aboni niráa! ² Mapujiti pe waminánomí galá ku machirúami níima suwaba namuti mapu ikí echi jaré pagótami ketasi nakí ku ruyénala jipi rawé; ayena cho galá ku ruyérami níima ne suwaba mapu echi jaré pagótami chiná niráa olá jipi rawé. ³ Echijiti mapurigá 'yémitamo echo'ná rokowárali niráa ra'íchali, ne suwaba echirigá achigórigá galá ku námarami níima echo'ná ne galá machíachi; ayena cho mapurigátamo echo'ná pachá 'yemi kalílachi, nakachí niráa ra'íchali, echirigá achigórigá echi auché jaré pagótami o'wéli ra'íchaga ku nawisama, echo'ná ripá moba 'yemi kalílachi jaga.

Galá bichíga majasi Riosi

(Mt. 10:28-31)

⁴ Echali Jesusi waminabi jeaneli: 'Yemi keni apanérawa, Nijé 'yemi nimí jeané: Ketasi majasi echi auché jaré mapu waminá ko'yá pagótami, chopi aboni ketasi omero waminabi olayá. ⁵ Chopi Nijé 'yemi nimí bachá niráa ané mapu galá níima máputamo wabé majabo echi Walubela Riosi. Galá majasi Riosi mapujiti Binói galá omero ko'oyá echi jaré pagótami, ayena cho ma ko'wisáa, Binói galá omero echo'ná ri'lé riáblochi a'wá aboni aliwala. Echo'ná ne wabé chati rajá sinibí niráa. Ne bichíwali galá bichíga majasi echi Walubela Riosi.

⁶ Echi jaré chuluguí ketasi 'me natiguí. Malí kúuchi chuluguí chopi natiguí okuá kentavo, chopi Riosi arigá galá newalá ibili echi jaré kúuchi chuluguí jiti. ⁷ Ayena cho suwaba echi wikabé 'yemi kupala, ibili niráa, galá tarárami ju. Echi Walubela Riosi galá machí chu kipu ju. Echijiti ketásirapé majasi 'yemi, mapujiti Riosi mayé mapu 'yémitamo ne wabé simírami natiguí, ketasi mapurigá wikabé kúuchi chuluguí.

Galá ku ruyesi máputamo bichí echi Walubela Jesucristo niráa

(Mt. 10:32-33; 12:32; 10:19-20)

⁸ Ayena cho Jesusi jeaneli: Nijeni wilálami níili mapurigá Ku'wíriami niráa; ayena cho Nijé 'yemi nimí ané mapu ne si'néami echi jaré galá bichíyami pagótami mapu ikí ruyeko auché jaré jeanigá mapu aboni tamí

jiti bichíyami ju. Nijeni ayena cho ruyema Riosi, echo'ná bacháami echi jaré o'wéala Riosi kapitánawala yuwa, jeanigá mapu si'néami echi yiri ruyéami pagótami Nijé níwala ju. ⁹ Chopi ne si'néami mapu ikí echo'ná pagótamichi aniko mapu aboni ketasi tamí jiti bichíyami ju, Nijeni ayena cho ruyema Riosi, echo'ná bacháami echi jaré o'wéala Riosi kapitánawala yuwa, jeanigá mapu echirigá ruyéami pagótami ketasi Nijé níwala ju.

¹⁰ Ayena cho Jesusi jeaneli: Ne bichíwali Nijeni wilálami níili mapurigá Ku'wíriami niráa. Alí ne si'néami pagótami mapu ikí tamí jiti sayéraga ra'íchako, abóniko arigá ku wikawárami níima, a aboni galá tansagá wikáwali. Chopi echi jaré mapu ikí wabé chati ra'íchako, echi Wabé Galabé Riosi Iwigala sayéraga, aboni ketasi siné ku wikawárami níima.

¹¹ Mapali echi jaré sayérami 'yemi mi tomea echo'ná aboni ri'obáwalachi, ayena cho mapali aboni 'yemi mi tomea echo'ná bacháami echi jaré o'wéala igúsuwami yuwa, echali ketasi wabé nílaga 'natasi mapu churigátamo ra'íchaga ku nijiyabo. ¹² Mapujiti echali rawé echi Wabé Galabé Riosi Iwigala 'yemi mi binérama mapu churigátamo ra'íchaga ku nijiyabo.

Jesucristo binera echi we níwami rijói jiti, echi mapu ketasi 'nátami níili

¹³ Echali echo'ná echi wikabé pagótami yuwa asali bilé rijói mapu Jesusi yuwa ra'íchaga, jeaneli: Binériami, jerigá ané echi keni rijimá, mapu binói tamí yuwa rojonama echi jaré tamujé níwala namuti, mapu tamujé onolá tamujé tamí ariweli. ¹⁴ Chopi Jesusi ku nijéwaga jeaneli: Ke wesi tamí nuleli mapurigani justicia olama 'yemi najirémami yuwa. Nibilé wesi tamí wilali mapurigá Nijeni rojuánami níima 'yemi yuwa. ¹⁵ Ayena cho Jesusi jeaneli: Ne galá 'nátaga pirélasí. Ketasi korúkami níisi, mapujiti 'yemi pagótami ketásitamo kanílaga pirélabo, chopi mapujítitamo niwa ne wikabé namuti. ¹⁶ Echali Jesusi irétaga jeaneli: Bilé rijói wabé níwami we ichali echo'ná binói kawíwalachi. Alí echirigá ichisuwa ne wabé simírami rakeli. ¹⁷ Echali echi wabé níwami rijói jerigá 'nátali: ¿Pírini olama? Jipi ne wabé simírami rakeli, ayena cho ne wabé buchili echo'ná nijé níwala rikówachi, echijiti ketásini niwa mapo'ná nijeni katiwama je'ná wikabé namuti nijé níwala 'wílami. ¹⁸ Alí binói waminabi je'ná jerigá 'nátali: Mani galá machí mapurigani olama: Mani waminá najuinama echi jaré nijé níwala rikówachi. Alí nijeni auché jaré waminabi o'wali niwama. Echali nijeni echo'ná pachá suwaba katiwama echi jaré wikabé namuti nijé níwala 'wírami. Ayena cho echo'ná galá katiwámani karúmati echi auché jaré wikabé nijé níwala namuti. ¹⁹ Echali nijeni jerigá 'natama, nijé binói niráa: Nijeni ma niwa wikabé namuti katiwárami, mapurigani sebárama wikabé bamíbbali. Jípini galá isábama. Chopi

galá kosáa, walú bajiga, ne wabé kanílamani. ²⁰ Chopi Riosi Binói jeaneli echi rijói: ¡Mujemi ke newalite jumi! ¡Jipi rokogó mujemi ma mukumea! Echali echi wikabé mujé níwala namuti auché bilé si'nú níwala níima.

²¹ Echali Jesusi waminabi nawésaga jeaneli aboni: Echirigá achigórigá ikimea ibili rijói yuwa mapu iki chopi muwéwako binói níwala namuti jena'í wichimóbachi, chopi ketásirapé namuti níwami ju Riosi yuwa.

Riosi galá tibula echi jaré Binói níwala

(Mt. 6:25-34)

²² Pe wakinana Jesusi jeaneli echi jaré mapu binói binérali: Nijé 'yemi nimí jeané: Ketasi wikabé namuti wabé níraga 'natasí, mapu churígátamo waminabi pirélabo, mapu píritamo kopoa. Nirapé níлага 'natasí 'yemi aboni jiti, mapu píritamo napachabo. ²³ Mapujiti echi ko'wáami arigá ketasi 'me natéami ju, chopi waminabi wabé simírami natéami ju máputamo waminabi pirélabo. Ayena cho echi chiní arigá ketasi 'me natéami ju, chopi 'yemi aboni waminabi wabé simírami natéami ju. ²⁴ Ne galá 'nesi echi jaré kolachi, mapu ketasi ichá, nirapé siné 'wi. Echi jaré kolachi ketasi kaliwa, nirapé rikowa, chopi Riosi we galá kowa aboni. 'Yemi nimí ané mapu 'yémitamo ne wabé simírami natiguí, ketasi mapurigá echi jaré kolachi. ²⁵ Ke wesi 'yemi ne wabé níлага 'nátaga, omérama a binói auché péé wi'libé niwayá bilé makali. ²⁶ Átamo ketasi omérasagá 'yemi aboni auché pe wi'libé niwayá, ¿churékulátamo ne wabé níliami ju echi auché jaré namuti jiti? ²⁷ Ne galá 'nesi mapurigá echi jaré rakó, echo'ná kawichí nirúami, ne galá ba'yóami niráa ochero. Echi jaré rakó ketásirapé nocha, nirapé tema, chopi Nijé 'yemi nimí ané mapu echi walula silíami Salomoni riwéami ketásirapé echi yena ba'yóami niráa napáchali mapurigá bilé rakó niráa, mapalí binói walubela silíami níli. ²⁸ A'lí a Riosi echirigá ne wabé galá ba'yóami niráa ochébanasagá echi jaré rakó mapu jipi rawé galá jawi echo'ná kawichí, chopi ba'alínala rawé echo'ná na'írali ikósarami níima, ¡Riosi Binói 'yemi mi ne wabé simírami galá napachátama, 'yemi pagótami ke 'me galá bichíyami! ²⁹ Echijiti ketasi wabé níлага asi mapu píritamo kopoa, mapu píritamo bajibo keremá. ³⁰ Mapujiti echi auché jaré pagótami ke bichíyami ne wabé níriga ama suwaba je'ná jeyiri namuti, chopi 'yémitamo onée echi Onorúami, ripá riwigachi atíami, mapu ne galá machí mapu 'yémitamo we newalé suwaba je'ná jeyiri namuti. ³¹ Chopi ne bachá niráa tansi mapurigá Riosi 'yemi mi ne galá nulema pachana 'yemi sulálachi niráa. Echali Riosi ayena cho 'yemi mi 'yama suwaba je'ná jeyiri namuti.

Echi jaré bichíyami ne wabé níwami níima echo'ná ripá riwigachi

(Mt. 6:19-21)

³² Tarapé majasi, mapujiti 'yémitamo mapurigá Nijé pugula bo'wá ju, mapu Nijeni galá nisé. 'Yémitamo péé okuáa ju, chopi 'yemi Onolá, echo'ná ripá riwigachi atíami, ne wabé ganíлага nulema 'yemi echo'ná pachá 'yemi sulálachi niráa. ³³ Ralinéasi mapu ikítamo niwa, a'lí galá kówasi echi jaré we tisúwati. Echirigá ologá 'yémitamo ne wabé níwami níibo echo'ná ripá riwigachi, mapo'ná echi jaré namuti ketasi siné suwibama; mapujiti echo'ná ripá riwigachi echi jaré chigórami ketasi omero chigoya, ayena cho echi jaré koséwali ketasi omero suwaba. ³⁴ Mapujiti echo'ná mapo'ná 'yemi níwala galabéala nirú, echo'ná 'yemi aboni ayena chó-tamo nakiboa muchínala.

Arigá 'wérali ju máputa galá kariwesa muchibo mapujiti tamujé Walubélawala ke sayiná ku nolínama jena'í wichimóbachi

³⁵ Ne galá 'nagá muchisi mapurigá jaré galabé oláami pióntami we rajigá buwé, rokogó niráa, mapuyénasí aboni walúlawala ke sayiná ku nolínama, mapujiti Nijeni ayena cho ke sayiná ku nolínama jena'í wichimóbachi. ³⁶ Mapurigá echi jaré galabé oláami pióntami níisi 'yemi. Echi jaré aboni we buwigá muchuwi mapuyénasí aboni walúlawala ku nolínama echo'ná jonsa mapo'ná jaré wabé kaníliga omáwiga niwila. A'lí aboni echirigá buwé mapurigá aboni omérama we yáati ku irápiya mapalí aboni walúlawala ke sayiná ku nawasa, bayema aboni. Echirigá achigórigá galá 'nagá muchisi 'yemi, mapujiti Nijeni ke sayiná ku nolínama jena'í wichimóbachi. ³⁷ Ne wabé kaníliami níima echi jaré pióntami, si'néami mapu iki aboni walúlawala echirigá galá 'nagá buwéami riwimea mapalí binói ku nawama. Ne bichíwali 'yemi nimí ané mapu echi walula galá a'láraga, echo'ná ko'wálachi muchínalama aboni. Echali echi walula binói niráa, echirigá wabé kóoma echi jaré pióntami. Echirigá achigórigá ikimea 'yemi yuwa, átamo galá 'nagá muchúami níisagá mapalí Nijeni ke sayiná ku nolínama jena'í wichimóbachi. ³⁸ A'lí a aboni walúlawala ne nasipa rokogó ku nawásagá, ba'alínala bi'yá chónachi keremá, echali echi jaré pióntami ne wabé kaníliami níima, a aboni walúlawala echirigá ku riwisáagá aboni, galá 'nagá muchúami. ³⁹ Chopi galá machisí 'yemi je'ná jeyili: A galá machisáagá echi kalíwami mapu chuyénako nawama riwéali echi chigórami, echali ne bichíwali echi kalíwami ne galá tibumi, ayena cho ketasi ariwemi mapurigá échiko we chigoma echo'ná kalírali. ⁴⁰ Echali Jesusi ayena cho jeaneli: 'Yemi ayena cho echirigá ne galá 'nagá muchisi, mapujiti Nijeni ke

sayiná ku nolínama mapalí 'yémitamo ketasi tamí buwema, mapujiti 'yémitamo ketasi machí mapu kilíbuko Nijeni ke sayiná ku nolínama. Nijeni wilárami níili mapurigá Ku'wiriami niráa.

Jaré pióntami galabé oláami ju, chopi auché jaré wabé chati oláami ju
(Mt. 24:45-51)

⁴¹ Echali echi Pegro jeanigá rukueli: Walubela, ¿áchami chopi tamujé tamí echirigá irétaga ané? ¿Kéchami ayena cho echirigá ané si'néami echi auché jaré pagótami? ⁴² Echali echi Walubela Jesusi jeaneli: Echi wabé galá oláami pioni, galabé 'nátami, echi ju mapu echi walubela kalíwami we wilá mapurigá walula nuláami niráa, echi auché jaré echo'ná binói kalílachi piréami yuwa, mapurigá échiko ibili niráa 'yama ko'wáami mapalí ma seba tétali. ⁴³ Ne wabé kaníliami níima ibili pióntami mapu binói walúlawala ma ku nawasa echirigá riwimea, sébali galá oláachi. ⁴⁴ Ne bichíwali 'yemi nimí ané mapu echi walula kalíwami ne walula niráa wilama echiyiri pioni, mapurigá échiko galá nuláami níima ne suwaba echi kalíwami rijói níwala namuti. ⁴⁵ Chopi a echiyiri pióntami 'natásagá mapu binói walúlawala wabé wi'libeko ku nolínama, echali siné káachi échiko chotama wabé chíbirigá olísiya echi auché jaré pióntami, echi muguí pióntami ayena cho. Alí échiko siné káachi chotama walú kosísiya, walú bajísiya mapuyénasí wabé rikuma. ⁴⁶ Alí mapalí echirigá oláami pioni ketasi buwigá asimea, echali ke sayiná binói walúlawala ku nawama, mapuyena echi pioni ketasi machimea mapu echi binói walúlawala ku nolínama riwéali. Echali echi walula kalíwami ne wabé kastigo 'yama echi pioni mapujiti échiko ketasi galabé oláami níili.

⁴⁷ Echi pióntami mapu ne galá machili mapurigá echi binói walúlawala nuleli, chopi binói ketasi a'lárali mapalí binói walúlawala ke 'mé ayó ku nolínama riwéali, nirapé olali mapurigá binói walúlawala nakili, échiko ne wabé simírali wipisótami níima. ⁴⁸ Chopi echi auché bilé pióntami mapu ketasi machili mapurigá binói walúlawala nulali, chopi binói arigá chati olali mapuyénasí binói walú kastigo 'yárami níima riwéali, échiko arigá ketasi 'me wisabé wipisótami níima. Mapujiti mapuyíripi ne wabé simírami 'yárami níili, échiko ayena cho ne wabé simírami ku kuwana tánarami níima; ayena cho mapuyíripi ne wabé simírami naleli, échiko waminabi ne wabé simírami tánarami níima.

Jaré mapu ketasi bichíima Jesucristo Ra'íchala wabé sayérama echi auché jaré mapu galá bichíima
(Mt. 10:34-36)

⁴⁹ Ayena cho Jesusi jeaneli: Nijeni nawésimia nawali jena'í wichimóbachi piréami pagótami, chopi echi jaré

mapu ketasi bichíima Nijé Ra'íchala siné káachi wabé na'áwaga sayérama echí auché jaré, si'néami mapu iki ne galá bichíima. Jipi Nijeni arigá wabé nakí mapurigá Nijeni ma mi'lirúami níima, mapurigá si'néami pagótami ke 'me ayó nawésarami níima Nijé Ra'íchala. Echali wikabé galá bichíima, chopi siné káachi, echi auché jaré wabé sayérama aboni. ⁵⁰ Arigá 'wérali ju mapurigá Nijeni waminá mi'lirúami níima; ayena cho Nijeni wabé risúu nílama mapuyénasí echirigá ikimea. ⁵¹ 'Yémitamo mayé mapu Nijeni nawali jena'í wichimóbachi mapurigá echi jaré pagótami sinibí kilí ologá pirélama, chopi ketásini echijiti nawali, chopi Nijeni nawali mapurigá echi jaré pagótami waminá rojonárami níima. ⁵² Mapujiti jipi jonsa pe waminánomí biléana bitichí piréami, malí we rojonárami níima. Echi bikiyá, echi auché jaré okuá sayérama, ayena cho echi okuá, echi auché jaré bikiyá sayérama, mapujiti echi jaré mapu ketasi tamí bichíima, arigá sayérama echi auché jaré mapu galá tamí bichíima. ⁵³ Jaré onorúami we sayérama echi jaré aboni kúchuwala kúruwi, ayena cho jaré kúruwi we sayérama echi jaré aboni onolá. Alí jaré muguí 'wéntami we sayérama echi jaré aboni tanala iwé, ayena cho jaré iwé sayérama echi jaré aboni iyela, ayena cho jaré muguí wasirúami wabé sayérama echi jaré aboni mo'olira, ayena cho jaré mo'olítami wabé sayérama echi jaré aboni wasila.

Jesusi ruyeli aboni mapu churigá aboni machimea mapurigá pe waminana ikimea riwéali
(Mt. 16:1-4; Mr. 8:11-13)

⁵⁴ Ayena cho Jesusi jeaneli echi jaré pagótami: Mapalítamo ritiwá echi nolí echo'ná ri'léruwi machínami, echalítamo aní mapu ukuméaré. Ayena cho echirigá ke 'me ayó galá ukú. ⁵⁵ Ayena cho mapalí echo'ná ka'yé 'naka jonsa wabé iká, echalítamo aní mapu ne wabé ratálamiré. Ayena cho echali echirigá wabé ratálama. ⁵⁶ ¡Wabé 'yékami jútamo! 'Yémitamo galá machí mapu churigá ikimea siné rawé mapalítamo ritiwá echo'ná nolírali, ayena cho mapalítamo ritiwá churigá iká. ¿Churékulátamo ketasi ayena cho galá machí mapurigá ikimea pe waminánomí rawé mapalítamo galá ritiwá mapurigá ma chota ikiyá jipi rawé?

Ne galá a'lari echi mujé sayela yuwa
(Mt. 5:25-26)

⁵⁷ ¿Churékulátamo 'yemi aboni ketasi galá 'nátaga níjéwa echi mapu ne wabé galabéala ju? ⁵⁸ Mapalí mujé sayela mi wi'nijíinalaga tomea echo'ná bacháami echi jaré igúsuwami yuwa, galá níima ku katéwasa echi mujé sayela yuwa mapalítamo abijí echo'ná buwichí 'yena echo'ná echi jaré igúsuwami muchíllachi simiba. Echirigá olá mapurigá binói ketasi mi wabé wi'nijima echo'ná bacháami echi komisario yuwa, mapujiti

echalí echi komisario siné káachi mi nijima echi jaré kapitani yuwa mapurigami pachá bachárami níima echo'ná komurachi. ⁵⁹ Nijé nimí ané mápumi ketasi ku machínama echo'ná pachá jonsa mapuyénasí mujemi ke cho suwaba natétasagá suwaba mapu ikí aboni mi bujema.

Arigá 'wérali ju mapu si'néami pagótami si'nú, galabé niráa 'nátaga, ku ro'wima Riosi yuwa

13 Echali rawé jaré rijói echo'ná sisá aneli echi Jesusi mapurigá echi walula siríami Pilato riwéami nulali ko'wínala jaré rijói echo'ná Galiléachi piréami; ayena cho aneli mapu churigá echi jaré rijói ko'wirúami níili mapalí aboni jaré namuti ko'yá 'yéneli, echi Walubela Riosi 'yábiya, echo'ná pachá echi walubé Juríosi ri'obáwalachi. ² Chopi Jesusi ku nijéwaga jeanigá rukueli: ¿Áchatamo mayé mapu echirigá ikili echi jaré rijói Galiléachi piréami yuwa mapujiti aboni ne wabé simírami chati oláami níili, ketasi mapurigá echi auché jaré pagótami echo'ná Galiléachi piréami? ³ Echali Jesusi waminabi jeaneli: 'Yemi nimí ané mapu ketasi echirigá níili, chopi a 'yémitamo ketasi si'nú, galabéala niráa 'natásagá, ayena cho átamo ketasi ku ro'wísagá Riosi yuwa, echali si'néami 'yémitamo achigórigá suwibabo. ⁴ Ayena chótamo galá machí mapurigá echi wabé ripabé wilámi kalí echo'ná Siloechi nirúami waminá najuili, ayena cho mapurigá echali makói miná osá naó rijói waminá mitáchali. ¿Áchatamo mayé mapu echirigá ikili echi jaré rijói yuwa mapujiti aboni ne wabé simírami chati oláami níili, ketasi mapurigá echi auché jaré pagótami echo'ná Jerusalémachi piréami? ⁵ Echali Jesusi waminabi jeaneli: 'Yemi nimí ané mapu ketasi echirigá níili, chopi a 'yémitamo ketasi si'nú, galabéala niráa 'natásagá, ayena cho átamo ketasi ku ro'wísagá Riosi yuwa, echali si'néami 'yémitamo achigórigá suwibabo.

Echi chuná mapu ke siné rakéami níili

⁶ Echali Jesusi irétaga niráa jeaneli: Bilé rijói níwali bilé chuná mapu ichirúami níili echo'ná binói kawíwalachi. A'lí echi rijói sinibí bamíbalí echo'ná ali echi chuná rakala, chopi ke siné riwali mapujiti ketasi rakéami níili. ⁷ A'lí echi chuná níwami ra'íchaga echi binói piórawala yuwa mapu echo'ná nóchami níili, a'lí jeaneli: Nibira, ma bikiyá bamíbalí ju mapalí jonsa nijeni 'ali echi chuná rakala jena'í chunárali, chopi ke siné riwálini. ¡Miná ripuná! mapurigá ma ketasi wilimea jena'í galabé wi'yéachi. ⁸ Chopi echo'ná nóchami pioní ku nijéwaga jeaneli: Walula, abijí jipi bamíbalí ariwé, mapuyénasí nijeni ne noligá jóruga, ripuka achema. ⁹ Echali galá rakémiré, chopi a ketasi cho rakésagá, echali auché biléala bamíbalí mujemi nulema ripuná-nala.

Bilé mukí ku sa'wárami níili siné rawé isábawachi

¹⁰ Siné rawé isábawachi Jesusi binériya asali echi jaré pagótami, echo'ná biléana aboni ri'obáwalachi.

¹¹ Echali rawé echo'ná pachá ri'obachi asali bilé mukí mapu nayúami níili makói miná osá naó bamíbalí jonsa. A'lí echi mukí wabé bunaga iyénali, mapujiti bilé wabé chati riablo aliwala chabé jonsa echirigá olali. Echijiti echi mukí tarapé chirigá omérali ku wachísiya binói niráa. ¹² Chopi mapalí Jesusi galá riwali echi mukí, echali Binói bayegá jeaneli: ¡Mukí, mami galá ku sa'wárami ju! Mami ketasi waminabi echirigá nayúami níima. ¹³ Echali Jesusi moba nochali echi mukí móbachi; ayena cho echi mukí we 'yáati ku sa'wárami níisa, galá ku wachili. A'lí binói chótali waminabi wabé walubéraga aneya Riosi. ¹⁴ Chopi echi walula echo'ná ri'obachi nuláami ne wabé yoli mapujiti Jesusi echirigá ku sa'wali echi mukí echali rawé mapalí isábawachi rawé níili. Echijiti echi walula nuláami jeaneli echi pagótami: Usani rawé nirú sinibí tarali mapalí risensia ju máputa galá nochabo. Echijiti echali usani rawé chopi kiná simasí mapurigátamo ku sa'wárami níibo, chopi ketasi risensia ju máputamo ku sa'wárami níibo mapalí isábawachi rawé ju. ¹⁵ Echali echi Walubela Jesusi ku nijéwaga jeaneli: 'Yémitamo wabé 'yékami ju. 'Yémitamo arigá ku botana echi jaré 'yemi pugula wáasi, echi 'yemi pugula bulito ayena cho, mapalí isábawachi rawé ju, mapurigátamo echo'ná komichi togá, bajírabo ba'wí. Echirigátamo pe nocha mapalí isábawachi rawé ju. ¹⁶ Chópitamo arigá aní mapu ketasi risensia ju mapu Nijeni ku sa'wama je'ná mukí jipi rawé mapalí isábawachi rawé ju. Chopi je'ná mukí bilé echi jaré Abrami kúchala kúchuwala ju mapu echi Satanasi riwéami riablo ma je'ná jerigá risúu olali makói miná osá naó bamíbalí jonsa. Echijiti Nijeni mayé mapu arigá risensia ju mapu je'ná mukí ku sa'wárami níima jipi isábawachi rawé. ¹⁷ A'lí mapalí Jesusi echirigá aneli, echali si'néami echi jaré Binói sayela wabé riwélaga tibili; chopi ne si'néami echi auché jaré pagótami ne wabé kaníili mapalí aboni riwali mapurigá Jesusi echirigá wabé omériga olali.

Echi mostasa anilíwami rakala

(Mt. 13:31-32; Mr. 4:30-32)

¹⁸ Echali Jesusi jeaneli: Nijeni 'yemi mi irétaga binéra-ma mapurigátamo galá machiboa mapu churigá Riosi galá nulá. ¹⁹ Mapalí Riosi we nulé echi pagótami, mapuyiri echi taa mostasa anilíwami rakala ju mapu bilé rijói ichá echo'ná binói kawíwalachi. Mapujiti echi taa mostasa rakala ma a'wisáa, ne walubé ochero, mapurigá bilé masana niráa, mapuyénasí echi churuguí echo'ná mostasa otowálachi rosorama.

Jesusi irétaga binera echi levadura jiti rugá

(Mt. 13:33)

²⁰ Echali Jesusi ayena cho irétaga binerali jeanigá: Nijeni 'yemi mi irétaga binérama mapurigátamo galá machiboa mapurigá Riosi nulé echi pagótami. ²¹ Mapalí Riosi galá nulé echi pagótami, achigórigá ju mapurigá mapalí bilé mukí ma baisá niráa anáwaga echi harina, galá nasówali echi levadura echi harina yuwa mapuyénasí suwaba galá kapótami níima.

Echi pe uchíi yéachi

(Mt. 7:13-14, 21-23)

²² Echali Jesusi we binerasiya inárali echo'ná Jerusalémachi simiyá, echirigá ologá Binói simírali echo'ná ne suníami o'wéalachi, ayena cho ne suníami rijówachi. Alí Binói galá binerali Riosi Raíchala. ²³ Echali bilé rijói jeanigá rukueli: Walubela, ¿Ácha pe okuáa ju echi jaré pagótami mapu galá ku wikawárami níima? Echali Jesusi ku nijéwaga jeaneli: ²⁴ Mapurigátamo ne 'wérali ologá nakí mo'wináliya echo'ná biléana uchíi yéachi, echirigá achigórigá ne wabé níлага tansi mapurigátamo ku wikawárami níibo, mapujiti Nijé 'yemi nimí ané mapu pe waminánomí wikabé nakimea mapurigá aboni ku wikawárami níima, chopi echali aboni ketasi chirigá ku wikawárami níima.

²⁵ Mapujiti pe wilibeko mapalí echi Walubela kalí níwami ku wilísaga, 'yérama echo'ná yéachi, echali 'yémitamo echo'ná machímana jáwami wabé anéraga echo'ná yéachi 'yétachi jeaniboa: ¡Walubela, tamujé tamí irapi! Chopi echi Walubela ku nijéwaga jeanimea: ¡Nijeni ketasi machí 'yemi! ¡Nirapeni machí kúmitamo piréami ju! ²⁶ Echali 'yémitamo jeanebo: Mujemi tamujé tamí galá machí, mapujiti tamujé mi yuwa ko'wali; ayena chota mi yuwa bajili echi uva ba'wila; ayena cho mi binériga iyénali echo'ná tamujé walúlachi ri'nará-tachi. ²⁷ Chopi Binói 'yemi mi ku nijéwaga jeanema: Mani 'yemi mi aneli mapu Nijeni ketasi machí kúmitamo piréami ju. Waminá waná simíbaga, si'néami 'yemi we chati oláami pagótami. ²⁸ Echali 'yémitamo wabé nalákabo, ayena chótamo wabé ki'lákabo 'yemi ramilá, mapalítamo riwiboa echo'ná ripá riwigachi muchúami echi Abrami, echi Isaka ayena cho, echi Jakobo ayena cho, ne si'néami echi auché jaré Riosi jiti nawésami ayena cho. Chopi 'yémitamo echo'ná machímana tibibo. ²⁹ Echali rawé ne suníami a'nagú norigá jonsa sisáa wikabé pagótami kopoya muchíbama echo'ná ripá riwigachi mapo'ná Riosi galá nulé echi pagótami. ³⁰ Alí jaré mapu jipi rawé ne jubá juko, abóniko ne bachá níma echali rawé; ayena cho jaré mapu jipi rawé ne bachá ju, abóniko ne jubá níima.

Jesusi ne wabé nalali mapalí Binói 'nátali echo'ná

Jerusalémachi piréami jiti

(Mt. 23:37-39)

³¹ Echali rawé echo'ná Jesusi yuwa sili jaré Bariseo anilíwami binériami mapu jerigá aneli: Jena'í jonsa ku simigá, mapujiti echi walula Erorsi mi mi'lináli.

³² Chopi Jesusi ku nijéwaga jeaneli: Echi Erorsi mapurigá bilé kiyochi ju. Ku simíbaga anesi mapurigá Nijeni jeané: Nibira, Nijeni machí a'wasá echi we chati ri-ablo aliwala, ayena choni ne galá ku sa'wá echi jaré nayúkami jipi rawé, ba'alí ayena cho. Alí waniwí ma sunímani. ³³ Chopi arigá 'wérali ju mapu Nijeni echirigá waminabi sísimá echo'ná Nijé buwilachi jipi rawé, ba'alí ayena cho, waniwí asíchiko, mapujiti arigá 'wérali ju mapu ibili Riosi jiti nawésami mi'lirúami níima echo'ná Jerusalémachi anilíwachi walúlachi.

³⁴ ¡'Yemi pagótami echo'ná Jerusalémachi piréami ne wabé risúu olárami níibo! Mapujítamo we ko'yá echi jaré Riosi jiti nawésami, ayena chótamo we basibuka ko'yá echi jaré mapu Riosi echo'ná 'yemi mi nawésanala júuli. ¡Wisabé chokéami Nijeni nakíli napabúnala 'yemi tamí yuwa, mapurigá bilé tolí ranéami wabé rakó binói níwala chulipi echo'ná ri'lé pachá binói analachi! ¡Chopi 'yémitamo ketasi nakili! ³⁵ ¡Nibili! 'Yemi ri'obáwara waminá bi'neli ripí. ¡Riosi ma 'yemi mi ariweli! Ayena cho Nijeni 'yemi nimí ané mapu jipi jonsa 'yémitamo chopi auchecho tamí riwiboa echali rawé mapalítamo jeaniboa: ¡Ne wabé galabératami ju Je'ná mapu ku nawá mapurigá ne Walubela niráa!

Jesusi ku sa'wali bilé rijói siné rawé isábawachi

14 Siné rawé isábawachi Jesusi ko'meya bakili echo'ná bilé walula Bariseo anilíwami binériami bitélachi. Alí echali echi auché jaré Bariseo echo'ná ne wabé kichiga 'nigá muchili. ² Echali bilé rijói nayúami mapu wabé bahínami níili, ayena cho echo'ná bacháami Jesusi yuwa asali. ³ Echali Jesusi rukueli echi jaré nualíwami binériami, echi auché jaré Bariseo anilíwami binériami ayena cho. Alí jerigá rukueli: ¿Ácha risensia ju mapu Nijeni ku sa'wama bilé nayúami jipi isábawachi rawé? ⁴ Chopi aboni tarapé namuti ku nijéwali. Echali Jesusi chapigá echi nayúami, gala ku sa'wali. Echali Jesusi jeaneli echi rijói mapu ma ku simea. ⁵ Chopi Jesusi jeaneli echi jaré Bariseo anilíwami binériami: Ibili rijói 'yemi mapu ikí bukélasa bilé bulito, bilé bóisi keremá, mapu echali siné rawé isábawachi waminá wichisá echo'ná biléana jochi, arigá we yáati ku machí pama mapalí isábawachi rawé ju. Nijeni ayena cho ku sa'wali je'ná rijói jipi isábawachi rawé. ⁶ Echali aboni ketasi chirigá omérali ku nijéwiya.

Echi jaré mapu bayérami níili echo'ná biléana ni-wíkwowachi

⁷ Echali mapali Jesusi riwali mapuriga echi auche jaré mapu echo'ná bayérami níili chopi echo'ná wabé galabéalachi muchínali, echali Binói jerigá ruyeli: ⁸ Mapali bilé rijói mi bayesa echo'ná biléana niwíkwowachi, ketasi bachá asibá echo'ná ne wabé galabéalachi, mapujiti siné káachi auche bilé rijói waminabi wabé walubela ketasi mapuriga mujé ayena cho bayérami níima.

⁹ Echali echi mapu mi bayeli echo'ná mujé yuwa nolí-nama, echi auche bilé rijói yuwa mapu waminabi walubela ju. A'lí mi jeanema: ¡Je'ná 'ya mapu binói echo'ná asimea! Echali mujemi wabé riwéliga siméa echo'ná wabé jubáami asiba. ¹⁰ Chopi mapali mi bayérami ju, echo'ná simigá ne jubáami asibá, mapuriga mapali nolinsa echi mapu mi bayeli, échiko mi jerigá anema: Keni amígowa, wakiná ne bacháami, asagá. Echali echi auche jaré echo'ná napawika muchúami galá riwimea mapuriga mujemi echiriga walúlatami níima. ¹¹ Mapujiti echi mapuyíripi a binói walubélatako, échiko wabé tabéalatami níima. A'lí echi mapu a binói wabé tabéalatako, échiko arigá walúlata-mi níima.

¹² Jesusi ayena cho ra'íchali echi rijói mapu Binói bayeli. Echali Jesusi jeaneli: Mapali mujemi jerigá wabé galá kóoma echi jaré mapu ikí mi bayé, ketasi chopi bayé echi jaré mujé galabé amígowala, nibilé bayé echi jaré mujé ritémawala, nibilé bayé echi auche jaré mujé pagótamawala, nibilé cho bayé echi auche jaré wabé níwami echo'ná mulubé mujé yuwa piréami, mapujiti si'néami auche cho kuwana mi bayema, a'lí bichemi echiriga ku natétarami níima. ¹³ Chopi mapali mujemi we galá kónama ko'wáami, echo'ná chopi bayé echi jaré wabé tisúwati, echi jaré ke akáanami ayena cho, echi jaré sikamochi ayena cho, echi jaré kasimochi ayena cho, echi jaré ke 'machíliami asíchiko. ¹⁴ Echali mujemi ne wabé kaníliami níima mapujiti aboni ketasi omero mi ku kuwana natétiya; chopi Riosi 'yemi mi ku natétama echali ne jubá rawé mapali si'néami echi jaré galá oláami pagótami ku o'wínama.

Bilé rijói galá kówali wikabé pagótami

¹⁵ Echali bilé rijói echo'ná atíami, echi Jesusi yuwa ra'íchaga, jeaneli: Ne wabé kaníliami níima ibili rijói mapu ko'mea echo'ná ripá riwigachi mapo'ná Riosi galá nulé echi pagótami. ¹⁶ Echali Jesusi ku nijéwaga jeaneli: Siné rokogó bilé rijói walú omáwaga, walú ni-wali ko'wáami. A'lí wikabé pagótami bayérami níili. ¹⁷ Chopi mapali ma sébachi níili ko'wáwami, ke wesi echo'ná sili. Echali echi rijói júuli auche cho bayénala si'néami echi jaré mapu bachá niráa bayérami níili. Echali binói jeanigá júuli bayénala: ¡We yáa wakiná

simasi, mapujiti suwaba ma galá a'láratami ju! ¹⁸ Chopi si'néamika ibili niráa chótali ku wikáwali tásiya. Echali echi bacháwala jerigá aneli: Bukulini ralali bilé kawí ichiwáwami. Jípini 'némiya simea echi kawí. Nijé nimí tani mapurigami tamí wikawama. ¹⁹ Auche bilé jerigá aneli: Nijeni bukulí ralali malána bulí wáasi ibóisi, jípini 'néniya simea machimeya. Nijé nimí tani mápumi tamí wikawama. ²⁰ Auche bilecho jerigá aneli: Bukulini ni-wili. Echijiti nijeni ketasi omero simiyá. ²¹ Echali mapali echi mapu julárami níili ma auche cho ku nawali, binói suwaba je'ná jerigá ruyeli echi binói walúrawala. Chopi echi walula ne wabé yoga jeaneli: We sapú simigá echo'ná walúlachi ri'narátachi, echo'ná pagótami napawílachi ayena cho, a'lí wakiná bayé echi jaré tisúwati, echi jaré ke akáanami ayena cho, echi jaré sikamochi ayena cho, echi jaré kasimochi ayena cho, echi jaré ke 'machíliami asíchiko. ²² Echali echi pioní jeaneli: Walula, mani galá olali mapurigami tamí nulé, chopi ke cho buchili echo'ná pachá kalírali mapo'ná mujemi omowama. ²³ Echali echi walula jeaneli echi binói piónawala: Auche simigá echo'ná suníami buwichí, kanápuromí mapo'ná echi pagótami 'yena, a'lí ne 'wérali wakiná mo'wá auche jaré mapuriga ne galá buchima echo'ná pachá nijé kalíllachi. ²⁴ Mapujiti 'yemi nimi ané mapu ke wesi echi jaré pagótami mapu bachá bayérami níili, galá ko'mea echi wabé galabé ko'wáami mapu nijeni a'lalali.

Galá níima máputa ariwebo suwaba echi auche jaré namuti mapurigata chopi Jesusi yuwa najátabo

²⁵ Echali rawé wikabé pagótami Jesusi yuwa najátali echo'ná buwichí. A'lí Binói ku kuwana 'néniya jeaneli: ²⁶ A bilé tamí bichíinalagá, arigá 'wérali ju mapu échiko wabé tamí galema. Echiriga arigá 'wérali ju mapu binói waminabi tamí galema ketasi mapuriga binói galé kepu onó, kepu iyé ayena cho. Arigá 'wérali ju mapu échiko waminabi tamí galema ketasi mapuriga binói galé kepu upí, kepu kúchuwa ayena cho, kepu ritémawa ayena cho. Ayena cho 'wérali ju mapu échiko waminabi tamí galema ketasi mapuriga binói galé a binói niráa. A'lí a ketasi tamí echiriga galésagá, échiko kétasi omérama tamí yuwa binéami níliya. ²⁷ Ayena cho mapuyíripi ketasi arigá anachama mapali binói risúu olárami níima, achigorigá mapuriga Nijeni arigá anachama mapalini wabé risúu olárami níima, échiko ketasi omérama tamí yuwa binéami níliya. ²⁸ Ayena cho ibili 'yemi mapuyíripi niwánali bilé ripabé wilíami kalí, ne bachá niráa galá 'natama chu kipu suwábamilé wenomí echi kalí niwayá, acha binói niwa echikí wikabé wenomí, mapuriga binói galá omérama kayena echi ripá wilíami kalí. ²⁹ Mapujiti a binói bachá niráa tigosa, chopi a ketasi omérasagá suniya echi kalí ni-wayá, echali si'néami echi auche jaré pagótami

echo'ná piréami echirigá riwisáa, chotama binói jiti kachigá ra'icha ³⁰ jeanigá: Echi rijói chótali echi ripabé wilíami kalí niwayá, chopi ketásirapé omérali suniya. ³¹ Ayena cho ibili walula silíami mapu ikí niwa makói mili sontarsi mapu nakómiya simea, auché bilé walula silíami sayérsiya mapu arigá niwa osá makói mili sontarsi, échiko bachá niráa asíbaga, galá 'natama acha binói omérama niyúria echi auché bilé walula silíami sayéria mapu osá makói mili sontarsi yuwa inaro. ³² Chopi a mayésagá mapu binói ketasi omero niyúria, echalí binói jaré katéwami julama ku katewánala echi auché bilé walula silíami yuwa, mapuyénasí échiko abijí mikabé inárachi. ³³ Echirigá mapuyíripi 'yémitamo ketasi ariwésagá suwaba echi jaré 'yemi níwala namuti ketasi omero tamí yuwa binéami níliya.

Mapalí echi koná ketasi akáami níisa

(Mt. 5:13; Mr. 9:50)

³⁴ Ne galá ju echi koná. Chopi a ketasi galá akáami níisagá, echalí ketasi chirigá galá ku akáami niwárami níima. ³⁵ Echiyiri koná ketasi ireke. Echalí echi koná chopi machí pátami níima echo'ná wiyérali, echo'ná ripúkachi keremá. ¡Si'néami 'yémitamo mapu ikí nakeko, ne galá namsi mapurigá Nijé 'yemi nimí jerigá ané!

Jesusi binera echi bo'wá wikáami jiti rugá

(Mt. 18:10-14)

15 Echalí rawé si'néami echi jaré wenomí napabúami echo'ná mulubé Jesusi yuwa kipúbiya sili. Ayena cho echi auché jaré rijói echo'ná kipúbiya sili, si'néami mapu ikí echi auché jaré Juríosi pagótami aneli chati oláami niráa. ² Echijiti echi jaré Bariseo anilíwami binériami ayena cho echi auché jaré nualilíwami binériami, si'néami echi Jesusi sayéraga ra'ichali. A'lí aboni jeaneli: ¡Echi Jesusi galá narigá echi jaré chati oláami pagótami, ayena cho Binói we ko'wá echi jaré aboni yuwa! ³ Chopi Jesusi je'ná jerigá irétaga jeaneli: ⁴ Ibili 'yemi mapu ikí bukélasa bilé kiento bo'wá, mapalí bilé bo'wá wikawása waminá gará tibútaga ariwema echi auché jaré kimakóisa makói miná kimakói echo'ná kawichí, mapuyénasí binói ámiya simea echi mapu wikali, mapuyénasí binói ma ku riwá. ⁵ Chopi mapalí ma galá riwá, echalí matochi rikagá binói we kaníraga ku bitichí tomea. ⁶ A'lí ma ku nawagá echo'ná bitichí, binói we yáati ku napabuma echi jaré binói amígowala, jeanigá: Tamí yuwa ne wabé kanílasí, mapujítini ma riwali echi bo'wá mapu ma wikáami níli. ⁷ Echalí Jesusi jeaneli: 'Yemi nimí ané mapu echirigá achigórigá waminabi ne wabé kanílama echo'ná ripá riwigachi muchúami mapalí bilé chati oláami rijói ma ku wikáwali tansa, ku ro'wíma Riosi yuwa, ketasi mapurigá mapalí kimakóisa makói miná

kimakói pagótami mayé mapu aboni wabé galabé oláami ju, echijiti aboni ketasi nakí ku wikáwali tánala.

Echi wenomí wikáami

⁸ Ayena cho mapuyíripi mukí níwasa makói peso plata, chopi a wikáwasa bilé peso, we yáati rajema bilé chopé, ayena cho ne suníami galá pichika echo'ná pachá kalírali, kilí niráa ama mapuyénasí ku riwimea. ⁹ Chopi ma galá riwisáa, echi mukí we yáati napabuma echi jaré binói amígowala, a'lí jeanema: Tamí yuwa ne wabé kanílasí, mapujítini ma ku riwali echi bilé peso plata mapu ma wikáami níli. ¹⁰ Echalí Jesusi ayena cho jeaneli: 'Yemi nimí ané mapu echi jaré Riosi kapitánawala echo'ná ripá riwigachi muchúami ne wabé kanírama mapalí ibili echi jaré chati oláami pagótami, wikáwali taga, galá ku ro'wíma Riosi yuwa.

Echi towí mapu suwábali binói onolá níwala namuti

¹¹ Jesusi ayena cho jeaneli: Bilé rijói okuá kúrowi kúchuwami níli. ¹² A'lí echi pe tabéala jerigá aneli binói onolá: Keni onó, tamí 'ya echi jaré mujé níwala namuti mapu nijé níwala nímaré. Echalí echi onorúami galá rojuániga binói níwala namuti, nasípasi 'yali echi binói ranala tabéala. ¹³ Chopi pe wakinana rawé echi tabéala ranarúami ne suwaba ralinéali echi jaré binói níwala namuti. A'lí ma napabusa binói níwala wenomí, waminá mikabé auché biléana si'wina kawírali simili; chopi echo'ná bitélaga binói chuwé ologá suwába suwábali binói níwala wenomí. ¹⁴ A'lí mapalí echi tabéala ranarúami ma echirigá suwábali binói níwala wenomí, echalí echo'ná kawírali piréami pagótami ne wabé simírami 'locheli, ayena cho echi tabéala ranarúami echirigá ne wabé 'locheli. ¹⁵ Chopi binói riwali nóchali echo'ná bilé rijói bitélachi echo'ná kawírali bitéami. Echalí echi rijói waminá júuli echi wikabé binói bukula kochi nisénala. ¹⁶ Chopi echi tabéala ranarúami arigá ne wabé 'locheli, mapujiti ke wesi 'yali ko'wáami. Echalí binói ne wabé simírami 'lochega, wabé nakili echi rojuí kumugá bosánali mapurigá echi kochi ko'wali. ¹⁷ Chopi binói jeriga ku 'nátali: ¡Echo'ná nijé onolá bitérachi ne wikabé pionirú mapu galá posaka ko'wá, chopi jena'í nijeni we lowa! ¹⁸ Mani ku simea echo'ná mapo'ná nijé onolá atí, a'lí nijeni jeanema: Keni onó, nijeni we chati olali Riosi sayéraga, ayena choni chati olali mujé sayéraga. ¹⁹ Ma ketasi galá ju mapurigá nijeni waminabi mujé ranala niráa anérami níima. ¡Tamí niwá mapurigá bilé mujé piónawala niráa! ²⁰ Echalí echi tabéala ranarúami ma ku simigá, pe wak-inana ku nawali echo'ná binói onolá bitérachi.

Chopi mapalí echi tabéala ranarúami abijí mikabé 'naka inálachi, echalí echi binói onolá galá riwisáa, arigá ne wabé natimali. Echalí echi onorúami we 'maga natépali, ayena cho wabé kaníliga narépalí. ²¹ Chopi

echi tabéala ranarúami chótali jerigá anésiya: Keni onó, nijeni we chati olali Riosi sayéraga, ayena choni chati olali mujé sayéraga. Ma ketasi galá ju mapurigá nijeni waminabi mujé ranala niráa anérami níima.

²² Chopi echi onorúami echalí we yáati jeaneli echi jaré binói piónawala jeanigá: We yáati machí pasa echi we galabéala napacha, galá ku napachátasi; ayena cho galá uchesi echi galabé simati chitúlami jiero echo'ná binói makúsuwalachi, ayena cho galá ku akárasí.

²³ Echalí echi onorúami ayena cho jeaneli: Wakíná 'no-lasa mi'lisí echi bilé bisero wabé sapéami, mapujiti tamujeta ma we kaníliga omáwaga kopoa. ²⁴ Mapujiti je'ná keni raná mapurigá mukúami niráa níili, chopi ma ku bitéami ju. ¡Binói waminá wikáami níili, chopi mata ku riwali! Echalí aboni chótali omáwaga ko'yá.

²⁵ Echalí echi rijói ranala bachirúami echo'ná kawichí iyénali, chopi ma ku mulubé nawagá echo'ná bitichí, échiko we námali echirigá we kaníliga tákawachi. ²⁶ A'lí binói bayegá rukueli bilé pioni mapu pili jiti echirigá olali echo'ná pachá bitichí. ²⁷ A'lí echi pioni jeaneli: ¡Mujé rijimala ma ku nawali! Echijiti mujé onolá ma nulali mi'línala echi bilé biselo wabé sapéami, mapurigata wabé kaníliga kopoa, mapujiti mujé rijimala ma galá ku nawali. ²⁸ Chopi echi bachirúami ne wabé yoga, ketasi nakili bakínala echo'ná pachá bitichí. Echijiti binói onolá ku machínaga, we tánali mapurigá pachá bakimea. ²⁹ Chopi echi bachirúami we yóniga ku nijéwaga jeaneli echi kepu onó: Mujemi galá machí mapurigá nijeni ma wikabé bamíbalí mi yuwa nóchali. Nijeni sinibí ne galá nimí nijéwali, chopi mujemi tarapé siné tamí 'yali bilé taa chibá mapurigá nijeni kaníliga omáwaga ko'mea echi auché jaré nijé amígowala yuwa. ³⁰ Chopi mapalí ke sayiná ku nawali je'ná mujé ranala mapu suwaba suwábali mujé níwala namuti wikabé chati oláami muguí yuwa bitélaga, jipi mujemi ma mi'yali echi bilé bisero wabé sapéami mapurigá wabé kaníriga omáwaga ko'mea. ³¹ Echalí echi onorúami jeaneli: Keni raná, mujemi sinibí tamí yuwa asali, nijé nimí 'yali suwaba mapu ikí mujé newaleli, ayena cho ne suwaba nijé níwala namuti, mujé níwala ju. ³² Chopi jipi rawé arigá 'wérali níili mapurigata wabé kaníliga omáwaga kopoa, mapujiti kemi rijimá mapu tamujeta mukúami niráa mayeli ma galá ku bitéali. Binói ma wikáami níili, chopi tamujeta ma ku riwali.

Echi ketasi galabé oláami tabéala nuláami

16 Echalí Jesusi ayena cho ra'íchaga echi jaré mapu Binói binérali, jeaneli: Bilé rijói walula ne wabé níwami níili. Échiko auché bilé si'nú nuleli mapurigá tabéala nuláami niráa, mapurigá échiko nuláami níima ne suwaba echi walula níwala namuti jiti. Chopi pe wakinana je'ná tabéala nuláami wi'nijírami níili mapurigá suwábami niráa, echi walula níwala namuti.

² Echalí echi wabé níwami rijói bayegá ra'íchali echi tabéala nuláami, jeanigá: ¿Piri ju je'ná mapu echi auché jaré pagótami mi wi'nijí? Jipi ne suwaba nijé níwala namuti ku taraga ma auchécho ku tamí 'ya, mapujiti mujemi ma ketasi waminabi nochama mapurigá tabéala nuláami niráa, nijé níwala namuti jiti. ³ Echalí echi tabéala nuláami jerigá 'nátali: ¿Pírini olama jipi? mapujiti keni walúlawa ma ketasi tamí nakiwi mapurigani nochama mapurigá tabéala nuláami niráa. Nijeni ketasi omero iwéami nocha. Ketásini omero wasaraya, nibilé choni omero ichayá, ayena cho nijeni we riwela wepi taga iyena namuti. ⁴ Echalí échiko jerigá 'nátali: Mani galá machí mapurigani olama, mapurigá mapalí keni walúlawa ma tamí 'yesa echi nóchali, echalí echi auché jaré pagótami galá tamí risénsia 'yama echo'ná aboni pirélachi. ⁵ A'lí ibili niráa bayegá echi auché jaré pagótami mapu ikí wikeli echi binói walúlawa jerigá rukueli echi bacháwala: ¿Chu kípumi wiké echi keni walúlawa? ⁶ A'lí échiko ku nijéwaga jeaneli: Nijeni wiké bilé kiento o'wéli sikolichi echi aceite. Echalí echi tabéala nuláami jeaneli: Jena'í oselichi osirúami ju mapu ikí mujemi wiké. ¡We sapú asagá, osá mápumi chopi wikema malisa makói o'weli sikolichi echi aceite! ⁷ Pe wilibeko echi tabéala nuláami jeanigá rukueli auché bilé: ¿Mujé, chu kípumi wiké? A'lí échiko jeaneli: Nijeni wiké bilé kiento alamuli turío. Echalí echi tabéala nuláami jeaneli: Jena'í oselichi osirúami ju mapu ikí mujemi wiké. ¡We sapú asagá osá mápumi chopi wike-ma osá naósamakóy alamuli echi turío! ⁸ Echalí echi walula ne wabé yónali mapujiti echi tabéala nuláami echirigá 'yékaka olali, chopi echi walula arigá mayeli mapurigá echi tabéala nuláami ne wabé 'nátaga olali. Echalí Jesusi ayena cho jeaneli: Echi auché jaré ke bichiyami pagótami, jena'í wichimóbachi piréami, waminabi wabé 'yékaka bujéami ju ketasi mapurigá echi auché jaré Nijé níwala pagótami, si'néami mapu ikí bichíiko Riosi Ra'íchala.

⁹ Echalí Jesusi ayena cho jeaneli: We galá kówasí jaré 'yemi níwala namuti echi auché jaré bichiyami pagótami mapu ikí we newalé. Ketasi chopi napabusi echi wikabé namuti níwalawami jena'í wichimóbachi, mapurigá echi auché jaré chati oláami pagótami we olánali. A'lí a 'yémitamo echirigá galá kónami nísagá jena'í wichimóbachi, echalí echi jaré bichiyami mapu 'yémitamo we kówali jena'í wichimóbachi, aboni 'yemi mi wabé kaníliga narépama echo'ná ripá riwigachi, echalí mapalí 'yémitamo galá sebabo echo'ná. ¹⁰ Echi jaré mapu ne bichíwali galabé olako mapalí aboni péebi olá, abóniko ayena cho ne bichíwali galabé olama mapalí aboni wabé simírami olá. A'lí echi jaré mapu wabé 'yékaka olako mapalí aboni péebi olá, aboni ayena cho wabé 'yékaka olama mapalí aboni wabé simírami olá. ¹¹ Echirigá ju mapu átamo ketasi galabé olásagá echi wikabé namuti níwarawami jena'í

wichimóbachi nirúami yuwa, mapo'ná echi jaré pagótami wabé chati oláami ju, echalí Riosi ketasi cho 'yemi mi anema Binói kúchuwala niráa. ¹² Ayena cho átamo ketasi galabé olásagá auché jaré pagótami níwala namuti yuwa, 'yémitamo ketasi 'yárami níbo echi jaré namuti níwalawami mapu 'yemi aboni níwala níima.

¹³ Ke wesi pióntami omérama nóchiya okuá o'wéala yuwa sinepi niráa. Mapujiti a echirigá olánalasagá, echi pioni biléala kichima siné káachi, echi auché biléala galema kéremá. Siné káachi echi bilé yuwa wabé kaníliga nochama, chopi echi auché bilé yuwa ketasi kaníliga nochama kéremá. Echijiti 'yémitamo ketasi oméramo Riosi níwala nóchali olayá, átamo sinepi niráa echi wikabé namuti níwalawami jiti chopi nóchaga olásagá.

¹⁴ Echalí echi jaré Bariseo anilíwami binériami galá námali suwaba je'ná mapurigá Jesusi ra'íchali. Echi jaré aboni wabé korúkami níili wenomí, echijiti aboni we kichiga ra'íchaga sayérali mapurigá Jesusi echirigá nawésali. ¹⁵ A'lí Jesusi jeaneli: 'Yémitamo wiká namuti olá mapurigá echi auché jaré pagótami mayema mapu 'yemi aboni wabé simírami galabé oláami ju. Chopi Riosi ne galá machí mapurigá 'yémitamo 'nata echo'ná pachana 'yemi sulálachi niráa. Ayena cho ne galá machísí 'yemi mapu echi Walubela Riosi arigá kichí echi jaré namuti mapu echi pagótami galabé mayé.

Riosi nulalila galá osirúami níili, chopi Riosi ayena cho nuleli echi jaré bichíyami pagótami echo'ná pachana aboni sulálachi niráa

¹⁶ Mapuyénasí nawali jena'í wichimóbachi echi Juani mapu pagóami níili, chopi nirúali Riosi nulalila osirúami mapurigá echi Moisesi osali; ayena cho nirúali Riosi Ra'íchala mapurigá echi jaré o'wéala Riosi jiti nawésami osali, chopi mapalí echi Juani nawali, echalí jonsa galá nawésarami níili echi we Galabé Ra'íchali jeanigá mapu Riosi ma galá nulé echi jaré galá bichíyami pagótami echo'ná aboni sulálachi niráa. A'lí mapuyíripi wabé nakiko, échiko galá omero echirigá bichiya.

¹⁷ Arigá 'wérali ju mapu suwaba achigórigá ikimea mapurigá osirúami ju echo'ná Riosi nulalila oseríwalachi. Siné káachi ripá riwigachi suwaba suwibama, jena'í wichimóbachi ayena cho, chopi arigá ikimea ne suwaba mapurigá osirúami ju echo'ná Riosi nulalila oselíwalachi.

Jesusi binera jeanigá mapu echi jaré mapu ma niwíami juko ketasi ku rojuama
(Mt. 19:1-12; Mr. 10:1-12)

¹⁸ Mapuyíripi ku ariwésagá binói upila, a'lí auché bilé yuwa upesa, échiko we chati olá, mapurigá ayena cho chati olá echi mapu niwíami ju mapalí si'nú yuwa

kochí. A'lí echi mapu upeko echi mukí ariwérami, échiko ayena cho echirigá we chati olá.

Echi rijói wabé níwami, echi Lázaro ayena cho

¹⁹ Bilé rijói wabé simírami níwami níili, echi mapu sinibí ne wabé galá simati napáchali; ayena cho sinibí rawé echi rijói ne wabé galabé ko'wali mapurigá omawa niráa. ²⁰ Ayena cho echo'ná bitéali auché bilé rijói mapu ne wabé risúwati níili, echi mapu Lázaro riwéami níili. Échiko ne wabé buchuwíana chánami níili. Ayena cho binói sinibí rawé asali echo'ná echi wabé níwami rijói bitélachi yéwachi machímana. ²¹ A'lí je'ná wabé risúwati rijói ne wabé 'locheli, mapuyénasí binói wabé nakili ko'náliya echi jaré wakichéami rimé mojuáami, echo'ná echi wabé níwami rijói bitélachi tibíami. Ayena cho echi jaré kochí echo'ná binói yuwa sisáa, we cha'mili binói chánawalachi. ²² Echalí siné rawé echi wabé risúwati rijói ma mukuli. A'lí echi jaré Riosi kapitánawala toli binói aliwala echo'ná ripá riwigachi mapo'ná echi walula Abrami ma asali Riosi yuwa. A'lí pe wakinana echi wabé níwami rijói ayena cho mukuli. Echalí binói chu'wirótami níili. ²³ A'lí mapalí echi wabé níwami rijói ne wabé chati risúu olárami níili echo'ná ri'lé riáblochi mapujiti binói ketasi bichíyami níili, echalí binói mikabé niráa 'néniga riwali echi walula Abrami echo'ná ripá riwigachi atíami, echi Lázaro ayena cho, mapujiti aboni galá bichíyami níili. ²⁴ Echalí echi rijói mapu wabé níwami níili, wabé o'weli ra'íchaga jeaneli: ¡Keni onó Abrami, tamí we natimá! ¡Wakiná julá echi Lázaro, mapurigá binói makúsawala ba'wí jiti sa'méchasa, rorobáchanama nijé cha'mélawala, mapujiti nijeni ne wabé risúu olárami ju jena'í chati na'írali! ²⁵ Echalí echi Abrami ku nijéwaga jeaneli: Rijói, galá 'natá mapurigami sinibí nareli echi wabé galabéala mapalimi abijí bitéali. Ayena cho 'natá mapurigá echi Lázaro risúu olárami níili. Chopi jipi rawé echi Lázaro ne wabé kaníratami ju jena'í tamí yuwa, chopi mujemi ma we risúu olárami ju, echo'ná wabé chati na'írali. ²⁶ Ayena cho echi Abrami waminabi jeaneli: Suwaba je'ná jerigá ne bichíwali ju, chopi ayena cho tamujé yuwa, 'yemi yuwa nasípa ne wabé simírami ri'lé a'nagú koláatami niwárami ju. Echijiti mapuyíripi nakiko simárama jena'í jonsa echo'ná bo'ónala yénasí, mapo'ná 'yémitamo muchuwi, ketasi chirigá omérama. Nibilé wesi omérama simáriya echo'ná jonsa mapo'ná 'yémitamo muchuwi wakiná yénasí mapo'ná tamujé muchuwi. ²⁷ Echalí echi rijói mapu wabé níwami níili, ma ku nijéwaga jeaneli: ¡Mujé Abrami mapurigá nijé onolá ju! ¡Perikó julá echi Lázaro echo'ná keni onó bitélachi! ²⁸ Mapujiti abijí echo'ná muchuwi echi jaré malí nijé ritémawala; mapurigá echi Lázaro galá nawésaga ruyema aboni, mapurigá aboni ketasi ayena cho wakiná simama jena'í wabé chati na'írali

mapo'ná nijeni ma ne wabé simírami chati risúu olárami ju. ²⁹ Chopi echi Abrami ku nijéwaga jeaneli: Aboni ma níwa Riosi Ra'íchala oserúami mapurigá echi Moisesi osali, ayena cho mapurigá echi auché jaré Riosi jiti nawésami osali. ¡Galá níima aboni echirigá galá nijéwaga olasa! ³⁰ Chopi echi rijói mapu wabé níwami níili ma ku nijéwaga, jeaneli: Siné káachi aboni ketasi bichíima mapurigá osirúami ju echo'ná Riosi Ra'íchala oselíwalachi, chopi a bilé rijói echo'ná aboni yuwa ku simisáagá mapu ma ku owínali mapalí binói ma mukúami níili, echalí aboni ne bichíwali galá bichíiga ku ro'wima Riosi yuwa, mapurigá aboni ku wikawárami níima. ³¹ Chopi echi Abrami ku nijéwaga jeaneli: A aboni ke nakisáagá bichíinala mapurigá osirúami ju echo'ná Riosi Ra'íchala oselíwalachi, mapurigá echi Moisesi osali, echi auché jaré Riosi jiti nawésami ayena cho, echalí aboni ketasi cho bichíima a bilé rijói ku owínsa mapalí binói ma mukúami níili.

Echi riablo sinibí chati olántama echi pagótami

(Mt. 18:6-7, 21-22; Mr. 9:42)

17 Echalí Jesusi ra'íchaga echi jaré yuwa mapu Binói binérali, jerigá aneli: Echi riablo sinibí chati olántama jena'í wichimóbachi piréami pagótami. ¡Chopi arigá wabé risúu olárami níima ibili rijói mapu ikí chati olara auché jaré! ² Ne bachá niráa ne galá níimili bilé rijói waminá walú ba'wírali pátami níisa, echo'ná binói kutálachi bilé matá jiti bulugá, mapurigá échiko ketasi chati olárama echiyiri táa mapu tamí jiti bichíiko. ³ Ne galá tibusi 'yemi aboni niráa. A echi kemi rijimá we chati ologá mi sayérasagá, ku galá ra'ámaga ruyé. A'lí a binói galá ku wikáwali tásagá, galá ku wikawí. ⁴ Ayena cho a échiko mi we chati ologá sayérasagá kicháosa chokéami siné rawé niráa, ayena cho a binói kicháosa chokéami mi jeanésagá: Ma ketásini auchecho siné echirigá olama. Echalí galá níima mujemi ayena cho kicháosa niráa ku wikáwasa echi binói.

¡Tamujé tamí 'ya mapurigata waminabi gala bichíibo!

⁵ Echalí echi jaré mapu Jesusi júuli nawisánala, si'néami je'ná jerigá aneli echi Walubela Jesusi: ¡Tamujé tamí 'yá mapurigata waminabi galá bichíibo! ⁶ Echalí echi Walubela Jesusi jeaneli: Je'ná sikómoro anilíwami namuti ne walú ju mapu chulú rojuá, ayena cho echi táa mostasa anilíwami rakala ne wabé tabéala ju. Chopi Nijé 'yemi nimí ané mapu átamo ne bichíwali péé táa niráa bichíisagá Riosi mapu chulú bilé táa mostasa rakala, echalí átamo jeanésagá je'ná walubé sikómoro anilíwami: ¡Jena'í jonsa suwaba machínaga, nawala así, echo'ná tu walubé ba'wírali wilimé! ¡Nijeni 'yemi nimí ané mapu je'ná walú namuti mapu chulú bilé rojuá,

echalí we yáati 'yemi mi galá ku nijéwaga, ne bichíwali echirigá olama!

Galá níima bilé pioni galá nijéwaga nochasa

⁷ A bilé 'yemi níwala pioni we wasaraga nocha inasa, namuti nisea kéremá, mapalí échiko ku nawá echo'ná bitichí, ke wesi 'yemi we yáati jeanema echi pioni jeanigá: ¡Simiró mujé! ¡We yáati asagá, galá ko'wá! ⁸ Chópitamo bachá niráa jerigá anema: Bachá galá a'lari mujé mapurigá nijeni galá ko'mea. A'lí péé jubáami mujemi ayena cho ko'mea. ⁹ Ayena cho Jesusi jeaneli: Nijeni mayé mapu ke wesi 'yemi ne walubé natétara 'yama mapalí bilé 'yemi níwala pioni echirigá galá nijéwaga olasa mapurigá 'yémitamo nuleli olánala, mapujiti échiko chopi olali mapurigá mujemi nuleli olánala. Binói ketasi waminabi wabé simírami galabé olali. ¹⁰ Echirigá achigórigá níima mapalí 'yémitamo ma sébali olali mapurigá Riosi 'yemi mi nulé. Echalí chopi jerigá anesi Riosi: Tamujé ketasi wabé simírami galabé oláami pióntami juta, mapujiti tamujeta chopi olali mapurigá arigá 'wérali níili mapurigata olabo. A'lí tamujeta ketasi waminabi wabé simírali olali.

Jesusi ku sa'wali makói rijói mapu wabé chati cha nayúkami níili

¹¹ Echalí rawé mapalí Jesusi inárali echo'ná Jerusalémachi simiyá, echalí Binói nasipa simírali echo'ná Samáriachi aniliwachi kawírali, echo'ná Galiléachi anilíwachi kawírali yuwa. ¹² A'lí mapalí Jesusi nawama riwéali echo'ná biléana rijówachi, echalí makói rijói wabé chati cha nayúkami natipábiya simasa, echo'ná mikabé 'nagá jábali. ¹³ Echalí aboni o'weli ra'íchaga jeaneli: ¡Binériami! ¡Mujé Jesusi, tamujé tamí wabé natimá! ¹⁴ Mapalí Jesusi galá riwáli echi aboni, echalí Binói jeaneli: ¡Ku simíbaga 'néraasi echi jaré sacerdote mapurigátamo ma ku sa'wárami ju! A'lí mapuyénasi aboni echirigá ku kuwana sírali, echalí aboni ke sayiná ma galá ku sa'wíami níili. ¹⁵ Chopi bilé aboni riwisáa mapu binói ma galá ku sa'wárami níili, echalí binói auchecho ku kuwana ro'wili mapo'ná Jesusi inárali, a'lí echi rijói o'weli ra'íchaga ne wabé Walubela aneli Riosi. ¹⁶ Ayena cho binói echo'ná bacháami Jesusi yuwa wéemi raweka chokóbaga wiligá ne walú natétara 'yali. A'lí echi rijói echo'ná Samáriachi bitéami níili, échiko ketasi Juríosi pagótami níili. ¹⁷ Echalí Jesusi ku nijéwaga jeanili: Makói níili mapu galá ku sa'wárami níili, chopi echi auché jaré kímakói ma ku simíbali. ¹⁸ Ke wesi aboni ku ro'wiga, walú natétara 'yali Riosi. Je'ná si'wina bitéami rijói chopi walú natétara 'yali. ¹⁹ Echalí Jesusi jeaneli: ¡Wiliska, ku simigá! Mujemi ma galá ku sa'wárami ju mapujítimi tamí bichíili.

Mapurigá Riosi nulema echi pagótami

(Mt. 24:23-28, 36-41)

²⁰ Echálí echi jaré Bariseo anilíwami binériami rukueli Jesusi mapu chu kilíbuko Riosi galá nulema riwéali echi pagótami jena'í wichimóbachi piréami. A'lí Jesusi ku nijéwaga jeaneli: Mapalí Riosi galá nulé echi pagótami, 'yémitamo ketásirapé namuti riwiboa. ²¹ Nirapétamo jerigá aniboa: ¡Nibila, jena'í Riosi galá nulé echi pagótami! Nirapétamo jeaniboa keremá: ¡Nibila, echo'ná auché biléana Riosi galá nulé echi pagótami! Mapujiti Riosi chopi nulé echi pagótami echo'ná pachana aboni sulálachi niráa.

²² Echálí Jesusi jeaneli echi jalé mapu Binói binérali: Waminánomí rawé 'yémitamo ne wabé simírami naki-boá 'nénala auché bilé Nijé rawéwala, chópitamo ketasi riwiboa. Nijeni wilálami níili mapurigá Ku'wíriami niráa. ²³ Echálí rawé jaré pagótami 'yemi mi jeanema: ¡Echi Walubela Jesuscristo jena'í atí! 'Yémi mi jeanema keremá: ¡Echi Walubela Jesucristo echo'ná auché biléana atí! Chopi ketasi echo'ná simasi, nibilé najátasi echirigá nawésami, mapujiti Nijeni ketasi chiná niráa nawama. ²⁴ Mapujiti mapurigá echo'ná ripá nolílali ne wabé ni'wika simí echo'ná panina jonsa, echo'ná tu bo'ónala yénasí, echirigá achigórigá Nijeni ku nolínama echálí ne jubá rawé, Nijé rawéwalachi. Nijeni wirálami níili mapurigá Ku'wíriami niráa. ²⁵ Chopi bachá niráa arigá 'wérali ju mapu jipi piréami pagótami tamí wabé risúu olama; ayena cho aboni ketasi tamí narema, mapujiti aboni wabé tamí kichima. ²⁶ A'lí mapurigá ikili chabé ki'yá rawé mapalí echi Noé riwéami rijói bitéali, echirigá achigórigá ikimeá echálí ne jubá rawé, Nijé rawéwalachi. Nijeni wilálami níili mapurigá Ku'wíriami niráa. ²⁷ Echálí rawé echi jaré pagótami jena'í wichimóbachi piréami chopi wabé ko'ogá, bajiga muchili, ayena cho echi jaré rijói we jubeli, ayena cho aboni we risénsia 'yali mapurigá aboni a'mala we ukunema, mapuyénasí sébali echálí rawé mapalí echi Noé bakili echo'ná pachá walubé kalírali, echo'ná walú ba'wírali moba yénami, arka anilíwami. Echálí ne walubé ukugá, suníami jena'í wichimóbachi ne ripabé buchíli ba'wí. A'lí ne si'néami echi jaré pagótami waminá suwili. ²⁸ Echirigá ayena cho achigórigá ikili chabé ki'yá rawé mapalí echi Lote riwéami rijói bitéali. Echálí echi pagótami ayena cho chopi wabé ko'wali, wabé bajili, ayena cho aboni wabé ralali, rarínéali ayena cho, ayena cho aboni wepi ichagá nóchali, ayena cho aboni kaliraya nóchali. ²⁹ Chopi echálí rawé mapalí echi Lote ma ku machínali echo'ná Sorómachi anilíwachi walúlachi jonsa, echálí rawé echo'ná ripá riwigachi jonsa we rujuili na'í rajáami, echi asújiri anilíwami rajáami ayena cho. Echálí ne si'néami echi jaré pagótami echo'ná piréami suwábarami níili.

³⁰ Echirigá achigórigá níima echálí ne jubá rawé mapalí

Nijeni ku nolínama jena'í wichimóbachi. Nijeni wilárami níili mapurigá Ku'wíriami niráa.

³¹ Echálí rawé sébachi a jaré 'yemi echo'ná 'yemi kalífachi mulubé machímana muchísagá, ayena cho a níwasagá jaré namuti echo'ná pachá kalírali, ketasi auchecho ku mo'wisí echo'ná pachá, jaré 'yemi níwala namuti uboya, chopi we yáati waminá júmsasi. Ayena cho a jaré 'yemi echo'ná kawichí 'yénasagá, ketasi cho ku ro'wisi echo'ná kepu bitichí, chopi we yáati waminá júmsasi. ³² Auchecho galá 'natasi mapurigá chabé ki'yá ikili echi Lote riwéami rijói upila. ³³ Mapujiti mapuyíripi chopi kaníлага bitéranaliko jena'í wichimóbachi, échiko arigá waminá mukumea. Chopi mapuyíripi arigá mukusáagá mapujiti binói chopi olánali mapurigá Nijeni nakí, échiko arigá sinibí niráa ku bitélama. ³⁴ A'lí Jesusi waminabi jeaneli: Echálí mapalí Nijeni ke sayiná ku nolínama, echálí okuá napawika kochigá bitíami níima. Echálí Nijeni ke sayiná tomea bilé, chópini ariwema echi auché bilé. ³⁵ A'lí okuá muguí napawika batúu uchútami níima. Echálí Nijeni tomea bilé, chópini ariwema echi auché bilé. ³⁶ Ayena cho echálí rawé okuá rijói echo'ná kawichí 'yéami níima. Nijeni ke sayiná tomea bilé, chopi ariwémani echi auché bilé. ³⁷ Echálí echi jaré mapu Jesusi binérali we jeanigá rukueli: ¿Walubela, kumi ariwérami níima echi jaré? Chopi Jesusi ku nijéwaga jeaneli: Mapo'ná bilé mukúami namuti bu'wí, echo'ná ayena cho we ko'poya napawima echi jaré wilú. Echirigá ayena cho mapalí echi jaré pagótami ketasi sinibí piréami ju, echálí aboni chopi waminá kastigo 'yárami níima.

Jesusi binera bilé kunámami jiti rugá, bilé walula komisario jiti ayena cho

18 Echi Walubela Jesusi ayena cho je'ná jerigá irétaga binérali echi pagótami, jeanigá mapu arigá 'wérali ju mapu aboni sinibí rawé ra'ichama Riosi yuwa, ayena cho mapu aboni ketásirapé siné ariwema echirigá Riosi yuwa ra'icha. ² Echálí Jesusi jeanigá irétaga ra'ichali: Bilé walula komisario bitéali echo'ná biléana walúlachi, echi mapu ketasi majali Riosi, nibilé cho o'wikeli echi auché jaré pagótami. ³ Ayena cho echo'ná bitéali bilé mukí kunámami, echi mapu wisabé echo'ná echi komisario yuwa nawagá jeanili mapu binói kastigo 'yama auché bilé rijói mapu we sayérali binói mukí kunámami. ⁴ Echálí wi'libé rawé iyénasí echi komisario ketasi nakili nijéwanala echi mukí kunámami. Chopi echi mukí abijí waminabi tánali justicia, echijiti pe wakinana echi komisario je'ná jerigá 'nátali: Nijeni ketasi majawá Riosi, nibilé choni o'wiké echi auché jaré pagótami, ⁵ chopi mapujiti je'ná mukí kunámami we tamí kumé, nijeni arigá olíima justicia, mapurigá binói ketasi waminabi tamí yuwa nawagá, waminabi wabé simírami tamí kumema. ⁶ A'lí echi walubela Jesusi

jeanili: Echirigá 'nátali bilé walula komisario mapu ketasi galabé oláami níili. ⁷ Nijé 'yemi nimí jeané mapu echi Walubela Riosi ayena cho justicia olíima echi jaré mapu Binói chapili, si'néami mapu ikí Riosi yuwa táni-ga ra'icha sinibí rawé, sinibí rokogó niráa. Nijé 'yemi nimí ané mapu Riosi ketasi wi'lí sima ku'wíríya aboni. ⁸ Ne bichíwali Nijé 'yemi nimí ané mapu Riosi we yáati ku'wíríama aboni. Chopi mapalí Nijeni ku nolínama je-na'í wichimóbachi, ¿áchani abijí riwimea jaré galá bichíyami pagótami? Nijeni wilárami níili mapurigá Ku'wíríami niráa.

Jesusi binela bilé Bariseo anilíwami binériami jiti bilé wenomí napabúami jiti ayena cho

⁹ Ayena cho Jesusi jerigá irétaga binériali echi jaré pagótami mapu aboni chopi niráa we galabé niráa mayeli, chopi aboni ketasi 'me galabé niralí echi auché jaré pagótami. Echali Jesusi jeaneli: ¹⁰ Siné rawé okuá rijói echo'ná walubé Juríosi ri'obáwalachi Riosi yuwa ra'ichábiya simíbalí. Bilé aboni echi Bariseo anilíwami binériami níili. Echi auché bilé rijói wenomí napabúami níili. ¹¹ Echali echi bilé rijói mapu Bariseo anilíwami binériami níili, échiko echo'ná ri'obachi wiligá, mapurigá Riosi yuwa ra'íchaga niráa, jeanili: Mujé Riosi, nijé nimí walú natétara 'ya mapujiti nijeni ketasi mapuyiri echi auché jaré pagótami ju. Nijeni ketasi chigórami ju. Nibilé choni chati oláami ju. Nibilé choni isena muguí yuwa kochí. Nibilé choni chati oláami ju mapurigá je'ná rijói wenomí napabúami. ¹² Ibili tarali nijeni osá chokéami ketásirapé ko'wá wi'libé niráa, mapalini chopi Riosi yuwa ra'íchaga olá; ayena choni echi makói, bilé 'yeka, 'yani Riosi, suwaba namuti mapu ikí nijeni mé. ¹³ Chopi echi wenomí napabúami mikabé 'naka niráa wiligá, ketasi nakili nirapé mapu echo'ná ripá riwigachi 'ninama; chopi binói jerigá anigá we cho'nali binói sulálachi: ¡Mujé Riosi tamí galá natimaga, tamí ku wikawi, mapujiti nijeni we chati oláami ju! ¹⁴ Echali Jesusi waminabi jeaneli: Nijé 'yemi nimí jeané mapu echi wenomí napabúami rijói ma ku wikawárami níili echali mapalí binói ku simili, chopi echi Bariseo anilíwami binériami ketasi cho ku wikawárami níili. Mapujiti mapuyíripi a binói niráa walúlawako, échiko arigá wabé tabéalatami níima, chopi mapuyíripi a binói niráa we tabéalatako, échiko arigá walúratami níima.

Echi jaré pagótami pali aboni kúchuwala echo'ná Jesusi yuwa

(Mt. 19:13-15; Mr. 10:13-16)

¹⁵ Ayena cho jaré pagótami echo'ná pali jaré kúuchi mapurigá Jesusi, Binói sikala jiti, nochama aboni. Chopi echi jaré mapu Jesusi binériali, aboni we ra'ámaga aneli echi pagótami mapu ketasi echirigá pama

echi kúuchi. ¹⁶ Chopi Jesusi bayegá echi jaré mapu Binói binériali, echali jeaneli: Ariwesi mapurigá echi jaré kúuchi tamí yuwa simea. Ketásirapé kumesi aboni, mapujiti Riosi we galá nulé si'néami echiyiri bichíyami. ¹⁷ A'lí Jesusi waminabi jeaneli: Ne bichíwali Nijé 'yemi nimí jeané: Ne si'néami echi jaré kúuchi galá bichíi Riosi. Chopi echi jaré pagótami mapu ketasi echirigá achigórigá bichíiko Riosi, aboni ketasi chirigá Riosi níwala níima.

Bilé rijói wabé níwami, Jesusi yuwa ra'íchali

(Mt. 19:16-30; Mr. 10:17-31)

¹⁸ Echali bilé rijói walula, Jesusi yuwa ra'íchaga, jerigá rukueli: Wabé galabé Binériami, ¿churigani galabé olama mapurigani echijiti sinibí niráa bitérama? ¹⁹ A'lí Jesusi ku nijéwaga jeaneli: Mujemi tamí ané mapu Nijeni wabé galabé ju. ¡Ne bichíwali Nijeni galabé ju, mapujiti chopi Riosi bi'néripi wabé galabé ju! ²⁰ Mujemi galá machí mapu Riosi je'ná jerigá nulé echi pagótami: Ketasi kochí auché bilé si'nú mukí yuwa. Ketasi wesi mi'yá auché jaré pagótami. Ketasi chigó. Ketasi 'yéka-ka nawisá, auché jaré sayéraga. Ne galá galé echi kemi onó, echi kemi iyé omá. ²¹ Echali echi rijói ku nijéwaga jeaneli: Nijeni ne galá nijéwaga olali suwaba je'ná jeyiri mapalí jonsa nijeni wabé táa níili. ²² Mapalí Jesusi je'ná jerigá námali, echali Binói jeaneli: Mujemi ketasi cho olali bilé namuti mapu arigá 'wériali ju oluwawa: Ma ku rarinéaga suwaba namuti mapu ikimi niwa, echi nati-gala nachútaga 'ya echi jaré tisúwati. Echali mujemi wabé níwami níima echo'ná ripá riwigachi. A'lí wakiná simigá tamí najató. ²³ Chopi mapalí echi wabé níwami rijói je'ná jerigá námali, echali binói ne wabé siweli, mapujiti binói ne wabé níwami níili. A'lí binói ketasi nakili 'yánala suwaba echi jaré binói níwala namuti echi jaré tisúwati.

²⁴ Mapalí Jesusi riwali mapurigá echi wabé níwami rijói ne wabé siweli, echali Jesusi jeanili: ¡Ne wabé nóchali ju mapurigá echi jaré wabé níwami pagótami galá nijéwaga olama mapurigá Riosi nulé! ²⁵ A'lí Jesusi waminabi jeaneli: Echi kameyo anilíwami namuti ne walú ju mapurigá bilé kawé niráa, chopi echi kameyo siné káachi ketasi 'me nóchali ologá simíramiré echo'ná biléana wichárali uchíi iwáachi. Chopi ne wabé simírami nóchali ju mapurigá echi jaré wikabé namuti níwami pagótami galá nijéwaga olama mapurigá Riosi nulé. ²⁶ Echali aboni je'ná jerigá namsa jeanili: ¡A echirigá ne bichíwali níisagá, a'lí ke wesi galá ku wikawárami níima! ²⁷ Chopi Jesusi ku nijéwaga jeaneli: Echi jaré pagótami ketasi omero je'ná jerigá olayá, chopi Riosi ne galá omero, mapujiti Riosi suwaba namuti galá omérami ju.

²⁸ Echali echi Pegro jeaneli: ¡Walubela, tamujé ma ariweli ne suwaba tamujé níwala namuti, mapurigata mi yuwa najátali! ²⁹ Echali Jesusi ku nijéwaga jeaneli: Jaré

mapu tamí bichíiko ne bichíwali ma ariweli kepu kalí mapujiti aboni wabé olánali mapurigá Riosi nulé aboni. Auché jaré ma ariweli kepu 'wénawa mapujiti aboni olánali mapurigá Riosi nulé aboni. Auché jaré echijiti ariweli kepu ritémawa. Auché jaré echijiti pe teli niráa ariweli aboni jubila. Auché jaré echijiti pe teli niráa ariweli aboni kúchuwala. ³⁰ Echali Jesusi ayena cho waminabi jeaneli: Mapuyíripi echirigá olásagá mapujiti binói tamí wabé galé, échiko waminabi wabé simírami narema jena'í wichimóbachi, ayena cho échiko 'yárami níima mapurigá binói ne sinibí niráa bitélama Riosi yuwa echo'ná ripá riwigachi.

Jesusi auchecho siné bachá niráa aní mapu Binói mi'lirúami níima

(Mt. 20:17-19; Mr. 10:32-34)

³¹ A'lí Jesusi pe waná bayegá echi jaré makói miná okuá mapu Binói nawésanalaga júuli, echali jeaneli: Jipi mata echo'ná Jerusalémachi simabo. Echo'ná ma sébali ikimea ne suwaba mapu ikí echi jaré Riosi jiti nawésami bachá niráa tamí jiti rugá osali. Nijeni wilárami níili mapurigá Ku'wíríami niráa. ³² A'lí echo'ná Jerusalémachi piréami pagótami tamí nijima mapurigá echi auché jaré si'wina piréami pagótami tamí kastigo 'yama. A'lí aboni tamí wabé chati anega tiníchama, ayena cho aboni wabé tamí kichiga riwélatama, ayena cho aboni tamí wabé kachípama. ³³ A'lí ma tamí wabé cho'nisáa, aboni tamí mi'limea; chopi ma bikiyá chi'rigá Nijeni auchecho ku owínama. ³⁴ Echali aboni tarapé galá machili je'ná jeyili. Aboni nirapé machili churékula Jesusi echirigá ra'íchali, mapujiti aboni ke-tasi omérali echirigá machiyá.

Jesusi ku sa'wali bilé rijói ke machíliami

(Mt. 20:29-34; Mr. 10:46-52)

³⁵ A'lí mapalí Jesusi mulubé inárali echo'ná Jerikochi anilíwachi walúlachi simiyá, echali bilé ke machíriami echo'ná mulubé buwichí, namuti táa asali. ³⁶ A'lí ma namsa echo'ná simárachi echi wikabé pagótami, echali echi ke machíliami we rukueli mapu piri jiti echirigá simárali. ³⁷ Echali binói jeanelati mapu echi Jesusi, echo'ná Nasarétachi bitéami, echo'ná simíraga inárali. ³⁸ Echali we yáati o'wéri ra'íchaga jeaneli: ¡Mujé Jesusi, mápumi echi Rabiri ranala ju, tamí wabé natimá! ³⁹ Echali echi jaré pagótami mapu bacháami sírali, si'néami we yónaga ra'ámali; chopi echi ke machíliami waminabi wabé o'weli ra'íchaga jeaneli: ¡Mujé Rabiri ranala tamí wabé natimá! ⁴⁰ A'lí Jesusi echo'ná wilíbaga nurali mapu echi ke machíriami echo'ná párami níima. A'lí mapalí ma echo'ná pálati, echali Jesusi jeanigá rukueli: ⁴¹ ¿Churigá mi nakí mapurigá Nijé nimí olama? Echali echi ke machíriami jeaneli: ¡Walubela, tamí ku machíliami niwá! ⁴² Echali Jesusi jeaneli: ¡Galá ku 'niná!

Mujemi ma galá ku sa'wárami ju mapujítimi galá tamí bichíili. ⁴³ A'lí echi rijói mapu ke machíliami níili, we yáati ma galá ku omérali 'néniya. Echali binói ne wabé Walubela anega Riosi, we najátali echi Jesusi yuwa echo'ná buwichí. A'lí ne si'néami pagótami je'ná jerigá riwisáa, ne wabé galabéraga aneli Riosi.

Jesusi ripili echo'ná Sakeo bitélachi

19 Echali Jesusi ma bakisá echo'ná Jerikochi anilíwachi walúlachi, echo'ná simíraga inárali. ² A'lí echo'ná walúlachi bitéali bilé rijói, Sakeo riwéami, mapu ne wabé níwami níili. Ayena cho je'ná rijói ne walula níili echi auché jaré wenomí napabúami yuwa. ³ Je'ná Sakeo wabé nakili 'néniya machináriya echi Jesusi, chopi binói tarapé chirigá omérali 'néniya, mapujiti ne wikabé auché jaré pagótami wabé cha'igá, noligá 'yéniya Jesusi yuwa. Ayena cho echi Sakeo we téeli níili. ⁴ Chopi echi Sakeo echo'ná bacháami we 'maga, ripá moli echo'ná ripá biléana sikómoro anilíwamichi, mapuyiri rojuá. Echi Walubela Jesusi echo'ná simírama riwéali. A'lí echi Sakeo echo'ná ripáami asagá, we nakili 'néniya. ⁵ Echali mapalí Jesusi echo'ná nawali, Binói echo'ná ripá 'néniya, galá riwisáa echi Sakeo, echali jeaneli: Mujé Sakeo, we sapú ku rikina, mapujiti jipi rawé arigá ju mapu Nijeni ripima echo'ná mujé bitélachi. ⁶ Echali echi Sakeo we sapú ku rikínaga, we kanílagá narépali echi Jesusi. ⁷ Chopi mapalí echi auché jaré wikabé pagótami je'ná jerigá riwali, echali si'néami aboni chótali we sayéraga ra'ícha, mapujiti aboni anili mapu Jesusi ma chi'libámiya simili echo'ná bilé wabé chati oláami rijói bitélachi. ⁸ Echali echi Sakeo wilísaga jeaneli echi Jesusi: ¡Nibira keni Walubélawa, nasípasíni 'yama echi jaré tisúwati mapu ikí namuti nijeni niwa! Ayena cho chabénala niráa a nijeni jaré namuti 'yéka 'yésagá, jipi nijeni auchéchoko ku kuwana 'yama, nawosa chokéami niráa. ⁹ A'lí Jesusi jeaneli: Jipi rawé ma ku wikawárami níili jena'í kalírali bitéami, mapujiti je'ná rijói ayena cho, bilé echi ki'yá bitéami Abrami pagótuala ju. ¹⁰ Ayena cho Jesusi jeaneli: Nijeni wilárami níili mapurigá Ku'wíríami niráa, ayena cho Nijeni we ámiya, ku ku'wílimiya nawali echi jaré pagótami mapu ma wikáami níili.

Jesusi binera echi jaré makói namuti wenomí jiti rugá

¹¹ Echali mapuyénasi echi pagótami galá námali je'ná jerigá ra'íchachi Jesusi, echali Binói auchecho siné irétaga ra'íchali aboni, mapujiti aboni ma ne mulubé sísalí echo'ná Jerusalémachi, ayena cho mapujiti si'néami pagótami mayeli mapu Riosi we yáati nulema riwéali jena'í wichimóbachi piréami pagótami. ¹² Echali Jesusi jerigá irétaga nawésali: Bilé rijói walula waminá mikabé auché biléana kawírali simili mapurigá binói wirárami níima mapurigá walubela sílami niráa

echo'ná binói kawíwalachi, mapurigá mapalí binói ma ku nawasa echo'ná binói kawíwalachi, echi ne walubela nuráami níima. ¹³ Chopi mapalí ke cho simili, echi walula bayegá makói echi jaré binói piónawala, ibili niráa 'yali bilé wabé natéami namuti wenomí. A'lí binói jeaneli ibili aboni: Namuti ralagá, auchecho ku raninéaga galá ku mesi auché jaré wenomí, mapuyénasí nijeni ku nawama. ¹⁴ Chopi echi auché jaré pagótami echo'ná echi rijói kawíwalachi piréami wabé kichiga auché jaré jubáami jeanigá júuli: ¡Tamujeta ketasi nakí mapurigá je'ná rijói wilárami níima mapurigá tamujé walubela silínawala niráa!

¹⁵ Chopi echi rijói arigá wilárami níili mapurigá ne walubela silíami niráa. A'lí binói ma ku nawali echo'ná binói kawíwalachi. Echali binói bayénala júuli echi jaré makói pioni mapu 'yárami níili echi wenomí, mapurigá binói gala machimea mapu chu kipu meli ibili pioni. ¹⁶ Echali echi bilé mapu bachá nawali, échiko jeaneli: Walula, echi mujé níwala wabé natéami namuti wenomí ma auché jaré makói muwéali. ¹⁷ Echali echi walula silíami ku nijéwaga jeaneli: We galá juko. Mujé we galabé pióntami jumi. Mami pe okuabi jiti galá bichíwali olali. Jipi nijé nimí wilama walula nuláami niráa echo'ná makóina o'wéalachi. ¹⁸ Echali auché bilecho jeanísíya nawali: Walula, echi mujé níwala wabé natéami namuti wenomí ma auché jaré malí muwéali. ¹⁹ A'lí echi walula silíami ayena cho jeaneli: Jipi nijé nimí wilama walula nuláami niráa echo'ná malána o'wéalachi. ²⁰ A'lí auché bilé jeanísíya nawali: Walula, jena'í atí mujé níwala we natéami namuti wenomí, mapu nijeni echo'ná biléana wisibúlachi rakoka katéwali. ²¹ Mapujiti nijé nimí ne wabé majali mapujiti mujemi wabé aparúami ju. Mujemi auchecho ku chapí echi jaré namuti mapu mujemi ketasi muchúwali; ayena chomi we 'wi mapo'ná mujemi ketasi ichali. ²² Echali echi walula silíami jeaneli: ¡Mujé pióntami wabé chati oláami jumi! Mapurigá mujé binói anili, echirigá nijé nimí wi'nijima. Mujemi galá machili mapu nijeni we aparúami níilo; ayena chomi galá machili mapu nijeni ku chapí echi jaré namuti mapu nijé ketasi muchúwali, ayena cho mapu nijeni we 'wí mapo'ná nijeni ketasi ichali. ²³ ¿Churékula bichemi ketasi nijali echi nijé níwala wabé natéami namuti wenomí, echi jaré wenomí tibúami yuwa? A'lí nijeni ku narema riwéali echi nijé níwala wenomí, ayena cho echi auché jaré mapu muwema riwéali, mapalí nijeni ma ku nawasa echo'ná nijé bitélachi. ²⁴ A'lí echi walula silíami jeaneli echi auché jaré echo'ná muchúami: Ku 'yesi echi wabé natéami namuti wenomí. A'lí 'yasi echi mapu ma niwa makói wabé natéami namuti wenomí. ²⁵ Chopi aboni jeaneli: ¡Walubela, échiko ma niwa makói wabé natéami namuti wenomí! ²⁶ Echali echi walula silíami ku nijéwaga jeaneli: Echi mapuyiripi wikabé níwako, waminabi auché jaré 'yárami níima. Chopi echi ma-

puyiripi ketasi wikabé níwako, échiko waminabi 'yérami níima echi jaré péé okuáa mapu binói abijí niwa. ²⁷ Ayena cho echi walula silíami waminabi jeaneli: Wakíná tosí echi jaré nijé sayela mapu ketasi nakili mapu nijé, aboni silínawala níima. ¡Waminá ko'wisí si'néami aboni jena'í bacháami tamí yuwa!

Jesusi ma bakili echo'ná Jerusalémachi

(Mt. 21:1-11; Mr. 11:1-11; Jn. 12:12-19)

²⁸ A'lí ma je'ná jerigá anisáa, Jesusi waminabi inárali echo'ná Jerusalémachi simiyá. ²⁹ Echali mapalí Binói ma mulubé sébali echo'ná Betajechi, echo'ná Betániachi ayena cho, mapo'ná mulubé ju echo'ná ripá rabó Olíbochi anilíwachi, echali Jesusi okuá júuli echi jaré mapu Binói binérali. ³⁰ A'lí Jesusi jeaneli: Echo'ná mulubé rijówachi simíbaga. A'lí mapalítamo echo'ná se-basa, 'yémitamo riwiboa bilé bulito wíira chukúami, echi mapu ketasi cho binératami ju. ¡Botánaga, wakiná tosí! ³¹ Chopi a jaré 'yemi mi jeanigá rukuésagá: ¿Churékulátamo botana? Echali jeanesi: ¡Echi Walubela Jesusi we newalé! ³² Echali echi jaré mapu Jesusi júuli, echo'ná simíbaga achigórigá riwali mapurigá Jesusi bachá niráa aneli aboni. ³³ A'lí mapalí aboni ma botana uchútali echi bulito, echali echi bulito níwami jeanigá rukueli: ¡Churékulátamo botana echi bulito? ³⁴ Echali echi jaré Jesusi yuwa binéami jeaneli: Tamujeta toboa mapujiti echi Walubela Jesusi we newalé. ³⁵ A'lí aboni toli echi bulito echo'ná mapo'ná Jesusi asali. Echali ma aboni kimala jiti pérasa echi bulito, aboni 'yali echi bulito mapurigá Jesusi asema. ³⁶ A'lí auché jaré pagótami we pérasali aboni kimala echo'ná buwichí mapo'ná Jesusi simírama riwéali echi bulito asigá. ³⁷ A'lí Jesusi ma mulubé ripuna simírama riwéali biléana buwichí mapo'ná echo'ná ripá rabó Olíbochi anilíwachi jonsa ko'nana simiwáwami ju. Echali si'néami echi jaré bichíyami mapu Binói yuwa najátali ke sayiná chótali wabé kaníliga o'weli ra'icha anega mapu Riosi ne wabé Walubela ju. A'lí echi jaré bichíyami echirigá ne wabé simírami kaníili mapujiti aboni auchecho newalali mapurigá aboni chabénala riwali mapalí Jesusi wisabé wabé omériga olali mapurigá ke wesi auché jaré pagótami omero olayá. ³⁸ Echali echi jaré bichíyami o'weli ra'íchaga jeanili: ¡Ne wabé galabé ju je'ná Walubela Silíami mapu ma inaro mapujiti echi Walubela Riosi júuli! ¡Ayena cho Riosi 'yama mapurigá Binói pagótamawala kilí ologá pirélama echo'ná ripá riwigachi! ¡Waminabi wabé Walubela níilaga Riosi! ³⁹ Echali jaré Bariseo anilíwami binériami ayena cho echo'ná 'yérali echi auché jaré wikabé pagótami yuwa. Aboni jeaneli: Binériami, ¡oyériga ra'amá echi jaré mapu Mujé binérali! ⁴⁰ Chopi Jesusi ku nijéwaga jeaneli: ¡Nijé 'yemi nimí ané mapu a je'ná jaré ketasi echirigá anisáagá, echali echi jaré rité o'weli niráa echirigá ra'ichámiré!

⁴¹ A'lí mapalí Jesusi ma mulubé sébali echo'ná Jerusalémachi anilíwachi walúlachi, ma galá 'néniga echi walúlachi, Jesusi wabé natimaga echo'ná piréami pagótami, wabé nalali. ⁴² Echali Jesusi jeanili: ¡Ne galabé níimili jena'í Jerusalémachi piréami pagótami machisáagá mapurigá Nijeni omérami ju ayá mapurigá aboni kilí ologá pirélama! Jipi rawé jena'ini atí, chopi aboni ketasi machí mapurigá Nijeni ku'wírama riwéali aboni. ⁴³ Echali Jesusi ayena cho jeanili: Waminánomí rawé jena'í Jerusalémachi piréami pagótami ne wabé risúu olálami níima, mapujiti echi jaré aboni sayela ne nologá ripabé tigoma jena'í walúlachi. ¡Echirigá echi jaré aboni sayela ne nologá sigá wabé nakoma jena'í Jerusalémachi piréami sayéraga! ⁴⁴ Echali echi jaré asayela waminá omérama jena'í Jerusalémachi piréami, mapuyénasí wikabé aboni waminá ko'wirúami níima. A'lí je'ná walúlachi suwaba najunárami níima mapuyénasí ketasi ripimani bilé rité tigótami niráa, mapujiti jena'í piréami pagótami ketasi machili mapu Riosi tamí júuli ku'wíranala aboni.

Jesusi ku machí a'wali echi jaré ralinéami echo'ná pachá echi walubé Juríosi ri'obáwalachi jonsa
(Mt. 21:12-17; Mr. 11:15-19; Jn. 2:13-22)

⁴⁵ Echali Jesusi echo'ná pachá echi walubé Juríosi ri'obáwalachi bakisá, chótali miná machí a'waya si'néami mapu ikí echo'ná 'yéнали namuti ralinéwa, si'néami mapu ikí namuti ralali ayena cho. ⁴⁶ Echali Jesusi jeaneli: Echo'ná Riosi Ra'íchala oselíwalachi je'ná jerigá osirúami ju: Nijé kalílachi ju mapo'ná echi pagótami Riosi yuwa ra'íchama, ¡chopi 'yémitamo ma niwali je'ná Riosi kalila mapurigá biléana risochí, chigórami pirélachi niráa!

⁴⁷ A'lí Jesusi sinibí rawé we galá binérami echi pagótami echo'ná pachá echi walubé Juríosi ri'obáwalachi. Chopi echi jaré o'wéala sacerdote, echi jaré nulalíwami binériami ayena cho, echi jaré o'wéala Juríosi ayena cho, si'néami wabé nakili mapu mi'limea echi Jesusi. ⁴⁸ Chopi aboni ketasi chirigá mi'yali Jesusi echali, mapujiti echi auché jaré wikabé pagótami wabé kaníliga námali Jesusi nawésawala.

Jesusi wabé omériga olali
(Mt. 21:23-27; Mr. 11:27-33)

20 Siné rawé Jesusi asali echo'ná pachá echi walubé Juríosi ri'obáwalachi. Echali Binói binériga nawésali echi wabé Galabé Riosi Ra'íchala echi wikabé pagótami. A'lí ke sayiná echo'ná sili echi jaré o'wéala sacerdote, echi jaré nulalíwami binériami ayena cho, echi jaré o'wéala ochérami Juríosi ayena cho. ² Echali aboni jeaneli: Tamujé tamí ku ruyé churigami echirigá wabé omériga olá. ¿Chigá mi echirigá 'yali mapurigami echirigá omero olayá?

³ Echali Jesusi ku nijéwaga jeaneli: Nijé ayena cho 'yemi nimí rukuema bilé namuti. Tamí ku nijéwasi. ⁴ ¿Acha Riosi, echo'ná ripá riwigachi atíami, nuleli echi Juani pagónala echi pagótami? ¿Acha jaré pagótami echirigá nuleli, kéremá? ⁵ Chopi aboni chótali a'nagupi ra'íchaga jeanigá: Ata jeanisáagá mapu Riosi nuleli echi Juani pagónala echi pagótami, echali echi Jesusi Binói tamujé tamí jeanigá rukuema: ¿Churékulátamo ketasi bichíili mapurigá echi Juani tamí jiti rugá nawésali? ⁶ Echali aboni waminabi je'ná jerigá 'nátali: Ata jeanisáagá mapu jaré pagótami nuleli echi Juani pagónala echi pagótami, echali si'néami pagótami tamujé tamí basibuka ko'wimea, mapujiti aboni mayé mapu Riosi ne bichíwali júuli echi Juani pagónala echi pagótami. ⁷ A'lí je'ná jerigá 'nátaga aboni ku nijéwaga jeaneli mapu aboni ketasi machili chigá nuleli echi Juani echirigá pagónala echi pagótami. ⁸ Echali Jesusi ku nijéwaga jeaneli: Nijé ketasi cho 'yemi nimí ruyema chigá tamí 'yali mapurigani je'ná jerigá wabé omériga olama.

Jesusi binera jaré wabé chati oláami nóchami jiti rugá
(Mt. 21:33-44; Mr. 12:1-11)

⁹ Echali Jesusi chótali irétaga ra'ícha echi pagótami, jeanigá: Bilé rijói onorúami ichali wikabé uva anilíwami rakéami namuti echo'ná binói kawíwalachi. A'lí échiko suwaba tanéwaga 'yali auché jaré nóchami, mapuyénasí binói wi'libé iyénali echo'ná auché biléana kawírali. ¹⁰ Chopi mapalí ma sébali echi uva rakala ripunálawachi, echali echi rijói júuli bilé binói piónawala echo'ná echi jaré nóchami yuwa mapurigá échiko galá narema binói níwala uva rakala; chopi echi jaré nóchami we chi'wánaga, yiri ku júuli. ¹¹ Echali echi uva níwami auchecho bilé pióntami júuli. Chopi echi jaré nóchami je'ná ayena cho we chi'wánaga, wabé riwélatasa, yiri ku júuli. ¹² A'lí echi uva níwami auchecho siné auché bilé pióntami júuli. Chopi echi jaré chati oláami nóchami ayena cho waminá chi'wánaga, waminá júuli. ¹³ Echali echi uva níwami ne jubáami niráa jerigá 'nátali: ¿Churigani olama? Jipi nijeni echo'ná julama echi keni raná mápuni ne wabé galé. Aboni gará 'nénasa keni raná, we galigá narémiré. ¹⁴ Chopi mapalí echi jaré chati oláami nóchami ma riwáli echi uva níwami ranala, echali aboni a'nagupi jeaneli: Je'ná ri'malí ju mapu suwaba je'ná uva níwami níima. ¡Waminá mi'liboa, mapurigá tamujé aboni echirigá níwabo suwaba je'ná ichirúami! ¹⁵ Echali aboni ma ku machí pasa echo'ná ichirúamichi jonsa, waminá mi'yali.

A'lí Jesusi waminabi jeanigá rukueli: Ma ku nawasa echi uva níwami rijói, ¿churigá kastigo 'yama echi jaré chati oláami nóchami? ¹⁶ Nijeni mayé mapu echi rijói uva níwami ma ku nolínasa, waminá suwábamiré echi jaré chati oláami nóchami; ayena cho échiko tanéwaga

'yama binói níwala ichirúami auché jaré galá oláami nóchami. Chopi mapalí echi jaré pagótami námali Jesusi je'ná jerigá ra'íchachi, echalí aboni jeanili: ¡Ketasi echirigá ikigá! ¹⁷ Chopi Jesusi galá 'néniga, jeanigá rukueli: ¿Churigá biché aniwáami ju mapurigá osirúami ju echo'ná Riosi Ra'íchala oselíwalachi? Je'ná jerigá osirúami ju:

Echi rité mapu echi jaré kalí niwáami miná chakena pali mapurigá ketasi galabé niráa, je'ná rité echo'ná sitocho, ma bachá niráa achárami ju. ¹⁸ Ayena cho Jesusi waminabi jeanili: Mapuyíripi echo'ná moba je'ná Ritérali wichisáagá, échiko arigá nosobúrami níima, chopi mapuyíripi echo'ná binói móbachi wichisáagá je'ná Rité, échiko waminá suwábarami níima.

¿Acha risénsiya ju máputa wenomí 'yabo echi silíami?
(Mt. 21:45-46, 22:15-22; Mr. 12:12-17)

¹⁹ Echali echi jaré o'wéala sacerdote, echi jaré nualíwami binériami ayena cho, we yáati nakili bulesa tonáliya echi Jesusi mapujiti aboni galá machili mapu Jesusi echirigá irétaga ra'icha, wabé sayérali aboni. Chopi aboni arigá wabé majali echirigá olayá, mapujiti echi auché jaré pagótami wabé galabé niralí echi Jesusi. ²⁰ Echali aboni júuli auché jaré 'yékami rijói mapurigá aboni kipuma Jesusi nawésawala. Echi auché jaré rijói ne wabé 'yékami níili, chopi aboni olali mapurigá galabé oláami niráa. Echijiti aboni wikabé namuti rukueli. A'lí aboni wabé wi'nijíinalaga kipuli mapalí Jesusi ku nijéwali, mapujiti aboni chopi wabé wi'nijíinalí Jesusi echi jaré o'wéala igúsuwami yuwa. ²¹ Echijiti aboni jeaneli: Binériami, tamujeta galá machí mapu Mujé sinibí ra'icha echi ne bichíwali, ayena cho mápu mi chopi binera mapurigá echi pagótami galabé olama, ayena chomi ketasi 'yékaka wi'nijí echi auché jaré pagótami, chópimi ne bichíwali binera mapurigá aboni olama mapurigá Riosi nulé aboni. ²² Echijiti tamujé tamí ku nijéwaga ruyé: ¿Acha risénsia ju máputa wenomí napabusa natétabo echi walula silíami Sésara riwéami? Ke risensia kéremá. ²³ Chopi Jesusi galá machili mapurigá aboni chopi wabé 'yékaka niráa rukueli, echijiti Binói jeaneli: ²⁴ ¡Tamí 'néresi echi wenomí! A'lí mapalí aboni 'yali bilé namuti wenomí, echali Binói jeanigá rukueli: ¿Chigá cho'orá ju mapu jena'í atí? ¿Chigá riwalá ju jena'í osirúami? Echali aboni ku nijéwaga jeaneli: Echi walubela silíami Sésara riwéami níwala ju. ²⁵ Echali Jesusi jeaneli: Galá nijéwaga olasi mapurigá echi walubela siríami Sésara anilíwami 'yemi mi nulé, chopi bachá niráa galá nijéwaga olasi mapurigá Riosi Binói 'yemi mi nulé. ²⁶ Echijiti aboni ketasi chirigá omérali wi'nijiya echi Jesusi echo'ná echi jaré o'wéala igúsuwami yuwa, mapujiti Binói echirigá ne galabé machíami niráa ku nijéwali. Chopi aboni wabé kilí muchiga 'nátali mapurigá Binói galabé ra'íchaga ku

nijéwali. A'lí aboni ketasi bilé namuti waminabi ku aneli.

Jaré rukueli mapu churigá ku o'wínama echi jaré ma suwíami

(Mt. 22:23-33; Mr. 12:18-27)

²⁷ Pe wilibeko jaré Saruseo anilíwami binériami echo'ná sili. Abóniko ketasi bichíili mapu echi jaré suwíami ku o'wínama waminánomí rawé. Echijiti aboni jeanigá ra'íchali Jesusi yuwa: ²⁸ Binériami, echi walula Moisesi osogá nulali mapu a bilé rijói ketasi cho kúchwaga mukusáagá, chopi echirigá kunámami niráa ariwésagá echi binói upila, mapu echali arigá 'wérali ju mapu echi mukúami rijói rijimala upema echi mukí ariwérami mapurigá binói galá kúchuma. Echali echi jaré kúuchi anérami níima mapurigá echi mukúami rijimala kúchwala niráa. ²⁹ Chabé tamujé yuwa muchili kichao rijói najirémami. A'lí echi bachirúami galá upeli, chopi tarapé cho kúchasa mukuli. ³⁰ Echali echi osá jubáwala upeli echi mukí kunámami, chopi échiko ayena cho ke cho kúchasa mukuli. ³¹ Echirigá achigórigá echi baisáwala ayena cho upeli echi mukí kunámami; ayena cho si'néami echi auché jaré najirémami ibili niráa echirigá upeli echi mukí; ayena cho ibili niráa tarapé cho kúchwami níisa waminá suwísali. ³² Echali jubáami echi mukí ayena cho ma mukuli. ³³ Echali echi jaré Saruseo jeanigá rukueli: ¿Chu yili 'nalina upila níima, mapalí echi jaré suwíami ma ku o'wínasa? Mapujiti si'néami echi jaré kichao najirémami ibili niráa galá upeli echi mukí.

³⁴ Echali Jesusi jeanigá ku nijéwali: Jena'í wichimóbacha echi jaré rijói we jubé, ayena cho echi jaré muguí we kuné. ³⁵ Chopi si'néami echi jaré rijói mapu ikí auhecho ku o'wintarami níima mapujiti aboni galá bichíyami ju, aboni ma ketasi auhecho mapurigá jubéami níima echo'ná ripá riwigachi. Nibilé cho mapurigá kunéami níima echi jaré muguí echo'ná ripá riwigachi. Echali echi jaré rijói ma ketasi 'yama aboni malala mapurigá aboni kunema. ³⁶ Mapujiti aboni ketasi chirigá auhecho suwimeea, chopi aboni sinibí pirélama achigórigá mapurigá echi jaré o'wéala Riosi kapitánawala sinibí piré. Ayena cho aboni ma Riosi kúchwala níima, mapujiti aboni ma ku o'wínali mapalí aboni ma suwíami níili. ³⁷ Ayena cho echi Moisesi nawésali jeanigá mapurigá echi jaré mapu ma suwíami ju, pe waminánomí auhecho ku o'wínama. Mapujiti echo'ná Riosi Ra'íchala oselíwalachi mapo'ná osirúami ju mapurigá Riosi ra'íchali echi Moisesi echo'ná mapo'ná bilé ku'wíchalachi we rajínali, echo'ná osirúami ju mapu echi Walubela Riosi abijí Riósawala ju echi Abrami, echi Isaka ayena cho, echi Jakobo asíchiko. ³⁸ Ne si'néami echi jaré Riosi níwala pagótami ketasi mapurigá suwíami ju, chopi aboni sinibí piréami ju Riosi yuwa. ³⁹ Echali jaré nualíwami binériami

jeaneli: Binériami, Mujemi ne wabé galabé anili.

⁴⁰ Echali aboni wabé majali waminabi rukué.

¿Chigá Ranala ju echi Cristo anilíwami?

(Mt. 22:41-46; Mr. 12:35-37)

⁴¹ Echali Jesusi jeanigá rukueli: ¿Churékula echaní jaré mapu echi Cristo anilíwami echi Rabiri ranala ju?

⁴² Mapujiti binói Rabiri je'ná jerigá anili mapurigá osirúami ju echo'ná Riosi Ra'íchala oselíwalachi mapo'ná Salmo anilíwami ju:

Echi Walubela Riosi jeaneli echi nijé Walubélawala:

Jena'í Nijé watonachi asagá,

⁴³ Mapuyénasi Nijeni wabé omériga ro'wama echi jaré Mujé sayela echo'ná ri'léami Mujé ralálachi, mapurigami echirigá galá omérama aboni.

⁴⁴ Echali Jesusi waminabi jeanigá rukueli: ¿Churigá Rabiri ranala níima, mapalí Rabiri binói echirigá ané binói Walubélawala?

Jesusi we wi'nijí echi jaré nulalíwami binériami

(Mt. 23:1-36; Mr. 12:38-40; Lk. 11:37-54)

⁴⁵ Ne si'néami echi jaré pagótami galá kipua muchili mapalí Jesusi je'ná jerigá aneli echi jaré mapu Binói binérali: ⁴⁶ Ne galabé niráa 'natasí mapurigá echi jaré nulalíwami binériami ketasi 'yemi mi 'yékama. Aboni chopi i'weli napáchaga 'yénanali. Ayena cho aboni ne wabé nakí mapu echi auché jaré pagótami sinibí ne wabé o'wikeka naripama. Ayena cho aboni chopi muchínali echo'ná wabé galabéalachi echo'ná pachá aboni ri'obáwalachi, mapurigá wabé o'wéala niráa. Ayena cho mapalí aboni bayérami ju ko'núula echo'ná auché jaré pagótami pirélachi, aboni chopi nakí mapu bachá niráa ko'mea. ⁴⁷ Chopi aboni ayena cho wabé 'yékaka niráa waminá 'ye echi jaré kunámami kalila. A'lí aboni wi'libé niráa ra'icha mapurigá Riosi yuwa ra'íchaga niráa. Echijiti aboni waminabi wabé kastigo 'yárami níima.

Echi wabé risúwati kunámami mukí muchúwali

wenomí

(Mr. 12:41-44)

21 A'lí Jesusi 'néniga riwali mapurigá echi jaré wabé níwami pagótami wikabé muchúwali wenomí echo'ná wenomí muchuwálachi echo'ná pachá echi walubé Juríosi ri'obáwalachi. ² Echali binói ayena cho riwali bilé wabé risúwati mukí kunámami mapalí echo'ná muchúwali okuá kentavo. ³ Echali Jesusi jeaneli echi auché jaré: Ne bichíwali 'yemi nimí ané mapu Nijeni ne wabé simírami natéami niráa niralí mapurigá je'ná wabé risúwati mukí muchúwali, chopi Nijeni ketasi 'me niralí mapurigá echi jaré wabé níwami muchúwali. ⁴ Mapujiti si'néami echi auché jaré, abijí wikabé tibiika echo'ná muchúwali, Riosi ayá. Chopi

je'ná mukí ne wabé risúwati níisa, arigá suwaba muchúwali mapu ikí binói níwali, mapurigá namuti ralogá bitélama.

Jesusi bachá niráa nawésaga aní mapu echi walubé Juríosi ri'obáwarachi waminá najuinárami níima

(Mt. 24:1-2; Mr. 13:1-2)

⁵ Echali jaré mapu Jesusi binérali a'nagupi ra'íchali echi walubé Juríosi ri'obáwala jiti rugá mapurigá wabé simati rité jiti niwárami níili, ayena cho mapurigá wabé ba'yóratami níili echi jaré wabé simati namuti jiti mapu echi jaré Juríosi pagótami ma 'yali. A'lí Jesusi jeaneli:

⁶ Waminánomí rawé ne suwaba je'ná namuti mapu 'yémitamo ritiwá waminá najuinárami níima. Echali nibilé rité ripima tigótami niráa.

Je'ná jerigá ikimea ke cho sébachi echali ne jubá rawé

(Mt. 24:3-28; Mr. 13:3-23)

⁷ Echali aboni jeanigá rukueli: Binériami, ¿chu kilíbuko je'ná jerigá ikimea? Tamujé tamí ruyé mapu churigá tamujeta machiboa mapalí je'ná jerigá ke 'me ayó ikimea.

⁸ Jesusi ku nijéwaga jeaneli: Ne galá tibuka 'natasí 'yemi aboni mapurigá ke wesi 'yemi mi 'yékama. Pe waminánomí wikabé ibili niráa nolínama mapu wabé 'yékaka niráa jeanimea: ¡Nijé binói ju echi Walubela Cristo! Ayena cho jeanimea: ¡Ma sébachi ju! Chopi 'yemi ketasi najátasi aboni yuwa. ⁹ Ayena cho mapalítami echi pagótami ra'íchachi mapu ne wikabé sontarsi wabé nakowi, ayena cho mapu wikabé pagótami wabé na'awa, echali ketasi majasi mapujiti arigá 'wérali ju mapu je'ná jerigá bachá ikimea, chopi echali ketasi cho sébachi níima echali ne jubá suwibálawachi rawé. ¹⁰ A'lí Jesusi waminabi jeaneli: Echali rawé biléana walula nulálachi kawírali piréami wabé nakoma, auché biléana walula nulúlachi kawírali piréami sayéraga; ayena cho bilé walula silíami pagótamawala wabé nakoma auché bilé walula silíami pagótamawala sayéraga. ¹¹ Echali wikanáami wabé nokomea je'ná kawí, ayena cho wikanáami jena'í wichimóbachí piréami pagótami ne wabé 'lochema, ayena cho wikabé pagótami wabé nayúkama. A'lí echali rawé jena'í wichimóbachí piréami wikabé riwime wabé majajárami namuti echo'ná ripá nolírali, ayena cho auché jaré o'weli namuti 'nératami níima.

¹² Chopi bachá ke cho sébachi je'ná jerigá ikíachi echi jaré 'yemi sayela 'yemi mi waminá chapigá wabé risúu olama. Aboni 'yemi mi bologá tomea echo'ná aboni ri'obáwalachi mapurigátamo kastigo 'yárami níibo. 'Yémitamo pachá mo'wárami níibo, ayena chótamo torúami níibo echo'ná bacháami jaré o'wéala silíami yuwa mapujítamo tamí bichíyami ju. ¹³ Echirigá ikimea 'yemi mi yuwa mapurigátamo galá oméрабо

Nijé ra'íchala nawésiya echi jaré o'wéala. ¹⁴ Chopi ketasi wikabé namuti níлага 'natasi mapu churigátamo ku nijéwaga ra'íchaga nijéabo echalí rawé. ¹⁵ Mapujiti echalí rawé Nijé Binói 'yemi nimí galabé 'natárama mapurigátamo galá ku wiaga ra'ichaba. A'lí ke wesi echi jaré 'yemi sayela galá omérama 'yemi mi ku nijéwiya. Nibilé wesi omérama 'yemi mi wi'nijiya, ne bichíwali niráa. ¹⁶ Chopi jaré 'yemi waminá nijírami níibo 'yemi aboni 'wénawala jiti mapurigátamo kastigo 'yárami níibo. Auché jaré 'yemi waminá nijírami níibo 'yemi aboni ritémawala jiti mapurigátamo kastigo 'yárami níibo. Auché jaré 'yemi waminá nijírami níibo 'yemi amí-gowala jiti mapurigátamo kastigo 'yárami níibo, ayena cho jaré 'yemi waminá ko'wirúami níibo. ¹⁷ A'lí ne si'néami pagótami jena'í wichimóbachi piréami 'yemi mi wabé kichima mapujiti 'yémitamo tamí bichíyami ju. ¹⁸ Arigá nirapé bilé wikama 'yemi kupala, echo'ná 'yemi mo'ólachi jáwami. ¹⁹ Átamo sinibí niráa galá bichíisagá, 'yémitamo arigá sinibí niráa pirélabo Riosi yuwa.

²⁰ A'lí mapalítamo ma ritiwá wikabé sontarsi ne noligá jáwami echo'ná Jerusalémachi anilíwachi walúlachi, echalí galá machisí mapu ke me ayó echo'ná walúlachi suwaba waminá suwábarami níima. ²¹ Echalí galá níima mapu echi jaré pagótami mapu echo'ná Juréachi anilíwachi kawírali muchuwi, arigá waminá ripá rabó júmsama. Ayena cho galá níima mapu echi jaré pagótami mapu echo'ná Jerusalémachi anilíwachi muchuwi waminá mikabé júmsama. Ayena cho galá níima mapu echi jaré pagótami mapu echo'ná kawichí 'yena ketasi ku mo'wimea echo'ná walúlachi. ²² Mapujiti echalí rawé echi pagótami ne wabé simírami risúu olárami níima, mapuyénasí suwaba ikimea mapurigá bachá niráa osirúami níili echo'ná Riosi Ra'íchala oseríwalachi mapurigá ikimea riwéali. ²³ Echalí Jesusi wabé natimaga jeanili: ¡Echalí rawé echi jaré muguí mapu ikí pocháami níimako ne wabé risúu olárami níima, echi auché jaré muguí mapu kúuchi kúchuwami níimako ayena cho! Mapujiti jena'í Jerusalémachi piréami pagótami ne wabé okótarami níima, ne wabé simírami risúu olárami ayena cho. ²⁴ Jaré aboni waminá ko'wirúami níima mapalí aboni wabé nakówako auché jaré pagótami sayéraga. Auché jaré aboni bologá torúami níima echo'ná auché jaréana si'wina kawírali. A'lí echi jaré isena pagótami we nulama mapurigá o'wéala nuláami niráa jena'í Jerusalémachi wi'libé bamíwali niráa, mapuyénasí Riosi echirigá risénsia 'yama.

Jesucristo ku nolínama jena'í wichimóbachi

(Mt. 24:29-35, 42-44; Mr. 13:24-37)

²⁵ Echalí echi rayénali si'wináriga nakulíwarami níima, echi michá ayena cho, echi jaré sopolí asíchiko. A'lí echi pagótami jena'í wichimóbachi piréami wabé maja-

ga ke newalama; ayena cho aboni ne wabé majajárami níima mapujiti ne wabé chati anema echi ba'wí echo'ná ri'ré suwé mapo'ná walú maní ba'wí; ayena cho aboni majajárami níima mapujiti ne wabé simírami o'wéri chipoma echi walú ba'wí. ²⁶ Echalí echi jaré pagótami jena'í wichimóbachi piréami ne wabé majaga, tarapé chiwikisáa nírama, mapujiti aboni wabé majajáratami níima mapalí aboni wabé 'natama mapu churigá ikimea riwéali jena'í wichimóbachi; ayena cho suwaba namuti echo'ná ripá riwigachi nirúami waminá nakulíwarami níima. ²⁷ Echalí Jesusi waminabi jeaneli: Echi jaré pagótami jena'í wichimóbachi piréami ayena cho tamí riwimea mapalí Nijeni ku nawama ne wabé Walubela niráa, mapujiti waminánomí rawé Nijeni ku nawama echo'ná ripana nolírali jonsa ne wabé ratábami niráa. Nijeni wilárami níili mapurigá Ku'wíriami niráa. ²⁸ A'lí mapalí ma chota je'ná jerigá ikiyá echalí wabé kanílasí. Ayena cho ripabé 'ninasi, mapujiti ke 'me ayó 'yémitamo galá ku'wíratami níibo.

²⁹ Echalí Jesusi ayena cho je'ná jerigá irétaga jeaneli: Ne galá 'nesi mapurigá echi jaré chuná ma o'wina sawarásiya, echi auché jaré namuti masana ayena cho. ³⁰ Mapalí 'yémitamo ritiwá mapu echi jaré namuti ma o'wina sawaraya, echalí 'yémitamo ma galá machí mapu ke 'me ayó galá kuwisama. ³¹ Echirigá achigórigá mapalí 'yémitamo ma riwiboa mapu je'ná jerigá galá ikí, echalí galá machisí mapu ke 'me ayó Riosi galá nulema jena'í wichimóbachi piréami pagótami.

³² Ne bichíwali 'yemi nimí ané mapu ne suwaba je'ná jerigá sébali ikimea mapalí je'ná jipi piréami pagótami ketasi cho suwí. ³³ Echirigá ne bichíwali ikimea mapujiti echo'ná ripá riwigachi suwaba suwibama, je'ná wichimoba ayena cho suwibama, chopi Nijé Ra'íchala ketasi siné suwibama.

³⁴ Sinibí galá 'nagá muchisi. Ketasi chati olasi mapurigátamo ketasi echijiti wabé biwárami sulélabo, mapujiti átamo waminá tékasagá, ayena cho átamo wabé níliami níisagá, echalítamo wabé níлага 'natásagá karúmati jiti majáratami níibo mapalí Nijeni ke sayiná ku nolínama jena'í wichimóbachi. ³⁵ Mapujiti echalí ne jubá rawé Nijeni ke sayiná ku nolínama jena'í wichimóbachi. Echalí echi jaré pagótami ne suníami jena'í wichimóbachi piréami ke sayiná kastigo 'yárami níima, achigórigá mapurigá echi jaré namuti kawichí nirúami ke sayiná chapirúami ju echo'ná mapo'ná biléana misúkuwami wilí. ³⁶ Galá 'nagá muchisi; ayena cho sinibí tániga ra'ichasi Riosi yuwa mapurigá ketasi ikimea 'yemi yuwa mapurigá ne bichíwali ikimea echi auché jaré jena'í wichimóbachi piréami pagótami; ayena cho tansi mapurigá 'yémitamo bacháami tamí yuwa jawárami níibo. Nijeni wilárami níili mapurigá Ku'wíriami niráa.

³⁷ Echalí Jesusi sinibí rawé nawésaga binérali echi pagótami echo'ná walubé Juríosi pagótami

ri'obáwalachi, chopi sinibí rokogó Binói chi'léballi echo'ná ripá rabó Olíbochi anilíwachi. ³⁸ A'lí ne si'néami echi jaré pagótami bi'yá abijí napawili echo'ná walubé Juríosi pagótami ri'obáwalachi mapurigá aboni galá kipuma Binói nawésawala.

Echi jaré o'wéala Juríosi wabé sayérali echi Jesusi

(Mt. 26:1-5, 14-16; Mr. 14:1-2, 10-11; Jn. 11:45-53)

22 A'lí ma mulubé sébachi níili echalí omowálawachi mapalí echi jaré Juríosi ko'wali echi jaré pani ke nasówarami echi lewadura anilíwami echi mapu echi pani galabé niwaliwa. Echali ayena cho níili mapalí aboni ko'yali echi jaré kúuchi bo'wá.

² Echali echi jaré o'wéala sacerdote, echi jaré nualíwami binériami ayena cho, si'néami katéwaga ra'íchali mapu churigá aboni galá omérama mi'ayá echi Jesusi, chopi aboni arigá majali echi auché jaré pagótami jiti, mapujiti echi auché jaré pagótami echi Jesusi amí-gowala níili.

³ Echali echi Júrsi galá nijéwali, sulachí niráa, mapurigá echi Satanasi riwéami riablo nuleli. A'lí echi Júrsi ayena cho Jiskariote rijíkowami níili. Échiko ayena cho bilé níili echi jaré makói miná okuá mapu Jesusi júuli nawísánala. ⁴ A'lí echi Júrsi simisáa ra'íchali echi jaré o'wéala sacerdote yuwa, echi auché jaré o'wéala echo'ná walubé Juríosi ri'obáwalachi nuláami ayena cho, mapu churigá binói nijima echi Jesusi echi jaré o'wéala yuwa mapurigá Binói kastigo 'yárami níima. ⁵ Echali echi jaré o'wéala echirigá namsa, we kaníili; ayena cho aboni bichíwaga aneli echi Júrsi mapu wenomí 'yama riwéali. ⁶ Echali echi Júrsi galá nirali mapurigá aboni natétama riwéali. A'lí echali jonsa echi Júrsi galá machigá 'nátali mapu churigá omérama nijiya echi Jesusi, echi jaré sontarsi yuwa, mapalí echi wikabé pagótami ketasi Binói yuwa 'yénali.

Jesusi ma ne jubá ko'wali echi jaré mapu Binói binérali yuwa

(Mt. 26:17-29; Mr. 14:12-25; Jn. 13:21-30; 1 Ko. 11:23-26)

⁷ A'lí ma sébali echali omowálawachi rawé mapalí echi jaré Juríosi pagótami ko'wali echi pani, ke nasówarami echi lewadura anilíwami. A'lí echi pani chopi galabé niwaliwa echi lewadura nasówaga. Echali omowálawachi ayena cho níili mapalí echi kúuchi bo'wá ko'wílati. ⁸ Echali Jesusi jeanigá júuli echi Pegro, echi Juani: Simíbagá a'lárabasi mapurigá tamujeta kopoa echi kúuchi bo'wá sapala awérami jipi a'lí omowálawachi rawé. ⁹ A'lí aboni ku nijéwaga jeanigá rukueli: ¿Kúmimi nakí máputa a'lárabo? ¹⁰ Echarí Jesusi jeaneli: Maparítamo ma sisáa echo'ná walúlachi, echalítamo natipabo bilé rijói ba'wí matora ináráchi biléana sikolíchi. Najátasi echi rijói mapo'ná yénasi bakí biléana kalírali. ¹¹ Echali jeansi echo'ná kalíwami:

Echi Binériami tamujé tamí júuli mi jeanigá rukuénala: ¿Kumi 'nalí ju echi kalí mapo'ná Nijeni ko'mea jipi a'lí omowálawachi rawé, echi jaré mapu nijé binérali yuwa? ¹² Echali echo'ná kalíwami 'yemi mi 'nérama bilé walú kalí echo'ná osá anamótami mapo'ná ma galá pichítami níima. Echo'ná galá a'lárasi mapurigá tamujeta kopoa echi taa bo'wá sapala awérami jipi a'lí omowálawachi. ¹³ Echali aboni ku simíbagá riwali achigórigá mapurigá Jesusi echirigá aneli. A'lí aboni galá a'lárali mapurigá si'néami aboni echirigá ko'mea echi taa bo'wá sapala awérami echali a'lí omowálawachi rawé.

¹⁴ A'lí ma alíwachi mapalí ma sébali tétali, echali Jesusi echo'ná mésachi asíbali ko'meya echi auché jaré yuwa mapu Binói nawésanalaga júuli. ¹⁵ Echali Jesusi jeaneli: ¡Nijeni ne wabé nakili mapurigani ko'mea je'ná bo'wá sapala awérami 'yemi mi yuwa mapalini abijí ke cho mi'lirúami níisa! ¹⁶ Mapujiti Nijé 'yemi nimí ané mapu Nijeni ma ketasi auchecho siné omáwaga ko'mea echi taa bo'wá sapala awérami jena'í wichimóbachi. Chopi Nijeni auchecho siné ko'mea echo'ná ripá riwigachi mapalí Riosi ne Walubela Nuléami níima ne si'néami pagótami yuwa, mapalí Nijeni ma mi'lirúami níisa aboni jiti, mapurigá Riosi níwala Méchuli niráa.

¹⁷ Echali Jesusi ma chapisáa bilé vaso echi uva ba'wila ro'wárami, walú natétara 'yali Riosi. A'lí Binói jeaneli echi jaré mapu Binói binérali: ¡Chapigá je'ná, péé kúuchi bajisi ibili 'yemi! ¹⁸ Mapujiti Nijé 'yemi nimí ané mápuni ma ketasi auchecho siné bajima echi uva ba'wila jena'í wichimóbachi, chópini auchecho siné bajima echo'ná ripá riwigachi mapalí Riosi ne Walubela Nuléami níima ne si'néami pagótami yuwa. ¹⁹ Echali Jesusi ma chapili echi pani. A'lí natétara 'yasa Riosi, ma rojonasa, 'yali echi jaré aboni. Echali jeaneli: Je'ná ju Nijé sapala. Nijeni ma mi'lirúami níima mapurigá 'yemi níwala Ku'wíriami niráa. Sinibí je'ná jerigá olasi mapurigátamo galá 'natabo tamí jiti. ²⁰ A'lí ma sunisa ko'yá, Binói echirigá ayena cho 'yali echi vaso mapo'ná uva ba'wila ro'wárami níili. Echali Binói jeaneli: Je'ná uva ba'wila mapurigá Nijé lalá ju. Riosi bukulíwami niráa a'láraga nulali mapurigá Nijeni mi'lirúami níisa, Nijé lalá echirigá ku luwárami níima 'yemi jiti, mapurigátamo ku wikawárami níibo.

²¹ Chopi jena'í bilénapi ko'wálachi tamí yuwa atí echi bilé rijói mapu arigá tamí nijima mapurigá echi jaré Nijé sayela tamí chapimea. ²² Echali Jesusi waminabi jeaneli: Nijeni wilárami níili mapurigá Ku'wíriami niráa. A'lí ne suwaba tamí yuwa ne bichíwali ikimea mapurigá Riosi ki'yá jonsa anili mapu ikimea riwéali. Chopi ne wabé risúu olárami níima echi bilé rijói mapu tamí nijima mapurigani waminá mi'lirúami níima. ²³ Echali aboni chótali a'nagupi rukuée mapu chigá 'nalí bilé aboni echirigá nijima riwéali echi Jesusi mapurigá Binói waminá chapirúami níima.

Aboni we ra'ichaga rukué mapu chigá aboni ne walula níima riwéali

²⁴ Echali echi jaré mapu Jesusi binérali ayena cho a'nagupi ra'ichaga rukueli mapu chigá bilé aboni ne walula níima riwéali echi auché jaré aboni yuwa.

²⁵ Chopi Jesusi jeaneli: Echi jaré o'wéala silíami, echi auché jaré pagótami silínawala, wabé 'wérali nulé echi jaré pagótami. Ayena cho echi pagótami ané aboni: O'wéala nigúurami niráa. ²⁶ Ketasi echirigá níisi 'yemi; chopi galá níima mapu 'yemi walúlawala mapurigá echi wabé tabéala nílaga, ayena cho galá níima mapu 'yemi níwala walula nuláami mapurigá nigúurami nílaga. ²⁷ Mapujiti echi bilé mapu echo'ná ko'wálachi ko'yá atí waminabi walula ju ketasi mapurigá echi auché bilé mapu echo'ná nigúuraga nocha. Chopi Nijeni we nigúuraga nocha 'yemi mi ku'wíríya.

²⁸ 'Yemi ju máputamo sinibí tamí yuwa 'yéneli mapalí Nijeni risúu olárami níili. ²⁹ Echijiti Nijé 'yemi nimí 'ya máputamo nulebo auché jaré pagótami mapurigá o'wéala niráa, achigórigá mapurigá Nijé Onolá tamí 'yali mapurigani nulema echi pagótami mapurigá ne Walubela niráa. ³⁰ Echijiti 'yémitamo tamí yuwa kopoa, mapalí Nijeni ne Walubela Nuláami níima. Alí 'yémitamo muchíbabo echo'ná makói miná okuá o'wéala muchíbalachi mapurigátamo justicia olabo echi jaré makói miná okuá rojuaka piréami Isaeli pagótami yuwa.

Jesusi bachá niráa anili mapurigá echi Pegro 'yékaka animea riwéali mapurigá binói ketasi machili echi Jesusi

(Mt. 26:31-35; Mr. 14:27-31; Jn. 13:36-38)

³¹ Echi Walubela Jesucristo ayena cho jeaneli: Mujé Simoni galá 'natá mapurigá echi Satanasi riwéami riablo ma risensia tánali mapurigá binói 'yemi mi chati oláanalama. Echi riablo 'yemi mi echirigá risúu olama mapurigá binói galá machimea áchatamo galabé oláami ju. Echirigá ayena cho echi jaré pagótami we kasuwa echi turío mapurigá galabé machinama. ³² Chopi Nijeni we tánali mapurigá Riosi mi waminabi galá bichíirama. Echijiti waminánomí mapalí mujemi auhecho ku wikáwali tánama Riosi, echalí ne galá bichíiraga nawesa mujé echi auché jaré mujé ritémawala bichíyami.

³³ Echi Simoni ku nijéwaga jeaneli: ¡Walubela, nijeni sinibí galá bichíima, ani arigá pachá bachárami nísagá mi yuwa echo'ná pachá kumurachi! ¡Ayena cho nijeni sinibí galá bichíima, arigá 'wérali nísagá mapurigá nijé waminá mi'lirúami níima mi yuwa! ³⁴ Chopi Jesusi ku nijéwaga jeaneli: ¡Mujé, Pegro, Nijé nimí ané mapu jipi rokogó, we yáa mapalí ke cho kusumea echi tolí, mujemi baisá chokéami 'yékaka animea mápumi ketasi tamí machí!

Ma ne mulubé sébachi níili mapalí Jesusi risúu olárami níima riwéali

³⁵ Echali Jesusi jeanigá rukueli: ¿Áchatamo newaleli bilé namuti mapalí Nijé 'yemi nimí júlaga nuleli máputamo ketasi toboa 'yemi níwala namuti echo'ná chiwáwalachi mapalítamo echo'ná buwichí 'yéneli? ¿Áchatamo newaleli mapalítamo ketasi toli 'yemi níwala maleta, mapalítamo ketasi toli auché jaré aká, keremá? Echali aboni ku nijéwaga jeaneli: Ketásita biyiri newaleli. ³⁶ Echali Jesusi jeaneli: Jípiko echi mapu níwako bilé chiwáwala, echo'ná togá binói níwala namuti; ayena cho echi mapu níwako bilé maleta, togá binói níwala wenomí; ayena cho echi mapu ketasi níwako bilé wílibé ripiyá, ma ralinéaga binói kimala, ralá bilé wílibé ripiyá. ³⁷ Mapujiti Nijé 'yemi nimí ané mapu arigá 'wérali ju mapurigá sébali ikimea tamí yuwa mapurigá je'ná jerigá osirúami ju tamí jiti rugá echo'ná Riosi Ra'ichala oselíwalachi: Echi jaré pagótami mayeli mapurigá Binói chati oláami níili mapurigá echi auché jaré chati oláami pagótami. Echirigá ikimea mapujiti mapurigá tamí jiti rugá osirúami ju, echirigá arigá ikimea. ³⁸ Alí aboni jeaneli: Walubela, jena'í nirú okuá i'wéli ripiyá. Echali Jesusi jeaneli: Ma galá sébali ju.

Jesusi ra'icha Riosi yuwa echo'ná Jechamanichi

(Mt. 26:36-46; Mr. 14:32-42)

³⁹ Alí Jesusi ma ku machínali echo'ná walúlachi jonsa. Echali Binói simili echo'ná ripá rabó Olíbochi anilíwachi mapurigá Binói wisabé olali; ayena cho echi jaré mapu Binói binérali así simíbali. ⁴⁰ Alí mapalí aboni ma sébali echo'ná, echali Jesusi jeaneli: Riosi yuwa ra'ichasi mapurigá echi riablo ketasi 'yemi mi chati oláanalama.

⁴¹ Echali Jesusi pe waná simili mapuyena bilé rijói omero bilé rité basibuka paya. Echali Binói chokóbaga wiligá Riosi yuwa ra'ichali, ⁴² jeanigá: Keni Onó, a Mujemi nakisáagá, tamí ku'wiro mapurigá Nijeni ketasi risúu olárami níima, chopi ketasi tamí olili mapurigá Nijeni chopi nakí. Arigá tamí olili mapurigá Mujé Binói nakí. ⁴³ Echali bilé walula Riosi kapitánawala echo'ná ripá riwigachi jonsa simíami, echo'ná Jesusi yuwa iwébanaga nawali. ⁴⁴ Echali Jesusi ne wabé simírami risúu olárami níili, echijiti Binói waminabi wabé nílaga ra'ichali Riosi yuwa. Alí Jesusi chiliwala mapurigá o'weli la pachútami níili, mapu ne ri'lé wi'yérali yénasí pachuli.

⁴⁵ Alí ma sunisa Riosi yuwa ra'icha, Jesusi ku wilísalí. Echali Binói ku simili echo'ná echi jaré yuwa mapu Binói binérali; chopi Binói riwali aboni we kochigá bitíami mapujiti aboni wabé simírami siweli. ⁴⁶ Echali Jesusi jeaneli: ¿Churékulátamo wepi kochí? Ku

muchísaga, Riosi yuwa ra'ichasi, mapurigá echi riablo ketasi 'yemi mi chati olánalama.

Jesusi bologá chapirúami níli

(Mt. 26:47-56; Mr. 14:43-50; Jn. 18:2-11)

⁴⁷ Echali mapali Jesusi abiji echiriga ra'ichachi, we yaa echo'na sili wikabe pagotami. A'li echi Jurasi riwéami mapu bile níli echi jaré makói miná okuá mapu Jesusi binerali, échiko bayebali echi wikabe pagotami. Echali binói mulubéanaga Jesusi yuwa, we nakili naripánala.

⁴⁸ Echali Jesusi jeaneli: Mujé Jurasi, záchami ne narépa-ga tamí nijima mapurigá Nijé bologá chapirúami níli ma? Nijeni arigá wilárami níli mapurigá Ku'wíríami niráa. ⁴⁹ A'li echi jaré mapu Jesusi yuwa 'yéneli, ma galá riwisáa mapurigá ikimea riwéali, echali jeanigá rukueli: Walubela, záchata sayéraga nakobo ripiyá jiti? ⁵⁰ Chopi bile aboni arigá chiwali bile rijói mapu echi ne walula sacerdote piónawala níli. Echirigá echi rijói watoná nakálachi suwaba ripunárami níli. ⁵¹ Chopi Jesusi jeaneli: ¡Ariwesi! Ma galá ju. Echali Jesusi nochogá echi pioni nakálachi, galá ku sa'wali.

⁵² Echali echi jaré o'wéala sacerdote, ayena cho echi auché jaré o'wéala echo'na walubé Juríosi ri'obáwalachi nuláami, ayena cho echi jaré o'wéala ochérami Juríosi, si'néami chapiboya sili echi Walubela Jesusi. Chopi Jesusi jeanigá rukueli: ¡Áchatamo ripiyá ka, ayena cho kusí ka sili tamí chapiboya mapurigá Nijé bile chigórami niráa? ⁵³ Ayena cho waminabi jeaneli: Sinibí rawé mapali Nijé 'yemi nimí yuwa asali echo'na pachá walubé Juríosi ri'obáwalachi, echalítamo ketasi tamí chapili, chopi jipi ma sébali 'yemi tétawala mapalítamo omero olayá mapurigá 'yemi aboni nakí, mapujiti echi wabé chati oluwáwami wabé muweli mapurigá echi rukuwáwami niráa.

Echi Pegro we 'yékaka aní mapu binói ketasi machí echi Jesusi

(Mt. 26:57-58, 69-75; Mr. 14:53-54, 66-72; Jn. 18:12-18, 25-27)

⁵⁴ Echali aboni bologá chapili echi Walubela Jesusi. A'li aboni bulusá toli echo'na echi ne walula sacerdote bitélachi. Echali echi Pegro 'naka niráa jubáami najátali. ⁵⁵ A'li ma sebasa echo'na echi walula sacerdote bitélachi, aboni ma na'asa echo'na pachá nasipa ri'narátachi, echo'na sokuáliya muchíbalí. Echali echi Pegro ayena cho echo'na sokuáliya asali. ⁵⁶ Chopi bile mukí pióntami riwali echi Pegro echo'na sokuáliya atíami. Echali echi mukí galá 'néniga jeanili: Je'na rijói ayena cho echi Jesusi yuwa 'yéneli. ⁵⁷ Chopi echi Pegro wabé 'yékaka jeaneli: ¡Mukí, ketásini machí echi Jesusi! ⁵⁸ Auché péé wilibeko auché bile rijói riwisáa jeaneli: ¡Mujé ayena cho aboni yuwa níli! Chopi Pegro ku nijéwaga jeaneli: ¡Rijói, ketásini níli! ⁵⁹ Auché pe wabé wilibeko, auché bilecho ne wabé bichíwaga jerigá anili:

Ne bichíwali je'na rijói ayena cho echi Jesusi yuwa asali, mapujiti je'na rijói ayena cho echo'na Galiléachi bitéami ju. ⁶⁰ Echali Pegro jeaneli: ¡Rijói, ketásini machí mapurigá mujemi aní! Chopi we yáati we kusuri bile tolí. ⁶¹ Echali echi Walubela Jesusi ku kuwana 'néneli echi Pegro. Ayena cho Pegro ku 'nátali mapurigá Jesusi bachá niráa jeanigá aneli: Jipi rawé ke cho kusúwachi echi tolí, mujemi baisá chokéami we 'yékaka jeanimea mápumi ketasi tamí machí. ⁶² Echali echi Pegro ma ku machínaga ne wabé o'móniga nalali.

Jesusi risúu olárami níli

(Mt. 26:67-68; Mr. 14:65)

⁶³ Echali echi jaré rijói mapu chapigá tibuli echi Jesusi, ne wabé chibi ologá tiníchaga, wabé cho'nali echi Binói. ⁶⁴ Echali aboni ma póлага Jesusi busílachi, waminá chiwali Binói akálachi, jeanigá: A Mujemi níis-agá echi Cristo mapu Riosi julama riwéali, mujemi galá machimée suwaba namuti. Echijiti tamujé tamí ku ruyé: ¿Chigá níli mapu mi chiwali? ⁶⁵ Ayena cho aboni auché jaré wikabé namuti waminabi wabé chati anigá riwélataga aneli.

Jesusi pálati echo'na bacháami ne si'néami echi jaré Juríosi pagótamawala o'wéalawala

(Mt. 26:59-66; Mr. 14:55-64; Jn. 18:19-24)

⁶⁶ Echali rawé mapali ma chi'ráali, echo'na napawili echi jaré o'wéala ochérami, echi jaré o'wéala sacerdote ayena cho, echi jaré nulalíwami binériami asíchiko. Echali Jesusi echo'na bacháami pálati ne si'néami echi jaré o'wéala Juríosi pagótami yuwa. Echali aboni jeanigá rukueli: ⁶⁷ Tamujé tamí ku ruyé: ¿Áchami Mujé ju echi Cristo anilíwami mapu Riosi julama riwéali je-na'í wichimóbachí? Echali Jesusi ku nijéwaga jeaneli: ⁶⁸ A Nijé 'yemi nimí jeanésegá mapu Nijé ne bichíwali ju echi Cristo, echali 'yémitamo ketasi tamí bichíbi; ayena cho a Nijé 'yemi nimí rukuésagá jaré namuti, 'yémitamo ketasi tamí ku nijéwabo. Nibilé cho tamí ku ni'yúbanabo. ⁶⁹ Ayena cho Jesusi waminabi jeaneli: ¡Jipi jonsa waminánomí Nijeni echo'na watonachi echi suwaba omérami Riosi yuwa asimea! ⁷⁰ Echali we yáati si'néami aboni jeanigá rukueli: ¿Mujecha ju echi bilepi Riosi Ranala? Echali Jesusi ku nijéwaga jeaneli: ¡Ayena Nijeni ju, mapurigá 'yemi aboni ma anili! ⁷¹ Echali aboni we yáati jeanili: ¡Binói we chati ra'ichali Riosi sayéraga! ¡Tamujé ma ketasi newalé auché bile testigo mapurigá échiko nawésama je'na Jesusi sayéraga, mapujiti tamujé aboni ma námali mapurigá Jesusi Binói wabé sayéraga ra'ichali Riosi!

Jesusi echo'ná bacháami Pilato yuwa pálati

(Mt. 27:1-2, 11-14; Mr. 15:1-5; Jn. 18:28-38)

23 A'lí ne si'néami aboni jáasga toli Jesusi echo'ná bacháami echi walula silíami Pilato riwéami yuwa, mapu echo'ná Juréachi walula nuráami níili. ² Echali ne si'néami aboni chótali wi'nijísiya Jesusi mapalí aboni jeanili: Tamujeta riwali mapu je'ná rijói wabé na'áwatali tamujé pagótamawala, mapujiti jeaní mapu ketasi risensia ju mapu tamujé natétabo wenomé echi walula silíami Sésara riwéami; ayena cho je'ná rijói aní mapu binói ju echi Cristo anilíwami, mapurigá bilé walubela silíami niráa. ³ Echali echi Pilato jeanigá rukueli: ¿Mujecha ju walubela silíami echi jaré Jurósi pagótami yuwa? A'lí Jesusi ku nijéwaga jeaneli: ¿Ne bichíwali Nijeni ju mapurigá mujemi anili! ⁴ Echali echi walula Pilato ku nijéwaga aneli echi jaré o'wéala sacerdote, echi auché jaré pagótami ayena cho: Nijeni mayé mapu je'ná Rijói ketásirapé chati oláami ju. ⁵ Chopi echi jaré pagótami waminabi o'weli jeanigá aneli: Je'ná Rijói sinibí wabé chati binéraga na'áwata echi auché jaré pagótami jena'í Juréachi piréami. Binói chótali binériya echo'ná Galiléachi piréami pagótami, chopi jipi ayena cho ma binériya nawali jena'í Juréachi.

Jesusi echo'ná bacháami echi Erorsi yuwa pálati

⁶ Ma namsa je'ná jerigá aníachi, echali echi Pilato rukueli acha Jesusi echo'ná Galiléachi bitéami níili. ⁷ A'lí mapalí jaré aneli mapu ayena echi Jesusi echo'ná Galiléachi bitéami níili, echali echi Pilato nulali mapurigá Jesusi echo'ná torúami níima mapo'ná echi Erorsi asali, mapujiti echi Erorsi walula silíami níili echo'ná Galiléachi nuláami. A'lí echi Erorsi ayena cho echo'ná Jerusalémachi asali echali rawé. ⁸ A'lí echi Erorsi we kaníili mapalí binói ma riwali echi Jesusi, mapujiti wi'libé jonsa echi Erorsi wabé 'nénali; mapujiti binói ma we námali wikabé namuti echi Jesusi jiti ra'ichálawachi, ayena cho echi Erorsi wabé nakili 'nénala mapalí Jesusi wabé omériga olali mapurigá ke wesi auché jaré pagótami omérali olayá. ⁹ Echali echi Erorsi wikabé namuti rukueli, chopi Jesusi ketasi bilé namuti ku nijéwali. ¹⁰ A'lí echi jaré o'wéala sacerdote ayena cho echo'ná muchili, echi jaré nulalíwami binériami ayena cho. Echali aboni waminabi ne wabé nilaga wi'nijili echi Jesusi. ¹¹ Echali echi Erorsi, echi jaré binói sontársawala yuwa, ne wabé chibi olali echi Jesusi. Ayena cho aboni we nakili tiníchanala echi Jesusi, echijiti aboni we napachátali bilé galabé wi'libé napacha mapurigá bilé walubela silíami niráa. Echali aboni auchecho ku júuli echo'ná mapo'ná echi Pilato asali. ¹² Echali rawé echi Pilato, echi Erorsi yuwa napawika auchecho galá ku amígowala níili, mapujiti chabénala aboni chopi a'nagupi we nasayérali.

Echi Pilato nulali mapurigá Jesusi waminá mi'lirúami níima

(Mt. 27:15-26; Mr. 15:6-15; Jn. 18:39-19:16)

¹³ Echali echi Pilato napabuli echi jaré o'wéala sacerdote, echi jaré pagótami o'wéalawala ayena cho, echi wikabé pagótami asíchiko, ¹⁴ echali binói jeaneli: 'Yémitamo tamí 'yali je'ná rijói mapurigá we na'áwatiami niráa echi auché jaré pagótami. Chopi nijeni ma suwaba we rukueli jena'í bacháami 'yemi yuwa, a'lí nijeni ketasi riwali mapu binói chati oláami ju, mapurigá 'yémitamo wikabé namuti wi'nijí. ¹⁵ Ayena cho echi Pilato waminabi jeaneli: Echi Erorsi ketasi cho riwali chati oláami niráa, mapujiti echi Erorsi ma auchecho ku kuwana júuli tamujé yuwa. Jipi 'yémitamo ma galá ritiwá mapu je'ná rijói tarapé biyiri chati oláami ju. Echijiti nijeni mayé mapu ketasi 'wérali ju mapu Binói waminá mi'lirúami níima. ¹⁶ Nijeni nulama wipisónala. A'lí bicheni ku ni'yúbanama. ¹⁷ Mapujiti echali omowálawachi arigá 'wérali níili mapurigá echi walula silíami ku machí pama bilé Jurósi rijói mapu pachá bachárami níili, mapujiti echi silíami echirigá olali sinibí bamíbali. ¹⁸ Chopi si'néami echi jaré wikabé Jurósi pagótami chótali o'weli ra'íchaga jeanigá: ¿Ketásita nakí echi Jesusi! ¿Ku machí pa echi Barabasi! ¹⁹ A'lí echi Barabasi riwéami rijói pachá kumurachi bachara asali mapujiti binói wabé sayérali echo'ná walúlachi nuláami o'wéala, ayena cho mapujiti binói mi'yali auché bilé rijoy. ²⁰ Echali echi Pilato nakili ku ni'yúbanala echi Jesusi, echijiti binói auchecho ra'íchali echi pagótami. ²¹ Chopi aboni auchecho waminabi wabé o'weli ra'íchaga jeanili: ¿Kúrsichi michoné! ¿Kúrsichi michoné! ²² Echali echi Pilato ma auché baisá chokéami niráa ra'íchali. Échiko jeanigá rukueli: ¿Churékula echo'ná kúrsichi michóntami níima? ¿Churigá chati olali? Nijeni tarapé riwali je'ná rijói chati oláami niráa, mapurigá binói echijiti waminá mi'lirúami níima riwéali. Nijeni nulama wipisónala. A'lí bicheni nulama ku ni'yúbanala. ²³ Chopi aboni waminabi o'weli ra'íchaga tali mapurigá Jesusi echo'ná kúrsichi michóniga mi'lirúami níima. A'lí echi jaré o'wéala sacerdote ayena cho echirigá tánali. Echijiti echi Pilato echirigá chopi olali mapurigá aboni nakili. ²⁴ Mapujiti binói nulali mapurigá Jesusi echirigá mi'lirúami níima, achigórigá mapurigá aboni nakili. ²⁵ Ayena cho echi Pilato nulali ku machí pánala echi Barabasi riwéami rijói mapu echo'ná kumurachi pachá bachárami níili mapujiti échiko wabé sayérali echo'ná walúlachi nuláami o'wéala, ayena cho mapujiti binói mi'yali auché bilé rijoy. Chopi echi Pilato waminá nijili echi Jesusi mapurigá Binói mi'lirúami níima mapurigá aboni nakili.

Jesusi clavo jiti michóntami níili echo'ná kúrsichi

(Mt. 27:32-44; Mr. 15:21-32; Jn. 19:17-27)

²⁶ Echálí echirigá towáwachi Jesusi, mapurigá Binói echo'ná kúrsichi michóniga mi'lirúami níima, aboni chapili bilé rijói Simoni riwéami, mapu echo'ná kawichí jonsa inárami níili. Échiko 'wérali anélati mapurigá binói matórama echi wabé bitéami kursi echo'ná jubáami Jesusi yuwa ináraga.

²⁷ Echálí rawé ne wikabé pagótami jubáami najátali echi Jesusi yuwa. Wikabé muguí ayena cho jubáami najátaga ne wabé o'móniga nalákali mapujiti Jesusi echirigá mi'lirúami níima riwéali. ²⁸ Chopi Jesusi ku kuwana 'néniga jeaneli echi jaré muguí: 'Yemi muguí jena'í Jerusalémachi piréami, ketasi tamí natimaga nalákasi. Chopi 'yemi aboni jiti natimaga nalákasi, echi jaré 'yemi kúchwala jiti natimaga ayena cho. ²⁹ Mapujiti pe waminánomí rawé echi jaré pagótami jeanimea: Echi jaré muguí mapu ketasi tanéami ju, arigá ne wabé kaníliami ju; ayena cho ne wabé kaníliami ju echi jaré muguí mapu ketasi siné ranáami níili; ayena cho kaníliami ju echi jaré mapu ke siné chi'írali echi jaré kúuchi. ³⁰ Echálí rawé jena'í wichimóbachí piréami pagótami ne wabé risúu olárami níima, echijiti aboni chotama jeané echi ripabé rabótami: ¡Wakiná tamujé tamichi moba najusi, mapurigata waminá suwibabo! Ayena cho aboni jeanema echi kúuchi rabótami: ¡Tamujé tamí moba polé! ³¹ Mapujiti a Nijeni je'ná jerigá risúu olárami nísagá, echi jaré wabé chati oláami pagótami jena'í Jerusalémachi piréami waminabi wabé simírami chati risúu olárami níima.

³² Echálí rawé okuá wabé chati oláami rijói ayena cho torúami níili Binói Jesusi yuwa, mapurigá aboni ayena cho waminá ko'wirúami níima. ³³ Echálí mapalí aboni ma sébali echo'ná biléana mapo'ná Chu'wí Mo'ólachi anilíwachi níili, echálí Jesusi echo'ná biléana kúrsichi, clavo jiti, michóntami níili Binói sikálachi, Binói ronólachi ayena cho. A'lí echi okuá chati oláami rijói echo'ná auché jaréana kúrsichi michóntami níili. Bilé aboni michóntami níili echo'ná biléana kúrsichi Jesusi yuwa watoná wilíami. Echi auché bilé michóntami níili echo'ná auché biléana kúrsichi Jesusi yuwa o'winá wilíami. ³⁴ A'lí mapalí aboni echirigá michónsali Jesusi, echálí Binói we yáati Riosi yuwa ra'íchaga jeaneli: ¡Keni Onó, galá wikáwi aboni, mapujiti aboni ketasi machí mapurigá aboni olá! Echálí echi jaré sontarsi, aboni niráa, rojuánali echi jaré namuti Jesusi napáchala, mapalí aboni namuti ri'échaga olali mapurigá echirigá machimea chigá mema riwéali ibili namuti. ³⁵ Echálí echi wikabé pagótami echo'ná 'nigá jali. Ayena cho echi jaré aboni o'wéalawala wabé kichiga tiníchali echi Jesusi mapalí aboni jeanili: Je'ná rijói anili mapurigá binói galá omérali ku'wíriya auché jaré. ¡Jipi galá níima a binói niráa ku'wírasa, a ne bichíwali binói nísagá

echi Cristo anilíwami mapu Riosi chapili! ³⁶ Echi jaré sontarsi ayena cho wabé chati sití ologá tiníchali echi Jesusi mapalí aboni murubéanaga Binói yuwa, 'yali bajínala wabé chokóami namuti ba'wila. ³⁷ Echálí aboni ayena cho jeaneli: ¡A mujé nísagá echi walubela Juríosi pagótami silínawala, a mujé binói niráa galá ku'wira! ³⁸ Ayena cho echo'ná kúrsichi ripá moba mapo'ná Jesusi michóntami níili je'ná jerigá osirúami níili: Je'ná ju echi Walubela Juríosi Silímawala. Echirigá osirúami níili Griego anilíwami ra'íchala niráa, echi Ebreo anilíwami ra'íchala ayena cho, echi Latini anilíwami ra'íchala asíchiko.

³⁹ Echálí bilé echi wabé chati oláami rijói mapu ayena cho echo'ná auché biléana kúrsichi michóntami níili, échiko wabé chati anigá jeaneli: ¡A mujé ne bichíwali nísagá echi Cristo anilíwami mapu Riosi julama riwéali, a mujé binói ku ku'wira, tamujé tamí ayena cho ku'wira! ⁴⁰ Chopi echi auché biléala jeanigá oyérali: ¿Kéchami majawá Riosi mápumi achigórigá kastigo 'yárami ju mapurigá Binoy? ⁴¹ Arigá galá níili mapu tamujé jerigá kastigo 'yárami níibo, mapujiti tamujé chopi echiyena kastigo 'yárami níili, achigórigá mapurigata wabé chati oláami níili; chopi je'ná rijói tarapé namuti chati olali. ⁴² Echálí echi rijói jeaneli: ¡Mujé Jesusi, waminánomí rawé galá tamí jiti 'natá, mapalimi ne Walubela Nuráami níima! ⁴³ Echálí Jesusi jeaneli: Ne bichíwali nimí ané mapu jípimi tamí yuwa asimea echo'ná ripá riwigachi.

Jesusi ma mukuli

(Mt. 27:45-56; Mr. 15:33-41; Jn. 19:28-30)

⁴⁴ A'lí echálí rawé mapalí ma nasipa rawé níili, ke sayiná ne suníami jena'í wichimóbachí we rukuáwali nasipa alíwachi yénasí. ⁴⁵ Echi rayénali wabé chónali. Echálí echi walubé runáami namuti mapuyiri bilé kimá tétami mapu echo'ná pachá walubé Juríosi ri'obáwalachi 'yératami niráa chukuli, échiko ke sayiná ne nasipa chi'wali. ⁴⁶ A'lí Jesusi o'weli ra'íchaga jeanili: ¡Keni Onó ne galá nisé keni aliwá! A'lí je'ná jerigá anisáa, ma mukuli. ⁴⁷ A'lí mapalí echi walula sontarsi riwali suwaba je'ná jerigá mapurigá ikili, echálí binói ne wabé walubela anega Riosi, waminabi jeanili: Ne bichíwali je'ná Rijói ne wabé galabé níili. ⁴⁸ Ayena cho si'néami pagótami mapu echo'ná 'nigá muchili, je'ná jerigá riwisáa wabé siwega cho'nagá aboni sulálachi ku simíbali. ⁴⁹ Chopi si'néami echi jaré mapu ikí Jesusi amígowala níili, echi jaré muguí ayena cho, si'néami mapu ikí echo'ná Galiléachi jonsa najátali Jesusi yuwa, ne si'néami aboni pe mikabé 'naka, we 'nigá jali je'ná jerigá mapurigá ikili.

Jesusi ma chu'wirótami níili

(Mt. 27:57-61; Mr. 15:42-47; Jn. 19:38-42)

⁵⁰ Echo'ná Arimatéachi anilíwachi, echo'ná Juréachi anilíwachi kawírali bitéali bilé galabé oláami rijói mapu José riwéami níili. Échiko bilé níili echi auché jaré o'wéala Juríosi yuwa. ⁵¹ Chopi binói bichíiga buweli mapurigá Riosi nulema jena'í wichimóbachi piréami pagótami, echijiti binói ketasi nakili mapurigá Jesusi mi'lirúami níima echo'ná kúrsichi mapurigá echi auché jaré o'wéala Juríosi nulali mi'línala. ⁵² Je'ná rijói simigá mapo'ná echi walula Pilato asali, we risensia tali mapu binói chu'wirómiya tomea echi Jesusi mukúami sapala. ⁵³ Echali ma echo'ná ripá kúrsichi jonsa rikibusa echi Jesusi mukúami sapala, echi José biléana kimíflachi kabili. A'lí echo'ná biléana risochí chu'wirólachi rikali, mapo'ná echo'ná biléana koláachi niwárami níili mapurigá risochí niráa. Echali ke wesi cho echo'ná chu'wirótami níili. ⁵⁴ Echali ma pe ba'alínala níili isábawachi rawé. ⁵⁵ Echali echi jaré muguí mapu ayena cho Jesusi yuwa sili echo'ná Galiléachi jonsa, aboni ayena cho echo'ná chu'wirólachi sigá galá riwali mapurigá echi Jesusi mukúami sapala echo'ná rikárami níili. ⁵⁶ Echali aboni ku ro'wiga echo'ná bitichí, galá a'lárali jaré wabé su'weti júkami namuti, jaré uchulíwami namuti ayena cho, echi Jesusi mukúami sapala uchénala. Chopi aboni galá isábali echali isábawachi rawé mapurigá echi jaré Juríosi pagótami nulérami níili.

Echi Walubela Jesusi ku owínali mapalí ma mukúami níili

(Mt. 28:1-10; Mr. 16:1-8; Jn. 20:1-10)

24 Chopi echali oméachi rawé, mapu echali jonsa bilé tarali níima, ne wabé bi'yá echi jaré muguí echo'ná chu'wechi sili, echi wabé su'wéti júkami namuti togá, echi mapu aboni ma a'lárali. Ayena cho auché jaré muguí aboni yuwa simíbalí. ² Chopi mapalí aboni ma sébali echo'ná chu'wechi, echali aboni riwali ma ri'nabura atíami echi walubé rité mapu echo'ná chu'wechi 'yératami níili. ³ Echali echo'ná pachá chu'wechi mo'wisáa, aboni ketasi riwali echi Walubela Jesusi mukúami sapala echo'ná bu'wíami, mapo'ná bachánala rikárami níili. ⁴ Echijiti aboni ne wabé majali, chopi aboni waminabi wabé majajali mapalí aboni ke sayiná riwali okuá rijói echo'ná napawika aboni yuwa jáwami, echi mapu ne wabé simírami ratábami napáchami níili. ⁵ Echali echi jaré muguí waminabi wabé majaga, chopi ri'lé wi'yérali 'nénali. A'lí echi okuá o'wéala Riosi kapitánawala jeanigá rukueli: ¿Churékulátamo jena'í chu'wechi amí echi Jesusi mapu ma ku bitéami ju? ⁶ Binói ma ketasi te jena'ibi, mapujiti ma ku owínali. Galá 'nátaga newalasi mapurigá Binói

bachánala 'yemi mi aneli mapalí Binói abijí iyénali echo'ná Galiléachi. ⁷ Echali Binói Jesusi 'yemi mi jeaneli mapu arigá 'wérali níili mapu Binói waminá nijírami níima, mapurigá echi auché jaré chati oláami pagótami chapigá mi'limea, echo'ná biléana kúrsichi michóniga, chopi mapurigá Binói bikiyá chi'ligá ku owínama riwéali. Binói wilárami níili mapurigá Ku'wíríami niráa. ⁸ Echali aboni galá 'nátaga newalali mapurigá Binói chabénala aneli. ⁹ A'lí echali mapalí echi jaré muguí ku sili echo'ná walúlachi, echo'ná chu'wechi jonsa, echali aboni ku ruyeli suwaba je'ná jeyiri echi jaré makói miná bilé mapu chabénala julárami níili nawisánala. Ayena cho echirigá ruyeli echi auché jaré bichíyami. ¹⁰ A'lí echi jaré muguí mapu je'ná jerigá ne bukúiwami niráa ruyeli echi jaré mapu julárami níili nawisánala, aboni echi María, echo'ná Makatárachi bitéami níili, echi Juana ayena cho, echi auché bilé María ayena cho, echi mapu echi Jakobo iyela níili; ayena cho auché jaré muguí aboni yuwa 'yéneli. ¹¹ Chopi echi jaré makói miná bilé mapu julárami níili nawisánala, aboni mayeli mapu echi jaré muguí chopi mapurigá ke newalite niráa ra'íchali. A'lí aboni ketasi bichíili mapurigá echi jaré muguí nawésali. ¹² Chopi echi Pegro arigá machínaga ne wabé 'maga simili echo'ná chu'wechi. A'lí mapalí binói 'nénali echo'ná pachá, echi chiní kimila chopi riwali echo'ná chakena achárami. Echali echi Pegro ku simigá, ne wabé 'nátali suwaba je'ná jeyiri jiti mapurigá ikili.

Mapurigá ikili echo'ná Emaúsachi burúami

(Mr. 16:12-13)

¹³ Echali rawé okuá aboni echo'ná biléana rijówachi sírali mapo'ná Emaúsachi anélati, mapo'ná mulubé níili echo'ná Jerusalémachi jonsa, mapuyena makói miná bilé kilometro niráa. ¹⁴ Echali aboni a'nagupi ra'ichásiya sírali suwaba mapurigá ikili. ¹⁵ A'lí mapuyénasí aboni echirigá a'nagupi ra'ichásiya sírali, echali Jesusi Binói echo'ná mulubéanaga, aboni yuwa inárali. ¹⁶ Echali aboni galá riwali mapurigá bilé rijói aboni yuwa iyénali, chopi aboni ketasi omérali machiyá chigá níili, mapujiti Riosi echirigá olali. ¹⁷ Echali Jesusi jeanigá rukueli aboni: ¿Piri ju máputamo echirigá wabé siwega a'nagupi ra'icha mapuyénasítamo jena'í buwichí 'yena? ¹⁸ A'lí bilé aboni mapu Klioba riwéami níili, échiko ku nijéwaga jeaneli: ¿Si'néami pagótami galá machí mapurigá ikili jena'í Jerusalémachi bukúli rawé jonsa! ¿Áchami bi'nélipi ju mápumi ketasi machí? ¹⁹ Echali Jesusi jeanigá rukueli: ¿Churigá ikili? A'lí biché aboni jeaneli: Mapurigá ikili echi Jesusi, echi mapu echo'ná Nasaréachi bitéami níili, echi mapu Riosi jiti nawésami rijói níili, echi mapu Riosi yuwa, ayena cho si'néami pagótami yuwa, ne wabé omériga oláami níili, ne wabé omériga ra'íchami ayena cho. ²⁰ Bukúli niráa echi jaré o'wéala sacerdote, echi auché jaré tamujé

o'wéalawala ayena cho nijili echi Jesusi mapurigá Binói wi'nijírami níima, ayena cho mapurigá Binói waminá mi'lirúami níima echo'ná kúrsichi michóniga. ²¹ Chopi tamujeta mayeli mapu Binói wilárami níima riwéali mapurigá Walubela Silfami niráa, echi mapu Ku'wíríami níima riwéali tamujé Isaeli pagótami yuwa, mapurigata ketasi waminabi nulélami níibo echi auché jaré isena pagótami jiti. A'lí jipi arigá ma bikiyá chi'lé mapu jonsa je'ná jerigá ikili. ²² Chopi jaré tamujé níwala muguí tamujé tamí majjáruga aneli mapu Binói ma auchecho ku bité, mapujiti echi jaré muguí bi'yá chi'láachi simíwali echo'ná chu'wechi, ²³ chopi aboni ketasi riwali Binói Jesusi mukúami sapala. ¡Alí aboni tamujé tamí jeanésiya ku sili mapurigá aboni riwali jaré o'wéala Riosi kapitánawala, echi mapu ruyeli mapu Binói Jesusi ma ku bitéami ju! ²⁴ Ayena cho jaré rijói tamujé apanérawala echo'ná chu'wechi simíwali. A'lí aboni achigórigá riwali mapurigá echi jaré muguí anili, chopi aboni ketasi cho riwali echi Jesusi mukúami sapala.

²⁵ Echali Jesusi Binói jeaneli: ¡Báaji! 'Yémitamo tarapé galá 'nátami ju; ayena chótamo wi'libénokuá mapurigátamo galá bichíibo suwaba mapurigá echi jaré Riosi jiti nawésami anili, mapurigá osirúami ju echo'ná Riosi Ra'íchala oselíwalachi. ²⁶ ¡Arigá 'wérali níili mapu echi Cristo echirigá risúu olárami níimi, mapalí Binói ke cho ne wabé Walubelatami níima! ²⁷ Echali Jesusi chótali binériga ruyé mapu churigá aniwáami ju Riosi Ra'íchala osirúami, ne suníami mapalí Jesusi Binói jiti rugá anirúami ju. Bachá niráa Binói echirigá binériga ruyeli mapurigá echi Moisesi osali, ayena cho Binói binériga ruyeli mapurigá echi auché jaré Riosi jiti nawésami osali.

²⁸ Echali aboni ma sébali echo'ná rijówachi mapo'ná aboni simiba sírali, chopi echi Jesusi olali mapurigá waminabi simíami niráa. ²⁹ Chopi aboni 'wérali niráa sulili, jeanigá: Jena'í tamujé tamí yuwa ripí, mapujiti ma we aliwa, ayena cho ma ne mulubé chonámare. Echali Jesusi echo'ná pachá bakili mapurigá aboni yuwa ripima. ³⁰ A'lí mapalí Jesusi ma ko'yá asali aboni yuwa, echali Binói chapigá echi pani, ma natétara 'yasa, rojuánaga 'yali mapurigá aboni ko'mea. ³¹ Echali aboni we yáati galá machíliami niwálati, ayena cho aboni ma galá machili mapu Jesusi Binói níilo, chopi Binói ma ke sayiná ke néwikili. ³² Echali aboni a'nagupi jeaneli: ¿Kéchata ne bichíwali wabé simírami kaníili mapalí Binói tamujé tamí yuwa ra'íchaga inárali echo'ná buwichí, ayena cho mapalí Binói tamujé tamí ra'íchaga ruyeli mapurigá osirúami ju echo'ná Riosi Ra'íchala oselíwalachi?

³³ Echali we yáati aboni ku simíwali echo'ná Jerusalémachi, mapo'ná aboni napawika muchúwami riwali echi jaré makói miná bilé, echi auché jaré aboni apanérawala yuwa. ³⁴ Echali si'néami echo'ná muchúa-

mi we yáati jeaneli: ¡Ne bichíwali ma ku owínali echi Walubela Jesusi! A'lí je'ná Simoni ma galá riwali.

³⁵ Echali echi okuá ayena cho jeaneli mapurigá ikili echo'ná buwichí, ayena cho mapu churigá aboni galá machili echi walubela Jesusi mapalí Binói rojuánali echi pani.

Jesusi ke sayiná wilíwali echo'ná echi jaré yuwa mapu Binói binérali

(Mt. 28:16-20; Mr. 16:14-18; Jn. 20:19-23)

³⁶ Chopi mapalí aboni abijí je'ná jerigá ra'íchali, echali ke sayiná Jesusi Binói echo'ná nasipa wilíwali aboni yuwa; ayena cho Binói kuíruga jeaneli: ¡Kilí niráa ologá pirélasí! ³⁷ Chopi aboni wabé majjárátami níili; ayena cho wabé majaga 'nátali mapu aboni riwali bilé aliwá.

³⁸ Chopi Jesusi jeanigá rukueli: ¿Churékulátamo echirigá majjárátami ju? ¿Churékulátamo si'winárigá 'nata echo'ná 'yemi sulálachi? ³⁹ Galá 'nesi Nijé sikálachi, Nijé ronólachi ayena cho. ¡Nijé Binói juni! Tamí nochogá 'nesi; mapujiti bilé aliwá ketasi sapé, nirapé oché, mapurigátamo tamí ritiwá. ⁴⁰ A'lí je'ná jerigá anisáa, Jesusi 'nérali Binói sikálachi, Binói ronólachi ayena cho. ⁴¹ Chopi mapuyénasí aboni abijí ke cho galá bichíili mapujiti aboni ne wabé simírami kaníili, ayena cho mapujiti aboni chopi wabé majaga 'nátaga 'nénali, echali Jesusi jeanigá rukueli: ¿Áchatamo niwa jaré namuti ko'wáami jena'ibi? ⁴² Echali aboni rojuániga bilé walú rochí awérami, pe táa 'yali ko'wánala echi Jesusi, pe táa kolimena ayena cho. ⁴³ A'lí Jesusi chapigá ko'wali echo'ná bacháami mapo'ná aboni 'nigá jali.

⁴⁴ Echali jeaneli: Je'ná jerigá mapurigá ikili tamí yuwa, chopi ju mapurigá Nijeni 'yemi mi aneli mapalini abijí 'yemi nimí yuwa asali: Mapu arigá 'wérali níili mapu suwaba ikimea mapurigá tamí jiti rugá osirúami ju echo'ná Riosi Ra'íchala oselíwalachi, mapurigá echi Moisesi osali, ayena cho mapurigá echi jaré o'wéala Riosi jiti nawésami osali, ayena cho mapurigá osirúami ju echo'ná Sálmochi anilíwachi. ⁴⁵ Echali Jesusi galá machírali aboni mapu churigá aniwáami ju suwaba Riosi Ra'íchala mapurigá osirúami ju. ⁴⁶ Echali Jesusi jeaneli: Echirigá osirúami ju mapu arigá 'wérali níili mapurigá Nijeni wabé risúu orálami níima, ayena cho mapurigá Nijeni mi'lirúami níima, ayena cho mapurigá baikiyá chi'lígá Nijeni ku owínama riwéali, mapalí Nijeni ma mi'lirúami níisa. Nijeni ju echi Walubela Cristo anilíwami mapu Riosi júuli jena'í wichimóbachi.

⁴⁷ Ayena cho arigá 'wérali ju mapurigá echi jaré mapu ikí tamí bichíyami ju galá nawésama Nijé Ra'íchala ne si'néami pagótami, ne suníami jena'í wichimóbachi piréami. Arigá 'wérali ju chótaga nawésiya jena'í Jerusalémachi jonsa, chopi ne suníami jena'í wichimóbachi ayena cho nawisárami níima, jeanigá mapurigá ne si'néami pagótami we siwega ku ro'wima Riosi yuwa, mapurigá galá ku wikawárami níima ma-

purigá aboni chati olali. ⁴⁸ 'Yémitamo ne galá machí suwaba je'ná jeyiri namuti, echijiti arigá 'wérali ju mapurigátamo we nawisabo. ⁴⁹ Nibila, Nijeni julama echo'ná moba 'yémichi echi Wabé Galabé Riosi Iwigala, Echi mapu Nijé Onolá ne bichíwaga aneli mapu nijima riwéali. Chopi jena'í Jerusalémachi tibisi mapuyénasí 'yémitamo 'yárami níibo mapurigátamo wabé omériga olabo mapurigá echi ripá riwigachi atíami Riosi 'yemi mi 'yama riwéali.

Jesusi torúami níili echo'ná ripá riwigachi

(Mr. 16:19-20)

⁵⁰ Echali Jesusi bayérali aboni echo'ná walúlachi Jerusalémachi anilíwachi jonsa, mapuyénasí Betáni-

achi anilíwachi. Echo'ná echi Walubela Jesusi ripá sikéraga, wabé galabéraga aneli aboni. ⁵¹ Echali mapalí Jesusi echirigá galabéraga aneli aboni, ke sayiná Binói ku simili echo'ná abónichi jonsa. A'lí Binói echo'ná ripá riwigachi torúami níili. ⁵² Echali aboni ma chokoba jaga waminabi walubéraga aneli echi Walubela Jesusi, a'lí aboni ne wabé kanílaga ku simíbali echo'ná Jerusalémachi. ⁵³ A'lí aboni sinibí rawé muchili echo'ná echi walubé Juríosi ri'obáwalachi, mapo'ná aboni sinibí wabé galabé aneli Riosi. ¡Echirigá nílaga!

Juan

Jesucristo mapu Riosi Ra'íchala anérami ju, ma ranarúami níili jena'í wichimóbachí

1 Ki'yá chokichí echi Riosi Ra'íchala níili. Echi Riosi Ra'íchala sinibí Riosi yuwa asali. A'lí Echi mapu Riosi Ra'íchala anérami ju, ayénachó Riosi ju. ² Je'ná, ki'yá chokichí, Riosi yuwa asali. ³ Je'ná Binói jiti, Riosi niwali ne suwaba namuti. A'lí tarapé biyiri namuti nirú mapu Binói ketasi niwali. ⁴ A'lí Echi mapu Riosi Ra'íchala anérami ju, Échiko we galá 'ya mapurigá echi pagótami sinibí niráa piréami níima. A'lí mapalí echi pagótami ma sinibí niráa piréami ju, echalí aboni ma galá machimea ne galabé ologá piréliya. ⁵ Jena'í wichimóbachí piréami pagótami ne wabé chati oláami ju. Echijiti aboni mapurigá echo'ná rokowárali niráa chopi 'yéami ju. A'lí Echi mapu Riosi Ra'íchala anérami ju, Echi galá machíramiya nawali echi pagótami jena'í wichimóbachí piréami. A'lí echi riablo we nakí mapurigá echi pagótami chopi chati ologá pirélama mapurigá echo'ná rokowárali piréami niráa; chopi binói ketasi omero olayá mapurigá ne si'néami pagótami echirigá olama, mapujiti echi Riosi Ra'íchala arigá machíraga olá si'néami echi jaré mapu ikí nakiko mapu galá bichíima Riosi.

⁶ Riosi chabénala bachá júuli bilé rijói, Juani riwéami, echi mapu pagóami níili. ⁷ Je'ná Juani nawali mapurigá nawésami niráa. Binói nawésali echi auché bilé Rijói jiti, echi mapu galá machíraga olá jena'í wichimóbachí piréami pagótami. Je'ná Juani echirigá nawésali mapujiti binói we nakili mapu ne si'néami pagótami galá bichíima echi auché bilé Rijói jiti. ⁸ Echi Juani ketasi níili echi mapu galá machíraga olá echi pagótami, chopi echi Juani bachá niráa nawali mapurigá binói nawisama echi auché bilé Rijói jiti, echi mapu galá machíraga olá echi pagótami. ⁹ Echalí echi auché Bilé mapu ne bichíwali machíraga olá si'néami pagótami ma nawama riwéali jena'í wichimóbachí.

¹⁰ Je'ná Binói jena'í wichimóbachí asali. A'lí ki'yá chokichí Binói niwali jena'í wichimóbachí, chopi jena'í wichimóbachí piréami pagótami ketasi galá machili echi Binói. ¹¹ Echirigá binói jena'í kepu níwalachi nawali; chopi echi jaré Binói níwala pagótami arigá ketasi nareli echi Binói. ¹² Chopi jaré jena'í wichimóbachí piréami arigá ne galá bichíili echi Binói, echijiti Binói galá 'yali mapurigá aboni niwárami níima Riosi

kúchuwala niráa, ne si'néami mapu ikí aboni galá bichíiko Binói riwalá niráa. ¹³ Ne si'néami mapu ikí galá bichíiga naréliko echi Binói, aboni ma Riosi kúchuwala niráa ranarúami ju. Riosi ma niwali echi aboni mapurigá Binói kúchuwala niráa. A'lí aboni ketasi echirigá ranarúami ju mapujiti aboni chopi echirigá nakili, nirapé mapujiti auché bilé rijói echirigá nakili; chopi ranarúami ju Riosi kúchuwala niráa mapujiti aboni ma galá bichíiga nareli echi Bilé mapu galá machíraga olá echi pagótami.

¹⁴ A'lí Echi mapu Riosi Ra'íchala anérami ju, ma ranarúami níili jena'í wichimóbachí mapurigá echi pagótami kúchuwala ranarúami ju. Je'ná Binói, rijói niráa, bitéali jena'í wichimóbachí, tamujé yuwa. A'lí tamujeta riwali echi Binói ne wabé Walubela niráa, echalí mapalí Riosi Onorúami aneli mapu bi'nélipi Binói Ranala ju, ayénachóta machili mapu Binói ne wabé simírami galéami ju, ayénachó ne wabe simírami bichíwaga ra'íchami niráa. ¹⁵ Echi Juani nawésali echi Binói jiti rugá mapalí o'weli ra'íchaga jeanili: Nijeni 'yemi mi nawésali je'ná Rijói jiti rugá, mapalini jerigá anili: Nijeni ma nawali 'yemi mi nawésisiya, chopi auché Bilé ke 'me ayó ayénachó nawama 'yemi mi nawésisiya. Je'ná Binói waminabi ne wabé simírami Walubela ju ketasi mapurigá nijé, mapujiti Binói ki'yá sinibí bitéali mapalí nijeni ke cho ranarúami níili.

¹⁶ Binói ne wabé simírami galéami ju. Ayénachó Binói tamujé tamí ne wabé simírami galeli. Echirigá Binói wisabé, sinibí niráa tamujé tamí ne wabé ku'wírali.

¹⁷ Echi Moisesi riwéami rijói osali Riosi nulalila mapurigá Riosi Binói nulali, chopi echi Walubela Jesucristo tamujé tamí 'yali mapurigata galéami níibo, ayénachó Binói tamujé tamí 'yali echi ne Bichíwali. ¹⁸ Ke wesi tarapé siné riwali Riosi, chopi echi bi'nélipi Riosi Ranala, echi mapu echo'ná ne mulubé Riosi Onorúami yuwa atí, je'ná Binói, tamujé tamí ne galá machírali echi Onorúami.

Echi Juani ma nawésali Jesucristo jiti rugá

(Mt. 3:11-12; Mr. 1:7-8; Lk. 3:15-17)

¹⁹ Mapalí echi jaré Juríosi echo'ná Jerusalémachi piréami júuli jaré sacerdote anilíwami rijói, ayénachó jaré Libita aniríwami rijói, mapurigá jerigá rukuema echi Juani: ¿Chigá 'nalí walula Riosi jiti nawésami ju mujé? Echalí echi Juani ne bichíwaga nawésali, ²⁰ ma-

palí binói ne galá machíami niráa jeanili: Nijé ketásini ju echi Walubela Cristo anilíwami, echi mapu Riosi wilali walubela Nigúurami niráa.

²¹ A'lí aboni auchecho siné rukueli jeanigá: ¿Chigá bichemi juko? ¿Áchami ju echi walula Riosi jiti nawésami, Elíasi riwéami, mapu chabé ki'yá bitéali jena'í wichimóbachí? A'lí echi Juani jeaneli: Ketásini ju. A'lí aboni auchecho siné waminabi jeanigá rukueli: ¿Áchami ju echi auché bilé walula Riosi jiti nawésami máputa we buwé? A'lí jeaneli: Ketásini ju.

²² A'lí aboni jeanigá rukueli: ¿Chigá bichemi juko? ¿Churigami tamujé tamí ané mujé binói? 'Wérali ju mapurigata echirigá ne galá ku ruyebo echi jaré o'wéala mapu tamujé tamí júuli.

²³ A'lí jeaneli: Nijeni ju echi rijói mapu echo'ná biléana waná kawichí nawésaga jeaní: Echi Walubela ke sayiná nawama jena'í wichimóbachí. Echijiti galá a'lárasí 'yemi aboni sulálachi, achigórigá mapurigátamo ayénachó galá a'lara echo'ná buwichí mapalí bile walula echo'ná simírama. Echirigá olasi mapurigá echi walula Riosi jiti nawésami Isaíasi riwéami osogá nulali.

²⁴ A'lí echi jaré mapu echirigá julárami niili, ayénachó o'wéala Bariseo anilíwami binériami níli. ²⁵ A'lí aboni jeanigá rukueli: ¿Churékula bichemi echirigá pagoka olá echi pagótami, ketásimi echi Walubela Cristo anilíwami níisagá, nirapemi echi Elíasi níisagá, nirapemi echi auché bilé walula nawésami níisagá?

²⁶ A'lí echi Juani ku nijéwaga jeaneli: Nijeni pagola ba'wí jiti, chopi auché Bilé ma 'yemi yuwa atí, mapu 'yémitamo ketasi cho galá machí. ²⁷ Je'ná ju Echi mapu tamí yuwa pe jubá nawá 'yemi mi nawésisiya. Binói ju Echi mapu waminabi ne wabé simírami Walubela ju, ketasi mapurigá nijé. Nijeni ma anili mápuni ketasi 'me galá ju mapurigani mulubéanama echo'ná Binói yuwa, nirapé mapurigani akarápatama Binói akalá.

²⁸ Suwaba je'ná echirigá ikili echo'ná Betábarachi anilíwachi, mapo'ná bo'ónala waná ju echo'ná Joránachi anilíwachi bakochi, mapo'ná echi Juani pagoya asali echi wikabé pagótami.

Jesusi, echi Riosi níwala Méchuli ju

²⁹ A'lí echalí jonsa ba'alínala rawé echi Juani auchecho siné echo'ná iyénali. Echalí binói riwali echi Jesusi echo'ná mulubé nawáachi. A'lí echi Juani jeaneli echi jaré binói yuwa 'yéname: Je'ná Rijói, echi Riosi níwala Méchuli ju, mapu we omériami ju bi'wayá jena'í wichimóbachí piréami chati olalila. ³⁰ Je'ná Rijói ju mapu nijé, echi Binói jiti rugá, chabé 'yemi nimí jeaneli: Auché Bilé ke 'me ayó nawama 'yemi mi nawésisiya, echi mapu waminabi wabé Walubela ju Binói, ketasi mapurigá nijé, mapujiti Binói ki'yá sinibí bitéali mapalini nijé ketasi cho ranarúami níli. ³¹ A'lí nijé ketasini machili echi Binói. Chopi nijé arigá ba'wí jiti pagómiya

nawálini, mapurigá echi jaré wikabé Isaeli anilíwami pagótami ne galá machimea echi Binói.

³² Ayénachó echi Juani jeanigá nawésali: Nijeni riwali echi Wabé Galabé Riosi Iwigala echo'ná ripá riwigachi jonsa rikínami mapurigá bilé makawi niráa. A'lí echi Wabé Galabé Riosi Iwigala echo'ná echi Jesusi yuwa moba tibili. ³³ Echalí nijeni ketasi cho machili echi Binói, chopi Riosi mapu tamí júuli ba'wí jiti pagónara echi pagótami, echi Binói tamí bachá niráa jeaneli: Mapalimi riwimea echi Wabé Galabé Riosi Iwigala echo'ná ripá riwigachi jonsa rikínami, ayénachó mapalimi riwimea echi Riosi Iwigala echo'ná moba tibíami bilé rijói yuwa, echi Rijói níima mapu ne galá 'yama echi Wabé Galabé Riosi Iwigala echi jaré pagótami. ³⁴ Nijeni ma riwali echi Binói; ayénachó nijeni nawésaga aní mapu je'ná Rijói, echi bi'nélipi Riosi Ranala ju.

Jesusi ma chota binériya jaré rijói

³⁵ A'lí echalí jonsa ba'alínala rawé echi Juani auchecho siné echo'ná asali. Echi auché jaré okuá mapu binói binérali ayénachó echo'ná binói yuwa muchili. ³⁶ Echalí echi Juani galá riwisá echo'ná iyénachi echi Jesusi, a'lí jeanili: ¡Echi rijói, echi Riosi níwala Méchuli ju!

³⁷ Echalí echi okuá rijói mapu Juani binérali, ma galá namsa mapurigá echi Juani anili, a'lí aboni jubáami najátaga simíbali mapo'ná Jesusi inárali. ³⁸ A'lí Jesusi ku kuwana 'néniga riwali echi okuá Binói yuwa jubáami náatachi. A'lí jeanigá rukueli: ¿Píritamo amí? Echalí aboni jeaneli: Binériami, ¿kumi bité Mujé?

³⁹ A'lí Jesusi jeaneli: ¡Kiná simíbaga, 'nesi! A'lí echo'ná simasa riwali mapo'ná bitéali. A'lí echalí rawé aboni Binói yuwa tibili, mapujiti ma nasipa alíwachi níli.

⁴⁰ A'lí echi Antresi mapu echi Simoni Pegro rijimala níli, je'ná bilé níli echi okuá mapu galá námali echi Juani echirigá aníachi. Echalí echi okuánika jubáami najátaga simíbali mapo'mí Jesusi simili. ⁴¹ Je'ná Antresi bachá ári kepu rijimá, echi mapu Simoni riwéami níli. A'lí ma riwisáa jeaneli: ¡Tamujeta ma riwali echi Mesíasi anilíwami! (Echi mapu jerigá aniwáami ju. Echi Walubela Nigúurami Cristo anilíwami.)

⁴² A'lí echi Antresi bayébalí echi Simoni echo'ná mapo'ná Jesusi asali. Echalí Jesusi galá 'néniga jeaneli: Mujé, Simoni riwéami ju, echi Jonasi ranala, chopi jípi-mi Pegro riwéami níima, echi mapu jerigá aniwáami ju: Bilé rité.

Jesusi bayeli echi Jilipi, echi Natanaeli ayénachó

⁴³ Echalí jonsa, ba'alínala rawé Jesusi simináali echo'ná Galiléachi anilíwachi kawírali. Echalí Jesusi riwali echi Jilipi echi mapu Binói jeaneli: ¡Tamí najató!

⁴⁴ Echi Jilipi echo'ná Becháirachi anilíwachi walúlachi bitéami níli, mapo'ná piréali echi Antresi, echi Pegro ayénachó. ⁴⁵ A'lí echi Jilipi ma riwisáa auché bilé rijói,

Natanaeli riwéami, a'lí jeaneli: ¡Tamujé ma riwali echi Rijói mapu echi walula Moisesi, echo'ná Riosi Ra'íchala osilíwalachi osogá anili mapu nawama riwéali! ¡Je'ná ju echi mapu echi auché jaré Riosi jiti nawésami ayénachó osogá anili mapu nawama riwéali! ¡Echi Jesusi ju, echo'ná Nasarétachi bitéami, echi José ranala!

⁴⁶ A'lí echi Natanaeli jeanigá rukueli: ¿Acha nolínama bilé rijói Walubela echo'ná Nasarétachi jonsa? A'lí echi Jilipi chopi jeaneli: ¡Kiná simigá 'ne echi Rijói!

⁴⁷ A'lí mapalí Jesusi riwali echi Natanaeli echo'ná Binói yuwa nawáachi, a'lí Jesusi echi Natanaeli jiti rugá jeanili: ¡Nibila! Wakiná inaro bilé rijói mapu Isaeli pagótami ju, echi mapu ne bichíwali tarapé 'yékami ju.

⁴⁸ A'lí echi Natanaeli echirigá namsa, jeanigá rukueli: ¿Churigami tamí galá machí? A'lí Jesusi jeaneli: ¡Mapalí echi Jilipi ke cho mi bayeli, Nijé ma nimí galá riwali, mapalimi echo'ná ri'lé pachá biléana chunárali asali!

⁴⁹ A'lí echi Natanaeli jeaneli: ¡Binériami, Mujé ju echi bilepi bi'nélipi Riosi Ranala! ¡Mujé ju echi Walubela, tamujé Isaeli pagótami Silínawala!

⁵⁰ A'lí Jesusi ku nijéwaga jeaneli: Mapujiti Nijé nimí aneli mapu nimí riwali echo'ná ri'lé pachá biléana chunárali, ¿áchami galá tamí bichí jipi? Pée waminana mujemi waminabi wabé simírami o'weli namuti ri-wiméa ketasi mapurigá je'ná.

⁵¹ A'lí Jesusi jeaneli: Ne bichíwali Nijé nimí jeané: Jipi jonsa pée waminana 'yémitamo galá riwiboa echo'ná ripá riwigachi ma iráparami niráa. Ayénachótamo echalí riwiboa echi jaré Riosi kapitánawala echo'ná ripá moyénaga, ayénachó ku tiguínami mapo'ná Nijé binói asimea, mapujiti Nijé wilálami ju mapurigá Ku'wíriami niráa.

Jaré walú omáwaga niwili echo'ná Kanachi anilíwachi

2 A'lí echalí jonsa wakiná bikiyá chi'línala, echo'ná Kanachi anilíwachi rijówachi, echo'ná Galiléachi anilíwachi kawírali, jaré walú omáwaga niwili. Echalí echi Jesusi iyela ayénachó echo'ná asali. ² A'lí echo'ná bayérami níili echi Jesusi, echi jaré mapu Binói binérali ayénachó. ³ A'lí si'néami echi wikabé mapu bayélati, ibili niráa pée kúuchi niráa 'yálati bajínala, uva anilíwami rakéami namuti ba'wila; chopi mapalí ma suwali echi uva ba'wila, echalí echi Jesusi iyela jeaneli: ¡Ma suwili echi uva ba'wila!

⁴ A'lí Jesusi jeaneli: Mukí, ¿churékulami echirigá tamí ané? Nijé tétawala ketasi cho sébali.

⁵ Chopi echi Binói iyela jeaneli echi jaré mapu kónaga nachútali: Suwaba olasi mapurigá Binói 'yemi mi anema.

⁶ A'lí echo'ná nirúali usani o'weli sikolí rité niwárami, ba'wí ro'olíwami, mapujiti echi jaré Juríosi pagótami echirigá nulérami níili wikabé namuti pabákanala echi ba'wí jiti. A'lí echi sikolí wabé o'weli níili. Ibili sikolí

buchili okuá ba'wí tula, bikiyá ba'wí tula keremá. ⁷ A'lí Jesusi jeaneli echi jaré mapu kóniga nachútali: Ba'wí buchíwasi echo'ná usani o'weli sikolichi. A'lí we yámiti we galá buchíwalati. ⁸ Echalí Jesusi jeaneli: Jipi ma pe taa ku tusa 'yasi bajínala echi walula kónami. A'lí echirigá 'yali. ⁹ A'lí echi walula kónami pe taa bajika machili echi ba'wí, chopi ma uva ba'wila niráa nakulíwarami níili. A'lí echi walula kónami ketasi cho machili mapu echi galabé uva ba'wila, ba'wí jiti niwárami níili. Chopi echi auché jaré mapu kóniga nachútali, ne galá machili mapu ba'wí chopi ro'wárami níili echo'ná sikolichi, ayénachó aboni galá machili mapu Jesusi ma wabé omériga ologá, ne suwaba, uva ba'wila niráa nakulíwali. A'lí echi walula kónami echalí ma galá ra'íraga echi uva ba'wila, ba'wí niwárami, echo'ná bayegá echi kunala, bukulí niwíami rijói, ¹⁰ jeaneli: Si'néami pagótami bachá nachútaga kona echi wabé galabéala uva ba'wila. A'lí mapalí echi jaré bayérami ma galá bajili, echalí pée jubáami echi pagótami kóniga nachuta echi pée ke 'me galabéala. ¡Chopi mujemi jipi yénasí nuteli je'ná ne wabé galabéala uva ba'wila!

¹¹ A'lí Jesusi echo'ná Kanachi anilíwachi, echo'ná Galiléachi anilíwachi asagá, echirigá chótali wabé omériga olayá mapurigá ke wesi auché jaré pagótami omero olayá. Echirigá Jesusi galá machírali echi pagótami mapu Binói ne wabé Walubela ju. A'lí echi jaré mapu Jesusi binérali, galá bichíili Binói niráa.

¹² Echalí jonsa, pée wakinana, Jesusi auhecho siné ku rikínali echo'ná Kapernaúmachi anilíwachi, Binói iyela yuwa, echi jaré Binói ritémawala ayénachó, echi auché jaré mapu Binói binérali ayénachó. A'lí si'neami echo'ná muchili ke 'me wikabé rawé.

Jesusi machí a'wali si'néami mapu ikí ralineá muchili echo'ná pachá walubé Juríosi ri'obáwalachi

(Mt. 21:12-13; Mr. 11:15-18; Lk. 19:45-46)

¹³ Echalí ma mulubé sébachi níili echi Juríosi pagótami omáwala mapalí echi kúuchi bo'wá ko'wílati. Echijiti Jesusi auhecho siné ku muyénali echo'ná ripáami Jerusalémachi. ¹⁴ A'lí Jesusi ma ku nawali echo'ná Jerusalémachi. A'lí Binói riwali jaré rijói wáasi ralineá muchúami echo'ná pachá walubé ri'obachi, echi jaré Juríosi pagótami ri'obáwalachi. A'lí auché jaré bo'wá ralinéami ayénachó echo'ná pachá muchili, auché jaré makawí ralinéami ayénachó. A'lí Binói ayénachó echo'ná riwali jaré wenomí nakulíwiya muchúami.

¹⁵ A'lí Jesusi bilé wiya wichiwela niwasa, si'néami miná machí a'wali echo'ná ri'obachi jonsa, echi jaré bo'wá ayénachó, echi jaré wáasi ayénachó. A'lí Binói miná rujuínali echi jaré wenomí nakulíwami rijói níwala wenomí; ayénachó Binói miná ri'nabuli aboni níwala jubeli. ¹⁶ A'lí Jesusi jeaneli echi jaré makawí ralinéami: ¡Chakena, waminá machí tosí je'ná namuti! ¡Ketasi ni-

wasi je'ná Nijé Onolá kalíłachi mapurigá ralinéaluwami kalila niráa!

¹⁷ A'lí echi jaré mapu Jesusi binérali, galá 'nátaga machili mapurigá je'ná jerigá osirúami níli echo'ná Riosi Ra'íchala Osilíwalachi: Nijeni ne wabé simírami, ne galá tibula Mujé kalila.

¹⁸ A'lí echi jaré Juríosi jeanigá rukueli: ¿Chigá mi risénsia 'yali mapurigami echirigá 'wérali olama? ¡Jipi, we yáati wabé omériga olá sinepi niráa, mapurigá ke wesi auché jaré omero olayá! ¡Echirigata galá machiboa mápumi risensia niwa je'ná jerigá 'wérali oluwáwami olayá!

¹⁹ A'lí Jesusi ku nijéwaga jeaneli: ¡Miná suwaba najunasí je'ná ri'obá, a'lí bicheni bikiyá chi'ligá ku niwama!

²⁰ A'lí echi jaré Juríosi jeaneli: Je'ná walubé ri'obá nawosa makói miná usani bamíbagá niwárami níli. ¿Áchami bikiyá chi'ligá ku niwama Mujé?

²¹ Chopi Jesusi, Binói kepu sapá, mapurigá bilé ri'obá niráa rugá ra'íchali. ²² Echijiti echalí mapalí Jesusi ma mukusá, ku owínali, echalí echi jaré mapu Binói binérali, galá 'nátaga machili mapurigá Binói chabénala je'ná jerigá anigá ra'íchali. Echalí aboni galá bichíli mapurigá osirúami ju echo'ná Riosi Ra'íchala Osilíwalachi; ayénachó aboni galá bichíli mapurigá Jesusi Binói ma aneli echi aboni.

Jesusi galá machí ne si'néami

²³ A'lí mapalí omowálawachi rawé níli, mapalí echi kúuchi bo'wá ko'wílati, echalí rawé Jesusi echo'ná Jerusalémachi asali. Echalí wikabé pagótami bichíli Binói niráa, mapujiti wisabé riwali wabé omériga oláachi Binói, mapurigá ke wesi auché jaré pagótami omero echirigá olayá. ²⁴ Chopi Jesusi Binói mayeli mapu aboni ketasi 'me bichíwaga olali, mapujiti Binói ne galá machili ne si'néami aboni. ²⁵ A'lí Jesusi ketasi newaleli mapurigá auché jaré pagótami jiti ruyérami níima Binói, mapurigá echi pagótami 'nata echo'ná pachana aboni sulálachi niráa, mapujiti Jesusi Binói ne galá machí mapurigá ju echo'ná pachana ibili rijói sulálachi.

Echi Nikoremo Jesusi yuwa ra'ícha

3 A'lí bilé rijói, Bariseo anilíwami binériami, echo'ná asali, echi mapu Nikoremo riwéami níli. Je'ná rijói, echi jaré Juríosi yuwa, walula níli. ² Je'ná rijói, Nikoremo riwéami, rokogó niráa nawali mapo'ná Jesusi asali. A'lí jeaneli: Binériami, tamujeta ne galá machí mapu Riosi Binói mi júuli mapurigami tamujé tamí binérama, mapujiti ke wesi rijói galá omero olayá mapurigami wabé omériga olá, a echi Walubela Riosi ketasi ku'wírasagá binói.

³ A'lí Jesusi ku nijéwaga jeaneli: Ne bichíwali nimí ané: Echi mapuyíripi ketasi auché siné bukulíwami niráa ra-

narúami juko, échiko ketasi chirigá nijéwaga olá mapurigá Riosi nulé.

⁴ A'lí echi Nikoremo jeaneli: ¿Churigá auchecho siné ranarúami níima bilé rijói, ma ochérami níisa? ¿Acha galá ku bakimea echo'ná pachá kepu iyé ropálachi, mapurigá binói echirigá auchecho siné ku ranarúami níima?

⁵ A'lí Jesusi ku nijéwaga jeaneli: Ne bichíwali nimí ané: Echi mapuyíripi ketasi ba'wí jiti ranarúami juko, ayénachó echi mapuyíripi ketasi Riosi Iwigala jiti ranarúami juko, échiko ketasi chirigá nijéwaga olá mapurigá Riosi nulé. ⁶ Jena'í wichimóbachí ne si'néami pagótami ranarúami ju, kepu 'wénawa kúchuwala niráa, chopi echi jaré mapuyíripi echi Wabé Galabé Riosi Iwigala jiti ranarúami juko, échiko Riosi kúchuwala ju. ⁷ Ketasi we majaga 'natasi mapujiti Nijé nimí aneli mapu arigá 'wérali ju mapu ne si'néami pagótami auché siné bukulíwami niráa ranarúami níima. ⁸ Echi iká mapu kanápuromí we iká. A'lí bichemi galá nami mapalí echi iká we ané, chopi arigá tarapemi machí kumi jonsa echirigá we iká. Nirapemi machí kumi simigá iká. Echirigá ju mapalí echi pagótami auché siné bukulíwami niráa ranarúami ju echi Galabé Riosi Iwigala jiti, mapujiti Riosi Iwigala mapurigá echi iká ju.

⁹ A'lí echi Nikoremo auchecho siné jeanigá rukueli: ¿Churigá echirigá níima je'ná?

¹⁰ Echalí Jesusi jeaneli: Mujé, mápumi walula binériami ju echi wikabé Isaéli pagótami yuwa, ¿kéchami machí je'ná jeyiri namuti? ¹¹ Nijé 'yemi nimí ané echi ne bichíwali, ayénachó Nijeni ne galá machí mápuni 'yemi mi ne bichíwaga ra'ícha, mapujiti Nijeni ma galá riwali echi jaré namuti mapu Nijé 'yemi nimí ruyegá nawesa; chopi 'yémitamo ketasi bichíli mapurigá Nijé 'yemi nimí nawésaga ané. ¹² Nijeni 'yemi mi aneli jena'í wichimóbachí nirúami namuti jiti. A'lí tarapétamo bichíli. ¿Churigátamo bichíibo, a Nijé 'yemi nimí anésagá echo'ná ripá riwigáchi nirúami namuti jiti?

¹³ Tarapé wesi jena'í wichimóbachí piréami echo'ná ripá riwigáchi munasa, jena'í wichimóbachí ku rikínali, mapurigá aboni ne galá nawésama jena'í wichimóbachí piréami mapurigá ju echo'ná ripá riwigáchi. Chopi Nijeni 'yemi mi echirigá ne bichíwaga nawesa mapujítini echo'ná ripá riwigáchi asali. A'lí Nijeni rikínali jena'í wichimóbachí, ayénachóni bité echo'ná ripá riwigáchi. Riosi tamí wilali mapurigá Ku'wíriami niráa. ¹⁴ A'lí echi Moisesi echo'ná ripá biléana kusírali uchali bilé namuti mapuyiri sinowi níwarami, mapalí echi wikabé Isaéli pagótami echo'ná biléana waná kawichí 'yénachi, echi wikabé sinowi jiti ikírami níli. Echirigá achigórigá 'wérali ju mapu jena'í wichimóbachí piréami pagótami ayénachó tamí ripá biléana kusírali wijáwaga uchama, ¹⁵ mapurigá ne si'néami mapu ikí tamí galá bichíiko tarapé 'wigaga suwimea, chopi sinibí piréami níima.

Echi Walubela Riosi ne wabé galeli jena'í wichimóbachí piréami pagótami

¹⁶ Mapujiti echi Walubela Riosi ne wabé galeli jena'í wichimóbachí piréami pagótami. Echijiti nijali bilepi kepu Raná, mapurigá ne si'néami pagótami mapu ikí galá bichíiko echi Binói jiti, ketasi mapurigá suwámi niráa níima, chopi sinibí piréami níima Riosi yuwa.

¹⁷ Echi Walubela Riosi ketasi júuli kepu Raná mapurigá wi'nijima jena'í wichimóbachí piréami pagótami. Chopi júuli mapurigá jena'í wichimóbachí piréami pagótami galá ku'wíratami níima echi Binói jiti.

¹⁸ Ne si'néami mapu ikí echi Binói jiti bichíiko, ketasi wi'nijírami ju; chopi ne si'néami mapu ikí ketasi bichíiko, ma wi'nijírami ju, mapujiti aboni ketasi bichíiko echi bilepi bi'nélipi Riosi Ranala. ¹⁹ A'lí ne si'néami mapu ikí ketasi bichíiko, ma wi'nijírami ju, mapujiti ma nawali jena'í wichimóbachí echi Walubela mapu galá machíraga olá echi pagótami. A'lí echi chati oláami pagótami sinibí nakili mapu wabé chati ologá, echo'ná rokowárali niráa chopi 'yénama, mapujiti aboni wabé chati oláami níili. ²⁰ A'lí si'néami mapu ikí we chati olako, échiko wabé kichí echi Walubela mapu galá machíraga olá echi pagótami. A'lí aboni ketasi nakí mapu bichíima echi Binói niráa, nirapé mapurigá aboni mulubéanama Binói yuwa, mapujiti aboni ketasi nakí mapu aboni chati olalila galá ku machirúami níima. ²¹ Chopi echi auché jaré mapu ne bichíwali galabé olako, aboni ayena mulubéana echi Walubela yuwa mapu galá machíraga olá echi pagótami, mapurigá echi auché jaré pagótami galá machimea mapu echi Walubela Riosi ku'wíraga olá echi jaré aboni yuwa.

Echi Juani auchecho siné nawésali echi Jesusi jiti rugá

²² Pe wakinana Jesusi simili echo'ná Juréachi anilíwachi kawírali, echi jaré mapu Binói binérali yuwa. A'lí Binói echo'ná aboni yuwa asagá, we pagoli echi auché jaré wikabé pagótami. ²³ Ayénachó echi Juani pagoya iyénali echo'ná Enónachi anilíwachi mapo'ná mulubé ju echo'ná Salímachi anilíwachi, mapujiti echo'ná walú ba'wéali. Echali echi Juani galá pagoli echi wikabé pagótami mapu echo'ná sili. ²⁴ Mapujiti echi Juani ketasi cho pachá bachárami níili.

²⁵ A'lí echi jaré mapu Juani binérali, auché jaré Juríosi pagótami yuwa, a'nagupi rukugá ra'íchalí mapujiti echi jaré Juríosi sinibí niráa wikabé namuti pabákaka olali.

²⁶ A'lí ne si'néami aboni echo'ná echi Juani yuwa sigá, jeaneli: Binériami, echi Rijói mapu mujé yuwa asali echo'ná bo'ónala bakochi Joránachi anilíwachi, echi mapu mujé nawésali echi Binói jiti, je'ná Rijói we pagola echi pagótami. A'lí ne si'néami, Binói yuwa sísimi.

²⁷ A'lí echi Juani ku nijéwaga jeaneli: Bilé rijói tarapé chirigá omérama wabé omériga olayá, a echi Walubela

Riosi ketasi echirigá 'yásagá. ²⁸ 'Yémitamo aboni ma bachá niráa galá námali mapurigani 'yemi mi aneli mapu nijé binói ketasi ju echi Cristo anilíwami, echi mapu Riosi wirali Walubela Nigúurami niráa, chopi echi Walubela Riosi tamí bachá júuli a'láranala echi Binói jiti. ²⁹ Mapalí bilé rijói bukulí niwíami ju, échiko we kanila mapujiti ma pe bukulí upéami ju. A'lí echi auché bilé mapu echi bukulí niwíami rijói amígowala ju, mapu echo'ná mulubé asagá galá nami echi bukulí niwíami rijói ra'íchala, je'ná binói amígowala echirigá namsa, ayénachó ne wabé kanila. Achigórigá nijé ayénachóni ne wabé kanila jipi. ³⁰ Arigá 'werali ju mapu echi Jesusi waminabi ne wabé Walubela niráa níima. Chopi nijeni arigá waminabi tabéala niráa níima.

Echi mapu ripá riwigachi jonsa nawako

³¹ Echi mapu ripá riwigachi jonsa nawako, échiko ne Walubela ju si'néami pagótami yuwa. A'lí echi mapu jena'í wichimóbachí bitéami juko, échiko wichimóbachí chopi bitéami ju, ayénachó wichimóbachí nirúami namuti chopi jiti ra'ícha. Echi mapu echo'ná ripá riwigachi jonsa nawako, échiko ne Walubela ju si'néami pagótami yuwa. ³² Je'ná Binói mapurigá námiga riwali, je'ná echirigá nawesa, chopi ke 'me wesi bichíi mapurigá Binói nawesa. ³³ A'lí echi jaré mapu arigá bichíi mapurigá Binói nawesa, aboni echirigá ne bichíwaga aní mapu Riosi ne bichíwami ju. ³⁴ Mapujiti echi mapu Riosi júuliko jena'í wichimóbachí, je'ná Binói wabé galá ra'ícha Riosi Ra'íchala, mapujiti Riosi Onorúami ne suwaba, ne bichíwaga 'yali echo'ná Binóichi echi Wabé Galabé Riosi Iwigala. ³⁵ A'lí echi Onorúami we kalé Binói kepu Raná, ayénachó omérawami 'yali ne suwaba namuti jiti. ³⁶ Ne si'néami mapu ikí galá bichíiko echi Riosi Ranala jiti, échiko ma sinibí piréami ju. Chopi echi auché jaré mapu ketasi nakiko mapu bichíima Riosi Ranala, échiko ketasi echirigá sinibí piréami níima. Chopi Riosi arigá ne sinibí niráa, ne wabé kastigo 'yama.

Jesusi ra'íchalí echo'ná Samáriachi bitéami mukí yuwa

4 A'lí echi jaré Bariseo anilíwami binériami ma námali mapu echi Walubela Jesusi ne wabé simírami wikabé binéraga pagoli, ayénachó námali mapu echi Juani ketasi 'me wikabé binéraga pagoli echi pagótami. ² A'lí Jesusi Binói ketasi pagoli, chopi echi jaré makói miná okuá mapu Binói binérali, aboni wikabé pagoli. ³ A'lí mapalí Jesusi je'ná jerigá machisáa, echali Binói echo'ná Juréachi anilíwachi kawírali jonsa ku simisáa, echo'ná Galileáchi anilíwachi kawírali ku simili.

⁴ Echali echo'ná buwichí ináraga, arigá 'werali níili mapu echo'ná Samáriachi anilíwachi kawírali simírama. ⁵ Echali rawé Jesusi nawali echo'ná biléana walúlachi echo'ná Samáriachi anilíwachi kawírali nirúaa-

mi, mapo'ná Sikárachi anilíwachi níili. A'lí echo'ná mulipi níili echi kawí pátami mapu echi Jakobo 'yali binói kepu raná, echi José riwéami. ⁶ Echo'ná nirúali biléana jótami, wabé rokóami, mapo'na manili ba'wí, mapu echi Jakobo ki'yá chabénala niwali. Echali rawé Jesusi echo'ná buwichí ináraga, ma we risisáa, echo'ná mulipi jótachi asíbalí. A'lí ma nasipa rawé níili. ⁷ Echali bilé mukí echo'ná Samáriachi bitéami echo'ná nawali, ba'wí túmiya, echi mapu Jesusi jeanigá tánali: Pe risénsia, tamí péé ta ba'wí 'ya mápuni bajima.

⁸ Mapujiti echi jaré mapu Jesusi binérali echo'ná walúlachi 'yénali, ko'wáami ralayá. ⁹ A'lí echi mukí echo'ná Samáriachi bitéami jeaneli: ¿Churékula mi tamí tani ba'wí bajíwami, mapujítimi Mujé Juríosi pagótami ju? A'lí nijeni jena'í Samáriachi bitéami ju. Echirigá aneli mapujiti echi Juríosi pagóami ketasi nakili echo'ná Samáriachi piréami pagótami yuwa. ¹⁰ A'lí Jesusi ku nijéwaga jeaneli: Ayénami machisáagá mapurigá Riosi galabé nijá, ayénachómi machisáagá chigá ju Nijé mapu nimí jeané: Tamí 'ya ba'wí mápuni bajima, echali ne bichíwali mujemi tamí tánami, a'lí Nijé ayena nimí 'yama echi sinibí bitélowami ba'wí.

¹¹ A'lí echi mukí jeaneli: Keni walúlawa, Mujé ketasi te mápumi jiti tuma ba'wí, mapujiti jena'í jochi ne wabé rokóami ju. Mujé, ¿kúmimi niwa echi sinibí bitélowami ba'wí? ¹² Echi ki'yá bitéami Jakobo mapu tamujé tamí 'yali je'ná jótami, mapurigá tamujé onolá níili. Binói jena'í bajili, echi jaré binói kúchuwala ayénachó, binói pugula wáasi ayénachó. ¿Mujecha ne simírami walubela ju ketasi mapurigá echi binói?

¹³ A'lí Jesusi ku nijéwaga jeaneli: Mapuyíripi je'ná ba'wí bajisa, auchecho siné ku balámama. ¹⁴ Chopi si'néami mapu ikí bajiko mapu Nijé nijima ba'wí, abóniko sinibí ketasi auché siné balámama; chopi echi ba'wí mapu Nijé nijima, pachana aboni yuwa machína-ma mapurigá biléana bajichi niráa, ayénachó echi jaré mapu bajiko echi ba'wí, sinibí niráa piréami níima.

¹⁵ A'lí echi mukí jeaneli: Keni walúlawa, perikó tamí 'ya echi ba'wí, mapuriganí ma ketasi siné balámama, mapuriganí ayénachó nirapé auché siné jena'í inama ba'wí tuya.

¹⁶ A'lí Jesusi jeaneli: Simigá bayémisa kemi kuná, kiná simasi.

¹⁷ A'lí echi mukí ku nijéwaga jeaneli: Nijé ketásini kuné. A'lí Jesusi jeaneli: Ne galá mi bichíwaga anili mápumi ketasi kuné, ¹⁸ mapujiti mi malí rijói kunéami níili. A'lí echi rijói mápumi jipi kuné, échiko ne bichíwali ketasi mujé kunala ju. Echirigami ne bichíwaga anili.

¹⁹ A'lí echi mukí ma je'ná jerigá namsa, jeaneli: ¡Keni Walúlawa, nijeni mayé mapu Mujé ju bilé walula Riosi jiti nawésami! ²⁰ Echi jaré ki'yá piréami mapu tamujé 'wénawala 'wénala níili, aboni jena'í ripá rabó chokoba jaga Riosi yuwa ra'íchali, chopi 'yemi Juríosi pagótami

aní mapu echo'ná Jerusalémachi chopi ju mapo'ná chokoba jaga Riosi yuwa ra'ichabo.

²¹ A'lí Jesusi jeaneli: Mukí, tamí galá bichiwi mapu pe minana ketasi 'wérali níima mapu 'yémitamo munabo jena'í ripá rabó, nirapé máputamo simabo echo'ná Jerusalémachi mapurigátamo waminabi walubéraga anebo echi Onorúami. ²² 'Yemi Samáriachi piréami wé-tamo nakí máputamo chokoba jaga o'wikebo Riosi, chópitamó ketasi machí Riosi. A'lí tamujé Juríosi pagótami ne bichíwagata o'wiké Riosi, mapujitita tamujé ne galá machí Binói. A'lí Nijé mápuni echi pagótami ku wikáwiami ju, ayénachóni Juríosi pagótami ju. ²³ Ma ke 'me ayó echirigátamo ne bichíwaga walubéraga anebo Riosi, mapujiti jipi ma nawali tétali mapalí si'néami mapu ikí ne bichíwaga walubéraga anema echi Onorúami, aboni echirigá ne galá bichíiga sulachí niráa, waminabi walubéraga anema Binói. A'lí Riosi Onorúami we nakí mapu echi pagótami echirigá galá bichíiga waminabi walubéraga anema Binói niráa. ²⁴ Riosi chopi Iwigá niráa ju. A'lí echi jaré mapu ikí waminabi walubéraga anema Riosi, arigá 'wérali ju mapu aboni galá bichíiga, sulachí niráa, echirigá waminabi walubéraga anema.

²⁵ A'lí echi mukí jeaneli: Ayénani galá machí mapu echi Mesíasí anilíwami nawama, echi mapu Cristo anilíwami ju. Mapalí Binói ma nawasa, tamujé tamí suwaba namuti ne galá ruyema.

²⁶ A'lí Jesusi jeaneli: Nijé Binói echi Cristo ju, mapu nimí yuwa ra'icha.

²⁷ Echali we yáati sili echi jaré mapu Jesusi binérali. A'lí aboni we 'néniga 'nátali mapujiti Binói echi bilé mukí yuwa ra'icha asali, chopi arigá tarapé wesi rukueli mapu piri rukueli Binói. Ni bilé wesi rukueli mapu churigá Binói ra'íchali echi bilé mukí yuwa. ²⁸ A'lí echi mukí echo'ná ariwesa binói sikolíwala, we yámiti echo'ná walúlachi simisáa, ruyeli echo'ná piréami pagótami, jeanigá:

²⁹ Kiná simíbagá, 'nesi bilé Rijói, echi mapu ne suwaba tamí aneli mapurigá nijeni olali chabé chokichí jonsa. ¿Kecha je'ná níimará echi Cristo anilíwami?

³⁰ A'lí echi si'néami pagótami echo'ná walúlachi jonsa simasa, echo'ná sili mapo'ná Jesusi asali. ³¹ A'lí mapuyénasí echi mukí bayémiya simili echo'ná piréami pagótami, echi jaré mapu Jesusi binérali jeaneli: Binériami, ¡Ma ko'wá!

³² A'lí Binói jeaneli: Nijeni niwa bilé ko'wáami mápuni ayena ko'wá, echi mapu 'yémitamo ketasi machí.

³³ A'lí echi jaré mapu Binói binérali a'nagupi jeanigá rukueli: ¿Acha jaré pálré mapu Binói ko'mea?

³⁴ A'lí Jesusi jeaneli: 'Yémitamo chopi we ko'nali echi ko'wáami; chopi echi Walubela Riosi tamí júuli jena'í wichimóbachí, Binói nóchala olánala, ayénachó Nijeni chopi ne wabé simírami olánali mapurigá Binói tamí nulé. Echijítini ma ketasi ko'nali jipi. ³⁵ 'Yémitamo we

aní mapu abijí naó michá ju mapuyena ma sebama 'wíwachi, mapalita we nochabo, chopi Nijeni 'yemi mi ané mapu jipi ma sébali Riosi níwala 'wíwachi rawé. Jipi we yáati galá níima we nochasa, Riosi nóchala olayá, mapujiti jipi rawé jaré pagótami arigá galá bichííma, átamo galá nawisásagá Riosi Ra'íchala. Echirigátamo we napabubo echi jaré pagótami Riosi yuwa, mapurigá echi 'wíami we napabú echi sunú. ³⁶ A'lí si'néami mapu ikí echirigá Riosi nóchala ologá 'wiko, ne galá ku natétarami níima, mapujiti we napabuma echi pagótami Riosi yuwa mapurigá aboni sinibí piréami níima. Echirigá echi mapu ichako ne wabé kanílama. A'lí echi mapu 'wiko ayénachó ne wabé kanílama. ³⁷ Mapujiti je'ná jerigá ne bichíwali anirúami ju. Bilé rijói chopi we ichá echi talí, a'lí auché bilé si'nú rijói chopi we 'wima echi raká. ³⁸ Nijeni 'yemi mi 'wínala niráa júuli echo'ná mapo'ná 'yémitamo ketasi ichali, chopi auché jaré we nóchali Riosi Ra'íchala nawésiya. A'lí 'yémitamo we kaníli mapujítitamo ritiwá mapurigá echi jaré pagótami ma galá bichííli.

³⁹ A'lí echo'na Samáriachi anilíwachi piréami, wikabé bichííli echi Jesusi jiti, mapujiti echi mukí jeanigá nawésali: Echi Jesusi ne suwaba tamí aneli mapurigani olali chabé chokichí jonsa. ⁴⁰ A'lí echo'ná Samáriachi piréami pagótami echo'ná Jesusi yuwa sigá, tániga aneli mapu Binói echo'ná aboni yuwa ripima. A'lí Jesusi echo'ná ripili osá rawé. ⁴¹ A'lí auché jaré wikabé echo'ná Samáriachi piréami galá bichííli mapalí galá námali mapurigá Jesusi Binói nawésaga anili. ⁴² Echali si'néami aboni jeaneli echi mukí: Jípita ma ne galá bichííli echi Jesusi niráa. Chabé bachánala tamujeta bichííli mapujiti mujemi tamujé tamí nawésali echi Binói jiti rugá, chopi pe wakiná bukulínala tamujeta waminabi galá bichííli mapujiti tamujé aboni ma galá kipuli mapurigá Binói Jesusi anili. Jípita ma galá ne bichíwali machí mapu je'ná Jesusi echi Walubela Cristo anilíwami ju, echi mapu galá ku Wikáwami ju jena'í wichimóbachí piréami pagótami chati olalila.

Jesusi ku sa'wali bilé towí

⁴³ Pe wakinánokuá okuá chi'ligá Jesusi ma ku simili echo'ná Samáriachi anilíwachi jonsa, echo'ná Galiléachi anilíwachi kawírali ku simináliya. ⁴⁴ Echali ku simili Jesusi echo'ná Galiléachi mapujiti Jesusi Binói jeanili mapu ke wesi walula Riosi jiti nawésami we kalékawami ju binói kawíwalachi piréami pagótami jiti. ⁴⁵ Chopi mapalí Jesusi ku nawali echo'ná Galiléachi anilíwachi kawírali, echali echo'ná piréami pagótami arigá galá nareli echi Binói, mapujiti aboni chabénala riwali suwaba mapu ikí Jesusi wabé omériga olali echo'ná Jerusalémachi echali mapalí echi jaré Juríosi pagótami omowábiya ko'yali echi jaré kúuchi bo'wá.

Echali omowálawachi echi jaré Galiléachi piréami ayénachó omowábiya 'yénali echo'ná Jerusalémachi.

⁴⁶ Echali Jesusi auchecho siné ku nawali echo'ná Kanachi anilíwachi, echo'ná Galiléachi anilíwachi kawírali, mapo'ná chabénala Binói echi ba'wí niwali mapurigá uva anilíwami ba'wila niráa. A'lí echo'ná Kapernaúmachi anilíwachi asali bilé rijói mapu ku'wíriami níili echo'ná nuráami walula silíami yuwa. Echali echi rijói ranala towí ne wabé nayúami bu'wili. ⁴⁷ A'lí mapalí echi rijói machili mapu echi Jesusi ma ku nawali echo'ná Galiléachi anilíwachi kawírali, echo'ná Juréachi anilíwachi kawírali jonsa simisá, echali binói 'némiya simili. A'lí risúu anigá tali mapurigá Jesusi ri'lé Kapernaúmachi echo'ná binói bitélachi simigá, galá ku sa'wama binói ranala towí, mapujiti ma ne mulubé mukumea riwéali. ⁴⁸ Echali Jesusi jeaneli: 'Yémitamo ketasi nakí tamí bichíinala, átamo ketasi bachá riwisáagá mapurigá nijeni wabé omerigá olá, mapurigá ke wesi auché jaré omero olayá.

⁴⁹ Chopi echi rijói walula silíami ku'wíriami jeaneli: ¡Walubela, we yáati tamí yuwa simí, abijí ke cho mukúwachi nijé ranala!

⁵⁰ Chopi Jesusi ku nijéwaga jeaneli: ¡Ma ku simigá echo'ná mujé bitélachi, mapujiti mujé ranala ma ku sa'wili! Echali echi rijói galá bichííga mapurigá Jesusi aneli, ma ku simili.

⁵¹ Ba'alínala rawé mapalí echi rijói ma ne mulubé ku nawama riwéali echo'ná binói bitélachi, echali echi jaré binói piónawala natipábiya simasa jeaneli: ¡Mujé ranala ma ku sa'wili!

⁵² Echali echi rijói rukueli jeanigá: ¿Chuyénako jonsa chótali ku sa'wiyá nijé ranala? Echali aboni jeaneli: Rapako, pe bukulí alíwachi ku sa'wili.

⁵³ A'lí echi rijói onorúami 'nátaga machili mapu echiyénako níili mapalí Jesusi jeaneli: ¡Mujé ranala ma ku sa'wili! Echali binói we yáati galá bichííli echi Jesusi niráa, ne si'néami echo'ná binói bitélachi piréami ayénachó.

⁵⁴ Echali rawé mapalí Jesusi echirigá ku simili echo'ná Juréachi jonsa, Binói je'ná jerigá olali mapalí Binói ku nawali echo'ná Galiléachi. Echali je'ná jerigá olá osá sérali mapurigá Jesusi echirigá wabé omériga olali echo'ná Galiléachi mapurigá ke wesi auché jaré omérali olayá.

Jesusi ku sa'wali bilé rijói ke akáanami echo'ná Betés-tachi bitéami

5 Echali pe wakinánokuá echi jaré Juríosi pagótami omáwala níili. Echijiti Jesusi ku simili echo'ná ripáami Jerusalémachi. ² A'lí echo'ná walúlachi ne mulubé echo'ná yéwachi mapo'ná sinibí siméraga mo'wálati wikabé bo'wá, echo'ná nirúali biléana walú jótachi mapo'ná manili ba'wí. Echo'ná echi Ebreo

ra'íchala niráa Betéstachi anilíwachi níili, ayénachó echo'ná nologá nirúali maríana kayáaga uchuchárami ³ mapo'ná sinibí echo'ná ri'lé pachá bitili wikabé nayúkami. Jaré ké machíliami níili; auché jaré ke 'agáanami níili; auché jaré ke omériami níili muchísiya; chopi si'néamika echirigá buwigá bitili mapu chu yé-nako ke sayiná nokomea echi ba'wí. ⁴ Mapujiti pe sinéami káachi bilé walula Riosi kapitánawala echo'ná jótachi nawagá we nokeli echi ba'wí. A'lí ma nokáachi echi ba'wí, echalí echi mapuyíripi bilé nayúami bachá niráa rikíinako echo'ná ba'wírali, échiko we yáati ma galá ku sa'wíami níili mapu chuyíripi nayulí jiti nayúami níiliko. ⁵ Echo'ná bu'wili bilé rijói echi mapu baisá makói miná osá naó bamíbalí jonsa ke akáanami níili. ⁶ Mapalí Jesusi riwali echi rijói echo'ná bu'wíami, ma galá machigá mapu wi'libé bamíbalí echirigá ke akáanami niráa níilo, echalí Binói rukueli jeanigá: ¿Áchami nakí mápumi ku galá akáanami níima?

⁷ Echalí echi rijói ke akáanami ku nijéwaga jeaneli: Keni walubélawa, ke wesi ne mapu tamí bachama echo'ná pachana ba'wírali, mapalí ma nokuá echi ba'wí. Sinibí nijeni chopi nakili bachá bakináliya, chopi auché bilé arigá bachá bakí. ⁸ Echalí Jesusi jeaneli: ¡Wiliska, ku chapigá kemi perí ma ku simigá! ⁹ Echalí we yáati echi rijói ma galá ku akáanami niwálati. A'lí binói ku chapigá kepu perí, ma ku simili. Chopi echalí rawé, isábawachi rawé níili. ¹⁰ Echijiti echi jaré Juríosi pagótami jeaneli echi rijói mapu ma ku akáanami niwálati: Jipi, isábawachi rawé ju. ¡Ketasi risensia ju mápumi echirigá tomea kemi perí!

¹¹ Chopi echi rijói ku nijéwaga jeaneli: Echi rijói mapu tamí galá ku akáanami niwali, échiko tamí jeaneli: ¡Ku chapigá kemi perí, ma ku simigá!

¹² Echalí echi jaré Juríosi rukueli jeanigá: ¿Chigá ju echi mapu mi jeaneli: Ku chapigá kemi perí, ma ku simigá?

¹³ Chopi echi rijói mapu ku galá akáanami niwálati ketasi machili chu riwéami níilo Jesusi, mapujiti echo'ná 'yénali wikabé pagótami. Echijiti Jesusi we yáati waná simili.

¹⁴ Péé wilibeko, echo'ná walubé Juríosi ri'obáwalachi, Jesusi auchecho siné riwisá echi rijói, echalí jeaneli: ¡Nibí, jípimi ma galá ku akáanami jumi! ¡Ketasi auché siné chati olá, mapurigami ketasi auché simírami risúu ikimea, ketasi mapurigá chabénala bachá!

¹⁵ Echalí echi rijói ku simigá ruyeli echi jaré Juríosi pagótami mapu Jesusi níilo echi mapu galá ku akáanami niwali. ¹⁶ Je'ná jiti echi jaré Juríosi pagótami wabé kichiga a'najátaga mi'lináali echi Walubela Jesusi mapujiti Binói ku sa'wali echi rijói mapalí isábawachi rawé níili. ¹⁷ Chopi Jesusi jeaneli: Keni Onó jipi isábawachi rawé 'wérali olá. Nijeni ayénachó 'wérali olá jipi isábawachi rawé.

¹⁸ Echijiti echi jaré Juríosi pagótami waminabi wabé mi'lináali echi Jesusi, mapujiti Binói ketasi nijéwaga olali mapurigá echi jaré Juríosi pagótami nulérami níili olánala sinibí isábawachi rawé; ayénachó aboni mi'lináali mapujiti Jesusi Binói anili mapu Binói achigó yiri níili Riosi yuwa, mapujiti Jesusi jeaneli: ¡Echi Walubela Riosi nijé Onolá ju!

Riosi Ranala ne wabé Walubela ju

¹⁹ A'lí Jesusi jeaneli: Ne bichíwali Nijé 'yemi nimí jeané: Nijé ju Riosi Ranala, chopi Nijeni ketasi biyiri omero olayá, Nijé Binói chopi niráa. Chópini olá mápuni ritiwá echirigá oláachi Riosi Onorúami. Ne suwaba mapurigá Onorúami olá, echirigá Nijeni ayénachó olá, mapujiti Nijeni Riosi Ranala ju. ²⁰ Riosi Onorúami wabé tamí galé. Nijeni bilepi Riosi Ranala ju. A'lí Riosi Onorúami tamí riwiri ne suwaba mapu ikí Binói olá, chopi péé waminánomí Onorúami tamí riwírama mapurigá Binói waminabi ne wabé simírami omériga olama, mapurigá 'yémitamo ma echirigá riwisáa ne wabé simírami kami nílika ikigá 'natábotamo. ²¹ Mapujiti achigórigá mapurigá echi Onorúami ku o'wíntaga ku akami niwá echi jaré suwíami, echirigá ayénachó Nijeni sinibí piréami niráa niwá si'néami mapu ikí Nijeni nakí echirigá niwayá, mapujiti Nijé bilepi ju Riosi Ranala. ²² A'lí Onorúami ketasi nulá mapu echi pagótami waminá kastigo 'yárami níima; chopi Binói tamí 'yali mapurigá Nijé Binói nulama kastigo 'yánala echi jaré chati oláami pagótami mapujiti Nijeni bilepi Riosi Ranala ju. ²³ Onorúami tamí echirigá 'yali mapurigá ne si'néami pagótami tamí walubéraga anema, achigórigá mapurigá aboni walubéraga ané Riosi Onorúami. Echi jaré mapu ikí ketasi tamí walubéraga aneko, abóniko ketasi cho walubéraga ané Riosi Onorúami, mapujiti Nijeni bilepi Riosi Ranala ju. A'lí Onorúami tamí júuli jena'í wichimóbachí.

²⁴ Echalí Jesusi waminabi jeaneli: Ne bichíwali 'yemi nimí jeané: Si'néami echi jaré mapu ikí nijéwaga olako mapurigá Nijeni aní, echi jaré mapu ayénachó galá bichíiko echi Onorúami mapu tamí júuli jena'í wichimóbachí, abóniko ma sinibí piréami ju. A'lí aboni ke siné kastigo 'yárami níima, mapujiti aboni ma ku wikawárami ju. A'lí aboni ma ketasi suwíami niráa níima, chopi sinibí niráa pirélama. ²⁵ Ne bichíwali Nijeni ayénachó 'yemi mi jeané: Jipi ma sébali tétali mapalí echi jaré suwíami tamí námama ra'íchachi, mapujiti Nijeni bilepi ju Riosi Ranala. A'lí si'néami mapu ikí galá nijéwaga bichíiko mapurigá Nijeni aní, abóniko sinibí niráa pirélama. ²⁶ Mapujiti Riosi Onorúami Binói wabé omérami ju iwítiya echi pagótami, ayénachó Onorúami tamí 'yali mapurigá Nijeni galá omérama sinibí piréami niráa niwayá echi jaré pagótami, mapujitini bilepi ju Riosi Ranala. ²⁷ Ayénachó Onorúami tamí nuleli ma-

purigani justicia olíima echi jaré pagótami mapujiti Binói tamí wilali mapurigá Ku'wíriami niráa. ²⁸ Ketasi majaga 'natasi je'ná jiti, mapujiti pe waminánomí sebama tétali mapalí ne si'néami echi jaré suwíami tamí námama ra'íchachi. ²⁹ Echali ne si'néami echi jaré suwíami ku o'wínaga buyáma echo'ná chu'wechi jonsa. A'lí echi jaré mapu ikí galá olálíko, abóniko ku o'wínama mapurigá aboni sinibí pirélama Riosi yuwa, chopi echi auché jaré mapu ikí chati olálíko, aboniko ku o'wínama mapurigá aboni sinibí niráa kastigo 'yárami níima.

Echi Jesusi ne bichíwali Walubela ju

³⁰ Echali Jesusi waminabi jeanili: Nijeni ketasi biyiri omero 'wérali olayá Nijé Binói niráa; chopi Nijeni sinibí justicia olá mapurigá Onorúami tamí nulé. A'lí Nijeni ne bichíwali olá justicia mapujiti Nijeni ketasi olá mapurigá Nijé Binói nakí, chópini sinibí olá mapurigá Onorúami nakí, echi mapu tamí júuli jena'í wichimóbachí. ³¹ A Nijé Binói bi'nélipi jeanisáagá: ¡Nijeni bilepi Riosi Ranala ju! Echali echi jaré pagótami ketasi bichíima mapurigá Nijeni aní. ³² Chopi auché Bilé nilú mapu tamí jiti nawesa jeanigá mapu Nijeni bilepi Riosi Ranala ju. A'lí Nijeni galá machí mapu Échiko ne bichíwaga nawesa tamí jiti, mapalí Binói ne bichíwaga aní mapu Nijeni bilepi Riosi Ranala ju. ³³ 'Yémitamo jaré júuli echi Juani rukuénala. Echali echi Juani ne bichíwali niráa nawésali tamí jiti. ³⁴ Chopi Nijeni ketasi newalé mapurigá jaré rijói tamí jiti nawesa jeanigá mapu Nijeni bilepi Riosi Ranala ju. Arigá Nijeni nakí máputamo bichíibo mapurigá echi Juani tamí jiti nawésali, mapurigátamo galá ku wikawárami níibo. ³⁵ Echi Juani ne bichíwali nawésali tamí jiti. Echijiti binói mapurigá bilé namuti walú rajáami niráa níili mapu galá ratábaga rajá echo'ná rokowárali. A'lí 'yémitamo pe téeli niráa we kaníliga kipuli mapurigá echi Juani nawésali. ³⁶ Echi Juani ne bichíwali nawésali tamí jiti rugá mapu Nijeni bilepi Riosi Ranala ju; chopi echi jaré pagótami waminabi galá machíratami ju mapu Nijeni bilepi Riosi Ranala ju, mapujiti Nijeni wabé omériga olá mapurigá Onorúami tamí júuli olánala. ³⁷ A'lí Onorúami mapu tamí júuli, Binói ayénachó tamí jiti nawésali; chopi 'yémitamo ke siné námali Onorúami ra'íchachi, nirapé chótamo riwáli chu yíríko Binói. ³⁸ Ayénachó 'yémitamo ketasi bichíili ne sulachí niráa mapurigá Onorúami tamí jiti nawésali, mapujiti 'yémitamo ketasi tamí bichíili. A'lí Onorúami Binói tamí júuli jena'í wichimóbachí. ³⁹ Yémitamo wisabé niráa we galá 'neni Riosi Ra'íchala oselíwalachi, mapujítitamo mayé mapu átamo echirigá bichíisagá mapurigá osirúami ju, echali 'yémitamo ne sinibí niráa piréami níibo Riosi yuwa. A'lí echo'ná Riosi Ra'íchala oselíwalachi ju mapo'ná ne bichíwali tamí jiti rugá osirúami ju. ⁴⁰ A'lí 'yémitamo ke-

tasi tamí bichíinali mapurigátamo echijiti ne sinibí piréami níibo.

⁴¹ Nijeni ketasi nakí mapurigá jena'í wichimóbachí piréami pagótami echirigá chopi animea mapu Nijeni we galabé rijói ju, mapujiti Nijeni ne bichíwali Riosi Ranala ju. ⁴² A'lí Nijeni galá machí 'yemi, ayénachóni galá machí máputamo ketasi ne sulachí niráa galé Riosi. ⁴³ Nijeni nawali jena'í wichimóbachí mapujiti Nijé Onolá tamí júuli, chopi 'yémitamo ketasi tamí bichíili. A bilecho 'yemi yuwa nawásagá, binói chopi jeanigá mapu bilé walubela ju, echalítamo galá bichíibo echi binói. ⁴⁴ ¿Churigátamo omélabo galá tamí bichíiya? Mapujítitamo a'nagupi niráa o'wéala ané, chópitamo ketasi nakí mapurigá echi bilepi Walubela Riosi 'yemi mi ne bichíwali o'wéalama. ⁴⁵ Ketasi mayesi mapu Nijeni 'yemi mi wi'nijima echo'ná bacháami Keni Onó yuwa. Echo'ná 'yémitamo chopi wi'nijírami níibo mapujítitamo ketasi bichíili mapurigá echi walula Moisesi osali, mapurigá osirúami ju echo'ná Riosi Ra'íchala oselíwalachi; chópitamo arigá aní máputamo wabé galá nijewa echi Moisesi. ⁴⁶ Mapujiti a 'yémitamo galá bichíisagá mapurigá echi Moisesi osali, ayénachótamo tamí galá bichíibi, mapujiti echi Moisesi tamí jiti rugá osali. ⁴⁷ Chopi átamo ketasi galá bichíisagá mapurigá echi Moisesi osali, ¿churigátamo bichíibo mapurigá Nijeni 'yemi mi ané?

Jesusi kowa malí mil rijói

(Mt. 14:13-21; Mr. 6:30-44; Lk. 9:10-17)

6 Echali ma je'ná jerigá anisáa, echi Jesusi echo'ná walú ba'wírali Galiléachi anilíwachi moba simíraga, ku simili echo'ná bo'ónala suwé. Echo'ná walú ba'wírali ayénachó Tibériachi anélati. ² A'lí ne wikabé pagótami ayénachó jubá najátaga simíwali Jesusi yuwa, mapujiti aboni ma wisabé riwáli mapurigá Jesusi wabé omériga olali mapurigá ke wesi auché jaré omero olayá, mapujiti Jesusi chopi chacheka ku sa'wali echi jaré nayúkami. ³ Echali Jesusi simigá echo'ná biléana ripá rabó, echo'ná asíbali echi auché jaré yuwa mapu Binói binérali. ⁴ Echali ma mulubé sébachi níili echi jaré Juríosi pagótami omáwala mapalí echi kúuchi bo'wá ko'wílati. ⁵ Echali rawé Jesusi 'néniga riwáli ne wikabé pagótami echo'ná Binói yuwa síami. Echali Binói rukueli echi Jiripi jeanigá: ¿Kumicheta raliboa wikabé ko'wáami, mapurigá si'néami je'ná wikabé pagótami galá posama?

⁶ Chopi Jesusi echirigá rukueli mapu churigá aníla echi Jilipi, mapujiti Jesusi Binói galá machili mapurigá Binói olama. ⁷ Echali echi Jiripi ku nijéwaga jeaneli: ¡Okuá kiento peso natéami ko'wáami ketasi sebama mapurigá ibili aboni pe kúuchi chapimea!

⁸ A'lí echi Antresi bilé níili mapu Jesusi binérali, ayénachó binói rijimala níili echi Simoni Pegro. Echi Antresi jeaneli echi Jesusi:

⁹ Jena'í atí bilé towí mapu malí kúuchi pani niwa, echi sebara anilíwami niwárami. Échiko ayénachó niwa okuá kúuchi rochí. ¿Chopi echikipi ko'wáami ketasi chirigá sebama mapurigá je'ná wikabé pagótami ko'mea!

¹⁰ Echálí Jesusi jeaneli: Jeanesi echi wikabé pagótami mapu ne si'néami jena'í galabé kasalátali muchíbama. A'lí echo'ná muchíbali wikabé malí mil rijói niráa.

¹¹ Echálí Jesusi chapili echi jaré pani. A'lí ma natétara 'yasa Riosi, Binói 'yali echi jaré mapu Binói binérali mapurigá aboni nachútama echi auché jaré wikabé pagótami. Echálí we yáati echi malí kúuchi pani wikabé muweli. A'lí aboni nachútali echi wikabé pagótami echo'ná muchúami. Echálí echi Walubela Jesusi achigórigá olali echi okuá kúuchi rochí yuwa. A'lí echi wikabé pagótami ko'wali suwaba mapu ikí aboni nakili.

¹² Mapalí echi wikabé pagótami ma galá posali, echálí Jesusi jeaneli echi jaré mapu Binói binérali: Ku napabusi echi kúuchi chi'wáami tibíami mapurigá tarapé namuti waminá ri'ichárama.

¹³ A'lí ma napabusa, aboni buchíili makói miná okuá walírali echi kúuchi chiwáami mapu tibili mapalí echi wikabé pagótami ma galá posaka ko'wali, mapalí Jesusi bachá 'yali ko'núliya echi malí kúuchi pani sebara niwárami. ¹⁴ A'lí ma riwisáa mapurigá Jesusi echirigá wabé omériga olali mapurigá ke wesi auché jaré omero olayá, echálí echi wikabé pagótami jeanili: ¿Ne bichíwali je'ná Jesusi echi Walubela Riosi jiti nawésami ju mapu nawama riwéali jena'í wichimóbachí!

¹⁵ Chopi Jesusi galá machili mapurigá aboni ne 'wérali tonáali, walula sílami niráa wilábiya, echijiti Binói auchecho siné, bi'neli niráa, waminá waná ripá rabó simili.

Jesusi echo'ná walú ba'wírali moba wirigá iyénali

(Mt. 14:22-27; Mr. 6:45-52)

¹⁶ Chopi mapalí ma chónachi níili, echálí echi jaré mapu Jesusi binérali ku ri'léna simíbalí echo'ná walú ba'wírali suwé. ¹⁷ A'lí aboni mo'wili echo'ná pachá biléana bárkochi ba'wichí moba iyénami. Echálí aboni chótali waminá bo'ómana simiba, echo'ná Kapernaúmachi anilíwachi. Echálí ma we chónachi níili, a'lí Jesusi ketasi cho ku nawali aboni yuwa. ¹⁸ Echálí chótali ne wabé iwéami ikayá, echijiti echi walubé ba'wí wabé apulali. ¹⁹ A'lí mapalí aboni ma mikabé sírali mapuyena malí kilómetro, usani kilómetro keremá, echálí aboni ke sayiná riwali echi Walubela Jesusi echo'ná walú ba'wírali moba inárami. A'lí Binói mulubéanali echo'ná bárkochi, chopi aboni ne wabé majali. ²⁰ Echálí Jesusi jeaneli: Nijeni ju. ¿Ketasi majasi!

²¹ A'lí aboni wabé kaníliga narega, pachá bachali echo'ná bárkochi. Echálí ke sayiná echi barko ma nawali echo'ná suwé mapo'ná aboni sírali.

Echi jaré wikabé pagótami we amí echi Jesusi

²² Ba'alínala rawé echi jaré wikabé pagótami abijí tibili echo'ná walú ba'wírali suwé mapo'ná Jesusi galá kóoli aboni. A'lí aboni galá machili mapurigá echi Walubela Jesusi ketasi así ku similo echi jaré yuwa mapu Binói binérali mapalí aboni ku simíbalí echo'ná pachá echi bilepi bárkochi muchiga mapu echo'ná jonsa ku simili. ²³ Chopi mapuyenasí echi jaré pagótami abijí buwigá tibili echo'ná suwé, echálí auché jaré barko, echo'ná Tibériachi jonsa simíbami, ma sébali echo'ná auché biléana pe waná suwé, mapo'ná mulipi níili echo'ná mapo'ná aboni bachánala ko'wali echi jaré pani, mapalí echi Walubela Jesusi ma natétara 'yali Riosi. ²⁴ Echálí mapalí echi jaré pagótami riwali mapurigá echi Walubela Jesusi ketasi echo'ná asali, ayénachó mapurigá echi jaré mapu Jesusi binérali ketasi echo'ná muchili, echálí aboni mo'wili echo'ná pachá echi auché jaléana bárkochi. A'lí aboni echo'ná pachá muchiga ku simíbalí echo'ná bo'ónala Kapernaúmachi anilíwachi, echi Jesusi ásiya.

Jesusi ju echi ko'wáami mapu sinibí piréami niwá echi jaré pagótami

²⁵ A'lí ma riwisáa echi Walubela Jesusi echo'ná bo'ónala suwé, echálí aboni rukueli jeanigá: Binériami, ¿kilíbukomi nawali jena'íbi?

²⁶ Chopi Jesusi jeaneli: Ne bichíwali 'yemi nimí ané máputamo chopi tamí amí mapujítitamo galá posaka ko'wali. 'Yémitamo ketasi tamí amí mapujítitamo galá machili mapurigá Nijeni wabé omériga olali, mapurigá ke wesi auché jaré omero olayá. ²⁷ Ketasi chopi nochasi mapurigátamo mepo echi ko'wáami mapu arigá we yáati suwibama, chopi nochasi mapurigátamo mepo echi ko'wáami mapu sinibí niráa tibima, echi mapu 'yemi mi 'yama mapurigátamo sinibí pirélabo. Riosi tamí wilali mapurigá Ku'wíriami niráa. Nijeni 'yemi mi 'yama echi ko'wáami mapu sinibí tibima, mapujiti Riosi Onorúami echijiti tamí wilali.

²⁸ Echálí aboni rukueli jeanigá: ¿Churigata ologá echirigá olabo suwaba mapurigá Riosi nakí máputa olabo?

²⁹ Echálí Jesusi ku nijéwaga jeaneli: Echi Walubela Riosi chopi nakí máputamo je'ná jerigá olabo: Ne galá tamí bichíisi, mapujiti Riosi Binói tamí júuli jena'í wichimóbachí.

³⁰ Echálí aboni rukueli jeanigá: ¿Pírimi karúmati omero ne wabé omériga olayá, mapurigá auché jaré ketasi omero olayá? Tamujé tamí riwiri, mapurigata galá riwisáa, echálí galata mi bichíibo. ¿Piri ju mápumi echirigá olá? ³¹ Tamujé pagótamawala ki'yá piréami galá ko'wali echi maná anilíwami ko'wáami echo'ná waná kawichí, mapurigá jerigá osirúami ju echo'ná

Riosi Ra'íchala oselíwalachi: Riosi 'yali mapurigá aboni ko'mea echi ko'wáami mapu ripá riwigachi jonsa rikínali.

³² Echali Jesusi ku nijéwaga jeaneli: Ne bichíwali Nijé 'yemi nimí jeané: Echi Moisesi ketasi níli mapu 'yemi mi 'yali echi ko'wáami echo'ná ripá riwigachi jonsa. Chopi echi keni Onó ju mapu 'yemi mi 'ya echi ne bichíwali ko'wáami echo'ná ripá riwigachi jonsa. ³³ Mapujiti echi ko'wáami mapu Riosi nijá, echi ju mapu ma rikínali ripá riwigachi jonsa. Echi ju mapu galá 'ya mapu jena'í wichimóbachí piréami pagótami sinibí pirélama.

³⁴ Echali aboni jeaneli: ¡Walubela, sinibí tamujé tamí 'ya echi ko'wáami!

³⁵ Chopi Jesusi jeaneli: Nijé Binói ju echi ko'wáami mápuni nijá mapurigá echi pagótami sinibí pirélama. Si'néami mapu ikí tamí yuwa siko, tarapé siné 'lochema. Si'néami mapu ikí tamí bichíiko, tarapé siné balámama. ³⁶ Chopi mapurigá Nijeni ma 'yemi mi aneli, 'yemi ayénatamo tamí riwali, chópitamo arigá ketasi tamí bichíili. ³⁷ Ne si'néami echi jaré mapu ikí Onorúami tamí 'yali, aboni arigá tamí yuwa simea. A'lí ke wesi ku machí a'wámani echi jaré mapu ikí tamí yuwa siko. ³⁸ Mapujiti Nijeni echo'ná ripá riwigachi jonsa simisáa nawali jena'í wichimóbachí mapurigani chopi olama mapurigá Onorúami nakí mapu tamí júuli. Nijeni ketasi chopi nawali jena'í wichimóbachí mapurigani olama mapurigá Nijé Binói chopi nakí. ³⁹ A'lí Onorúami, mapu tamí júuli, je'ná jerigá nakí: Mapu Nijeni ke wesi wikipyama echi jaré mapu Binói tamí 'yali, chopi mapurigá Nijeni ne si'néami ku o'wíntama echali ne jubá rawé. ⁴⁰ Echi Onorúami mapu tamí júuli, je'ná jerigá nakí: Mapu ne si'néami mapu ikí tamí 'néni-ga bichíiko ne sinibí piréami níima, mapujiti Nijeni bilepi Riosi Ranala ju. A'lí Nijeni ku o'wíntama aboni echali ne jubá rawé.

⁴¹ Echali echi jaré Juríosi pagótami chótali kichiga ra'icha, echi Jesusi sayéraga, mapujiti Binói jeanili: Nijé Binói ju echi ko'wáami, echi mapu ripá riwigachi jonsa rikínali. ⁴² Echali aboni a'nagupi ra'íchaga jeanili: ¿Kecha je'ná ju Jesusi, echi José ranara? Tamujeta galá machí binói onolá, binói iyela ayénachó. ¿Churikória echaní mapu binói rikínali echo'ná ripá riwigachi jonsa?

⁴³ Chopi Jesusi ku nijéwaga jeaneli: Ketasi echirigá ra'ichasi a'nagupi, tamí sayéraga. ⁴⁴ Ke wesi omérama tamí bichiya, a echi Onorúami mapu tamí júuli ketasi galá bichírasagá aboni. A'lí echali ne jubá rawé Nijeni ku o'wíntama si'néami mapu ikí galá tamí bichíiko.

⁴⁵ Echo'ná Riosi Ra'íchala oselíwalachi osirúami ju mapurigá echi jaré Riosi jiti nawésami jerigá osali: Riosi si'néami 'yemi mi galá binérama. Echirigá ju mapu si'néami mapu ikí galá kipuga binéko mapurigá Onorúami binera, abóniko galá tamí bichíima.

⁴⁶ Ketasi bichíwali ju mapu jaré ma riwali Onorúami; chopi Nijeni mápuni bilepi Riosi Ranala ju, mapu Riosi tamí júuli jena'í wichimóbachí, Nijeni ma galá riwali Onorúami. ⁴⁷ Ne bichíwali 'yemi nimí jeané: Echi jaré mapu tamí bichíiko, abóniko ne sinibí piréami ju. ⁴⁸ Nijé Binói ju echi ko'wáami mápuni nijá mapurigá echi pagótami sinibí pirélama. ⁴⁹ Echi jaré ki'yá piréami 'yemi pagótamawala ko'wali echi maná anilíwami ko'wáami echo'ná biléana waná kawichí, chopi aboni arigá waminá suwili. ⁵⁰ Chopi Nijeni 'yemi mi ra'icha echi ko'wáami jiti rugá mapu ripá riwigachi jonsa rikínali, mapurigá echi jaré mapu ikí ko'wako echi ko'wáami ma ketasi suwimea. ⁵¹ Nijé Binói ju echi ko'wáami sinibí bitéami mapu rikínali echo'ná ripá riwigachi jonsa. Si'néami mapu ikí ko'wako je'ná ko'wáami ne sinibí niráa pirélama. A'lí echi ko'wáami mapu Nijeni nijá, Nijé Binói sapala chopi ju. Nijeni 'yama Nijé Binói sapala mapurigá jena'í wichimóbachí piréami pagótami sinibí pirélama.

⁵² Echali echi jaré Juríosi pagótami a'nagupi rukueli jeanigá: ¿Churigá omérama je'ná rijói tamujé tamí ayá binói sapala mapurigata kopoa mapurigá ko'wáami niráa?

⁵³ A'lí Jesusi jeaneli: Ne bichíwali Nijeni 'yemi mi jeané: A ketásitamo kosáagá Nijé sapala, ayénachó a ketásitamo bajísagá Nijé lalá, a'lí bichétamo ketasi sinibí piréami ju. Riosi tamí wilali mapurigá Ku'wíríami niráa. ⁵⁴ Si'néami mapu ikí ko'wako Nijé sapala, echi jaré mapu ayénachó bajiko Nijé lalá, abóniko sinibí piréami ju. A'lí Nijeni ku o'wíntama aboni echali ne jubá rawé. ⁵⁵ Mapujiti Nijé sapala echi ne bichíwali ko'waami ju. A'lí Nijé lalá echi ne bichíwali bajíwami ju. ⁵⁶ Si'néami mapu ikí ko'wako Nijé sapala, echi jaré mapu ayénachó bajiko Nijé lalá, abóniko sinibí tamí yuwa piré, ayénachó Nijeni sinibí aboni yuwa bité. ⁵⁷ Riosi Onorúami, mapu tamí júuli jena'í wichimóbachí, sinibí bitéami ju. A'lí Nijeni sinibí bité Binói jiti. A'lí si'néami mapu ikí tamí ko'wako, abóniko ayénachó achigórigá sinibí pirélama tamí jiti. ⁵⁸ Nijeni ra'icha echi ko'wáami jiti rugá mapu ripá riwigachi jonsa rikínali. Je'ná ko'wáami ketasi mapurigá echi maná anilíwami ko'wáami ju, echi mapu echi jaré 'yemi pagótamawala ki'yá piréami ko'wali, chopi aboni arigá waminá suwili. Jipi si'néami mapu ikí ko'wako je'ná ko'wáami, mapu ripá riwigachi jonsa rikínali, aboniko sinibí niráa pirélama.

⁵⁹ Echi Walubela Jesusi je'ná jerigá binérama nawésali echo'ná Kapernaúmachi mapalí echi jaré Juríosi pagótami napawili echo'ná aboni ri'obáwalachi.

Jesucristo Ra'íchala 'ya mapurigá echi pagótami ne sinibí pirélama

⁶⁰ Je'ná jerigá námsa wikabé mapu Jesusi yuwa najátali a'nagupi jeaneli: We nóchali ju máputa echirigá bichíibo mapurigá Binói binera. Ke wesi omérama echirigá nijéwiya.

⁶¹ Echali Jesusi Binói galá machili mapurigá aboni echijiti a'nagupi chílawaga ra'íchali. A'lí Binói rukueli jeanigá: ¿Wabéchatamo chati níili je'ná jiti mapurigá Nijeni 'yemi mi aneli? ⁶² ¿Churigá bichétamo aniboa átamo tamí riwísagá echo'ná ripá riwigachi ku moyénachi, mapo'nani bachá asali? Riosi tamí wilali mapurigá Ku'wíriami niráa. ⁶³ Echi pagótami chopi sinibí pirélama Nijé Iwigala jiti. Aboni ketasi chirigá omérama sinibí piréliya aboni sapala jiti. Nijeni 'yemi mi ne bichíwaga aneli mapu churigátamo omérabo sinibí piréliya. A'lí átamo galá echirigá bichíisagá, 'yémitamo ne bichíwali sinibí pirélabo. ⁶⁴ Chopi jaré 'yemi abijí ketasi cho bichíi. Echali Jesusi echirigá aneli mapujiti chabé chokichí jonsa Binói galá machili chigá níili mapu ke bichíima; ayénachó Jesusi galá machili chigá jiti Binói waminá nijírami níima riwéali. ⁶⁵ A'lí Jesusi waminabi jeaneli: Echijiti Nijeni 'yemi mi aneli mapu ke wesi omérama tamí bichíiya, a Onorúami ketasi echirigá bichíirasagá.

⁶⁶ Echali jonsa wikabé pagótami mapu Jesusi yuwa najátali ma waminá ku ariweli. A'lí aboni ma ketasi 'yé-nali Binói yuwa. ⁶⁷ Echali Jesusi rukueli echi jaré makói miná okuá binéami jeanigá: ¿'Yémi áchatamo ayénachó waná simánali tamí aliwesa?

⁶⁸ Chopi echi Simoni Pegro ku nijéwaga rukueli jeanigá: Walubela, ¿chigá bicheta yuwa simabo? ¡Mujé Ra'íchala chopi tamujé tamí 'ya mapurigata sinibí pirélabo! ⁶⁹ Ayénachó tamujé ma galá bichíili Mujé niráa. Jípita galá machí mapu Mujemi ju echi Cristo anilíwami. Mujemi ju echi bilepi Riosi Ranala.

⁷⁰ Echali Jesusi ku nijéwaga jeaneli: Nijé Binói chapili 'yemi máputamo makói miná okuá ju. ¿Chopi arigá bilé rijói 'yemi we sití suléami ju mapurigá echi riablo niráa!

⁷¹ Chopi Jesusi echirigá ra'íchali echi Júrsi Jiskarioti riwéami rijói jiti rugá. Échiko auché bilé rijói, Simoni Jiskarioti riwéami, ranala níili. Echi Júrsi níili mapu waminá nijima riwéali echi Jesusi mapurigá Binói mi'lrúami níima. A'lí Jesusi Binói binérali echi Júrsi. Echi yuwa si'néami makói miná okuá niili mapu Jesusi binérali.

Echi jaré mapu Binói ritémawala niráa níili ketasi bichíili Jesusi niráa

7 Pe wakináokuá echi Walubela Jesusi iyénali echo'ná Galiléachi anilíwachi kawírali. Echali Binói

ketasi nakili inánara echo'ná Juréachi anilíwachi kawírali, mapujiti echo'ná piréami Juríosi pagótami ne wabé mi'lináali echi Binói. ² Echali ma ne mulubé sébachi níili echi jaré Juríosi pagótami omáwala mapalí rojuá sawala laka muchíwachi níili. ³ Echali echi jaré Jesusi ritémawala jeaneli: Ketasi tibí jena'í Galiléachi, chopi echo'ná Juréachi simigá mapurigá echo'ná piréami pagótami mapu ikí galá bichíi mujé niráa ayénachó riwimea mapurigá mujemi olá. ⁴ Mapujiti a bilé rijói nakisáagá mapu binói galá machirúami níima echi auché jaré pagótami jiti, échiko sinibí ne machiná niráa olá suwaba namuti mapurigá echi auché jaré pagótami galá riwimea mapurigá binói olá. A mujemi ne bichíwali omérasagá olayá mapurigá ke wesi auché jaré pagótami omero olayá, echirigá olá ne machiná niráa, mapurigá ne si'néami pagótami galá riwimea mapurigami olá.

⁵ Echali aboni echirigá aneli mapujiti aboni echi Jesusi ritémawala ke, arigá ketasi bichíili Binói niráa. ⁶ A'lí Jesusi jeaneli: Ke cho abijí séba Nijé tétala; chopi 'yémitamo sinibí olá mapu ikí 'yemi abónitamo nakí. ⁷ Jena'í wichimóbacha piréami pagótami ketasi omérama 'yemi mi kichiya, chopi aboni wabé tamí kichí mapujiti Nijeni ne bichíwaga nawesa aboni jiti rugá, mapu aboni wabé chati oláami ju. ⁸ Bachá simíibaga 'yemi echo'ná Jerusalémachi, mapujiti omowálawachi sébachi ju. Nijeni ketasi cho simea, mapujiti Nijé tétala ketasi cho seba.

⁹ A'lí ma je'ná jerigá anesa, echi Walubela Jesusi abijí tibili echo'ná Galiléachi anilíwachi kawírali.

Jesusi simili echo'ná Jerusalémachi mapalí omowálawachi sébachi níili mapalí sawá laka muchíwachi níili

¹⁰ Chopi pe jubá mapalí echi jaré Jesusi ritémawala ma simíibali echo'ná Jerusalémachi echali omowálawachi sébachi, echali Jesusi ayénachó echo'ná simili; chopi Binói ketasi iyénali wikabé pagótami yuwa, echijiti ketasi machirúami níili mapurigá Binói echo'ná iyénali. ¹¹ Echali echi jaré Juríosi pagótami mapu ma echo'ná Jerusalémachi omawa muchili, aboni a'nagupi jeanigá we ali echi Jesusi: ¿Kumi 'nalí iyena echi rijói?

¹² Echali rawé echo'ná wikabé pagótami napawika muchúwachi jaré wikabé a'nagupi ra'íchali echi Walubela Jesusi jiti rugá. Jarecho jeanili: Echi Jesusi we galabé ju. A'lí auché jaré jeanili: Echi rijói ketasi galabé ju, chopi binói wabé 'yékaka nawésiami ju echi jaré pagótami.

¹³ Chopi echali aboni ke wesi machiná niráa ra'íchali echi Walubela Jesusi jiti rugá, mapujiti si'néami we majali echi jaré o'wéala Juríosi.

¹⁴ A'lí ma nasipa sérali sunísiya echi omáwali mapalí echi Walubela Jesusi binéramiya bakili echo'ná pachá echi walubé Juríosi pagótami ri'obáwalachi. ¹⁵ Echali echi jaré Juríosi pagótami wabé kilí kipuli mapalí echi Walubela Jesusi binéraga nawésali; ayénachó aboni we cha nílaga a'nagupi rukueli: ¿Churigá galá machí je'ná Rijói wikabé karúmati namuti, mapujiti Binói ke siné bineli mapurigá echi auché jaré wabé machíami sinibí we binela?

¹⁶ Chopi Jesusi ku nijéwaga jeaneli: Mapurigá Nijeni binela, ketasi Nijé níwala ju. Chopi Echi mapu tamí júuli jena'í wichimóbachí, Echi níwala ju. ¹⁷ A'lí a jaré nakisáagá echirigá olánala mapurigá Riosi nakí mapurigá echi pagótami olama, aboni galá machimea acha Riosi Binói tamí júuli echirigá binera echi pagótami, acha Nijé, binói chopi niráa, echirigá binérima kéremá. ¹⁸ Mapuyíripi rijói chopi ra'íchaga nawésako mapurigá binói nakí, échiko echirigá olá mapurigá binói walubéraga anérami níima echi auché jaré pagótami jiti. A'lí mapuyíripi rijói chopi nakíko mapu walubéraga anérami níima echi bilé mapu bachá náwali, échiko ne bichíwaga ra'íchami ju, ayénachó binói tarapé 'yékami ju.

¹⁹ Ne bichíwali ju mapu echi walula Moisesi 'yemi mi 'yali Riosi nulalila osirúami, chopi ke wesi 'yemi ne galá nijéwaga olali mapurigátamo nulérami níili. Jipi, ¿churékulátamo tamí mi'lináali?

²⁰ Echali echi jaré pagótami ku nijéwaga jeaneli: We chati riablo aliwala aliwéami jumi. ¿Chigá biché mi mi'lináali?

²¹ Echali Jesusi jeaneli: Nijeni galabé ologá ku sa'wali bilé rijói echali mapalí isábawachi rawé níili, echijiti si'néamitamó wabé si'wináriga 'nátali. ²² Chopi echi Moisesi 'yemi mi nuleli noligá sikirénala echi jaré kúuchi kúrowi 'yemi kúchala, a'lí bichétamo arigá noligá sikiré bilé taa towí mapalí isábawachi rawé ju. (Chopi echi Moisesi ketasi níili mapu bachá niráa echirigá olali, mapujiti echi auché jaré chabé ki'yánala piréami 'yemi pagótamawala bachá niráa echirigá olali.) ²³ A'lí a 'yémitamo noligá sikirésagá bilé taa towí, mapalí isábawachi rawé ju, mapurigátamo echirigá suwaba galá nijéwaga olabo mapurigá Moisesi 'yemi mi osogá nuleli, ¿churékulátamo na'awa tamí yuwa mapujítini ne suwaba ku sa'wali bilé rijói mapalí isábawachi rawé níili? ²⁴ Ketasi chuwé wi'nijisi auché jaré. Mapalí 'yémitamo chopi 'nátaga mayé mapu, siné káachi, aboni we chati olá; chopi galá machigá wi'nijisi mapalí 'yémitamo ne bichíwali galá machí mapurigá auché jaré chati olá.

Jesusi nawésaga aní mapu Binói julárami níili Riosi jiti

²⁵ Echali jaré echo'ná Jerusalémachi piréami chótali a'nagupi rukuésiya jeanigá: ¿Kecha je'ná ju echi rijói

mapu aya 'yénalati mi'liboya? ²⁶ Jipi jena'í ne machiná niráa nawesa, chopi ke wesi chibi ané. ¿Acha níimilé mapu echi jaré o'wéala ne bichíwali mayé mapu je'ná rijói echi Cristo anilíwami ju? ²⁷ Ayénachó aboni a'nagupi jeaneli: Chopi tamujeta galá machí je'ná rijói, mapu kumi bitéami ju. A'lí mapalí echi Cristo anilíwami nolínsa, ke wesi machimea kumi jonsa nawalo.

²⁸ Echali Jesusi nawésaga binérali echi jaré pagótami echo'ná pachá echi walubé Juríosi pagótami ri'obáwalachi; chopi ma kipusa mapurigá aboni a'nagupi anili, echali Binói o'weli ra'íchaga jeaneli: 'Yémitamo mayé máputamo galá tamí machí, ayénachótamo mayé máputamo galá machí mapu kúmini nalí okuá nawalo. A'lí bichétamo ketasi galá tamí machí, nirapétamo galá machí mapu kúmini nalí okuá nawali, mapujiti Nijeni ketasi olámiya nawali mapurigá Nijé Binói chopi nakí. Nijeni julárami níili jena'í wichimóbachí. A'lí Echi mapu tamí júuli ne bichíwali ju, chopi 'yémitamo ketasi machí Binói. ²⁹ Chopi Nijeni galá machí Binói, mapujítini nawali echo'ná jonsa mapo'ná Binói atí. Ayénachó Binói tamí júuli.

³⁰ Echali echi jaré Juríosi pagótami chapináali bologá tonáalia echi Jesusi; chopi ke wesi chapili mapujiti ketasi cho sébali Binói tétala. ³¹ A'lí wikabé pagótami arigá bichíili Jesusi niráa. Echali aboni jeaneli: Je'ná Rijói ne bichíwali ju echi Cristo anilíwami, mapujiti Binói ne wabé omériga olá wikabé namuti, mapurigá auché jaré pagótami ketasi omelo olayá. A'lí echirigá olama riwéali echi Cristo anilíwami.

Echi jaré Bariseo anilíwami binériami júuli jaré kapitani echi Jesusi chapínala

³² Echali echi jaré Bariseo anilíwami binériami galá námali mapurigá echi auché jaré pagótami anili, Jesusi jiti rugá. Echijiti echi jaré Bariseo, ayénachó echi jaré o'wéala sacerdote, si'néamika napawika katéwaga júuli jaré kapitani, echo'ná walubé Juríosi pagótami ri'obáwalachi jonsa, mapurigá aboni chapisá bologá tomea echi Walubela Jesusi. ³³ A'lí echi Walubela Jesusi jeaneli: Pée téeli rawé chopi asiméani 'yemi yuwa. A'lí pée waminánomí Nijeni auchecho ku símea Echi yuwa mapu tamí júuli jena'í wichimóbachí. ³⁴ Echali 'yémitamo tamí abo, chópitamó ketasi tamí riwiboa, mapujiti 'yémitamo ketasi omélabo simiba echo'ná mapo'ná Nijeni asimea.

³⁵ A'lí echi jaré Juríosi pagótami chótali a'nagupi niráa rukuée jeanigá: ¿Kumi siméaré je'ná, mapo'ná tamujeta ketasi riwiboa? ¿Acha echo'ná auché jaréana símea, echi auché jaré Juríosi pagótami yuwa, si'néami mapu ikí hijaga piré, echi auché jaré isena Griego anilíwami pagótami yuwa, mapurigá Binói nawésaga binérama echi auché jaré isena pagótami? ³⁶ Tamujeta ketasi machí chu aniwáami ju mapurigá Binói tamujé tamí

aneli jeanigá: 'Yémitamo tamí abo, chópitamo ketasi tamí riwiboa, mapujiti 'yémitamo ketasi omérabo simiba echo'ná mapo'ná Nijé asimea.

Jesusi nawésali echi sinibí bitéami ba'wí jiti rugá

³⁷ Echali ne jubá rawé omowálawachi, ne wabé simírami walubéala omowálawachi rawé níli. Echali rawé Jesusi wilísaga, o'weli ra'íchaga jeanili: A jaré 'yemi balámasagá, wakiná tamí yuwa simíbaga bajisi echi ba'wí mapu Nije nijá. ³⁸ Mapujiti echo'ná Riosi Ra'íchala oselíwalachi tamí jiti rugá, jerigá osirúami ju: Si'néami mapu ikí tamí bichíiko, echo'ná pachana abónichi jonsa walubé simea ba'wí mapu Nijeni nijá, mapurigá wikanáami bakochi niráa, mapurigá si'néami mapu ikí bajima echi ba'wí, ne sinibí niráa pirélama.

³⁹ A'lí je'ná jerigá anisá, Jesusi jerigá anináali mapu si'néami mapu ikí bichíima Binói niráa, galá nalema echi Wabé Galabé Riosi Iwigala echo'ná pachana aboni sulálachi niráa. Echali rawé Jesusi echirigá anili mapujiti echi Wabé Galabé Riosi Iwigala echali ketasi cho nawali jena'í wichimóbachí, mapujiti Binói Jesusi ketasi cho wabé walubélatami níli.

Jaré pagótami waná cho 'nátami níli

⁴⁰ Echali jaré echi pagótami echo'ná muchúami je'ná jerigá namsa jeanili: Je'ná Rijói ne bichíwali ju echi Riosi jiti nawésami mapu jena'í wichimóbachí nolínama riwéali.

⁴¹ Chopi auché jaré jeanili: ¡Je'ná Rijói echi Walubela Cristo anilíwami ju! Chopi auché jaré jeanili: Je'ná ketasi nímiré echi Cristo, mapujiti echi Cristo ketasi echo'ná Galiléachi bitéami níma. ⁴² Mapujiti echo'ná Riosi Ra'íchala oselíwalachi osirúami ju mapurigá echi Walubela Cristo bilé níma echi walula silíami Rabiri riwéami kúchala kúchuwala; ayénachó osirúami ju mapurigá echi Cristo echo'ná Belénchi ranarúami níma riwéali, mapo'ná echi Rabiri bitéali chabé ki'yá.

⁴³ Echali echi pagótami echirigá wikanáami 'nátaga, waminá rojuali, mapujiti aboni ketasi ne chópirigá bichíili echi Jesusi niráa. ⁴⁴ Echali jaré bologá tonáali echi Jesusi, chopi ke wesi echirigá olali.

Echi jaré o'wéala ketasi bichíili Jesusi niráa

⁴⁵ Echali echi jaré kapitani mapu julárami níli echo'ná walubé Juríosi pagótami ri'obáwalachi jonsa, ma ku sili mapo'ná echi jaré Bariseo, echi jaré o'wéala sacerdote muchili. A'lí echi jaré o'wéala jeanigá rukueli: ¿Churékulátamo ke wakiná palí echi Jesusi?

⁴⁶ Echali echi jaré kapitani ku nijéwaga jeaneli: ¡Ke wesi siné echirigá ra'íchali mapurigá echi Rijói ra'icha!

⁴⁷ A'lí echi jaré Bariseo jeanigá rukueli: ¿Áchatamo ayénachó ariweli mapurigá echi Rijói 'yemi mi 'yéka-ma? ⁴⁸ ¡Ke wesi tamujé o'wéalawala galá bichíili echi Je-

susi niráa, nirapé wesi echi jaré Bariseo! ⁴⁹ Chopi je'ná jaré pagótami mapu ketasi machiko mapurigá nulárami ju, abóniko wabé si'winárigá bichíiralati.

⁵⁰ Echali echi Nikoremo riwéami rijói, mapu chabé-nala rokogó niráa 'némiya simili echi Jesusi, échiko bilé níli echi jaré Bariseo echo'ná muchúami. A'lí echi Nikoremo jeaneli echi auché jaré:

⁵¹ Tamujé nulalila chopi jiti ketásita omérabo kastigo ayá bilé rijói mapalita ke cho bachá niráa galá rukuésagá, mapurigata galá machiboa mapu piri chati olalo binói.

⁵² Chopi echi auché jaré o'wéala ku nijéwaga jeaneli: ¿Áchami ayénachó echo'ná Galiléachi bitéami ju? ¡Ne galá machigá 'ne mapurigá osirúami ju echo'ná Riosi Ra'íchala oselíwalachi, mapujítimi riwimea mapu ke wesi o'wéala Riosi jiti nawésami echo'ná Galiléachi piréami níli!

Echi chati oláami mukí

⁵³ Echali aboni ibili niráa ku bitichí simíbali.

8 Chopi Jesusi simili echo'ná ripá rabó Olíbochi anilíwachi. ² A'lí ba'alínala rawé bi'yá chi'rásiachi Jesusi auchecho ku nawasa echo'ná Jerusalémachi, auchecho ku bakili echo'ná pachá walubé Juríosi pagótami ri'obáwalachi. Echali si'néami pagótami mulubéanali Binói yuwa. A'lí Binói echo'ná asibaga, chótali binériya aboni. ³ A'lí jaré nulalíwami binériami, jaré Bariseo yuwa, echo'ná pali bilé chati oláami mukí, echi mapu riwílati si'nú rijói yuwa kochíami. Echali aboni echo'ná nasipa wilali echi mukí echi jaré echo'ná muchúami yuwa. ⁴ A'lí aboni jeaneli echi Jesusi: Binériami, je'ná mukí riwirúami níli si'nú rijói yuwa kochíami. ⁵ A'lí echi walula Moisesi tamujé tamí osogá nuleli máputa basibuka ko'wiboa echirigá chati oláami muguí, chopi Mujeru, ¿chumi aní?

⁶ Echali aboni chopi echirigá rukueli mapujiti aboni nakili kipúnala mapu churigá echi Jesusi ku nijéwama riwéali, mapujiti aboni wabé wi'nijíinali echi Jesusi. A'lí Jesusi yólaga ri'lé wi'yérali osali Binói makúsawala jiti. ⁷ A'lí mapujiti aboni waminabi rukueli, echali Jesusi ku wachí wilíbaga jeaneli: Mapuyiripi 'yemi máputamo ke bilé siné chati olali, échiko bachá basibuma echi mukí sayéraga.

⁸ Echali Jesusi auchecho siné ku yólaga, auchecho ri'lé wi'yérali osali. ⁹ Chopi aboni wabé 'nátaga tibili mapurigá Jesusi aneli. Echijiti aboni ne wabé wi'nijíirami niráa níli pachana aboni sulálachi niráa, mapujiti ibili we 'nátali mapurigá aboni ayénachó we chati oláami níli. Echali aboni chótali ibiripi niráa ku buyásiya echo'ná pachá jonsa mapo'ná Jesusi asali. Echi jaré wabé ochérami ne bachá buyásali, echali echi auché jaré ke 'me ochérami ayénachó ku buyásali, mapuyénasí echi Jesusi bi'neli tibili echi mukí yuwa, mapu

ayena echo'ná tibili. ¹⁰ Echali Jesusi ku wilísali. A'lí ma-palí Binói chopi riwali echi mukí echo'ná wilíami, echali Binói jeanigá rukueli: Mujé mukí, ¿kumi muchuwi echi jaré mapu mi wi'nijili? ¿Macha ke wesi néwalé mapu mi kastigo 'yánali?

¹¹ A'lí echi mukí jeaneli: Keni Walubélawa, ke wesi ne mapu tamí kastigo 'yánali. Echali Jesusi jeaneli: Nijeni ketasi cho mi kastigo 'yánali. Ma ku simigá echo'ná mujé bitélachi, chopi ketasi auché chati olá.

Jesusi galá machíraga olá jena'í wichimóbachí piréami pagótami

¹² A'lí Jesusi auchecho siné ra'íchali echi pagótami. Echali Binói jeaneli: Nijeni we galá machíraga olá jena'í wichimóbachí piréami pagótami. Si'néami mapu iki olako mapurigá Nijeni aní, aboni machimea galabé ologá piréliya. A'lí aboni ketasi chuwé ologá pirélama mapurigá echi jaré pagótami mapu ketasi machí mapo'ná aboni 'yena, mapurigá echi jaré pagótami mapu we 'yena echo'ná rokowárali niráa.

¹³ Echali echi jaré Bariseo anilíwami binériami jeaneli: Mujé Binói chopi ra'íchaga aní mápumi we omérami ju echirigá olayá, chopi ketasi bichíwali ju mapurigá mujé mi aní mujé binói jiti rugá.

¹⁴ A'lí Jesusi ku nijéwaga jeaneli: Ayena bichíwali ju mapurigá Nijeni anili mapu Nijeni galá machíraga olá echi pagótami, mapujiti Nijeni galá machí kúmini jonsa nawali; ayénachóni galá machí mapu kúmini simea, chopi 'yémitamo ketasi machí mapu kúmini jonsa nawalo, nirapétamo machí mapu kúmini siméaríko.

¹⁵ 'Yémitamo chopi tamí wi'nijí mapurigá jena'í wichimóbachí piréami pagótami 'nátaga wi'nijí auché jaré. A'lí Nijé Binói ketasi wesi wi'nijí. ¹⁶ Chopi a Nijeni wi'nijísagá auché jaré, Nijeni ne bichíwali niráa wi'nijima, mapujiti Nijeni ketasi bi'neli niráa wi'nijima, chopi echi Onorúami mapu tamí júuli jena'í wichimóbachí, Échiko tamí yuwa, okuákata napawika wi'nijibo.

¹⁷ Echali Jesusi waminabi jeaneli: Echo'ná 'yemi nulalila oselíwalachi je'ná jerigá osirúami ju: Mapalí okuá rijói a'nawí chópirigá nawisásagá, echali mapurigá aboni nawesa ne bichíwali ju. ¹⁸ Galá ju. Nijé Binói bichíwaga aní mapu Riosi Onorúami tamí júuli jena'í wichimóbachí. A'lí Onorúami auché Bilé ju mapu bichíwaga anili mapu Binói tamí júuli.

¹⁹ Echali echi jaré Juríosi pagótami jeaneli: ¿Kumi atí Mujé Onolá? Chopi Jesusi ku nijéwaga jeaneli: 'Yémitamo ketasi tamí galá machí. Nirapétamo machí echi Nijé Onolá. Átamo tamí galá machisáagá, ayénachótamo machiboi echi Nijé Onolá.

²⁰ Echali Jesusi je'ná jerigá nawésaga aneli mapuyénasí Binói binérali echi jaré pagótami echo'ná pachá echi walubé Juríosi pagótami ri'obáwalachi, echo'ná bacháami mapo'ná wenomí muchuwálawachi níili;

chopi ke wesi cho bulali mapujiti ketasi cho sébali Binói tétala.

Echo'ná mapo'ná Nijé simea, 'yémitamo ketasi oméрабо echo'ná simiba

²¹ A'lí Jesusi auchecho siné jeaneli: Mani ku simea. A'lí 'yémitamo tamí abo, chópítamo waminá suwiboa. A'lí bichétamo ketasi ku wikawárami níibo mapurigátamo chati olali. A'lí echo'ná mapo'ná Nijeni simea, 'yémitamo ketasi oméрабо echo'ná simiba.

²² Echijiti echi jaré Juríosi pagótami a'nagupi rukueli jeanigá: ¿Acha mi'limea Binói niráa? Siné káachi Binói echijiti echaní mapu tamujé ketasi oméрабо simiba echo'ná mapo'ná Binói simea.

²³ Echali Jesusi jeaneli: 'Yémitamo jena'í ri'lé piréami ju, chopi Nijeni echo'ná ripá riwigachi jonsa nawáami ju. 'Yémitamo chopi jena'í wichimóbachí piréami ju, chopi Nijeni ketasi sinibí niráa jena'í wichimóbachí bitéami níima. ²⁴ Echijítini 'yemi mi echirigá aneli máputamo arigá waminá suwiboa, chópítamo ketasi ku wikawárami níibo mapurigátamo chati olali, mapujiti átamo ketasi bichíísagá mapu Nijé ne bichíwali ju echi bilepi Riosi Ranala, echalítamo arigá waminá suwiboa, chópítamo ketasi ku wikawárami níibo mapurigátamo chati olali.

²⁵ Echali echi jaré Juríosi pagótami jeanigá rukueli: Mujé, ¿chigá bichemi juko? Chopi Jesusi ku nijéwaga jeaneli: Mani 'yemi mi galá aneli chabé chokichí jonsa mapu chigani ju Nijé. ²⁶ Abijini niwa wikabé namuti mápuni animea 'yemi jiti rugá; ayénachó Nijeni abijí 'yemi mi wi'nijima wikabé namuti jiti, chopi Echi mapu tamí júuli jena'í wichimóbachí ne bichíwaga aní. A'lí Nijeni chopi ané jena'í wichimóbachí piréami pagótami achigórigá mapurigá Nijeni námali aníami Echi mapu tamí júuli.

²⁷ Chopi aboni ketasi machili mapu Jesusi ra'íchali echi Onorúami jiti rugá. ²⁸ Echijiti Jesusi jeaneli: Nijeni wilárami níili mapurigá Ku'wíríami niráa, chopi mapalítamo tamí ripá uchabo, echalítamo galá machiboa mapu Nijé ne bichíwali ju echi Bilepi Riosi Ranala. Echalítamo ayénachó machiboa mapu Nijeni ketasi biyili olá Nijé Binói chopi niráa, chopi mapurigá Onorúami tamí binérali, echirigani ra'icha. ²⁹ Mapujiti Echi mapu tamí júuli, sinibí tamí yuwa atí. Nijé Onolá ketasi tamí bi'neli ariweli, mapujiti Nijeni sinibí olá mapurigá Binói nakí, mapurigá Binói echijiti wabé kanílama. ³⁰ A'lí mapalí Jesusi echirigá anili, ne wikabé echi jaré Juríosi pagótami galá bichíili Binói niráa.

Echi jaré Riosi kúchuwala, echi auché jaré chati oláami yuwa

³¹ Echali Jesusi jeaneli echi jaré Juríosi mapu galá bichíili Binói niráa: Átamo sinibí niráa galá bichíísagá

mapurigá Nijeni 'yemi mi aneli, echalítamo ne bichíwali tamí yuwa binéami níibotamo. ³² Echalítamo machiboa echi ne bichíwali. A'lí mapalítamo galá machiboa echi ne bichíwali, echalítamo ma ku machí a'wátami niráa níibo, mapurigátamo ma ketasi waminabi nulékowami níibo pióntami niráa.

³³ Echali aboni ku nijéwaga jeaneli: Echi Abrami kúchala kúchuwala chopi juta. Ke wesi, ke siné tamujé tamí nuleli mapurigá pióntami niráa. ¿Churigámi tamujé tamí ané máputa ku machí a'wátami niráa níibo?

³⁴ A'lí Jesusi jeaneli: Ne bichíwali 'yemi nimí ané mapu si'néami mapu ikí chati olako, abóniko waminabi echirigá chati olama, a ketasi ku wikawárami níisagá, achigórigá mapurigá 'wérali ju mapu bilé pioni sinibí ne wabé nochama. ³⁵ A'lí bilé pioni ketasi mapurigá echi kalíwami rijói ranala ju, chopi echi kalíwami rijói ranala sinibí bité echo'ná kalírali mapujiti échiko echo'ná kalírali bitéami rijói ranala ju. ³⁶ A'lí Jesusi waminabi jeaneli: Nijé ne bichíwali bilepi Riosi Ranala ju. A'lí a Nijeni 'yemi mi ku'wírasagá mapurigá ma ketasi 'werali níima mapurigátamo waminabi chati olabo, echalítamo ne bichíwali ketasi waminabi nulérami níibo mapurigá echi riablo piónowala niráa. ³⁷ Nijeni galá machí mapu 'yemi echi ki'yá bitéami Abrami kúchala kúchuwala jútamo, chopi 'yémitamo tamí mi'lináali mapujítamo ketasi bichíili mapurigá Nijé 'yemi nimí aneli. ³⁸ Nijé 'yemi nimí nawésaga ruyé mapurigá Keni Onó tamí 'nérali. A'lí 'yémitamo chopi olá mapurigá 'yemi onolá 'yemi mi aneli.

³⁹ Echali aboni ku nijéwaga jeaneli: Echi ki'yá bitéami Abrami chopi mapurigá tamujé onolá níili. A'lí Jesusi jeaneli: Átamo ne bichíwali mapurigá echi Abrami kúchala kúchuwala níisagá, a'lí bichétamo olabi mapurigá echi Abrami olali. ⁴⁰ A'lí Nijeni chopi 'yemi nimí bichíwaga ruyeli mapurigá Riosi Binói tamí binérali, chopi 'yémitamo arigá tamí mi'lináali. ¡Echi Abrami ke siné echirigá chati olali! ⁴¹ ¡'Yémitamo achigórigá olá mapurigá olá echi 'yemi onolá! Echali aboni jeaneli: ¡Tamujeta bilepi niráa, echi Walubela Riosi chópita oné! Tamujeta ketasi ranarúami níili mapurigá bilé mukí ke kunéami bi'neli asagá raná.

⁴² Echali Jesusi jeaneli: A echi Walubela Riosi ne bichíwali níisagá 'yemi onolá, echali 'yémitamo galá tamí galebi, mapujiti Nijeni chopi nawali jena'í wichimóbachí mapujiti echi Walubela Riosi tamí júuli. Nijeni ketasi olámiya nawali mapurigá Nijé Binói chopi nakili, mapujiti Riosi Binói tamí júuli. ⁴³ ¿Churékulátamo ketasi omero machiyá mapurigá Nijeni 'yemi mi ané? Nijeni mayé máputamo ketasi omero echirigá machiyá mapujítamo ketasi nakí nijéwiya mapurigá Nijeni 'yemi mi nawésaga aneli. ⁴⁴ 'Yémitamo oné echi riablo. A'lí 'yemi chopi echi riablo níwala jútamo, ayénachótamo chopi nakí olánala mapurigá binói nakí. A'lí

echi riablo ne wabé nikówami níili ki'yá chokichí jonsa. A'lí binói ke siné bichíwaga olali, nibilé bichíwaga ra'ícha. A'lí mapalí echi riablo ne wabé 'yékaka ra'ícha, binói chopi echirigá ra'ícha mapujiti binói ne wabé 'yékami ju; ayénachó echi riablo ne chokila ju ne suwaba echi 'yékalawami. ⁴⁵ Chopi mapujiti Nijeni ne bichíwaga ra'ícha 'yémitamo ketasi tamí bichíi. ⁴⁶ Nijeni ke siné chati olali. Echijiti ke wesi 'yemi galá omérama riwíliya mapurigá Nijeni chati oláami ju. A'lí ani ne bichíwaga anísaagá, ¿churékulátamo ke tamí bichíi? ⁴⁷ Ne si'néami mapu ikí Riosi níwala pagótami juko, aboni we galá nakí námanala Riosi Ra'íchala; chopi 'yémitamo ketasi Riosi níwala pagótami ju. Echijiti 'yémitamo ketasi nakí námanala Riosi Ra'íchala.

Echi Walubela Jesucristo arigá sinibí níili mapalí echi ki'yá bitéami Abrami ke cho bitéali

⁴⁸ Echali echi jaré Juríosi pagótami ku nijéwaga jeaneli: Ayénata ne bichíwali anili mapalita anili mapu Mujemi chati oláami ju, mápumi echo'ná Samáriachi bitéami jumi, ayénachó mápumi wabé chati riablo aliwala aliwéami ju.

⁴⁹ Echali Jesusi ku nijéwaga jeaneli: Nijeni ketasi we chati riablo aliwala aliwéami ju. Chópini wabé walubélaga ané echi Nijé Onolá. A'lí 'yémitamo ketasi tamí walubélaga ané, chópitamó wabé sití ra'íchali tamí sayéraga. ⁵⁰ A'lí Nijeni ketasi amí mapurigá echi pagótami tamí chopi walubéraga anema, chopi abilecho ju mapu we amí mapurigá Nijé Binói waminabi walubéraga anérami níima. A'lí Échiko ne bichíwali justicia olama. ⁵¹ Ne bichíwali 'yemi nimí jeané: ¡Si'néami mapu yíripi galá nijéwaga olako mapurigá Nijeni aní, abóniko ke siné suwimea!

⁵² Echali echi jaré Juríosi pagótami jeaneli: ¡Jípita galá machí mápumi we chati riablo aliwala aliwéami jumi! Echi Abrami ma mukuli, ayénachó echi jaré Riosi jiti nawésami ma suwili, chopi mujemi echaní: ¡Mapu yíripi galá nijéwaga olako mapurigá Nijeni aní, abóniko ke siné suwimea! ⁵³ ¿Mujecha waminabi wabé walula ju, ketasi mapurigá echi Abrami echi mapu tamujé onolá niráa niili? A'lí echi Abrami ma mukuli, ayénachó echi jaré o'wéala Riosi jiti nawésami ma suwili. ¿Chigábichémi mayé mujé binói niráa?

⁵⁴ Echali Jesusi ku nijéwaga jeaneli: A Nijeni walubéraga anésagá Nijé Binói niráa, echali ketasi ne bichíwali Walubela níima Nijé; chopi Nijé Onolá ju mapu tamí walubéraga ané. A'lí 'yémitamo aní mapu echi Binói 'yemi Riósawala ju. ⁵⁵ Chopi 'yémitamo ketasi machí Nijé Onolá. A'lí Nijeni galá machí echi Binói, chopi a Nijeni anísagá mapu Nijé ketasi machí echi Binói, echali Nijeni ne wabé ikaléami níima, achigórigá mapurigá 'yemi niráa. A'lí Nijeni ne bichíwali galá machí echi Nijé Onolá, ayénachóni galá nijéwaga olá mapurigá Binói

tamí ané. ⁵⁶ Echi Abrami 'yemi Juríosi pagótami onolá niráa níili. Échiko ne wabé kaníili mapujiti Nijeni nawama riwéali jena'í wichimóbachi. Ki'yá bachánala echi Abrami galá bichíiga, arigá riwali echalí rawé mapalí Nijeni nawama riwéali jena'í wichimóbachi, echijiti binói ne wabé kaníili.

⁵⁷ Echálí echi jaré Juríosi pagótami we yáati ku nijéwaga jeaneli echi Jesusi: Mujé tarapé cho malisa makói bamíbami ju. ¿Churikória jeanimi mapu Mujemi ayena riwali echi ki'yá bitéami Abrami?

⁵⁸ Echálí Jesusi ku nijéwaga jeaneli: Ne bichíwali 'yemi nimí jeané: Chabé ki'yá mapalí echi Abrami ke cho bitéali, ne bachá Nijé a sinibí níili, mapujiti Nijeni sinibí bité.

⁵⁹ Echálí aboni chapili rité mapujiti aboni nakili basi-buka mi'lináliya echi Jesusi, chopi Binói ke ne ikigá waminá nolowili. A'lí mapo'ná aboni jali nasipa simíraga ku machínali echo'ná walubé Juríosi pagótami ri'obáwalachi jonsa.

Jesusi galá ku machíliami niwali bilé rijói mapu ke machíliami níili mapu jonsa ranálati

9 Siné rawé Jesusi echo'ná walúlachi iyénaga simírali echo'ná biléana mapo'ná Binói riwali bilé rijói mapu ke machíliami níili mapalí jonsa ranálati.

² Echálí echi jaré mapu Jesusi binérali we rukueli jeanigá: Binériami, ¿churékula echirigá ke machíliami niráa ranálati je'ná rijói? ¿Acha níiliré mapujiti binói 'wénawala we chati olalí? ¿Acha níili mapujiti binói chati oláiliré omá?

³ Chopi Jesusi ku nijéwaga jeaneli: Ketasi echirigá ikili mapujiti binói 'wénawala chati oláami níili, nibilé cho mapujiti binói chati olaami níili; chopi echirigá ikili mapurigá jena'í wichimóbachi piréami pagótami galá riwíratami níima mapurigá Riosi wabé omérigá olama je'ná rijói yuwa. ⁴ Mapuyénasí abijí rawewa arigá 'wérali ju mapurigá Nijeni olama Binói nóchala olayá mapu tamí júuli jena'í wichimóbachi, mapujiti ke 'me ayó wabé rokowama mapalí ke wesi omérama waminabi nochásiya. ⁵ Chopi mapuyénasí Nijeni abijí atí jena'í wichimóbachi, Nijeni galá machíraga olama jena'í wichimóbachi piréami pagótami.

⁶ Echálí Jesusi ma je'ná jerigá anisáa, ri'lé wi'yérali kachípali. A'lí echi sa'liwá jiti wisogá niwali. Echálí Binói ucheli echi wisogá echo'ná echi ke machíliami rijói busílachi. ⁷ Echálí Jesusi jeaneli echi rijói ke machíliami: We yáati simigá echo'ná wi'lé jótachi Siloechi anilíwachi, mapo'ná juláramichi anilíwami ju. Echálí galá basigomi echo'ná maníami ba'wí jiti. A'lí echi ke machíliami echo'ná simigá galá basigoli. A'lí mapalí ku nawali echo'ná jonsa, binói galá ku machíliami níili.

⁸ Echálí echi auché jaré echo'ná piréami, ayénachó echi jaré mapu chabénala riwali mapu ke machíliami níili,

si'néamika a'nagupi rukueli jeanigá: ¿Kecha je'ná ju echi mapu chabé jonsa wenomí taa asali?

⁹ Echálí jaré jeanili: Ayena, echi ju. Chopi auché jarecho jerigá anili: Ketasi echi ju, chopi echi néchigo yiri ju. Echálí echi rijói binói jeanili: ¡Ayena nijeni ju!

¹⁰ Echálí aboni rukueli jeanigá: ¿Churigami galá ku machíili? ¹¹ Echálí echi rijói mapu ke machíliami níili ku nijéwaga jeaneli: Echi Rijói mapu Jesusi riwéami ju pee taa wisogá, tamí ucheli busuchí. A'lí tamí jeaneli: Simigá echo'ná wi'lé jótachi Siloechi anilíwachi. Galá basigomi echo'ná maníami ba'wí jiti. Echálí nijeni echo'ná simigá basigoli. A'lí bicheni we yáati galá ku machíili.

¹² A'lí aboni rukueli jeanigá: ¿Kumi atí echi rijói? Echálí binói jeaneli: Ketásini machí.

Echi jaré Bariseo anilíwami binériami wabé rukueli echi rijói mapu ma ku machíliami niwálati

¹³ Echálí echi rijói mapu chabénala ke machíliami níili, ma tólati echo'ná bacháami mapo'ná echi jaré o'wéala binériami Bariseo anilíwami muchili. ¹⁴ Chopi mapalí Jesusi wisogá niwasa, galá ku machíliami niwali echi rijói, echálí rawé siné isábawachi rawé níili. ¹⁵ Echijiti echi jaré Bariseo auchecho siné rukueli echi rijói mapu churigá binói ma ku galá machíili. Echálí echi rijói jeaneli: Echi Jesusi tamí wisogá ucheli nijé busílachi. Echálí nijeni galá basigoli. A'lí jípini ma galá ku machíili.

¹⁶ Echálí jaré echi Bariseo anilíwami binériami jeanili: ¡Tamujeta mayé mapu echi rijói mapu echirigá olá ketasi Riosi jiti julárami níili mapujiti binói arigá olá mapalí isábawachi rawé ju! Chopi auché jarecho jeanili: Echi rijói ketásirapé omérama echirigá olayá, a binói wabé chati oláami níisagá, mapujiti ke wesi auché jaré pagótami omero echirigá olayá mapurigá binói olá. Echirigá níili mapu echi pagótami okoná niráa rojuali. Jaré mayeli mapu Jesusi galabé oláami níili, chopi auché jaré mayeli mapu Binói chati oláami níili.

¹⁷ Echálí echi jaré Bariseo auchecho siné jeanigá rukueli echi mapu chabénala ke machíliami níili: Muje, ¿churigami aní echi rijói jiti mapu mí ku machíliami niwali? Echálí echi rijói jeaneli: Nijeni mayé mapu échiko Riosi jiti nawésami ju.

¹⁸ Chopi echi jaré Juríosi pagótami ketasi nakili bichínala mapu echi rijói chabénala ke machíliami níili, chopi mapu ma ku machíliami niwálati. Echálí aboni bayeli echi rijói 'wénawala, echi mapu ma ku machíliami niwálati. ¹⁹ Echálí jeanigá rukuélati: ¿Acha je'ná ju 'yemi ranala, echi mapu 'yémitamo aní mapu ke machíliami ranarúami níili? ¿Churigá galá ku machíili jipi?

²⁰ A'lí echi rijói 'wénawala ku nijéwaga jeaneli: Tamujeta galá machí mapu je'ná ju tamujé ranala, echi mapu ke machíliami ranarúami níili. ²¹ Chópita ketasi

machí churigá binói galá ku machíili jipi. Nirapeta machí chigá ku machíliami niwali. Binói rukuesi jipi. Ma walú ochérami ju. Binói niráa suwaba galá nawisama mapu churigá galá ku machíliami niwálati.

²² Echi rijói 'wénawala wabé majaga echirigá aneli mapujiti echi auché jaré Juríosi pagótami ma galá anili mapu a jaré jeanisáagá mapu echi Jesusi, echi Walubela Cristo anilíwami ju, aboni ma ketasi risénsia níima mapu mo'wimea echo'ná pachá aboni ri'obáwalachi. ²³ Echijiti echi rijói 'wénawala echirigá jeaneli: Binói rukuesi. Ma walú ochérami ju.

²⁴ Echali echi jaré Juríosi auchecho siné bayegá echi rijói mapu chabénala ke machíliami níili, a'lí jeaneli: Ne galá bichíwali tamujé tamí wakiná ku nawisá, mapujiti Riosi mi galá kipú. Tamujeta galá machí mapu echi rijói wabé chati oláami ju.

²⁵ A'lí echi rijói ku nijéwaga jeaneli: Nijeni ketasi machí acha chati oláami ju, siné káachi ketasi chati oláami kéremá; chópini bilé namuti gala machí. ¡Chabeni ke machíliami níili, chopi jípini galá ku machíliami ju!

²⁶ Echali echi jaré Juríosi auchecho siné rukueli jeanigá: ¿Churigá mi olali echi rijói? ¿Churigá mi ku machíliami niwali?

²⁷ Echali echi rijói mapu chabénala ke machíliami níili ma ku nijéwaga jeaneli: Mani 'yemi mi galá aneli, chópitamó ketasi tamí bichíili. ¿Churékulátamo nakí mápuni auchecho siné 'yemi mi ruyema? ¡Siné káachi 'yémitamo ayénachó najátaga binénali Binói yuwa!

²⁸ Echali aboni wabé na'áwaga, chíbirigá aneli jeanigá: Mujé chopi echi rijói yuwa binéami ju. Chopi tamujeta binéami ju mapurigá echi walula Moisesi osali. ²⁹ Tamujeta galá machí mapu Riosi we ra'íchali echi Moisesi yuwa; chopi ketásita machí acha ra'íchali echi Jesusi yuwa. Nirapeta machí kumi jonsa nawali binói.

³⁰ Echali echi rijói ku nijéwaga jeaneli: ¡Je'ná ne wabé bukúfwami ju, mapu 'yémitamo ketasi machí kumi jonsa nawalo echi Jesusi! ¡Chopi echi Jesusi arigá ma tamí ku machíliami niwali! ³¹ Tamujeta galá machí mapu Riosi ketasi nijéwaga olá mapurigá echi jaré chati oláami we taní, mapujiti Riosi chopi ku nijéwaga olá mapurigá taní echi auché jaré mapu ikí waminabi walubéraga anega, chopi olako mapurigá Riosi Binói nakí. ³² ¡Chopi tarapé siné námali mapu auché bilé rijói ku machíliami niwali bilé mapu ke machíliami níili mapu jonsa ranálati! ³³ A'lí a echi Jesusi ketasi Riosi jiti julárami níisagá, tarapé omérami echirigá olayá.

³⁴ Echali aboni jeaneli: ¡Mujemi wabé chati oláami níili mapalí jonsa ranálati, chópimi nakí tamujé tamí binérama! Echali echi jaré o'wéala Juríosi nulali mapurigá echi rijói ma ke siné auché bakimea echo'ná pachá aboni ri'obáwalachi.

Echi jaré pagótami ketasi omérali machiyá Riosi Ra'íchala

³⁵ Echali Jesusi galá machili mapurigá aboni ma nulali mapu echi rijói ke siné auché bakimea echo'ná pachá aboni ri'obáwalachi. A'lí Jesusi auché riwisáa echi rijói, echali jeanigá rukueli: ¿Áchami bichíi bilepi Riosi Ranala niráa?

³⁶ Chopi echi rijói ku nijéwaga jeaneli: Keni Walubélawa, ¿chigá ju echi Bilepi Riosi Ranala, mapurigá nijeni galá bichíima Binói niráa?

³⁷ Echali Jesusi ku nijéwaga jeaneli: Mujemi ma galá riwali echi Bilepi Riosi Ranala. ¡Nijeni ju, mápuni mi yuwa ra'icha!

³⁸ Echali echi rijói we yáati echo'ná bacháami Jesusi yuwa chokoba wilíbaga jeaneli: ¡Keni Walubélawa, ne galá nimí bichíi!

³⁹ Echali Jesusi jeanili: Nijeni nawali jena'í wichimóbachi mapurigani justicia olama, mapurigá echi jaré ke machíliami galá ku machílama, ayénachó mapurigá echi auché jaré mapu mayeko mapu aboni galá machí suwaba namuti, arigá tibima mapurigá ke machíliami niráa.

⁴⁰ A'lí jaré echi Bariseo anilíwami binériami mapu echo'ná Jesusi yuwa muchili, ma je'ná jerigá namsa, echali jeanigá rukueli: ¿Áchami mayé mapu tamujé ayénachó mapurigá ke machíliami niráa ju?

⁴¹ Echali Jesusi ku nijéwaga jeaneli: Átamo ne bichíwali ke machíliami níisagá, echalítamo ketasi wi'nijírami níibi, 'yemi chati olalila jiti. Chopi mapujítamo jeani: Tamujeta ne galá machí, echijiti 'yémitamo abijí wi'nijírami níibo.

Jesusi binera echi jaré bo'wá jiti rugá

10 Ne bichíwali Nijéni 'yemi mi jeané: Echi mapu ketasi bakiko ne yéachi niráa, echo'ná walú kalí, bo'wá kalíilachi, echi mapu echo'ná chakena ripáami 'moka simira bakiko, échiko we chigórami ju, ayénachó chiná 'wísami ju, ² chopi echi mapu echo'ná ne yéachi niráa bakiko, échiko echi galabé bo'wá niséami ju. ³ Echo'ná bo'wá kalila yéachi tibúami galá irapa mapurigá echi galabé bo'wá niséami bakimea. A'lí suwaba ibili niráa echi jaré bo'wá ne galá machí echi galabé bo'wá niséami ra'íchala, ayénachó echi galabé bo'wá niséami ibilipi niráa bayé mapurigá riwéami niráa binói pugula bo'wá. A'lí suwaba machí a'wasá echo'ná bo'wá kalíilachi jonsa. ⁴ A'lí mapalí echi galabé bo'wá niséami ma ku machí a'wasa suwaba binói pugula bo'wá, echali binói bachá inárama echi jaré bo'wá yuwa. A'lí echi bo'wá jubáami galá najata mapujiti suwaba galá machí echi galabé bo'wá niséami ra'íchala. ⁵ Chopi echi bo'wá ketasi najátama auché bilé si'nú niséami mapu aboni ketasi machí, chopi waminá júm-

sama echo'ná binóichi jonsa, mapujiti aboni ketasi machí echi si'nú niséami ra'íchala.

⁶ Echali Jesusi je'ná jerigá irétaga ra'íchali aboni, chopi aboni ketasi machili churigá aniwáami níli mapurigá Binói aneli.

Echi Walubela Jesusi ju echi galabé bo'wá niséami

⁷ Echali Jesusi auchecho siné ra'íchali jeanigá: Ne bichíwali Nijeni 'yemi mi jeané: Nijé ju mapurigá echi yéachi mapo'ná echi bo'wá mo'wimea. ⁸ Si'néami echi auché jaré mapu bachá niráa síliko, Nijé ke cho nawáachi, aboni we chigórami ju, ayénachó chiná 'wísami ju; chopi Nijé pugula bo'wá ketasi nijéwali mapalí aboni bayeli. ⁹ Nijeni ju echi yéachi. Si'néami mapu ikí tamí jiti mo'wiko, abóniko ku'wíratami níima. A'lí aboni mapurigá echi bo'wá níima mapu sinibí a'lí mo'wigá, sinibí rawé ku 'machínaga, we riwimea kasalá.

¹⁰ Echi chigórami chopi chigoka, ko'ogá, suwábamiya nawá; chopi Nijeni nawali mapurigá echi jaré Nijé níwala pagótami ne sinibí pirélama, ayénachó mapurigá aboni ne wabé simírami kaníliga pirélama.

¹¹ Echali Jesusi ayénachó jeanili: Nijé ju echi we galabé bo'wá niséami. Nijeni mukumea mapurigani ku'wírama Nijé pugula bo'wá. ¹² Chopi echi mapu pióntami niráa nóchako, échiko ma riwísáa ináráchi echi nalíwali, we yáati ariwesa echi bo'wá, waminá másimi, mapujiti binói ketasi ne bo'wá niséami ju, ayénachó ketasi ne binói pugula ju echi bo'wá. Echali echi nalíwali jaré chapisáa, suwaba waminá hijana echi auché jaré bo'wá. ¹³ Echi rijói waminá másimi mapujiti binói chopi mapurigá pióntami niráa nóchami ju. Echi-jiti binói tarapé natimá echi bo'wá.

¹⁴ Echali Jesusi waminabi jeaneli: Nijeni ju echi we galabé bo'wá niséami. A'lí mapurigá Nijé Onolá galá tamí machí, ayénachó mapurigá Nijé galá machí Nijé Onolá, echirigá achigórigá Nijé galá machí Nijé pugula bo'wá, ayénachó nijé pugula bo'wá galá tamí machí. A'lí Nijeni ariwema mapurigá echi jaré Nijé asayela tamí mi'limea mapurigani echijiti omérama ku'wíriya Nijé pugula bo'wá. ¹⁶ Ayénachó Nijeni pugué auché jaré isena bo'wá mapu ketasi napawika mo'wíami ju je'ná bo'wá yuwa. Arigá 'wérali ju mapurigá Nijeni ayénachó wakiná 'nolama echi auché jaré isena bo'wá. Aboni galá tamí nijéwama. A'lí ne suwaba Nijé pugula napawika, bilénapi 'yénama tamí yuwa, mapujiti Nijeni bilepi ju echi galabé bo'wá niséami.

¹⁷ Onorúami tamí wabé galé mapujiti Nijeni ariwema mapurigá Nijé asayela tamí mi'limea, mapurigani pe waminánomí auchecho siné ku owínama. ¹⁸ Tarapé wesi aboni wabé omérami ju tamí mi'ayá, chopi Nijé Binói nakimea mapurigá aboni tamí mi'limea, mapurigani echijiti omérama ku'wíriya Nijé pugula bo'wá. Nijé galá

risénsia juni ariwesa mapurigá aboni tamí mi'limea, ayénachóni risensia ju mapurigani ku owínama mapalini ma mi'lirúami níisa. Nijé Onolá echirigá tamí nuleli.

¹⁹ Mapalí echi jaré Juríosi pagótami námali echi Walubela Jesusi je'ná jerigá ra'íchachi, echali aboni auchecho siné okoná niráa rojuali. ²⁰ Echali wikabé aboni jeanili: Echi Jesusi wabé chati riablo aliwala aliwéami ju, ayénachó ke newalite ju. ¿Churékulátamo galá bichíi mapurigá Binói aní?

²¹ Chopi auché jarecho jeanili: Ke bilé wesi omérama echirigá ne galabé niráa ra'icha, a binói wabé chati riablo aliwala aliwéami níisagá. Nibilé wesi chati riablo aliwéami omérama ku machílatiya echi jaré ke 'machíliami.

Echi jaré Juríosi ketasi bichíili Echi Jesusi jiti

²² Echali echo'ná Jerusalémachi walú omowálati mapujiti omowálawachi sébachi níli mapalí echi jaré Juríosi pagótami sinibí bamíbali echirigá oláli mapu jonsa echi ri'obá ne bukulíwami níli. A'lí echali rawé we romó níli. ²³ Echali rawé echi Walubela Jesusi echo'ná walú Juríosi pagótami ri'obáwalachi biléana machímana iyénali mapo'ná echi walula sílami Salomoni riwéami níwalachi anélati. ²⁴ Echali echi jaré Juríosi pagótami echo'ná sisáa ne noligá jábaga jeanigá rukueli: ¿Kilíbuko mujemi tamujé tamí anema mapu chigá mi ju Mujé? ¡Ami ne bichíwali níisagá echi Walubela Cristo anilíwami, ne galá tamujé tamí ané!

²⁵ A'lí Jesusi ku nijéwaga jeaneli: Mani 'yemi mi ne galá aneli, chópitamó ketasi tamí bichíili. A'lí ne suwaba mapurigá Nijeni wabé omériga olá, mapurigá Nijé Onolá tamí risensia 'yali olánala, ne suwaba echi Nijé olalila ne machíami niráa 'nera mapu chigá ju Nijé.

²⁶ Chopi 'yémitamo ketasi bichíi mapujítitamó ketasi Nijé pugula bo'wá niráa ju, mapurigá Nijeni ma 'yemi nimí aneli. ²⁷ Echi jaré Nijé pugula bo'wá ne galá machí Nijé Ra'íchala, ayénachó Nijeni ne galá machí aboni. A'lí aboni galá tamí najata. ²⁸ Nijeni 'ya mapurigá aboni ne sinibí pirélama. A'lí aboni ke siné suwimea. Nirapé wesi tamí 'yésama Nijé sikálachi jonsa. ²⁹ Nijé Onolá tamí 'yali echi jaré Nijé pugula bo'wá. Echi Nijé Onolá ne bachá bi'nélipi Walubela ju si'néami echi auché jaré yuwa. A'lí ke wesi omérama waminá 'yésia echi Nijé Onolá sikálachi jonsa. ³⁰ Echali echi Walubela Jesusi waminabi jeanili: ¡Nijé, echi Onorúami yuwa, mapurigá bilepi niráa juta!

³¹ Echali we yáati echi jaré Juríosi pagótami auchecho siné chapísali rité, mapujiti basibuka mi'lináali echi Walubela Jesusi. ³² Chopi Binói jeaneli: Wisabé Nijeni galabé wabé omériga olali echo'ná bacháami 'yemi yuwa, mapurigá Nijé Onolá tamí 'yali mapurigani ola-

ma. ¿Chu yiri 'nalí echi wikabé galabé oluwáwami jítamo tamí basibuka mi'lináali?

³³ Echali echi jaré Juríosi pagótami ku nijéwaga jeaneli: Echi galabé oluwáwami jiti ketásita mi basibuka mi'liboa, chopi mapujiti Mujemi we chati ra'íchali Riosi sayéraga, mapujítimi pe rijói kemu, arigá aní mápumi Riosi ju. ³⁴ A'lí Jesusi ku nijéwaga jeaneli: Echo'ná 'yemi nulalil a oselíwalachi osirúami ju mapu Riosi jeanili: 'Yémitamo jaré riosi jútamo. ³⁵ A'lí bicheta galá machí mapu Riosi Ra'íchala ne bichíwali ju mapurigá oselichi osirúami ju, echijiti ke wesi pagótami omérama ne bichíwaga aniyá mapu Riosi Ra'íchala ketasi bichíwali ju. A'lí echo'ná Riosi Ra'íchala oselíwalachi osirúami ju mapu Riosi Binói ra'íchaga aneli jaré riosi niráa echi jaré pagótami mapu galá nareli Binói Ra'íchala. ³⁶ A'lí a Riosi tamí chapisáagá mapurigá Binói tamí julama jena'í wichimóbachi, ¿churigátamo galá omero aniyá mapu Nijeni we chati ra'íchali Riosi sayéraga mapujítini anili mapu Nijeni Bilepi Riosi Ranala ju? ³⁷ A'lí a Nijeni ketasi achigórigá olásagá mapurigá Nijé Onolá we olá, echali ketasi tamí bichíisi. ³⁸ Chopi a Nijeni ne bichíwali achigórigá olásagá mapurigá Nijé Onolá we olá, echali galá tamí bichíisi mapujítini echirigá wabé omériga olá, arigátamo ketasi bichíisagá mapurigá Nijeni ra'icha. Echali 'yémitamo sinepi niráa ne galá machiboa mapurigá Onorúami pachana tamí yuwa ju, ayénachó mapurigá Nijeni Onorúami yuwa ju.

³⁹ Echali echi jaré Juríosi pagótami auchecho siné chapináali echi Jesusi mapurigá bologá tomea, chopi Binói ku simili echo'ná jonsa mapurigá aboni ketasi omérama chapiyá.

⁴⁰ A'lí Jesusi ku nawali echo'ná bakochi, Joránachi anilíwachi bo'ónala suwé. A'lí Binói echo'ná tibili mapo'ná echi Juani chabénala pagó iyénari echi jaré pagótami. ⁴¹ Echali rawé auché jaré ne wikabé pagótami echo'ná bakochi sili 'nébiya echi Jesusi. A'lí echi pagótami jeanili: Ne bichíwali echi Juani ketasi bilé namuti wabé omériga olali mapurigá ke wesi auché jaré omero olayá, chopi suwaba ne bichíwali níili mapurigá echi Juani nawésaga anili je'ná Jesusi jiti rugá.

⁴² A'lí wikabé pagótami galá bichíili Jesusi niráa mapalí Binói echo'ná asali.

Echi Lásaro ma mukuli

11 Echo'ná Betániachi anilíwachi bilé rijói we nayú bu'wili, echi mapu Lásaro riwéami níili. Echo'ná ayénachó piréali echi María riwéami mukí, echi binói rijimala Marta riwéami yuwa. ² A'lí echi María najirémami níili echi Lásaro yuwa mapu we nayú bu'wili; ayénachó echi María níili mapu uchema riwéali echi Walubela Jesusi ralálachi echi wabé su'weti júkami aceite jiti, ayénachó binói kupala jiti ku bi'wama ri-

wéali. ³ Echali rawé echi okuá 'muguí najirémami bilé rijói júuli jerigá anénala echi Walubela Jesusi: Tamujé Walubélawala, echi rijói, Mujé amígowala ne wabé nayulú.

⁴ Echali echi Walubela Jesusi ma je'ná jerigá namsa, jeanili: Echi Lásaro ketasi mukúami tibima je'ná nayulí jiti. Échiko chopi wabé nayulú jipi rawé mapurigá péé waminánomí echi jaré pagótami riwíratami níima mapurigá Riosi ne wabé Walubela ju, ayénachó mapurigá je'ná nayulí jiti aboni riwíratami níima mapurigá Nijé Binói ne wabé Walubela ju. Nijeni bilepi Riosi Ranala ju.

⁵ A'lí Jesusi arigá we galeli echi Marta, echi binói Marta binilá ayénachó, echi Lásaro asíchiko. ⁶ Chopi mapalí Jesusi ma anélati mapurigá echi Lásaro echirigá ne wabé nayú bu'wili, echali Jesusi abijí osá rawé tibili echo'ná mapo'ná Binói asali. ⁷ Chopi wakiná waniwí-nala rawé Jesusi auchecho ra'íchali echi jaré mapu Binói binérali. Echali jeaneli: Ma auchecho ku simabo echo'ná Juréachi anilíwachi kawírali.

⁸ Chopi echi jaré mapu Binói binérali jeaneli: ¡Binéria-mi bukúlí echo'ná Juréachi piréami Juríosi pagótami wabé nakili mi basibuka mi'lináliya! ¿Áchami auchecho simináali echo'ná?

⁹ Echali Jesusi ku nijéwaga jeaneli: Ibílipi rawé péé téeripi ju. Echijiti echi pagótami chopi we 'yena mapuyénasí abijí rawé ju, mapurigá aboni ne galá machílagá, ketasi turúpama. ¹⁰ Chopi a rokogó 'yé-nasagá aboni we turúpama mapujiti rokogó niráa ketasi galá machí. ¹¹ Pe wilibeko Jesusi ayénachó jeaneli: Echi Lásaro, tamujé apanérawala ma kochili, chopi Nijeni ku busurébanama.

¹² Echali echi jaré mapu Jesusi binérali jeaneli: Keta Walubélawa, a echi Lásaro ma kochíami níisagá, jípiko galá ku sa'wiméaré.

¹³ Echali Jesusi echirigá aneli mapujiti echi Lásaro ma mukúami níili, chopi echi auché jaré mapu Binói binérali we mayeli mapu Binói ra'íchali kochiwáami niráa. ¹⁴ Echali Jesusi ne galá machíami niráa jeaneli: Echi Lásaro ma mukuli. ¹⁵ A'lí 'yemi jiti weni kaníili mapujiti Nijeni ketasi echo'ná asali, mapurigá jípítamo galá bichíibo; chopi ma simabo echo'ná echi Lásaro yuwa.

¹⁶ Echali echi Tomasi, echi mapu 'marachi anélati, échiko jeaneli echi auché jaré mapu Jesusi binérali: Mata ayénachó simabo, mapurigata ayénachó Binói yuwa waminá suwiboa.

Echi Jesusi ku o'wíntiami ju, Binói nijá echi sinibí pirélawami

¹⁷ Chopi mapalí Jesusi echo'ná nawali, Binói riwali mapu ma naó chí'léami níili mapu jonsa chu'wirólati echi Lásaro. ¹⁸ Echo'ná Betániachi anilíwachi ne mu-

lubé ju echo'ná Jerusalémachi yuwa, mapuyena okuá kilómetro miná nasipa niráa. ¹⁹ A'lí wikabé echi jaré Juríosi pagótami wabé natimaka 'nésiya sili echi Marta, echi María mapujiti ma mukuli aboni rijimala. ²⁰ Chopi mapalí echi Marta galá machili mapu echi Jesusi ma mulubé nawásali, echalí binói natipámiya simili; chopi echi María abijí tibili echo'ná bitichí. ²¹ Echalí echi Marta jeaneli Jesusi: ¡Keni Walubélawa, a mi bukulí jena'í asisáagá, ketasi mukumeli keni rijimá! ²² Chopi nijeni galá machí mapu Riosi mi 'yama ne suwaba mapu ikí Mujemi tánsagá.

²³ Echalí Jesusi jeaneli: ¡Echi mujé rijimala auchecho ku bitélama!

²⁴ A'lí echi Marta jeaneli: Nijeni galá machí mapu binói auchecho ku bitélama echalí ne jubá rawé, mapalí ne si'néami echi jaré suwíami ku 'owínama.

²⁵ Echalí Jesusi jeaneli: Nijeni ku o'wíntiami ju, ayé-nachó Nijeni nijá echi sinibí pirélawami. Si'néami mapu ikí tamí bichíiko arigá ma suwisáagá, auchecho siné ku pirélama. ²⁶ Ayénachó ne si'néami mapu ikí abijí piré mapu galá tamí bichíiko, aboni ke siné suwimea. ¿Áchami bichíi je'ná?

²⁷ Echalí echi Marta jeaneli: ¡Ayena, keni Walubélawa, nijeni galá bichíi mapu Mujé ju echi Cristo anilíwami, mápumi echi bilepi Riosi Ranala ju, mapu ki'yá chokichí jonsa nawama riwéali jena'í wichimóbachí!

Jesusi we nalali mapujiti echi Lásaro ma mukúami níili

²⁸ A'lí echi Marta ma je'ná jerigá anisáa, we yáati ku bitichí simili, echo'ná bayémiya echi binói rijimala, María riwéami. Echalí echi Marta chiná niráa jeaneli: Tamujé tamí Binériami jena'í atí. Binói tamí júuli mi bayénala.

²⁹ Echalí we yáati jerigá namsa echi María we sapú wilísaka simili echi Jesusi 'némiya. ³⁰ Mapujiti echi Jesusi ke cho nawali echo'ná rijówachi chopi Binói abijí tibili echo'ná mapo'ná echi Marta natépalí. ³¹ Echalí echi jaré Juríosi pagótami mapu natimásiya sili echi María, abijí echo'ná tibili echi María kalíachi; chopi mapalí aboni riwali mapurigá echi María echirigá we sapu wilísaka ku machínali, echalí aboni jubá najátali mayega mapu echi María echo'ná chu'wechi simea nalámiya.

³² A'lí mapalí echi María nawali echo'ná mapo'ná Jesusi asali, we yáati riwisáa, bacháami chokoba wiligá jeaneli: ¡Keni Walubélawa, a mi bukulí jena'í asisáagá ketasi mukumeli keni rijimá!

³³ Chopi mapalí Jesusi riwali echi María naláachi, ayé-nachó echi jaré Juríosi pagótami nalákachi, mapu echi María yuwa sili, echalí Binói wabé siwega o'mónali suláchí niráa. ³⁴ Echalí Jesusi jeanigá rukueli: ¿Kúmitamo chu'wirolí? A'lí echi jaré pagótami ku nijéwaga jeaneli:

Walubela, wakiná simigá, galá 'ne mapo'nata chu'wirolí.

³⁵ Echalí Jesusi we nalali. ³⁶ A'lí echi jaré Juríosi jeanili: ¡Nibira, echi Jesusi ne wabé simírami galeli echi Lásaro!

³⁷ Chopi auché jaré aboni jeanili: Je'ná mapu galá ku machíiami niwali echi ke machíiami, ¿kecha o'mérali ku'wíríya echi Lásaro mapurigá ketasi mukumée?

Jesusi ku owíntali echi Lásaro

³⁸ A'lí Jesusi auchecho wabé o'mónali mapalí Binói nawali echo'ná chu'wechi. Echo'ná biléana risochí níili. A'lí echo'ná yéachi bilé walú rité 'yératami níili. ³⁹ A'lí Jesusi jeaneli: ¡Waminá chakena pasi echi walú rité! Chopi echi Marta mapu rijimala níili echi mapu ma mukuli, échiko jeaneli: ¡Walubela, ma we chati júla-maré, mapujiti ma naó chí'leli mapu jonsa mukuli!

⁴⁰ Echalí Jesusi jeaneli: Ma nimí aneli mapu ami galá bichíisagá mujemi riwimea mapu Riosi ne wabé Walubela ju.

⁴¹ Echalí ma chakena pálati echi rité. A'lí Jesusi ripá 'néniga Riosi yuwa ra'íchaga jeaneli: Keni Onó, walú natétara nimi 'ya mapujítimi ma galá tamí kipuli. ⁴² Nijeni galá machí mápumi sinibí tamí kipú, chópini echirigá aní mapurigá jena'í jáwami pagótami ku'wíratami níima, mapurigá aboni bichíiima mapu Mujemi tamí júuli jena'í wichimóbachí.

⁴³ Echalí ma je'ná jerigá anisáa, Jesusi o'weli ra'íchaga jeanili: ¡Lásaro, wakiná machina! ⁴⁴ Echalí we yáati echi mapu mukúami níili ma ku machínali, chopi binói sikálachi abiji chiní jiti bulirúami níili, binói ronólachi ayénachó. A'lí binói mo'ólachi bilé wisibuli jiti bulirúami níili. Echalí Jesusi jeaneli echi auché jaré pagótami: ¡Ma ku botonasi! Ariwesi mapurigá galá ku inama.

Echi jaré Jesusi sayérami a'nagupi galá anili echi Jesusi chapiboya

(Mt. 26:1-5; Mr. 14:1-2; Lk. 22:1-2)

⁴⁵ Echalí wikabé echi jaré Juríosi pagótami mapu echi María yuwa 'yénali, ma galá bichíili Jesusi niráa, mapalí aboni riwali mapurigá Jesusi ku owíntali echi Lásaro.

⁴⁶ Chopi auché jaré echi Juríosi pagótami 'nébiya simíbali echi jaré Bariseo anilíwami binériami. Echalí aboni ruyeli suwaba mapurigá olali Jesusi. ⁴⁷ Echalí echi jaré Bariseo ayénachó echi jaré o'wéala sacerdote bilénapi napawili ne si'néami echi auché jaré o'wéala Juríosi pagótami yuwa. Echalí aboni a'nagupi ra'íchaga jeanili: ¿Churigá bicheta olabo? ¡Echi Jesusi wikabé namuti wabé omériga olá mapurigá ke wesi auché jaré omero olayá! ⁴⁸ Ata wi'libé rawé echirigá ariwésagá, ne si'néami pagótami bichíiima Binói niráa. Echalí, siné káachi, echi jaré o'wéala Romano nolinsa najunama tamujé ri'obáwala; ayénachó aboni ketasi waminabi tamujé tamí nirama mapurigá o'wéala niráa. ⁴⁹ Echalí

bamíbbali bilé rijói Kaijasi riwéami ne walubela sacerdote níili. Echali échiko echo'ná aboni yuwa asagá jeaneli: 'Yémitamo tarapé galá 'nátami ju, ⁵⁰ nirapétamo machí mapu waminabi galá níima tamujé yuwa mapu pe bilé rijói waminá mukumea, echi auché jaré pagótami jiti, mapurigá ne si'neami tamujé Juríosi pagótami ketasi waminá suwábarami níibo.

⁵¹ Echali echi Kaijasi ketasi ne binói niráa 'nátaga echirigá anili, chopi mapurigá binói ne walula Riosi sakerdótawala níili echali bamíbbali, echijiti Riosi Binói echirigá ra'ichárali, mapurigá echi Kaijasi jeanimea mapu echi Walubela Jesusi mukumea riwéali ne si'néami echi jaré Juríosi pagótami jiti. ⁵² Ayénachó mapurigá Binói ketasi mukumea riwéali echi jaré Juríosi pagótami chopi jiti, mapujiti Binói ayénachó mukumea riwéali ne si'néami echi auché jaré isena pagótami jiti, si'néami mapu ikí Riosi kúchuwala níili, mapu chijaga piréali ne suníami jena'í wichimóbbachi, mapurigá ne si'néami echi jaré Riosi kúchuwala bilepi pagótami niráa níima. ⁵³ A'lí echali rawé jonsa echi jaré Juríosi pagótami o'wéalawala wabé 'nátaga ra'ichali mapu churigá chapisáa waminá mi'llirúami níima echi Jesusi.

⁵⁴ Echijiti Jesusi ma ketasi ne machiná iyénali echo'ná echi jaré Juríosi pagótami rijówachi; chopi Binói ku simili echo'ná Juréachi anilíwachi kawírali jonsa, echo'ná biléana walúlachi Eparínachi anilíwachi yénasi mapo'ná mulipi ju echi wabé satibótami kawí. Echali Jesusi echo'ná asali echi jaré mapu Binói binérali yuwa.

⁵⁵ Echali mulubé sébbachi níili echi jaré Juríosi pagótami omáwala mapalí echi kúuchi bo'wá ko'wílati. Echijiti wikabé pagótami ne suníami o'wéalachi piréami muyénsari echo'ná Jerusalémachi simiba. Echali omowálawachi echi pagótami bachá niráa simíbbali mapurigá galá bi'wama aboni niráa, mapurigá echi jaré Juríosi sinibí olali echo'ná walubé aboni ri'obáwalachi.

⁵⁶ Echali echi wikabé pagótami we ali echi Jesusi echo'ná Jerusalémachi. Ayénachó mapalí aboni echo'ná walubé aboni ri'obáwalachi 'yéni, echali a'nagupi ra'ichaga rukueli jeaníga: ¿'Yémiru churigátamo maye? ¿Acha nolínamaré omowámiya echi Jesusi? ¿Ke nolínama keremá!

⁵⁷ Echirigá anili mapujiti echi jaré o'wéala sacerdote, echi jaré Bariseo anilíwami binériami ayénachó, ma nulali mapu a jaré machisáagá maponá echi Jesusi asali, we yáa ku rumea mapurigá aboni bologá chapimea.

Bilé mukí ucheli wabé su'weti júkami aceite echo'ná Jesusi ralálachi

(Mt. 26:6-13; Mr. 14:3-9)

12 Péé bachánala usani rawé niráa, echali omowálawachi rawé sebámiachi mapalí echi kúuchi bo'wá ko'wílati, echali rawé Jesusi simili echo'ná Betániachi mapo'ná echi Lásaro bitéali, echi mapu Je-

susi chabénala ku owíntali mapalí echi Lásaro ma mukúami níili. ² Echali a'lí echo'ná piréami niwali we galabé ko'wáami echi Jesusi kóbbiya, echi auché jaré Binói amígowala ayénachó. Echali echi Marta niwali echi ko'wáami. A'lí echi Lásaro bilé níili mapu Jesusi yuwa ko'yá asali. ³ A'lí echi María mapuyena nasipa litro pali we su'weti júkami aceite mapu wabé natéami níili. Echali echi María echo'ná Jesusi ralálachi uchesa, kepu kupá jiti ku bi'wali. A'lí echo'ná pachá kalírali buchuwí jubali echi we su'weti júkami jiti. ⁴ A'lí echi Júrasí Jiskarioti bilé rijói Simoni riwéami ranala níili. Échiko bilé níili mapu Jesusi binérali, chopi binói ayénachó níili mapu nijima riwéali echi Jesusi mapurigá echi jaré Binói asayela bologá chapimea. Echali rawé echi Júrasí jeanili:

⁵ ¿Churékula ke waminá ralinéalati je'ná wabé su'weti júkami aceite mapuyena bikiyá mili peso natéami niráa, mapurigata galá 'yabo, ku'wírabiya echi jaré wabé tisúwati?

⁶ Chopi echi Júrasí ketasi natimáami níili echi jaré tisúwati. Binói echirigá anili mapujiti ne wabé chigórami níili. A'lí mapujiti binói nulérami níili mapútogá inama echi maleta wenomí muchuwala mapu aboni si'néamika níwala níili, binói chiná niráa, sinibí péé o'yó niráa 'wili echo'ná muchuwásarami. ⁷ Echali Jesusi jeaneli echi Júrasí: ¡Ariwé echi mukí! Ketasi waminabi yoni, mapujiti binói bachá niráa tamí ucheli echi wabé su'weti júkami jiti, mapurigá echi pagótami tamí uchema echali rawé mapalí Nijeni chu'wirótami níima. ⁸ Ne sinibí niráa 'yemi mi yuwa muchima jaré pagótami we tisúwati, chopi Nijeko ketásini 'yémi mi yuwa asimea ne sinibí niráa.

Echi jaré Juríosi pagótami ayénachó mi'lináli echi Lásaro

⁹ Echali wikabé echi jaré Juríosi pagótami machili mapu Jesusi echo'ná Betániachi asali. A'lí aboni echo'ná simíbbali mapurigá aboni galá 'nema echi Jesusi, ayénachó mapurigá aboni galá 'nema echi Lásaro, echi mapu Jesusi ku owíntali mapalí binói ma mukúami níili. ¹⁰ Echali echi jaré o'wéala sacerdote a'nagupi galá anili ayénachó mi'lináliya echi Lásaro. ¹¹ Mapujiti wikabé Juríosi pagótami ma riwisáa echi Lásaro, echali waminá ariwésali echi jaré o'wéala sacerdote mapurigá aboni chopi bichíima echi Jesusi niráa.

Jesusi ku nawali echo'ná Jerusalémachi

(Mt. 21:1-11; Mr. 11:1-11; Lk. 19: 28-40)

¹² Echali wikabé pagótami ma bachá niráa simíbbali echo'ná Jerusalémachi mapujiti omowálawachi sébbachi níili mapalí echi kúuchi bo'wá ko'wílati. A'lí echi pagótami galá machili mapu Jesusi echo'ná walúlachi nawama riwéali ba'alínala rawé. ¹³ Echali echi wikabé pagó-

tami rakú sawala ripúnaga, chapigá simíbali echi Jesusi natipábiya. Echali aboni o'weli ra'íchaga jeanili: ¡Waminabi wabé Walubela nílaga Riosi! ¡Ne wabé galabé ju je'ná Walubela Jesusi mapu Riosi jiti inaro! ¡Wabé galabé ju je'ná Jesusi mapu tamujé Isaeli pagótami silínawala ju!

¹⁴ Echali Jesusi bilé bulito riwisáa, Binói aseli, mapurigá jerigá osirúami ju echo'ná Riosi Ra'íchala oselíwalachi:

¹⁵ Ketasi majasi 'yemi pagótami echo'ná Jerusalémachi piréami.

'Nesi mapurigá 'yemi walubela silínawala bilé bulito asigá inaro.

¹⁶ Echali rawé echi jaré mapu Jesusi binérali ketasi machili chu aniwáami níli mapurigá Jesusi olali, chopi pe wakinana mapalí Binói ne wabé walubératami níli, echali aboni galá ku 'nátaga machili mapu suwaba je'ná jerigá osirúami níli, Binói jiti rugá, echo'ná Riosi Ra'íchala oselíwalachi, ayénachó mapurigá suwaba echirigá olárami níli.

¹⁷ Echali echi jaré pagótami mapu chabénala 'yéneli echi Walubela Jesusi yuwa mapalí Binói echo'ná chu'wechi jonsa bayegá ku owíntali echi Lásaro mapu ma mukúami níli, aboni bachánala ma suwaba galá ku ruyeli echi auché jaré mapurigá aboni riwali echali rawé. ¹⁸ Echijiti echi wikabé pagótami echi Jesusi natipábiya simíbali echali rawé, mapujiti aboni ma galá machili mapurigá Jesusi echirigá wabé omériga olali, mapurigá ke wesi auché jaré omero olayá. ¹⁹ Echali echi jaré Bariseo anilíwami binériami a'nagupi jeanili: Mátamo galá machí máputamo ketasi 'me 'wérali olá echi Jesusi sayérasíya. Jipi galá 'nesi, ¡ne si'néami pagótami Binói yuwa najata!

Jaré Griego anilíwami pagótami we 'néneli echi Jesusi

²⁰ Echali omowálawachi rawé jaré Griego anilíwami rijói ayénachó sili echo'ná Jerusalémachi mapurigá amachima echi jaré wikabé Juríosi pagótami yuwa.

²¹ Echali je'ná pe okuá rijói echo'ná sili mapo'ná echi Jiripi asali, echi mapu echo'ná Becháirachi bitéami níli echo'ná Galiléachi anilíwachi kawírali. A'lí aboni jerigá tániga anili: Jesusi 'nébota.

²² Echali echi Jilipi ku simigá echirigá aneli echi Antresi. A'lí echi Antresi, echi Jilipi yuwa, okuánika napawika simíbali echirigá ruyébiya Jesusi Binói. ²³ Echali Jesusi ku nijéwaga jeaneli: Ma sébali tétali mapalí Nijeni wabé walubératami níima. Nijeni wilárami niili mapurigá Ku'wíriami niráa. ²⁴ Ne bichíwali Nijeni 'yemi mi ané mapu bilé turío rakala ke ichirúami níisagá ri'lé wi'yérali mapurigá echirigá waminá mukumea, echali echi bilepi turío rakala galá nutétami níisagá, sinibí bilepi bi'nélipi níima, chopi ma echo'ná wi'yérali ichirúami níisagá, mapurigá echirigá waminá

mukumea, echali pe waminánomí waminabi wikabé rakema. ²⁵ Echi jaré mapuyíripi chopi nakiko kaníraga piréranala mapurigá aboni waminabi olama mapurigá aboni nakí, aboni pe waminánomí arigá suwimea; chopi echi auché jaré mapuyíripi ketasi chopi nakiko echirigá kanílaga piréranaliko mapurigá aboni nakí, echi jaré mapuyíripi chopi nakiko waminabi piréranaliko jena'í wichimóbachi mapurigá aboni olama mapurigá Nijeni nakí, abóniko ne bichíwali sinibí pirélama Riosi yuwa. ²⁶ A jaré tamí ku'wíranalasagá galá níima abóniko sinibí tamí yuwa najátasa. A'lí mapo'ná Nijeni asimea, echo'ná ayénachó muchima echi jaré tamí ku'wíriami. A'lí a jaré tamí ku'wíranalasagá, aboni o'wéalatami níima keni Onó jiti.

Jesusi bachá niráa aní mapurigá Binói mi'lirúami níima

²⁷ Jípini ne wikabé karúmati jiti ne wabé siwega 'nátani. A'lí ¿churigani animea? ¿Áchani jeanimea: Keni Onó tamí ku'wiro mapurigani ketasi risúu olárami níima? Chopi ami je'ná jiti tamí jurásagá jena'í wichimobachi, ²⁸ echali keni Onó, chopi olá mapurigá Mujé Binói waminabi wabé walubéraga anérami níima. Echali aboni námali mapalí Riosi Binói ripá riwigachi atíami ra'íchaga jeanili: Mani wabé walubérali Nijé Binói niráa, chópini auchecho siné waminabi wabé walubérama.

²⁹ Echali echi jaré pagótami mapu echo'ná námiya jali, we yáati jeanili: ¡Wepi ri'óami níli! Auché jaré jeanili: Bilé walubela Riosi kapitánawala, Binói yuwa ra'íchaliré.

³⁰ Echali Jesusi jeaneli: Riosi ketasi echirigá ra'íchali mapurigá Nijé bi'neli námama, chopi Binói echirigá ra'íchali mapurigá 'yemi galá námabo. ³¹ Jipi jena'í wichimóbachi piréami ma wi'nijírami níima, ayénachó echi mapu walula nuláami ju jena'í wichimóbachi ma waminá machí pátami níima. ³² A'lí mapalí Nijeni ri'lé wichi jonsa, ripá kúrsichi uchárami níisa, echali Nijeni napabuma jaré ibili pagótami mapu iki piré ne suníami jena'í wichimóbachi, mapurigá aboni tamí yuwa níima.

³³ Echali Jesusi je'ná jerigá anigá, bachá niráa machírali mapu churigá Binói mi'lirúami níima riwéali.

³⁴ Chopi echi pagótami ku nijéwaga jeaneli: Tamujeta wisabé námali 'nékowachi mapurigá osirúami ju Riosi Nulalila, mapu echi Cristo anilíwami ne sinibí niráa bitélama, chopi Mujemi aní mapu Riosi mi wilali mapurigá Ku'wíriami niráa, ayénachó mápumi ripá kúrsichi uchárami níima. ¿Chigami ju Mujé?

³⁵ Echali Jesusi ku nijéwaga jeaneli: Abijí pe téeli niráa Nijeni 'yemi mi yuwa asimea, mapurigani 'yemi mi galá machíraga olama. Echijiti kanílaga 'yensi mapuyénasí Nijeni abijí 'yemi mi echirigá machíraga olá, mapurigátamo ketasi rokowárali niráa 'yéna, mapujiti

si'néami mapu ikí rokowárali niráa 'yénako, ketasi machí kumi 'nalí simama. ³⁶ Galá tamí bichíisi mapuyé-nasí Nijeni abijí 'yemi mi echirigá machíraga olá, mapurigátamo Nijé pagótamawala niráa níibo, ne galá machíratami niráa.

Echalí ma je'ná jerigá anisáa, Jesusi chiná niráa ku simili mapurigá aboni ketasi waminabi riwimea.

Echi jaré Juríosi pagótami ketasi omérali bichiya Jesusi niráa, mapujiti aboni rokowárali niráa 'yénali

³⁷ Echali echi pagótami wisabé riwali Jesusi echirigá wabé omériga oláachi mapurigá ke wesi auché jaré omero olayá, chopi aboni arigá ketasi bichíili Binói niráa. ³⁸ Mapujiti echirigá arigá ikimea riwéali mapurigá osali echi walula Riosi jiti nawésami Isaíasi riwéami, mapurigá jerigá osirúami ju echo'ná Riosi Ra'íchala oselíwalachi:

Walubela, ¿chigá galá bichíili mapurigata nawésali?
¿Chigá 'nalí galá riwíratami níili echi Walubela Riosi jiti, mapu Binói Riosi ne suwaba omérami ju?

³⁹ Echirigá níili mapu aboni ketasi omérali bichiya, mapujiti echi Isaíasi ayénachó jerigá osali:

⁴⁰ Riosi ke machírali aboni busila.
Ayénachó Binói waminá biwachébanali aboni sulálachi,
mapurigá aboni ma ketasi 'ninama aboni busila jiti, ayénachó mapurigá aboni ketasi machimea suláchi niráa,
ayénachó mapurigá aboni ma ketasi ku ro'wima echi Walubela Riosi yuwa,
mapurigá Binói galá ku wikawama aboni.

⁴¹ Echi walula Isaíasi je'ná jerigá anili mapujiti binói bachá niráa riwali mapurigá Jesucristo wabé walubératami níima waminánomí, echijiti echi Isaíasi echirigá ra'íchali echi Walubela Jesucristo jiti rugá.

⁴² Echali wikabé echi jaré Juríosi pagótami arigá galá bichíili Jesusi niráa. Jaré aboni o'wéalawala ayénachó bichíili chopi aboni ketasi machiná niráa anili mapu aboni echirigá bichíili, mapujiti aboni we majali mapurigá echi jaré Bariseo anilíwami binériami echirigá machisáa ma ketasi risénsia nijima riwéali mapurigá aboni waminabi mo'wimea echo'ná echi jaré Juríosi pagótami ri'obáwalachi. ⁴³ Echi jaré o'wéala echirigá olali mapujiti aboni ne wabé nakili mapurigá echi auché jaré pagótami anema aboni waminabi wabé o'wéala niráa, chopi aboni ketasi 'me nakili mapurigá Riosi Binói anema aboni ne wabé o'wéala niráa.

Echi jaré pagótami ne wabé wi'nijílami níima mapalí aboni ketasi bichíi Jesucristo Ra'íchala

⁴⁴ Echali Jesusi o'weli ra'íchaga jeanili: Si'néami mapu ikí tamí bichíiko, abóniko ketasi tamí bi'nélipi niráa bichíi, chopi aboni ayénachó galá bichíi Riosi Onorúa-

mi mapu tamí júuli jena'í wichimóbachi. ⁴⁵ Si'néami mapu ikí tamí ritiwako, aboni ayénachó galá ritiwá Onorúami mapu tamí júuli jena'í wichimóbachi. ⁴⁶ Nijeni mápuni galá machíraga olá echi jaré pagótami, mani nawali jena'í wichimóbachi mapurigá echi jaré mapu ikí tamí bichíiko ma ketasi tibima mapurigá ke machíami niráa. ⁴⁷ A'lí a jaré galá námsagá mapurigá Nijeni ra'icha, chopi a ketasi galá nijiyásagá, Nijeni ketasi ju mápuni wi'nijima aboni, mapujiti Nijeni ketasi wi'nijímiya nawali jena'í wichimóbachi piréami pagótami, chópini nawali mapuriganí galá ku wikawama aboni. ⁴⁸ Si'néami mapu ikí tamí kichiga, ketasi nijéwaga olako mapurigá Nijeni ra'íchali, aboni arigá ma wi'nijírami ju. A'lí aboni kastigo 'yárami níima echali ne jubá rawé, mapujiti aboni ketasi nijéwaga olali mapurigá Nijeni ra'íchali. ⁴⁹ Mapujiti Nijeni ketasi ra'icha mapurigá Nijé Binói chopi nakí. Echi Nijé Onolá mapu tamí júuli jena'í wichimóbachi, Binói tamí binérali mapu churiganí animea, ayénachó mapu churiganí binérama echi pagótami. ⁵⁰ A'lí bicheni galá machí mapu Nijé Onolá tamí nuleli echirigá binéranala echi pagótami, mapurigá aboni ne sinibí niráa pirélama. A'lí mapurigá Nijeni ra'icha, echiriganí chopi ra'icha mapurigá Onorúami tamí nuleli binéranala.

Jesusi galá pabákali echi jaré mapu Binói binérali ralálachi

13 Echali rawé níili mapalí ba'alínala sebama riwéali echi jaré Juríosi pagótami omáwala, mapalí aboni ko'yali echi kúuchi bo'wá. A'lí Jesusi galá machili mapu ma mulubé sebásali tétali mapalí Binói ma simea riwéali jena'í wichimóbachi jonsa, mapurigá Binói ku simea Onorúami yuwa. Binói Jesusi sinibí ne wabé galeli echi jaré Binói níwala jena'í wichimóbachi muchúami chopi echali rawé Jesusi machírali aboni, mapurigá Binói ne wabé simírami galéami níili.

² Echali echi riablo ma 'natárali echi Júrsi Jiskariote mapurigá binói nijima echi Jesusi mapurigá echi jaré Binói asayela ma mi'limea. A'lí echi Júrsi, echi Simoni Jiskariote riwéami rijói ranala níili. ³ Echali Jesusi galá machili mapu Binói nawali jena'í wichimóbachi, mapujiti Riosi Binói nawali. Ayénachó Jesusi galá machili mapurigá Binói auchecho ku simea riwéali Riosi yuwa. Ayénachó Binói galá machili mapurigá Onorúami ma wilali Binói ne bachá wilíami Walubela niráa. ⁴ Echali a'lí mapalí aboni ko'yá muchili, echi Walubela Jesusi ku wilísaga waminá 'yeli bilé wi'lí napacha móbala chukúami. A'lí chapisáa bilé chiní bí'walíwami galá buleli echo'ná Binói umílachi. ⁵ Echali Binói ro'wali ba'wí echo'ná biléana walú bitólachi. A'lí Binói chótali pabákiya echi jaré mapu Binói binérali ralálachi. Echali Binói ku wakichébanali echi chiní jiti mapu Binói umílachi buleli.

⁶ Chopi mapalí Jesusi ma pabákama riwéali echi Simoni Pegro ralálachi, echalí échiko jeanigá rukueli: Walubela, ¿Mujéchami pabákama tamí ralálachi?

⁷ Echalí Jesusi ku nijéwaga jeaneli: Jipi mujemi tarapé machí mapu churékula Nijeni je'ná jerigá olá, chópimi galá machimea pe waminánomí.

⁸ Echalí echi Pegro jeaneli: ¡Nijeni ke siné nimí nakíma mápumi tamí pabákama nijé ralálachi! Chopi Jesusi ku nijéwaga jeaneli: A Nijeni ketasi mi pabákasagá, mujemi ma ketasi omérama tamí yuwa níliya.

⁹ Echalí echi Simoni Pegro we yáati jeaneli: Keni Walubélawa, ketasi chopi pabaki nijé ralálachi. ¡Ayénachó pabaki nijé sikálachi, nijé mo'ólachi!

¹⁰ Echalí Jesusi jeaneli: Mapalí jaré pagótami bukulí 'úbalikó, echalí chopi 'wérali ju mapu aboni waminá pabákama aboni ralálachi, mapujiti aboni ma galá bi'wiami ju. A'lí 'yemi ma galá bi'wiami ju, chopi ketasi ne si'néami.

¹¹ Echalí Jesusi echirigá anili mapu ketasi, ne si'néami bi'wiami níili, mapujiti Binói galá machili mapu chigá 'nalí aboni waminá nijima riwéali Binói, mapurigá echi jaré Binói asayela waminá mi'limea.

¹² Pe wilibeko mapalí Jesusi ma sunili pabákiya si'néami aboni ralálachi, echalí Binói auchecho ku napachasa, auchecho asíbalí echo'ná mapo'ná aboni ko'yá muchili. Echalí Binói jeaneli: ¿Áchatamo galá machí mapurigá Nijeni 'yemi mi olali? ¹³ 'Yémitamo sinibí tamí jeané: ¡Binériami! Ayénachótamo tamí jeané: ¡Walubela! A'lí ne galá ju máputamo echirigá tamí anebo, mapujiti Nijeni ne bichíwali 'yemi mi Binériami ju, ayénachóni 'yemi Walubélawala ju. ¹⁴ A'lí Nijeni mápuni 'yemi mi Binériami ju, ayénachó mápuni 'yemi Walubélawala ju, Nijeni ma 'yemi mi pabákali 'yemi ralálachi. Echijiti galá níima 'yemi aboni ayénachó a'nagupi niráa pabákasa 'yemi aboni ralálachi.

¹⁵ Mapujiti Nijeni bachá niráa echirigá olali mapurigá 'yémitamo ayénachó achigórigá olabo mapurigá Nijeni olali. ¹⁶ Ne bichíwali Nijeni 'yemi mi ané mapu ke wesi pióntami ne wabé o'wéala ju, chopi echi nuráami mapu galá nulé echi jaré pióntami, échiko waminabi wabé simírami walubela ju, ketasi mapurigá echi jaré pióntami. ¹⁷ Átamo galá machisáagá je'ná jeyiri namuti, we kaníliami níibotamo, átamo ayénachó echirigá olásagá.

¹⁸ Nijeni ketasi echirigá anili ne si'néami 'yemi jiti rugá. Nijeni galá machí mapu chigá ju echi jaré mapu Nijeni chapili. Chopi arigá 'wérali ju mapu je'ná jerigá ikimea, mapurigá echo'ná Riosi Ra'íchala oselíwalachi osirúami ju jeanigá: Echi mapu tamí yuwa ko'wako, échiko wabé tamí sayérali. ¹⁹ Nijeni 'yemi mi echirigá ané ne bachá niráa, ke cho echirigá ikíichi, mapurigá pe waminánomí mapalí ne bichíwali echirigá ikimea, echalítamo ne galá bichíibo mapu Nijeni bilepi Riosi Ranala ju. ²⁰ Echalí Jesusi waminabi jeaneli: Ne

bichíwali Nijeni 'yemi mi jeané: Si'néami mapu ikí galá narigako echi mapu Nijeni julama aboni yuwa, aboni ne bichíwali tamí narigá; ayénachó si'néami mapu ikí tamí narigako, abóniko ayénachó narigá Onorúami mapu tamí júuli jena'í wichimóbachi.

Jesusi bachá niráa anili mapu echi Júراسي níili mapu nijima riwéali Binói Jesusi mapurigá Binói waminá mi'lirúami níima

(Mt. 26:20-25; Mr. 14:17-21; Lk. 22:21-23)

²¹ Ma je'ná jerigá anisáa, Jesusi we siwega o'mónali sulachí niráa. Echalí Binói ne machíami niráa jeaneli: Ne bichíwali Nijeni 'yemi mi ané mapu bilé 'yemi tamí nijima mapurigá echi jaré Nijé sayela tamí mi'limea.

²² Echalí si'néami echi jaré mapu Jesusi binérali chótali a'nagupi 'nena mapujiti aboni ketasi machili mapu chigá jiti rugá ra'íchali echi Jesusi. ²³ Echalí bilé rijói mapu Jesusi binérali, mulubé niráa Binói yuwa ko'yá asali, echi mapu Jesusi wabé galeli. ²⁴ Echalí echi Simoni Pegro kepu siká jiti galá riwírataga ruyeli mapurigá echi rijói galá rukuema Jesusi mapu chigá 'nalí rugá anili.

²⁵ A'lí echi rijói mulubé áami chukúbaga mapo'ná Jesusi asali, echalí rukueli jeanigá: Walubela, ¿chigá ju echi?

²⁶ Echalí Jesusi ku nijéwaga jeaneli: Pe táa pani pagueka, Nijé 'yama echi mapu tamí nijima mapuriganí mi'lirúami níima. A'lí ma pagueka echi pani, we yáati 'yali echi Júراسي Jiskariote, echi mapu Simoni Jiskariote ranala níili. ²⁷ A'lí mapalí echi Júراسي ma chapili echi pani, echalí jonsa binói chopi nulérami níili pachana binói sulálachi niráa, echi Satanasi anilíwami riablo jiti. Echalí Jesusi jeaneli echi Júراسي: ¡We yáati olá mapurigami olama!

²⁸ Chopi echi jaré echo'ná ko'yá muchúami ke wesi galá machili mapu churékula Jesusi echirigá aneli.

²⁹ Chopi mapujiti echi Júراسي nulérami níili togá inánala aboni níwala wenomí muchuwala maleta, echijiti jaré ibili mayeli mapu Jesusi echirigá aneli mapujiti Binói nakili mapurigá echi Júراسي simea ralimeya karúmati mapu ikí aboni newaleli echalí omowálawachi, mapurigá binói 'yama jaré wenomí echi jaré tisúwati kéremá. ³⁰ Chopi mapalí echi Júراسي ma ko'wali echi pani, echalí we yáati binói ma ku machínali echo'ná pachá jonsa, chopi ma wi'libeka rokogó níili.

Echi bukulíwami nulalíwami

³¹ Echalí ma machinsa echi Júراسي, echi Walubela Jesusi jeanili: Jipi jena'í wichimóbachi piréami pagótami ma galá riwíratami ju mapurigá Nijeni ne wabé Walubela ju. Nijeni wilárami níili mapurigá Ku'wíriami niráa; ayénachó Nijeni galá riwílata echi pagótami mapurigá Riosi Onorúami ne wabé Walubela ju. ³² A'lí a Nijeni riwírasagá echi pagótami mapurigá Riosi Onorúami ne wabé Walubela ju, echalí Riosi Onorúami

galá riwírama echi pagótami mapu Nijeni wabé Walubela ju. A'lí Riosi ke 'me ayó echirigá olama. Nijeni wilárami níli mapurigá Ku'wíriami niráa. ³³ 'Yémitamo mapurigá Nijé kúchuwala niráa ju, chopi Nijeni ma ketasi wi'libé rawé asimea 'yemi yuwa. Pe waminánomí 'yémitamo tamí abo, chopi mapurigá Nijeni ma aneli echi jaré Juríosi pagótami, jipi Nijeni ayénachó 'yemi mi echirigá ané, máputamo ketasi omérabo simiba echo'ná mapo'ná Nijeni simea. ³⁴ Bukulíwami niráa Nijeni 'yemi mi jerigá nulé: Máputamo a'nagupi niráa wabé galebo. Achigórigá mapurigá Nijeni 'yemi mi wabé galé, echirigá galesi 'yemi a'nagupi. ³⁵ Jena'í wichimóbachí piréami pagótami galá machimea mapu Nijeni 'yemi mi binérali, átamo echirigá a'nagupi galésagá.

Jesusi bachá niráa aní mapu echi Pegro 'yékaka animea mapu binói ketasi machili echi Jesusi
(Mt. 26:31-35; Mr. 14:27-31; Lk. 22:31-34)

³⁶ Echali echi Simoni Pegro jeanigá rukueli: Keni Walubélawa, ¿kumi mi simea? A'lí Jesusi ku nijéwaga jeaneli: Jipi mujemi ketasi omérama tamí najátaga simiyá echo'ná mapo'ná Nijeni simea, chopi pe waminánomí mujemi ayénachó echo'ná simea.

³⁷ Echali echi Pegro jeaneli: Keni Walubélawa, ¿churékola nijeni ke omérama jipi mi najata? ¿Nijeni ma karigá atí mapurigani mukumea mi jiti!

³⁸ Echali Jesusi ku nijéwaga jeaneli: ¿Áchami ne bichíwali karigá atí mapurigami tamí jiti mukumea? Ne bichíwali Nijeni mi ané mapu jipi rokogó, ke cho kusúwachi echi tolí, mujemi baisá chokéami 'yékaka animea mápumi ketasi tamí machí.

Echi Walubela Jesucristo ju echi Buwé, echo'ná ripá riwigachi burúami

14 Echali Jesusi jeaneli echi jaré mapu Binói binérali: Ketasi siwesi kétamo sulachí. Galá bichíisi Riosi. Tamí ayénachó galá bichíisi. ² Echo'ná keni Onó bitélachi wikabé kalí nirú. A ketasi echirigá nísagá, Nijeni ma 'yemi mi echirigá anemi, mapujiti Nijeni echo'ná simea, 'yemi pirélachi a'láramiya. ³ A'lí mapalí Nijeni ma bachá a'láramiya simisáa 'yemi pirélachi, waminánomí Nijeni auchocho siné ku nolínama mapurigá Nijeni 'yemi mi echo'ná bayérama, mapurigá 'yémitamo ayena echo'ná muchibo mapo'ná Nijeni asimea. ⁴ A'lí 'yémitamo galá machí mapo'ná Nijeni simea, ayénachótamo galá machí echo'ná burúami.

⁵ Echali echi Tomasi jeaneli: Walubela, tamujeta ketasi machí kumi mi simea. ¿Churigata biche machiboa echo'ná burúami?

⁶ Echali Jesusi ku nijéwaga jeaneli: Nijeni ju echi buwé echo'ná ripá riwigachi burúami, ayénachó Nijeni ju echi ne bichíwali, ayénachó Nijeni nijá mapurigá echi

pagótami sinibí pirélama. A'lí a ketasi tamí jiti simisáagá, ke wesi omérama echo'ná nawayá mapo'ná Onorúami atí. ⁷ Átamo tamí machisáagá, ayénachótamo machibói echi keni Onó. A'lí jipi jonsa 'yémitamo galá machí echi keni Onó, mapujítamo ma tamí riwáli.

⁸ Echali echi Jiripi jeaneli: ¿Perikó risensia, tamujeta galá 'nebo Onorúami! Alíkota galá nilabo.

⁹ A'lí Jesusi jeaneli echi Jilipi: Mani wi'libé rawé asali 'yemi mi yuwa. ¿Kéchami cho tamí galá machí? ¿Echi mapu tamí ritiwako, échiko ma ritiwá Onorúami! ¿Churékola echaní mujé: Perikó risensia, tamujeta 'nebo Onorúami? ¹⁰ ¿Kéchami bichíi mapu Nijé echi Onorúami yuwa ju, ayénachó mapu Onorúami tamí yuwa ju? Echirigá mapurigá Nijé 'yemi mi ra'icha, ketásini echirigá ra'icha, Nijé Binói chopi niráa. Echi Onorúami mapu tamí yuwa pachana Nijé sulálachi atí, Binói wabé omériga olá mapurigá Binói nakí. ¹¹ Galá tamí bichíisi mapurigani anili mapu Nijeni echi Onorúami yuwa ju, ayénachó mapu Onorúami tamí yuwa pachana Nijé sulálachi atí. A'lí átamo ketasi galá tamí bichíisagá echi Nijé ra'íchala jiti mapurigá Nijeni ra'íchali, arigá tamí bichíisi mapujiti Nijeni ma wisabé wabé omériga olali mapurigá ke wesi auché jaré omero olayá. ¹² Ne bichíwali Nijeni 'yemi mi jeané: Si'néami mapu ikí tamí bichíiko, abóniko achigórigá wabé omériga olama mapurigá Nijeni olá; ayénachó aboni waminabi simírami wabé omériga olama mapujiti Nijeni simea echo'ná mapo'ná Onorúami atí. ¹³ A'lí ne suwaba mapu yíripi 'yémitamo tánsagá Onorúami, mapujítamo galá tamí bichíi, echirigá Nijeni olama mapurigá echirigá ologá Nijeni riwírama mapu Riosi Onorúami ne wabé Walubela ju. ¹⁴ Mapuyiripi 'yémitamo tánsagá Riosi mapujítamo galá tamí bichíi, echirigani olama Nijé.

Jesusi bichíwaga anili mapu Binói julama echi Wabé Galabé Riosi Iwigala jena'í wichimóbachí

¹⁵ Átamo tamí galésagá, galá nijéwaga olasi mapurigá Nijeni 'yemi mi nuleli. ¹⁶ A'lí Nijeni we tánama Onorúami mapurigá Binói 'yemi mi yuwa julama auché Bilé wabé galéami Nigúurami, mapurigá échiko sinibí 'yemi mi yuwa asimea. Échiko echi Wabé Galabé Riosi Iwigala niima, mapu ne bichíwami ju. ¹⁷ Echi auché jaré jena'í wichimóbachí piréami ketasi omérama nalea echi Galabé Riosi Iwigala, mapujiti aboni ketasi oméro 'néniya, nirapé omero machiyá echi Galabé Riosi Iwigala; chopi 'yémitamo ma galá machí Riosi Iwigala mapujiti Binói 'yemi yuwa atí, a'lí Binói sinibí 'yemi yuwa tibima echo'ná pachana 'yemi sulálachi niráa. ¹⁸ Nijé ketasi 'yemi mi awínali waná ariwema. Auchocho sineni ku nolínama mapurigani 'yemi mi yuwa asimea. ¹⁹ Pe waminánomí echi auché jaré jena'í

wichimóbachi piréami pagótami ma ketasi tamí ri-wimea, chopi 'yémitamo galá tamí riwiboa. A'lí 'yémitamo sinibí pirélabo mapujiti Nijeni sinibí bitéami ju.

²⁰ Echali rawé 'yémitamo galá machiboa mapu Nijé, echi keni Onó yuwa ju, ayénachótamo machiboa mapu 'yemi aboni tamí yuwa jútamo, ayénachótamo machiboa mapu Nijeni 'yemi mi yuwa pachana 'yemi sulálachi atí. ²¹ Si'néami mapu ikí ma galá machigá mapurigá Nijeni nulá, a'lí echirigá galá nijéwaga olako, abóniko echirigá ologá ne galá riwírata echi auché jaré mapu aboni ne bichíwali tamí galé. A'lí Keni Onó we galema echi jaré mapu tamí galeko, ayénachó Nijé Binói we galema aboni. A'lí Nijeni echo'ná aboni yuwa nawama mapurigá aboni galá tamí riwimea.

²² Echali echi auché bilé Júresi, ketasi echi Jiskarioti, jeaneli: Walubela, çchurékola tamujé tamí yuwa nawama mapurigá tamujeta mi riwiboa, chópimi ketasi nawama echi auché jaré yuwa, si'néami mapu ikí ketasi mi galeko?

²³ A'lí Jesusi ku nijéwaga jeaneli: Si'néami mapu ikí tamí galeko, aboni galá nijéwaga olá mapurigá Nijé aní. A'lí echi keni Onó wabé galema aboni. A'lí echi keni Onó, Nijeni ayénachó, okuaka nolínaga echo'ná pachana aboni sulálachi pirélabo. ²⁴ Si'néami mapu ikí ketasi tamí galeko, abóni ketasi nijéwaga olá mapurigá Nijé aní. A'lí Nijé nawésawala, mapurigátamo jipi galá nama muchuwi, ketasi Nijé Binói nawésawala ju, chopi Onorúami nawésawala ju mapu tamí júuli jena'í wichimóbachi.

²⁵ Jipi Nijeni 'yemi mi suwaba je'ná jerigá ané mapuyénasí Nijeni abijí 'yemi mi yuwa atí. ²⁶ Chopi pe waminánomí Onorúami tamí jiti julama echi Wabé Galabé Riosi Iwigala echo'ná pachana 'yemi sulálachi, mapurigá echi Galabé Riosi Iwigala 'yemi mi wabé natimaga ku'wírama. Echali Riosi Iwigala 'yemi mi binérama suwaba namuti; ayénachó Binói 'yemi mi auchecho galá ku machíratama mapu ikítamo ke newalali mapurigá Nijeni 'yemi mi aneli.

²⁷ Mani 'yemi mi ripórama, chopi Nijeni 'yemi mi 'ya máputamo kilí niráa ologá pirélabo. A'lí Nijeni ketasi achigórigá nijá, mapurigá echi auché jaré jena'í wichimóbachi piréami 'yemi mi kanílatanali. Ketasi siwesi ketamo suláchí, nirapé majasi. ²⁸ 'Yemi mátamo námali mapurigá Nijeni 'yemi mi aneli, mapu Nijeni ma ku simea, ayénachó mapu pe waminánomí Nijeni auchecho siné ku nolínama jena'í mapo'ná 'yemi muchuwi. Átamo ne bichíwali tamí galésagá 'yémitamo ne wabé kanílabo, ma machigá mapu Nijeni simea Onorúami yuwa, mapujiti echi Onorúami ne wabé simírami Walubela ju, ketasi mapurigá Nijé. ²⁹ Jipi ke cho echirigá ikíichi, Nijeni bachá niráa 'yemi mi aneli mapurigá pe waminánomí ne bichíwali echirigá ikimea, mapurigá echali ma echirigá ikíichi, 'yémitamo galá tamí bichíibo.

³⁰ Ma ketásini waminabi wi'lí ra'ichama 'yemi mi yuwa, mapujiti echi riablo, mapu we nulé jena'í wichimóbachi piréami pagótami, ma mulubé inaro. Chopi Nijeni waminabi wabé simírami omérami ju. Echi Riablo ketasi tamí omérama. ³¹ Chopi arigá 'wérali ju mapu echirigá ikimea, mapurigá jena'í wichimóbachi piréami pagótami galá machimea mapu Nijeni we galé Onorúami, ayénachó mapurigá aboni galá machimea mapu Nijé we olá mapurigá Onorúami tamí nuleli olánala. Ma jáasi. Mata simabo jena'í jonsa.

Echi uva anilíwami rakéami namuti

15 Echali Jesusi jeaneli: Nijeni ju echi ne bichíwali uva anilíwami rakéami namuti. A'lí echi Nijé Onorá mapurigá bilé rijói ju echi uva icháami. ² A'lí echi keni Onó waminá ripuna ne suwaba echi jaré Nijé níwala uva otowala mapu ikí ketasi galá rakeko. Chopi mapalí echi auché jaré otowala galá rakeko, echi keni Onó waminá 'ye echi jaré wikabé napawika jáwami kúuchi otowala mapurigá ibili galá rakéami otowala echirigá jaré ibili 'yeka galabélatami níima, mapurigá suwaba echi jaré galabé otowala waminabi wikabé rakema. ³ 'Yémitamo ma galabélatami ju mapurigá echi jaré otowá mapu Nijé Onolá jaré ibili 'yeka galabérali, mapujítamo echirigá galabélatami níili Nijé Ra'íchala jiti mapalí Nijeni 'yemi mi binérali. ⁴ Sinibí tamí yuwa napawika níisi, mapurigá Nijeni sinibí 'yemi mi yuwa napawika ju. Bilé otowá ketasi omérama rakéa bi'neli otowá niráa, a ketasi napawika níisagá echi ronola yuwa. Echirigá achigórigá 'yémitamo ketasi oméramo galabé olayá, átamo ketasi sinibí tamí yuwa napawika níisagá.

⁵ Nijeni ju echi uva anilíwami ronola. A'lí 'yémitamo echi jaré otowala ju. Si'néami 'yémi máputamo sinibí tamí yuwa napawika tibiko mapurigá echi jaré otowala napawika nachuka tibí echi uva ronola yuwa, 'yémitamo ne wabé galabé oláami níibo. A'lí 'yémitamo ketásirapé chirigá oméramo galabé olayá a ketásitamo tamí yuwa níisagá. ⁶ A'lí echi auché jaré mapu ketasi napawika tibiko tamí yuwa, abóniko waminá machí a'wátami níima. Echali échiko waminá suwibama mapurigá echi jaré otowala ripunárami, mapu ma napabuka suwaba na'árami níima.

⁷ Átamo sinibí tamí yuwa napawika níisagá, ayénachó átamo sinibí galá 'natásagá mapurigá Nijeni 'yemi mi binérali, echali tansi mapuyíripi 'yémitamo nakí, a'lí bichétamo echirigá 'yárami níibo. ⁸ Echi keni Onó waminabi wabé Walubela anérami níima mapalí 'yémitamo we galabé olá, ayénachótamo echirigá ologá galá machílatabo echi auché jaré mapu 'yémitamo ne bichíwali tamí yuwa binéami ju. ⁹ Nijeni 'yemi mi ne wabé galé achigórigá mapurigá Onorúami tamí wabé galé. Sinibí tamí yuwa níisi, mapujiti Nijeni 'yemi mi

echirigá wabé galé. ¹⁰ Átamo nijiyásagá mapurigá Nijeni nulá, echalí Nijeni waminabi 'yemi mi galema mapurigani sinibí 'yemi mi galé, achigórigá mapurigá Nijeni sinibí nijéwaga olá mapurigá Keni Onó tamí nulé, a'lí keni Onó sinibí waminabi tamí galé.

¹¹ Nijeni 'yemi mi je'ná jerigá ané mapurigátamo wabé kanílabo tamí yuwa, ayénachó mapurigátamo echirigá waminabi ne wabé simírami kanílabo. ¹² Nijeni 'yemi mi je'ná jerigá nulé: Mapurigátamo a'nagupi ne wabé galebo, achigórigá mapurigá Nijé 'yemi mi galé. ¹³ Ke wesi waminabi wabé simírami galéami ju ketasi mapurigá bilé rijói mapu ku'wíraga mukuli mapujiti binói wabé galeli binói amígowala. ¹⁴ 'Yémitamo Nijé amígowala ju, átamo galá nijéwaga olásagá mapurigá Nijeni 'yemi mi nulé. ¹⁵ Mani ketasi 'yemi mi anema pióntami niráa, mapujiti echi jaré pióntami ketasi galá machí mapurigá aboni walúrawala olá. Chopi Nijeni 'yemi mi anema Nijé amígowala niráa mapujiti Nijeni ma 'yemi mi machírali ne suwaba mapu ikí Nijé Onolá tamí aneli. ¹⁶ 'Yémitamo ketasi tamí chapili, chopi Nijeni 'yemi mi bachá chapili; ayénachó Nijeni 'yemi mi jáwali mapurigátamo simíbaga, wabé galabé olabo, achigórigá mapurigá echi jaré otowala ne galabé niráa raké. A'lí Nijeni nakí mapu 'yémitamo chopi olabo mapurigá Riosi 'yemi mi nulé, mapujiti echiyiri oluwáwami ketasi waminá suwábarami níima. A'lí átamo echirigá olásagá, echi keni Onó 'yemi mi 'yama ne suwaba mapu ikítamo tani, mapujítitamo galá tamí bichíi. ¹⁷ Je'ná ju mapurigá Nijeni 'yemi mi nulé: Mapurigátamo a'nagupi ne wabé galebo.

Jena'í wichimóbachí piréami ne wabé kichí echi Jesusi

¹⁸ A'lí a 'yemi mi kichísagá jena'í wichimóbachí piréami, galá machísí mapu bachá niráa aboni tamí wabé kichili. ¹⁹ Chopi a 'yémitamo achigórigá olásagá mapurigá echi auché jaré jena'í wichimóbachí piréami olá, echalí aboni 'yemi mi wabé galemi, mapujiti aboni ne wabé galé si'néami mapu ikí achigórigá olá mapurigá aboni olá. Nijeni ma 'yemi mi chapili ibili niráa mapalítamo piréali echi auché jaré jena'í wichimóbachí piréami yuwa, echijiti echi auché jaré jena'í wichimóbachí piréami 'yemi mi ne wabé kichí, mapujítitamo ketasi achigórigá olá mapurigá aboni olá. ²⁰ Galá newalasi mapurigá Nijeni 'yemi mi jeaneli: Ke wesi pióntami ne wabé o'wéala ju, chopi echi nuláami mapu galá nulé echi jaré pióntami, échiko waminabi wabé walubela ju ketasi mapurigá echi jaré pióntami. A'lí mapujiti aboni ma tamí wabé kichiga a'najátali, echijiti aboni ayénachó 'yemi mi wabé kichiga a'najátama. A'lí mapujiti aboni ketasi tamí nijéwali mapurigá Nijeni binérali, echijiti aboni ketasi cho 'yemi mi nijéwama mapurigá 'yémitamo binéramo. ²¹ A'lí aboni 'yemi mi suwaba je'ná jerigá risúu olama mapujítitamo galá tamí bichíi, ma-

pujiti aboni ketasi machí echi Onorúami mapu tamí júuli jena'í wichimóbachí.

²² A'lí a Nijeni ketasi nawásagá jena'í wichimóbachí ra'íchamiya aboni, echalí aboni ketasi chokila níima mapurigá aboni ma chati olali; chopi jipi aboni arigá chokila ju, mapurigá aboni chati olali. ²³ A'lí si'néami mapu ikí tamí kichíko, aboni ayénachó we kichí echi keni Onó. ²⁴ Ayénachó a Nijeni ketasi wisabé wabé omériga olásagá echo'ná bacháami aboni yuwa mapurigá ke wesi auché jaré omero olayá, echalí aboni ketasi wi'nijírami níimi mapurigá aboni chati olali, chopi aboni ma riwali mapurigá Nijeni olali. A'lí aboni arigá tamí wabé kichí, ayénachó aboni wabé kichí echi Nijé Onolá. ²⁵ Chopi jipi echirigá ikí mapujiti arigá 'wérali níili mapu echirigá ikimea, achigórigá mapurigá bachá niráa je'ná jerigá osirúami níili echo'ná aboni nulalila oselíwalachi, jeanigá: Tarapé chibi yiri jiti, aboni wabé tamí kichili.

²⁶ Chopi mapalí nolinsa echi ne bichíwami Galabé Riosi Iwigala, echi mapu 'yemi mi wabé ku'wíraga nati-mama, Échiko 'yemi mi ra'íchama tamí jiti rugá. A'lí Nijeni 'yemi mi yuwa julama echi Galabé Riosi Iwigala mapujiti Onorúami echirigá tamí nuleli. ²⁷ Echalí 'yémitamo ayénachó tamí jiti rugá nawisabo, mapujiti 'yémitamo chabé chokichí jonsa tamí yuwa muchili.

16 Jipi Nijeni 'yemi mi je'ná jerigá ané mapurigátamo ketásirapé siwega 'natabo echalí echirigá ikíichi, chopi mapurigátamo arigá waminabi galá tamí bichíi. ² Echalí echi jaré Nijé sayela ketasi risénsia 'yama mapurigá 'yémitamo waminabi mo'wiboa echo'ná pachá aboni ri'obáwalachi; ayénachó pe waminánomí mapuyíripi aboni 'yemi mi waminá ko'wisáagá, we mayema mapu aboni chopi olá mapurigá Riosi nakí, mapalí aboni 'yemi mi ko'yá. ³ Echalí aboni echirigá olama mapujiti aboni ke siné machili Onorúami, nirapé tamí machili. ⁴ Chopi Nijeni 'yemi mi je'ná jerigá ané mapurigá mapalí seba echalí rawé 'yémitamo galá 'nátaga newalabo mapurigá Nijeni ma 'yemi mi bachá niráa aneli suwaba je'ná jeyiri.

Mapurigá echi Galabé Riosi Iwigala we olá

Chabé chokichí Nijeni ketasi 'yemi mi je'ná jerigá aneli mapujiti Nijeni 'yemi yuwa asali. ⁵ Chopi Nijeni ma ku simea mapurigani Onorúami yuwa asimea, mapu tamí júuli jena'í wichimóbachí. A'lí ke wesi 'yemi tamí rukué mapu kúmini simea. ⁶ Chopi 'yémitamo ne wabé o'mónali mapujiti Nijeni 'yemi mi je'ná jerigá aneli. ⁷ Nijeni 'yemi mi ne bichíwali jeané: A Nijeni ku simisáagá, waminabi wabé galabé níima 'yemi 'nalina. Mapujiti a Nijeni ketasi ku simisáagá, echalí ketasi nolí-nama echo'ná 'yemi yuwa echi Wabé Galabé Riosi Iwigala, echi mapu 'yemi mi wabé ku'wíraga natimama; chopi a Nijeni ku simisáagá, echalí Nijeni julama

echi wabé Galabé Riosi Iwigala echo'ná 'yemi yuwa. ⁸ A'lí mapalí echi Galabé Riosi Iwigala nawasa, échiko we galá machílatama echi jaré pagótami jena'í wichimóbachi piréami mapu aboni we chati oláami ju; ayénachó machílatama mapurigá Riosi nakí mápu aboni chopi galabé wachíniga ologá pirélama, ayénachó machílatama mapu Riosi pe waminánomí walú kastigo 'yama echi jaré chati oláami pagótami. ⁹ Aboni wabé chati oláami ju mapujiti aboni ketasi tamí bichíí. ¹⁰ A'lí aboni galá machimea mapurigá Nijeni galabé wachíniga ologá bité, mapujiti Nijeni ma ku simea mapo'ná Onorúami atí. A'lí 'yémitamo ma ketasi tamí auchecho riwiboa. ¹¹ A'lí aboni galá machimea mapu Riosi walú kastigo 'yama echi jaré chati oláami pagótami mapujiti echi riablo mapu we nulé jena'í wichimóbachi piréami, ma ne bichíwali wi'nijírami ju.

¹² Nijeni abijí waminabi wikabé namuti 'yemi mi ané-nali, chopi jípitamo 'yemi ketasi omérabo machiyá.

¹³ Pe waminánomí mapalí nolinsa echi ne bichíwali Wabé Galabé Riosi Iwigala, Échiko 'yemi mi binérama suwaba echi ne bichíwali, mapujiti Échiko ketasi ra'ichama mapurigá binói chopi nakí. Echi Wabé Galabé Riosi Iwigala chopi ra'ichama mapurigá Binói gala nami aníachi Onorúami, ayénachó Binói 'yemi mi galá machílatama suwaba mapu ikí ikimea waminánomí.

¹⁴ Echi Galabé Riosi Iwigala tamí waminabi walubéraga anema, mapujiti Binói ma tosá Nijé níwala namuti, 'yemi mi machílatama. ¹⁵ Ne suwaba namuti mapu ikí Onorúami níwala ju, échiko ne suwaba ayénachó Nijé níwala ju. Echijiti Nijeni anili mapu echi Galabé Riosi Iwigala ma tosá Nijé níwala namuti, 'yemi mi galá machílatama.

Echi jaré mapu o'mónami ju pe waminánomí we kanílatami níima

¹⁶ Echali Jesús waminabi jeaneli: Pe ke 'me ayó 'yémitamo ma ketasi tamí riwiboa, chópitamó auchecho ke 'me ayó yáati tamí riwibóatamo, mapujiti Nijeni echo'ná simea mapo'ná Onorúami atí.

¹⁷ Echali jaré mapu Jesús binérali a'nagupi rukueli jeanigá: ¿Chu aniwáami ju je'ná mapurigá Binói tamujé tamí ané? Mapujiti jeaní mapu pe ke 'me ayó tamujeta ma ketasi riwiboa echi Binói, ayénachó máputa auchecho ke 'me ayó yáati ku riwibóata, mapujiti Binói echo'ná simea mapo'ná Onorúami atí. ¹⁸ ¿Chu aniwáami ju je'ná mapu Binói jeaní mapu ke 'me ayó tamujeta ma ketasi riwiboa Binói? Tamujeta ketasi machí mapu piri jiti Binói echirigá ra'icha.

¹⁹ Echali echi Walubela Jesús galá machili mapu aboni echirigá rukuénali. Echijiti Binói jeaneli: Nijeni 'yemi mi aneli mapu pe ke 'me ayó 'yémitamo ma ketasi tamí riwiboa, chopi máputamo auchecho ke 'me ayó, yáati tamí riwiboa. ¿Áchatamo je'ná jiti a'nagupi

ra'íchaga rukué? ²⁰ Nijeni ne bichíwali 'yemi mi ané mapu 'yémitamo wabé nalákaka o'monabo, chopi echi auché jaré jena'í wichimóbachi piréami pagótami ne wabé kanílama. A'lí mapalí 'yémitamo echirigá o'monabo, pe waminánomí 'yémitamo auchecho wabé ku kanílatami níibo. ²¹ Echali Jesús waminabi jeaneli: Mapalí biré mukí ranamea bilé taa binói ranala, echali echi mukí ne wabé okolá mapujiti ma sébali binói tétawala, chopi ma nawárasa echi taa múchali echali echi mukí ma ketasi ku newalá mapurigá ne wabé okoli, chopi ne wabé kanílama mapujiti ma ranali binói ranala jena'í wichimóbachi. ²² 'Yémitamo ayénachó echirigá achigórigá ne wabé risúu níilaga o'mona jipi, chopi Nijeni auchecho siné 'yemi mi ku riwimea. Echali 'yemi ne wabé simírami kanílabotamo pachana 'yemi sulálachi niráa, mapuyénasi ke wesi omérama 'yee echi wabé kanílawami.

²³ Echali rawé 'yemi ma ketasi biyiri tamí rukuébotamo. Ne bichíwali Nijeni 'yemi mi jeané mapu Onorúami 'yemi mi 'yama ne suwaba mapu ikítamo taní mapujítitamo tamí bichíí. ²⁴ Chopi jipi yénasi 'yémitamo ketasi cho biyiri echirigá tánali Onorúami mapujítitamo tamí bichíí. Jipi jonsa galá tansi echirigá, mapujítitamo ma galá tamí bichíí. A'lí bichétamo echirigá narepo, mapurigátamo ne wabé simírami kanílabo.

Jesucristo ketasi nijéwaga olali mapurigá jena'í wichimóbachi piréami olá, echijiti Binói ma niyúrali

²⁵ Echali Jesús waminabi jeaneli: Nijeni 'yemi mi je'ná jerigá irétaga nawésali, chopi pe waminánomí Nijeni ma ketasi 'yemi mi echirigá irétaga nawésama. Echali Nijeni 'yemi mi ne galá machíami niráa ruyema Onorúami jiti rugá. ²⁶ Echali rawé 'yemi abónitamo we tánabo Onorúami mapujítitamo waminabi galá tamí bichííbo. Echijiti jipi Nijeni ketasi 'yemi mi ané mapu Nijé Binói waminabi tánama Onorúami 'yemi jiti.

²⁷ Onorúami Binói 'yemi mi wabé galé, mapujiti 'yémitamo tamí galé, ayénachó mapujítitamo ma galá bichíili mapu Nijeni nawali echo'ná ripá riwigachi jonsa mapujiti Onorúami tamí júuli. ²⁸ Mapalí Nijeni nawali jena'í wichimóbachi, Nijeni simili echo'ná ripá riwigachi jonsa, mapo'ná Onorúami atí. Jipi Nijeni ma ku simea jena'í wichimóbachi jonsa mapurigani auchecho ku simea mapo'ná Onorúami atí.

²⁹ Echali echi jaré mapu Jesús binérali jeaneli: Jipi Mujemi ne bichíwali galá machíami niráa ra'icha. Mami ketasi chopi irétaga niráa ra'icha. ³⁰ Jípita ne galá machí mapu Mujemi galá machíami ju ne suwaba namuti, ayénachóta galá machí mapu ketasi arigá 'wérali ju máputa mi rukuebo bilé namuti, mapujítimi ma bachá niráa galá machí mapurigá tamujeta mi rukuénali. Echijítita ma galá bichíí mápumi simili echo'ná

ripá riwigachi jonsa mapo'ná Onorúami atí, mapalimi nawali jena'í wichimóbachi.

³¹ Echalí Jesusi rukueli jeanigá: ¿Áchatamo ne bichíwali echirigá bichíi jipi? ³² Jipi ma ke 'me ayó pe waminánomí 'yémitamo waminá chijanárami níibo. Echalí 'yémitamo ibili niráa a'nagú waná júmsaga, tamí bi'neli ariwebo; chopi Nijeni ketasi bi'neli atí, mapujiti Onorúami sinibí tamí yuwa atí. ³³ Nijeni 'yemi mi ané suwaba je'ná jeyiri mapurigátamo galá tamí bichíiga, sinibí kilí ologá pirélabo; chopi mapuyénasítamo abijí pilé jena'í wichimóbachi 'yémitamo wabé risúu olárami níibo. Echalí arigá waminabi galá tamí bichíisi mapujiti Nijeni ma niyúrali, mapujiti Nijeni ketasi nijéwaga olali mapurigá jena'í wichimóbachi piréami olá.

Jesusi tániga ra'icha Riosi yuwa echi jaré mapu Binói binérali jiti

17 Ma bachá niráa je'ná jerigá anisáa, echalí Jesusi ripá riwigachi 'néniga, Riosi yuwa ra'íchaga jeaneli: Keni Onó ma sébali tétali. Nijeni bilepi Mujé Ranala ju. Jipi ma tamí wabé Walubéraga ané, mapurigá Nijeni ayénachó mi ne wabé Walubéraga anema, mapu Nijeni bilepi Mujé Ranala ju! ² Mapujiti Mujemi tamí wilali mapurigá Walubela niráa, si'néami echi auché jaré pagótami Walubélawala, mapujiti Nijeni bilepi Mujé Ranala ju. A'lí bichemi echirigá tamí wilali mapurigani 'yama mapurigá ne sinibí niráa pirélama si'néami echi jaré mapu ikí Mujemi tamí 'yali. ³ A'lí aboni ne sinibí pirélama mapujiti aboni galá mi machí mápumi echi Bilepi ne Bichíwali Riosi ju, ayénachó mapujiti aboni galá tamí machí mápumi Jesucristo ju, mapu Mujemi tamí júuli jena'í wichimóbachi.

⁴ Echalí Jesusi, Riosi yuwa ra'íchaga, waminabi jeaneli: Mapuyénasí Nijeni iyénali jena'í wichimóbachi, Nijeni mi wisabé Walubéraga niráa aneli. Ayénachóni ma suwaba galá nijéwaga olali mapu ikí Mujemi tamí nuleli olánala. ⁵ Keni Onó, jipi auchecho tamí wilá echo'ná Mujé yuwa mapurigá Walubela niráa, achigórigá mapurigani Walubela níili Mujé yuwa ki'yá bachá jonsa, mapalí je'ná kawí ketasi cho niwárami níili.

⁶ Mujemi ma chapili jaré jena'í wichimóbachi piréami pagótami, mapurigami tamí 'yama mapurigá Nijé níwala pagótami niráa. A'lí mani ruyeli aboni mapu Mujemi echi ne Walubela Riosi ju. Abóniko Mujé níwala níili, chopi Mujemi tamí 'yali. A'lí aboni galá nijéwaga olali mapurigá Nijeni nawésali Mujé Ra'íchala. ⁷ Jipi aboni ma galá machí mapu suwaba namuti mápumi tamí 'yali, ne suwaba echo'ná ripá riwigachi jonsa sili mapo'ná Mujemi atí. ⁸ Mapujiti Nijeni ma galá nawésali aboni, achigórigá mapurigá Mujemi tamí 'yali nawésanala. A'lí aboni ma galá bichíili mapurigá Nijeni nawésali; ayénachó aboni galá machili mapu Nijeni ne

bichíwali nawali echo'ná ripá riwigachi jonsa mapo'ná Mujemi atí, ayénachó aboni ma galá bichíili mapu Mujemi tamí júuli jena'í wichimóbachi.

⁹ Nijeni mi tani mapurigami ku'wírama aboni. Ketásini mi tani mapurigá mi ku'wírama echi auché jaré jena'í wichimóbachi piréami. Nijeni mi chopi tani mapurigami ku'wírama echi jaré mapu Mujemi tamí 'yali, mapujiti aboni Mujé níwala ju. ¹⁰ Ne suwaba Nijé níwala ayénachó Mujé níwala ju. A'lí Mujé níwala ayénachó Nijé níwala ju. A'lí echi jaré Nijé níwala pagótami o'wéalatami ju mapujiti Nijeni ne Walubela ju.

¹¹ Nijeni ma ketasi tibí jena'í wichimóbachi. Chopi aboni abijí jena'í tibí. A'lí Nijeni ma ku simea mapurigani Mujé yuwa asimea. Mujé wabé Galabé keni Onó, ne suwaba omérami jumi. Ne galá niseri si'néami echi jaré mapu Mujemi tamí 'yali, mapurigá si'néami aboni bilénapi napawika bichíyami níima, achigórigá mapurigá Nijeni napawika ju Mujé yuwa. ¹² Mapuyénasí Nijeni asali aboni yuwa jena'í wichimóbachi, Nijé sinibí ne galá tibútaga niseli echi jaré mapu Mujemi tamí 'yali, mapujiti Mujemi tamí echirigá omératali. Ke wesi aboni waminá 'wigali, chopi echi bilé mapu ma bachá niráa wikáami níili. Échiko arigá wikali, achigórigá mapurigá bachá niráa osirúami níili echo'ná Riosi Ra'íchala oselíwalachi mapu echirigá ikimea.

¹³ Jipi Nijé ma simea echo'ná mapo'ná Mujemi atí. Chopi mapuyénasí Nijeni abijí jena'í wichimóbachi atí, Nijeni je'ná jerigá aní mapurigá aboni ne wabé simírami kanílama, achigórigá mapurigá Nijé ne wabé kaníla. ¹⁴ Nijeni galá nawésali aboni Mujé Ra'íchala. Chopi echi auché jaré jena'í wichimóbachi piréami ne wabé kichí echi jaré aboni, mapujiti aboni ketasi chopi jena'í wichimóbachi piréami ju, achigórigá mapurigá Nijeni ketasi jena'í wichimóbachi bitéami ju. ¹⁵ Nijeni ketasi mi tani mapurigami ma ku tomea echi jaré aboni jena'í wichimóbachi jonsa, chopi nimí tani mapurigami tibú-tama aboni mapurigá echi riablo ketasi omérama sayera aboni. ¹⁶ Achigórigá mapurigá Nijeni ketasi jena'í wichimóbachi bitéami ju, echi jaré aboni ketasi cho jena'í wichimóbachi piréami ju. ¹⁷ Ne wabé galabé niráa niwá aboni, mapurigá Mujé níwala pagótami niráa, mapujiti aboni galá bichíi echi ne bichíwali. Mujé Ra'íchala echi ne Bichíwali ju. ¹⁸ Mujemi tamí júuli jena'í wichimóbachi, mapurigani asimea jena'í wichimóbachi piréami yuwa. Nijeni ayénachó echirigá achigórigá júuli echi jaré aboni, mapurigá aboni muchima echi auché jaré jena'í wichimóbachi piréami yuwa. ¹⁹ Mapujiti Nijeni we galé aboni, echijiti Nijeni waminabi galabé niráa nílini Nijé Binói niráa, mapurigá aboni ayénachó waminabi galabé niwárami níima, mapujiti aboni galá bichíima echi ne bichíwali.

²⁰ Nijé ketasi chopi mi tani mapurigami ku'wírama je'ná jaré mapu ikí Mujé níwala ju jipi rawé. Nijé ayénachó tani mapurigami ku'wírama echi auché jaré,

si'néami mapu ikí waminánomí galá tamí bichíima, mapalí aboni galá kipuma mapurigá je'ná jaré nawésama. ²¹ Nijeni mi tani mapurigá ne si'néami aboni bilénapi napawika bichíiyami níima, mapurigá si'néami aboni chopi napawika níima Tamujé yuwa, Mujé Galabé Onorúami, achigórigá mapurigá Mujemi pachana tamí yuwa atí, ayénachó mapurigá Nijeni pachana Mujé yuwa atí. Ayénachóni nakí mapurigá aboni bilénapi napawika bichíiyami níima mapurigá echi auché jaré jena'í wichimóbachi piréami galá bichíima mapu Mujemi tamí júuli jena'í wichimóbachi. ²² A'lí Nijeni 'yali aboni mapurigá aboni o'wéalatami níima, achigórigá mapurigá Mujemi tamí 'yali mapu Nijé wabé Walubératami níima, mapurigá si'néami aboni bilénapi napawika bichíiyami níima achigórigá mapurigá Nijeni Mujé yuwa chopi napawika juta. ²³ Nijeni pachana aboni yuwa atí. A'lí Mujemi pachana Nijé yuwa atí, mapurigá si'néami aboni napawika ayénachó bilepi niráa níima, mapurigá echi auché jaré jena'í wichimóbachi piréami echijiti ne galá machimea mapu Mujemi tamí júuli jena'í wichimóbachi, ayénachó mapurigá Mujemi ne wabé galé echi jaré napawika bichíiyami, achigórigá mapurigami tamí galé.

²⁴ Keni Onó, Mujemi tamí 'yali echi jaré aboni. Nijeni wabé nakí mapurigá aboni echo'ná tamí yuwa muchi-ma, mapo'ná Nijeni asimea, mapurigá aboni galá ri-wimea mapurigá Mujemi tamí wabé walubérali, mapujiti Mujemi sinibí tamí wabé galeli kiyá jonsa mapalí je'ná kawí ketasi cho niwárami níili. ²⁵ Mujé galabé oláami Onorúami, jena'í wichimóbachi piréami pagótami ketasi mi machí, chopi Nijeni mi ne galá machí. A'lí je'ná jaré bichíiyami ma galá machí mapu Mujemi tamí júuli jena'í wichimóbachi. ²⁶ Nijeni galá machírali aboni mapu Mujemi echi Bilepi Riosi ju. A'lí abijí Nijeni waminabi echirigá machíratama, mapurigá aboni a'nagupi ne wabé galema, achigórigá mapurigá Mujemi tamí galeli, ayénachó mapurigá Nijé Binói pachana aboni sulálachi asiméani.

Jesusi bologá tólati

(Mt. 26:47-56; Mr. 14:43-50; Lk. 22:47-53)

18 Ma je'ná jerigá anisáa, echalí Jesusi ku machínali echo'ná pachá jonsa, waminá bo'ónala komichi Setrónachi anilíwachi simiyá. Echo'ná wikabé namuti rojuá olivo anilíwami jali. Echalí Jesusi echo'ná nasipa simili echi auché jaré yuwa mapu Binói binérali. ² A'lí echi Júراسi mapu nijímiya nawali echi Jesusi mapurigá Binói waminá mi'lirúami níima, échiko ayénachó ma bachá ra'éami níili echo'ná, mapujiti chabénala niráa Jesusi wisabé echo'ná napawili echi jaré yuwa mapu Binói binérali. ³ Echirigá níili mapu echi Júراسi ayénachó echo'ná nawali, wikabé sontarsi yuwa, jaré kapitani yuwa ayénachó, mapu echo'ná walubé Juríosi ri'obáwalachi tibúami níili. Si'néami aboni echo'ná

julárami níili echi jaré o'wéala sacerdote jiti, ayena echi jaré Bariseo anilíwami binériami jiti. Aboni i'wéali ripiyá kami níili, ayénachó chopé rajégami níili, auché jaré karúmati ayénachó. ⁴ Echalí Jesusi ma galá machigá suwaba mapurigá ikimea riwéali Binói, bachá natipámiya simigá jeanigá rukueli: ¿Chigátamo amí?

⁵ A'lí aboni ku nijéwaga jeaneli: Echi Jesúsita amí, echo'ná Nasarétachi bitéami. Echalí Jesusi Binói ku nijéwaga jeaneli: Nijé ju.

A'lí echi Júراسi mapu echirigá nijiga olali, mapurigá Jesusi waminá mi'lirúami níima, echiko ayénachó echo'ná wi'lili echi jaré sontarsi yuwa. ⁶ Chopi mapalí Jesusi jeaneli: ¡Nijé ju! Echalí si'néami echi jaré sontarsi we yáati ri'ná bitíbbali. ⁷ Echalí Jesusi auchecho siné jeanigá rukueli: ¿Chigá bichétamo amiko? A'lí aboni auchecho nijéwaga jeaneli: Echi Jesúsita amí, echo'ná Nasarétachi bitéami.

⁸ A'lí Jesusi ku nijéwaga jeaneli: Mani 'yemi mi aneli mapu Nijé ju. ¡Átamo tamí ásagá, ariwesi mapurigá je'ná jaré waminá ku simama!

⁹ Echalí je'ná jerigá ikili mapurigá ne sébali ikimea mapurigá Jesusi Binói bachá niráa jeaneli: Echi jaré mapu Onorúami tamí 'yali, ke wesi 'wigali. ¹⁰ A'lí echi Simoni Pegro wi'lí ripiyá kami níili. Echalí échiko machí paka echi wi'lí ripiyá, wamina ripúnali bilé rijói, Malko riwéami, nakálachi watoná. Échiko echi walubela sacerdote piónawala níili. ¹¹ Chopi Jesusi jeaneli echi Pegro: ¡Echo'ná wichibáchalachi ku wilá echi wi'lí ripiyá! ¿Kéchami mayé mapu arigá 'wérali ju mapu Nijeni risúu olárami níima, achigórigá mapurigá Onorúami bachá niráa nulali mapurigani echirigá olárami níima?

Jesusi pálati echo'ná bacháami echi ne walubela sacerdote yuwa

(Mt. 26:57-58; Mr. 14:53-54; Lk. 22:54)

¹² Echalí echi jaré wikabé sontarsi, aboni walúlawala yuwa, echi jaré Juríosi kapitánawala asíchiko, si'néami-ka chapigá buleli echi Jesusi. ¹³ Echalí Jesusi we yáati tólati echo'ná bilé rijói sacerdote Anasi riwéami bitélachi. A'lí echi Anasi auché bilé rijói, Kaijasi riwéami, si'alá níili. A'lí echalí bamíbbali echi Kaijasi ne walubela sacerdote níili. ¹⁴ Ayénachó echi Kaijasi níili mapu chabénala aneli echi jaré Juríosi mapu waminabi galá níimako mapu pe bilé rijói waminá mukumea si'néami aboni Juríosi pagótami jiti.

Echi Pegro we 'yékaka aní mapu binói ketasi machili echi Jesusi

(Mt. 26:69-70; Mr. 14:66-68; Lk. 22:55-57)

¹⁵ Echalí echi Simoni Pegro, auché bilé yuwa mapu Jesusi ayénachó binérali, okuánika jubáami najátasali echi Jesusi. A'lí echi auché bilé galá machirúami níili echi ne walula sacerdote jiti. Echijiti échiko we yáati

bakili echo'ná pachá biléana ri'narátachi, echo'ná nasi-pa echi ne walula sacerdote bitélachi, mapo'ná Jesusi tólati. ¹⁶ Chopi echi Pegro echo'ná machímana 'yéachi tibili. Echijiti echi auché bilé mapu Jesusi binérali, echi mapu galá machirúami níli echi Anasi riwéami sacerdote jiti, échiko auchecho ku machínaga, galá ra'íchali echi tiwé pióntami yuwa echo'ná yéachi tibúami. Echali echi bilé mapu Jesusi binérali echo'ná pachá bayérali echi Pegro. ¹⁷ Echali echi tiwé pióntami echo'ná yéachi tibúami jeanigá rukueli echi Pegro: ¿Kéchami ayénachó Mujé bilé ju mapu je'ná Jesusi binérali? Echali echi Pegro ku nijéwaga jeaneli: Ketasi nijé ju.

¹⁸ Echali rokogó ne wabé ruráli, echijiti echi jaré pióntami, echi jaré kapitani yuwa, bachá niráa sawili na'ali. A'lí si'néami aboni echo'ná sokuala jali. Echali echi Pegro ayénachó echo'ná sokuala wilili aboni yuwa.

Echi ne walula sacerdote we rukué echi Jesusi

(Mt. 26:59-66; Mr. 14:55-64; Lk. 22:66-71)

¹⁹ A'lí echi ne walula sacerdote chótali rukué echi Jesusi mapu chu yiri níli mapu Binói binérali, ayénachó rukueli mapu piri níli mapu Binói binérali echi auché jaré. ²⁰ Echali Jesusi ku nijéwaga jeaneli: Nijeni sinibí ne machiná niráa nawésali jena'í wichimóbachi piréami pagótami. Nijeni sinibí echirigá nawésaga binérali echi pagótami echo'ná suníami aboni ri'obáwalachi, ayénachó echo'ná echi walubé Juríosi pagótami ri'obáwalachi mapo'ná si'néami aboni napawí. Nijeni ketasi siné chiná niráa nawésali. ²¹ Echali Jesusi jeanigá rukueli: ¿Churékulami echirigá tamí rukué? Galá rukué echi jaré mapu tamí námali, mapu churigá Nijeni nawésali. Aboni galá machí suwaba mapu ikí Nijeni anili.

²² A'lí mapalí Jesusi je'ná jerigá anili, echali bilé kapitani echo'ná walubé Juríosi ri'obáwalachi tibúami mapu echo'ná Jesusi yuwa wilili, échiko jeanigá waminá cho'nali: ¿Echirigáchami ku nijewa echi ne walula sacerdote?

²³ Echali Jesusi ku nijéwaga jeaneli: A Nijeni sití ra'ichásagá, tamí ku ruyé mapu churigá Nijeni sití ra'íchali; chopi a Nijeni arigá galabé niráa ra'ichásagá, ¿churékulami echirigá tamí cho'ná?

²⁴ Echali echi Anasi nuleli echi jaré sontarsi echirigá bulérami niráa tónala echi Jesusi echo'ná echi Kaijasi yuwa, echi mapu ne walubela sacerdote níli.

Echi Pegro auchecho siné 'yékaka anili mapu binói ketasi machili echi Jesusi

(Mt. 26:71-75; Mr. 14:69-72; Lk. 22:58-62)

²⁵ Echali yénasí echi Pegro abijí sokuala wilili echo'ná na'írali. A'lí echi auché jaré echo'ná jáwami jeanigá rukueli: ¿Kecha ayénachó bilé ju mujé mapu echi Jesusi

mi binérali? Echali Pegro wabé 'yékaka jeaneli: ¿Ketasi nijé ju!

²⁶ A'lí bilé rijói echo'ná wilíami jeanigá rukueli: ¿Kecha nimí riwali echi Jesusi yuwa iyénami echo'ná mapo'ná wikabé namuti rojuá, Olivo anilíwami, jawí? Echi rijói echirigá rukueli mapujiti binói péé rijimala níli echi Malko riwéami rijói, ayénachó échiko echo'ná iyénali mapalí echi Pegro ripúnali echi Malko nakala. A'lí echi rijói ayénachó echi walubela sacerdote pióntawala níli.

²⁷ Echali echi Pegro auchecho siné 'yékaka anili mapu binói ketasi machili Jesusi. A'lí we yáati kusuli bile tolí.

Jesusi tólati echo'ná bacháami echi walula silíami Pilato riwéami yuwa

(Mt. 27:1-2, 11-14; Mr. 15:1-5; Lk. 23:1-5)

²⁸ Echali Jesusi tólati echo'ná echi Kaijasi bitélachi jonsa, echo'ná biléana walubé kalírali yénasí, mapo'ná echo'ná nuráami walula silíami bitélachi níli. Echali ma chí'lásali, echali omowálawachi rawé, echijiti echi jaré Juríosi ketasi mo'wili echo'ná pachá echi walula silíami bitélachi mapujiti aboni arigá nakili ko'náliya echi kúuchi bo'wá sapala mapurigá aboni omáwiga olali echali rawé alí. Chopi echi silíami ketasi Juríosi pagótami níli, echijiti aboni mayeli mapu ma mo'wiságá echo'ná pachá echi silíami bitélachi, ma ketasi risénsia ními mapu aboni echirigá omowama echali rawé.

²⁹ Echijiti echi Pilato riwéami silíami waminá machínali echi jaré Juríosi pagótami ra'íchamiya. Echali echi Pilato jeanigá rukueli: ¿Piri jítitamo wi'nijí je'ná rijói?

³⁰ A'lí aboni ku nijéwaga jeaneli: ¿A Binói ketasi chati oláami níisagá, tamujeta ketasi mi 'yabi!

³¹ Echali echi Pilato jeaneli: ¿Aboni niráa ku togá, waminá justicia olábasi 'yemi nulalila jiti! Echali echi jaré Juríosi pagótami ku nijéwaga jeaneli: Tamujé aboni ketásita justicia olabo, mapujiti tamujé Juríosi pagótami ketasi risensia ju máputa nulabo bilé rijói mi'línala.

³² Aboni echirigá anéli mapujiti arigá 'wérali níli mapurigá achigórigá ikimea mapurigá Jesusi Binói bachá niráa anili, mapu Binói mi'lirúami níima echo'ná biléana kúrsichi michóniga, achigórigá mapurigá echi jaré Romano anilíwami pagótami sinibí echirigá ko'yali echi jaré chati oláami pagótami. ³³ Echali echi Pilato auchecho siné bakili echo'ná pachá echi walubé kalí binói bitélachi. A'lí auchecho bayegá echi Jesusi, echi Pilato jeanigá rukueli: ¿Mujecha ju echi jaré Juríosi pagótami walubela silínawala?

³⁴ Echali Jesusi ku nijéwaga jeanigá rukueli: ¿Mujecha echirigá tamí rukué mapujiti mujé binói nakí echirigá machináliya? ¿Auché jarecha echirigá mi ruyéliré omá, tamí jiti rugá?

³⁵ Echali echi Pilato ku nijéwaga jeanigá rukueli: ¿Áchami mayé mapu nijeni Juríosi pagótami ju? Echi jaré Mujé pagótamawala níli, echi jaré o'wéala sacer-

dote ayénachó, mapu wakiná mi nijili, mapurigá nijeni mi kastigo 'yama. ¿Pírimi wabé chati olali?

³⁶ Echálí Jesusi ku nijéwaga jeaneli: Nijeni arigá nula ma jena'í wichimóbachí mapurigá Walubela silíami niráa. Chópini ketasi achigórigá 'wérali nulama mapurigá echi auché jaré o'wéala silíami we nulá. A Nijeni echirigá nulásagá, echi jaré mapu tamí bichíyami ju ma wabé nakomi, tamí ku'wírasiya, mapurigá echi jaré Juríosi pagótami ketasi tamí omérama; chopi Nijeni ketasi 'wérali nulá mapurigá echi auché jaré o'wéala silíami jena'í wichimóbachí piréami we nulá.

³⁷ A'lí echi Pilato jeanigá rukueli: ¿Echirigacha ne bichíwali bilé walubela silíami jumi? Echálí Jesusi ku nijéwaga jeaneli: Ayena, Nijeni walubela silíami ju, mapurigá mujemi aní. Echijiti Nijeni ranarúami níili jena'í wichimóbachí; ayénachóni nawali jena'í wichimóbachí mapurigani nawisama echi ne Bichíwali. Si'néami mapu ikí galá nijéwaga olako mapurigá ne bichíwali ju, aboni galá kipú mapurigá Nijeni aní.

³⁸ Echálí echi Pilato jeanigá rukueli: ¿Piri ju echi ne Bichíwali?

Ma nulálati mapurigá Jesusi waminá mi'lirúami níima
(Mt. 27.15-31; Mr. 15.6-20; Lk. 23.13-25)

A'lí ma je'ná jerigá rukuesa, echi Pilato auchocho ku machínali echi jaré Juríosi pagótami yuwa ra'ichámiya. Echálí binói jeaneli: ¡Nijé ketasi biyiri namuti mapurigá chati oláami niráa, riwálini je'ná rijói! ³⁹ Sinibí bamíbalí, jipi omowálawachi sébachi rawé, nijeni ku machí pama pe bilé 'yemi pagótamawala mapu pachá bachara atí. ¿Áchatamo nakí mápuni ku machí pásama echi Walubela, 'yemi Juríosi pagótami silínawala?

⁴⁰ Echálí ne si'néami aboni auchocho o'weli ra'íchaka jeaneli: ¡Échiko ketasi ku machí pa! ¡Chopi ku machí pa echi Barabasi! A'lí echi Barabasi riwéami rijói we chigórami níili, echijiti pachá bachara asali.

19 Echálí echi Pilato nulali waminá wipisónala echi Jesusi. ² A'lí echi jaré sontarsi so'uwá tega koyétali Jesusi mo'ólachi; ayénachó pe sitákami chomítawami napachátali, mapurigá bilé walubela silíami niráa. ³ Echálí si'néami echi jaré sontarsi mulubéanaga Jesusi yuwa tiníchaga jeaneli: ¡Walubela nílaga mujé walubela Juríosi silínawala! Ayénachó cho'nílati Binói banalachi.

⁴ A'lí echi Pilato auchocho ku machínaga jeaneli: ¡Galá 'nesi je'ná rijói! Mani auchocho siné ku machí pama, mapurigátamo ne galá machiboa mapu nijeni ketasi biyiri namuti riwali mapurigá chati oláami niráa.

⁵ Echálí Jesusi ku machínali echi so'uwá niwárami koyeka, ayénachó echi pe sitákami chomítuwami napáchaga. A'lí echi Pilato jeaneli echi jaré pagótami: ¡Jena'í wilí je'ná rijói!

⁶ Chopi mapalí echi jaré o'wéala sacerdote, echi jaré ri'obachi tibúami kapitani galá riwali, echálí si'néami

aboni chótali o'weli ra'íchaga jeaneyá: ¡Echo'ná kúrsichi michoné! ¡Echo'ná kúrsichi michoné! Echálí echi Pilato jeaneli: 'Yemi togá, echo'ná kúrsichi michónasi, mapujiti nijeni ketasi biyiri riwali mapurigá chati oláami niráa.

⁷ Chopi echi jaré Juríosi pagótami ku nijéwaga jeaneli: Tamujeta ma nulélati. A'lí mapurigata nulérami níili, arigá 'wérali ju mapurigá je'ná rijói waminá mi'lirúami níima, mapujiti rijói ké, arigá jeaní mapu binói bilepi Riosi Ranala ju.

⁸ Echálí ma je'ná jerigá namsa echi Pilato waminabi wabé majali. ⁹ Echijiti echi Pilato auchocho siné pachá bakigá echo'ná walubé kalírali, jeanigá rukueli echi Jesusi: ¿Kumi jonsa nawali mujé? Chopi Jesusi ketásirapé namuti ku nijéwali.

¹⁰ Echálí echi Pilato jeanigá rukueli: ¿Kéchami tamí ku nijéwama? ¿Kéchami machí mapu nijeni walubela silíami ju, mápuni we omero nulayá mi mi'línala, mápuni ayénachó omero nulayá mi ku machí pánala?

¹¹ A'lí Jesusi ku nijéwaga jeaneli: ¡Mujemi tarapé omérami tamí sayera, Riosi ke mi echirigá 'yásagá! Echijiti Nijé nimí ané mapu echi rijói mapu tamí nijili mapurigá mujemi tamí kastigo 'yama, échiko waminabi wabé chati oláami ju, ketasi mapurigá mujé.

¹² Echálí jonsa echi Pilato chopi 'nátali mapu churigá omérama ku ni'yúbana echi Jesusi; chopi echi jaré Juríosi pagótami o'weli ra'íchaga jeaneli: ¡Ámi ku ni'yúbanasagá je'ná Jesusi, mujemi ketasi amígowala ju echi ne walubela silíami echo'ná Rómachi bitéami! Mapujiti mapuyíripi ne walubela silíami níli, échiko we sayera echi ne walubela silíami echo'ná Rómachi bitéami.

¹³ Echálí echi Pilato ma je'ná jerigá namsa, auchocho siné nulali ku machí pánala Jesusi. A'lí echi Pilato asíbali echo'ná mapo'ná echi ne walubela silíami sinibí asíbali, mapo'ná echi Ebreo ra'íchala niráa Gabátachitachi anilíwachi níli, chopi Ralámuli ra'íchala niráa Rijibétachitachi anilíwachi ju. ¹⁴ Echálí ma nasipa rawé níli. A'lí ba'alínala rawé omowálawachi sébachi níli mapalí echi jaré kúuchi bo'wá ko'wílati. Echálí echi Pilato jeaneli echi jaré Juríosi pagótami jeanigá: ¡Jena'í wilí echi walubela 'yemi silínawala!

¹⁵ Chopi si'néami aboni o'weli ra'íchaga jeaneli: ¡Waminá mi'yá! ¡Echo'ná kúrsichi michoné! Echálí Pilato jeaneli: ¿Áchani nulama echo'ná kúrsichi michóniga mi'línala echi walubela 'yemi silínawala? Chopi echi jaré o'wéala sacerdote ku nijéwaga jeaneli: ¡Ketásita niwa auché bilé walubela silíami, chopi echi walubela silíami echo'ná Rómachi bitéami!

¹⁶ Echálí echi Pilato nijali echi Jesusi mapurigá aboni waminá mi'limea, echo'ná biléana kúrsichi michóniga. A'lí aboni ma waminá toli.

Jesusi clavo jiti michóntami níili echo'ná kúrsichi

(Mt. 27:32-44; Mr. 15:21-32; Lk. 23:26-43)

¹⁷ Echali Jesusi ma matóraga echi Binói níwala kursi, chótali echo'ná biléana simiyá mapo'ná chu'wí mo'ólachi anélati; ayénachó echi Ebreo anilíwami ra'íchala niráa echo'ná Gorótachi anilíwachi níili.

¹⁸ Echo'ná echi Walubela Jesusi clavo jiti michóntami níili Binói sikálachi, ayénachó Binói ronólachi, echo'ná biléana kúrsichi. A'lí Binói yuwa auché okuá rijói, ibílana niráa, echo'ná auché okoná kúrsichi echirigá michóntami níili. A'lí Jesusi Binói echo'ná nasipa wilámi kúrsichi michóntami níili. ¹⁹ Echali echi walula Pilato nulali biléana táa tabla osogá uchánala echo'ná ripá kúrsichi kuwálachi. A'lí jerigá osirúami níili: Je'ná ju Jesusi, echo'ná Nasarétachi bitéami, echi Walubela Juríosi Silínawala. ²⁰ Echali wikabé echi jaré Juríosi pagótami galá 'nénali je'ná osirúami, mapujiti echo'ná mapo'ná Jesusi michónalati kúrsichi ne mulubé níili echo'ná Jerusalémachi anilíwachi walúlachi jonsa. A'lí echirigá osirúami níili echi Ebreo ra'íchala niráa, echi Griego ra'íchala niráa ayénachó, echi Latini ra'íchala niráa asíchiko. ²¹ Chopi echi jaré o'wéala Juríosi sakterdótawala jeaneli echi walula Pilato: Perikó ketasi echirigá osá: Je'ná ju echi Walubela Juríosi Silínawala. Chopi galá níima je'ná jerigá osisá: Je'ná rijói jeanili: Nijé ju echi Walubela Juríosi Silínawala.

²² Chopi echi Pilato ku nijéwaga jeaneli: Echi mápuni osáliko echirigá a tibima.

²³ Echali ma echo'ná kúrsichi michónsa Jesusi, echi jaré sontarsi ma chapigá suwaba namuti Binói níwala chiní, naóana niráa rojuánali mapurigá ibili sontarsi chapimea bilé niráa. A'lí Jesusi níwala wi'lí napacha, moba chukúami, ketasi sútami niili; chopi bilepi niráa amarúami tétami níili ripá jonsa, ri'lé yénasí. ²⁴ Echijiti echi jaré sontarsi a'nagupi jeaneli: Ketásita naóana chi'wanabo, chopi galá níima rijibaka niráa ri'yékasa chigá 'nalí chapirá. A'lí echirigá olálati mapurigá ne sébali ikimea mapurigá bachá niráa osirúami níili echo'ná Riosi Ra'íchala oselíwalachi, mapo'ná je'ná jerigá osirúami ju:

Aboni a'nagupi rojuánali suwaba namuti Nijé níwala chiní; ayénachó rijibaka ri'yékali, chigá 'nalí chapilá Nijé níwala wi'lí napacha moba chukúami.

²⁵ A'lí echo'ná mulubé mapo'ná echi kursi wilili mapo'ná Jesusi michóntami níili, echo'ná wilili echi Jesusi iyela, auché bilé mukí yuwa, echi mapu Jesusi iyela rijimala níili, echi mapu ayénachó María riwéami níili, echi mapu echi Kleópasi riwéami rijói upila níili. A'lí auché bilecho mukí, María riwéami, ayénachó echo'ná wilili, echi mapu echo'ná Makatálachi bitéami níili.

²⁶ Echali mapalí Jesusi riwali echo'ná wilíami echi kepu iyé, Binói ayénachó riwali echi bilé mapu Binói binérali, mapu Jesusi Binói ne wabé galeli, mapu ayénachó

echo'ná mulubé wilili Jesusi iyela yuwa. Echali Jesusi jeaneli kepu iyé: Keni iyé, je'ná rijói mapurigá mujé binói ranala níima.

²⁷ A'lí Jesusi ayénachó jeaneli echi bilé mapu Binói binérali: Echi Nijé iyela ma mapurigá mujé binói iyela níima. A'lí echali jonsa echi bilé mapu Jesusi binérali, binói galá nareli echi Jesusi iyela echo'ná binói bitélachi mapurigá binói iyela niráa.

Jesusi ma mukuli

(Mt. 27:45-56; Mr. 15:33-41; Lk. 23:44-49)

²⁸ Ma je'ná jerigá anisáa, echali Jesusi galá machili mapu ne suwaba ma sébali ikili mapurigá bachá niráa osirúami níili echo'ná Riosi Ra'íchala oselíwarachi mapurigá ikimea riwéali. Echijiti Binói jeanili: ¡Weni bala-mi!

²⁹ Echali echo'ná manili bilé sikolí wabé chokóami uva ba'wila maníami. A'lí echo'ná jáwami we pakeli bilé namuti mapuyili bilé táa bo'osali echo'ná wabé chokóami uva ba'wíwíachi. A'lí echo'ná biléana kusírali ochogá, ne chumuchí ucheli mapurigá Jesusi chunugá bajima. ³⁰ Echali Jesusi ma chunugá bajisa echi we chokóami ba'wila, we yáati jeanili: Suwaba ma sébali ikili. A'lí yóraga, ma mukuli.

Bilé sontarsi waminá chi'wánali Jesusi wachigálachi

³¹ A'lí ba'arínala omowálawachi rawé níili mapalí echi jaré kúuchi bo'wá ko'wílati. Echijiti echi jaré Juríosi pagótami ketasi nakili mapurigá echi bikiá rijói suwíami sapala waminabi echo'ná ripá kúrsichi uchuma mapujiti ba'alínala isábawachi rawé walú omowálawachi níili. Echijiti aboni tánali mapurigá echi Pilato nulama waminá ka'linánala echi jaré bikiyá rijói ronólachi mapurigá aboni we sapú waminá suwimea, mapurigá aboni suwíami sapala we yáati waminá rikibúrami níima mapurigá echi bikiyá suwíami sapala ketasi tibima echo'ná kúrsichi ba'alínala isábawachi rawé. ³² Echijiti echi jaré sontarsi simíbaga ka'línali echi bilé rijói ronólachi mapu ayénachó michónalati echo'ná biléana kúrsichi mapalí Jesusi mi'lílati; ayénachó ka'línali echi auché bilecho rijói ronólachi mapu ayénachó michónalati echo'ná auché biléana kúrsichi. ³³ Chopi mapalí aboni mulubéanali mapo'ná Jesusi michóntami níili echo'ná auché biléana kúrsichi, aboni riwali mapu Jesusi ma mukúami níili, echijiti aboni ketasi ka'línali echi Walubela Jesusi ronólachi.

³⁴ Chopi bilé sontarsi arigá chi'wánali Jesusi wachigálachi bilé wabé oláami silá jiti. Echali we yáati walú lénali, ayénachó machínali ba'wí. ³⁵ Echi rijói mapu je'ná jerigá ruyeko, mapurigá jena'í oselichi osirúami ju, echi ju bilé mapu galá riwali. A'lí binói ne bichíwaga aní. Échiko galá machí mapu binói bichíwaga aní, mapurigá 'yémitamo ayénachó galá bichííbo.

³⁶ Mapujiti je'ná jerigá ikili mapurigá suwaba ne sébali ikimea mapurigá bachá niráa osirúami níili echo'ná Riosi Ra'ichala oselíwalachi mapo'ná jeaní: Aboni ketasi ka'linama ni bilé Binói ochilá. ³⁷ Ayénachó je'ná jerigá osirúami ju echo'ná auché biléana osirúami echo'ná Riosi Ra'ichala oselíwalachi: Aboni auchecho ku riwimea Echi mapu aboni chi'wánali.

Jesusi chu'wirótami níili

(Mt. 27:57-61; Mr. 15:42-47; Lk. 23:50-56)

³⁸ Ma je'ná jerigá ikisáa, echalí echi José echo'ná Ari-matéachi bitéami risénsia tánali echi Pilato, echi Jesusi mukúami sapala ku tomeya. Echalí echi Pilato risensia 'yali. A'lí echi José echo'ná simigá, waminá toli Jesusi mukúami sapala. Echi José echi Jesusi yuwa binéami níili, chopi échiko chiná niráa bineli mapujiti binói we majali echi auché jaré Juríosi pagótami jiti. ³⁹ Auché bilé rijói Nikoremo riwéami ayénachó ku'wirimiya nawali. Échiko níili mapu chabénala, siné rokogó niráa, ra'ichámiya nawíili Jesusi yuwa. Je'ná Nikoremo pali jaré wabé su'weti júkami namuti, mira anilíwami, echi auché bilé áloe anilíwami nasówaga. Suwaba we bitéami níili mapuyena baisá makói kilo niráa. ⁴⁰ A'lí echi okuá rijói chapigá echi Jesusi mukúami sapala galá kabili wi'libé chiní pe táa chipérami jiti. Echalí aboni ayénachó echirigá kabili echi jaré su'weti júkami namuti yuwa, echo'ná pachá nasipa chinírali uchugá, mapurigá echi jaré Juríosi pagótami sinibí echirigá olali mapalí aboni chu'wiroli echi jaré suwíami. ⁴¹ A'lí echo'ná mapo'ná echi Walubela Jesusi echo'ná kúrsichi michóntami níili, mulubé niráa jali wikabé namuti rojuá, olivo anilíwami. A'lí echo'ná nasipa nirúali bilé risochí chu'wiróami, bukuli niwárami, mapo'ná ke cho wesi chu'wirótami níili. ⁴² Echo'ná we yáati chu'wirótami níili echi Walubela Jesusi ma mukúami sapala, mapujiti echo'ná ne mulubé níili, ayénachó mapujiti ma we yáati chotama riwéali ba'alínala isábawachi rawé, mapalí echi jaré Juríosi pagótami tarapé risensia níili mapu nochama.

Jesusi ku owínali mapalí ma mukúami níili

(Mt. 28:1-10; Mr. 16:1-8; Lk. 24:1-12)

20 Echalí oméachi rawé, mapalí ne bachá rawé níili echalí tarali, echalí bi'yá abijí chónachi echi María echo'ná Makatálachi bitéami echo'ná risochí chu'wechi simili. Echalí binói riwali mapu echo'ná yéachi ma ketasi 'yératami níili echi walubé rité jiti. ² A'lí echi María wabé 'maga simili echo'ná mapo'ná echi Simoni Pegro asali, echi auché bilé yuwa mapu Jesusi binérami, echi mapu Jesusi wabé galeli. Echalí echi María jeaneli: ¡Ma waminá tólati echi Walubela, echo'ná risochí chu'wechi jonsa! A'lí bichéta ketasi machí kumi 'nalí rikálati.

³ Echalí echi Pegro, echi auché bilé binéami ayénachó, okuánika ku 'machínaga, we yáati simíbali echo'ná risochí chu'wechi. ⁴ Echalí okuánika napawika júmali, chopi echi auché bilé binéami waminabi wabé walínaga 'mali, ketasi mapurigá echi Pegro. Echijiti echi auché bilé binéami ne bachá nawali echo'ná risochí chu'wechi. ⁵ A'lí échiko bunaka 'néniga, galá riwali echo'ná ri'lé pacháami, abijí mapurigá kabítami niráa tibíami, echi wi'libé chiní pe táa chipérami, chopi échiko ketasi cho bakili echo'ná pachá. ⁶ A'lí echi Simoni Pegro ayénachó we yáati pe jubáami nawali. Échiko we yáati bakigá echo'ná pachá, ayénachó galá riwali echi wilibé chiní pe táa chipérami echo'ná tibíami. ⁷ Ayénachó riwali mapurigá echi chiní mapuyiri wisibula, echi mapujiti Jesusi mo'ólachi chulubítalati, ketasi napawika tibili echi auché jaré chiní yuwa, chopi echi wisibula waminá waná kabita achárami tibili. ⁸ Echalí ayénachó pachá bakili echi auché bilé binéami mapu ne bachá nawali echo'ná risochí chu'wechi. Échiko galá riwisáa echi táa chipérami chiní echirigá tibíami, ne galá bichíili mapurigá Jesusi ne bichíwali ma ku owínami níili. ⁹ Mapujiti aboni ketasi cho galá machili chu aniwáami níili mapurigá osirúami níili echo'ná Riosi Ra'ichala oselíwalachi jeanigá mapu echi Walubela Jesusi auchecho siné ku owínama riwéali mapalí ma mukúami níisa. ¹⁰ Echalí echi okuá mapu Jesusi binérami ma ku simíbali echo'ná aboni pirélachi.

Jesusi Binói ke sayiná mulubé wilfbali echi María echo'ná Makatárachi bitéami yuwa

(Mr. 16:9-11)

¹¹ Chopi echi María echo'ná risochí chu'wechi machímana we nalaka tibili. A'lí echirigá abijí nalaka binói bunaga 'nénali echo'ná pachá risochí chu'wechi.

¹² Echalí binói riwali okuá o'wéala Riosi kapitánawala, ne wabé tosákami napáchami, echo'ná muchúami mapo'ná Jesusi sapala chu'wirólati. Bilé echo'ná asali mapo'ná Jesusi mo'wéraga rikálati, chopi auché bilecho asali echo'ná mapo'ná Jesusi ronéraga rikálati.

¹³ A'lí echi okuá Riosi kapitánawala jeanigá rukueli: Mukí, ¿churékulami nalagá? Echalí echi María jeaneli: Mapujiti ma waminá tólati echi nijé Walubélawala. Jípi ni ketasi machí kumi 'nalina rikálati.

¹⁴ Chopi ma je'ná jerigá anisáa, echi María we yáati ku kuwana 'néniga ke sayiná riwali Jesusi echo'ná wilíami, chopi echi María ketasi machili mapu Jesusi Binói níili. ¹⁵ Echalí Jesusi jeanigá rukueli: Mukí, ¿churékulami nalagá? ¿Chigami amí? Chopi echi María mayega mapu echo'ná tibúami níili, echalí jeaneli: A mujemi níisagá mapu waminá toli, tamí galá ruyé mapo'nami rikali, mapurigá nijeni ku tomea.

¹⁶ Echalí Jesusi jeaneli: ¡María! A'lí echi María we yáati ku kuwana 'néniga, Ebreo ra'ichala niráa ra'ichaga,

jeaneli: ¡Raboni! (echi mapu jerigá aniwáami ju: Binériami.)

¹⁷ Chopi Jesusi jeaneli: Ketasi cho tamí nochá, mapujiti Nijeni ketasi cho ku moyénali echo'ná ripá riwigachi mapo'ná Nijé Onolá atí. Chopi we yáati ku ruyémiya simigá echi jaré Nijé ritémawala, mapurigá Nijeni ripá munama mapo'ná echi Nijé Onolá atí, echi mapu ayénachó 'yemi Onolá ju. Nijeni munama echo'ná ripá riwigachi mapo'ná Nijé Riósawala atí, echi mapu ayénachó 'yemi Riósawala ju.

¹⁸ Echali echi María echo'ná Makatálachi bitéami we yáati ruyémiya simili echi jaré mapu Jesusi binérali, mapurigá binói ma galá riwali ku bitéami niráa echi Walubela Jesusi, ayénachó echi María ruyeli mapurigá echi Walubela Jesusi ma je'ná jerigá aneli.

Jesusi Binói ke sayiná mulubé wilíbbali echi jaré mapu Binói binérali yuwa

(Mt. 28:16-20; Mr. 16:14-18; Lk. 24:36-49)

¹⁹ Echali rawé mapalí Jesusi ku owínali, ne bachá rawé níili echali tarali. Echali rokogó echi jaré mapu Jesusi binérali, echo'ná pachá biléana kalírali napawika muchili. A'lí aboni ne suwaba 'yeli echo'ná kalírali 'yéachi mapujiti aboni we majali echi jaré Juríosi pagótami. Echali Jesusi Binói ke sayiná echo'ná bakigá nasipa aboni yuwa wilíbbali. A'lí Binói jeaneli: ¡Kuirá! ¡Kilí niráa ologá pirélasí!

²⁰ A'lí ma je'ná jerigá anisáa, Binói galá riwírali aboni Binói sikálachi, ayénachó riwírali Binói wachigálachi. Echali echi jaré mapu Binói binérali ne wabé kaníli, echirigá galá 'nesa echi Walubela Jesusi. ²¹ Echali Jesusi auchecho siné jeaneli: ¡Kilí niráa ologá pirélasí! Echirigá mapurigá Onorúami tamí júuli jena'í wichimóbbachi, echirigá achigórigá Nijeni 'yemi mi jula.

²² A'lí echo'ná abónichi moba púchaga Jesusi jeaneli: ¡Galá naresi echi Wabé Galabé Riosi Iwigala! ²³ Átamo ku wikawásagá mapurigá bilé rijói chati olali, échiko ma galá ku wikawárami ju. Ayénachó átamo ketasi ku wikawásagá mapurigá auché bilecho chati olali, échiko ketasi ku wikawárami ju.

Echi Tomasi galá riwali echi Walubela Jesusi ma ku bitéami niráa

²⁴ Chopi echi Tomasi mapu 'marachi anélati, bilé níili mapu Jesusi binérali, échiko ketasi aboni yuwa asali echali mapalí Jesusi echo'ná nawali. ²⁵ Pe wakinana echi auché jaré binéami jeaneli: ¡Tamujeta ma riwali ku bitéami niráa echi Walubela Jesusi! Chopi echi Tomasi ku nijéwaga jeaneli: ¡A nijeni ketasi cho riwisáagá echo'ná Binói sikálachi, mapo'ná Binói michónalati, ayénachó a nijeni ketasi cho bachásagá nijé makúsawala echo'ná Binói sikálachi iwáachi, mapo'ná clavo jiti michónalati, ayénachó a nijeni ketasi cho

bachásagá nijé sikala echo'ná Binói wachigálachi iwáachi mapo'ná Binói chi'wanárami níili, echali nijeni ketasi chirigá omérama bichíyia!

²⁶ Echali móbala oméachi rawé ne si'néami echi jaré makói miná bilé mapu Jesusi binérali, auchecho siné napawika muchili echo'ná pachá kalírali. Echali echi Tomasi ayénachó echo'ná echi auché jaré aboni yuwa asali. Echali arigá 'yeta wilíachi suníami yéachi, echi Walubela Jesusi ke sayiná nawagá echo'ná pachá, ne nasipa wilíbbali aboni yuwa. A'lí jeaneli: ¡Kuirá! ¡Kilí niráa ologá pirélasí!

²⁷ A'lí Binói we yáati jeaneli echi Tomasi: Jena'í wakiná bachá kemi makúsawa. Ne galá 'né Nijé sikala; ayénachó wakiná bachá kemi siká. Jena'í Nijé wachigálachi pachá bachá, mapo'nani chi'wanárami níili. Ketasi waminabi níili mapurigá ke bichíyami niráa, chopi ne galá bichíi. ²⁸ Echali echi Tomasi ku nijéwaga jeaneli: ¡Keni Walubelawa, Mujemi keni Riósawa ju!

²⁹ A'lí Jesusi jeaneli: Mujemi tamí bichíi mapujítimi ma tamí riwali, chopi echi auché jaré wabé kaníliami níima mapu ketasi tamí riwisáa, arigá tamí bichíi.

Je'ná jerigá osirúami níili mapurigá jena'í wichimóbbachi piréami pagótami galá bichíima Jesucristo niráa

³⁰ A'lí echali mapalí Jesusi iyénali jena'í wichimóbbachi, echi jaré yuwa mapu Binói binérali, echali chokichí jonsa Binói wisabé wabé omériga olali mapurigá ke wesi auché jaré omero olayá; chopi suwaba ketasi suwaba osílati jena'í oselichi mapurigá Binói wisabé echirigá olali. ³¹ Chopi je'ná mapurigá jena'í osirúami ju, ne suwaba echirigá osirúami níili mapurigá 'yémitamo galá bichíibo mapu echi Jesusi, echi Walubela Cristo anilíwami ju, echi bilepi Riosi Ranala; ayénachó mapurigátamo echirigá bichíiga, ne sinibí piréami níibo, mapujítitamo galá bichíi Binói niráa.

Jesusi ke sayiná mulubé wilíbbali kichao rijói yuwa mapu Binói binérali

21 Péé wakinánokúá Jesusi auchecho siné ke sayiná mulubé wilíbbali echi jaré yuwa mapu Binói binérali. Echali je'ná jerigá ikili echo'ná walú ba'wirali suwé Tibériachi anilíwachi: ² Echali napawika muchili echi Simoni Pegro, echi Tomasi mapu 'marachi anélati ayénachó, echi Natanaeli echo'ná Kanachi, echo'ná Galiléachi anilíwachi kawírali bitéami ayénachó, echi okúá Sibireo kúchala ayénachó, auché okúá mapu Jesusi binérali asíchiko. ³ Echali echi Simoni Pegro jeaneli: Nijeni simea rochí sirúmiya. A'lí echi auché jaré jeaneli: Tamujé ayénachóta mi yuwa simabo. Echali aboni simíbbaga mo'wili echo'ná biléana bárkochi. Chopi echali rokogó aboni tarapé bilé rochí chapili. ⁴ A'lí ba'alínala bi'yá chónachi Jesusi Binói ke sayiná

wilíbbali echo'ná walú ba'wírali suwé, chopi echi jaré mapu Binói binérali ketasi machili mapu Binói Jesusi níili. ⁵ Echali Jesusi jeaneli: 'Yemi rijói, ¿kéchatamo jaré machí a'wali rochí? Chopi aboni ku nijéwaga jeanili: Tarapé bilé.

⁶ Echali Jesusi jeaneli: Echo'ná bárkochi watoná 'nalí pasi echi walú chipérami tétami chiní, echalítamo galá chapiboa. A'lí echirigá pasa, aboni chapili ne wikabé rochí echo'ná pachá echi walú chipérami tétami chiní. Echali aboni ma ketasi omérali ku machí páa echi chiní, mapujiti echi wikabé rochí ne wabé bitéami níili. ⁷ A'lí echi bilé rijói mapu Jesusi binérali, mapu Binói ne wabé galeli, échiko jeaneli echi Pegro: ¡Echi rijói tamujé Walubélawala ju! A'lí mapalí echi Pegro námali mapu echi Walubela níili, echali binói we yáati ku napachali mapujiti ketasi napacha iyénali. A'lí we yáati waminá ba'wichí pochili mapurigá we yáati simea echo'ná suwé mapo'ná echi Walubela Jesusi wilíli. ⁸ Chopi echi auché jaré mapu Jesusi binérali arigá sili echo'ná suwé, echo'ná bárkochi ba'wichí moba iyénamichi muchiga, mapujiti mulubé níili, mapuyena bilé kiento metro niráa; ayénachó aboni banílasaga sili echi walú chipérami tétami chiní, ne wikabé rochí rakoka. ⁹ A'lí echo'ná wi'yérali suwé sisáa, sawíli na'árami riwali, bilé walú rochí yuwa echo'ná moba, echi pani ayénachó.

¹⁰ Echali Jesusi jeaneli: Wakiná tosí jaré rochí máputamo bukulipi chapili.

¹¹ Echali echi Simoni Pegro 'moka echo'ná bárkochi, echo'ná wi'yérali suwé baníraga pali echi walú chipérami chiní tétami. A'lí ne wabé buchiami níili o'weli rochí. Bilé kiento waminá malisa makói, waminá bikiá níili. A'lí echikí wikabé níisa, arigá ketasi chi'wali echi walú chipérami chiní tétami. ¹² Echali Jesusi jeaneli: ¡Wakiná simasi, kopoa! A'lí echi jaré mapu Binói binérali ke wesi nakili rukuénala mapu chigá níili Binói, mapujiti ne si'néami ma galá machili mapu echi Walubela Jesusi níili. ¹³ Echali Jesusi mulubéanaga aboni yuwa, ma chapigá echi pani, waminá nachútaga 'yali mapurigá aboni ko'mea. Echirigá achigórigá ayénachó nachútali echi rochí.

¹⁴ Echali jonsa mapalí Jesusi ma mukuli, je'ná jerigá ma baisá chokéami níili mapu Binói ke sayiná mulubé wilíbbali echi jaré binéami yuwa mapalí Binói ma ku owínali.

Jesusi ra'icha echi Simoni Pegro yuwa

¹⁵ Echali bi'yá mapalí aboni ma sunili ko'yá, echi Walubela Jesusi jeanigá rukueli echi Simoni Pegro: Mujé Simoni, mápumi echi Jonasi ranala ju, ¿áchami waminabi wabé tamí galé, ketasi mapurigá je'ná jaré? Echali echi Pegro ku nijéwaga jeaneli: Ayena Walubela, Mujemi galá machí mapurigá nijé nimí we galé. Echali

Jesusi jeaneli: Gala ju, ¡kotúurami echi jaré Nijé pugula bo'wá!

¹⁶ A'lí Jesusi auchecho siné jeanigá rukueli: Mujé Simoni mápumi echi Jonasi ranala ju, ¿áchami tamí galé? Echali echi Pegro ku nijéwaga jeaneli: Ayena Walubela, Mujemi galá machí mapurigá nijeni mi galé. Echali Jesusi jeaneli: ¡Galá nisérami echi jaré Nijé pugula bo'wá!

¹⁷ Echali auchecho baisá chokéami Jesusi jeanigá rukueli: Mujé Simoni mápumi echi Jonasi ranala ju, ¿áchami tamí galé? A'lí echi Pegro we siweli mapujiti ma baisá chokéami rukueli jeanigá: ¿Áchami tamí galé? Echijiti binói jeaneli: Walubela, Mujemi galá machí ne suwaba namuti. Mujemi ne galá machí mapu nijeni mi galé. Echali Jesusi jeaneli: ¡Kotúurami echi jaré Nijé pugula bo'wá! ¹⁸ Echali Jesusi waminabi jeaneli: Ne bichíwali Nijeni mi jeané: Mapalimi péerimá níili, mujemi sinibí, binói niráa, napachasa simili kanápuromí mapo'nami nakili, chopi waminánomí mapalimi ma ochérami níima, echali mujemi a'nagú ka'énala wachinama mujé sikala. A'lí auché bilé rijói mi napachátasa waminá tomea mapo'nami ketasi nakí simináliya.

¹⁹ Echali Jesusi echirigá aneli mapurigá Pegro galá machimea churigá binói Pegro mi'lirúami níima, mapurigá Riosi Binói echijiti waminabi wabé walubéraga anérami níima. A'lí Jesusi waminabi jeaneli echi Pegro: ¡Tamí najató!

Echi bilé binéami mapu Jesusi wabé galeli

²⁰ A'lí echi Pegro ku kuwana 'néniga riwali najátami echi auché bilé rijói mapu Jesusi ayénachó binérali, echi mapu Jesusi wabé galeli. A'lí echi rijói níili mapu mulubé Jesusi yuwa asali echali rokogó mapalí si'néami aboni napawika ko'yá muchili. Echi níili mapu jeanigá rukueli: Walubela, ¿chigá ju mapu mi nijima mapurigá echi jaré mujé sayela mi mi'limea? ²¹ Echali mapalí Pegro echirigá riwali echi auché bilé binéami, echali echi Pegro jeanigá rukueli echi Jesusi: Walubela, je'ná rijóirú, ¿churigá ikimea?

²² Echali Jesusi ku nijéwaga jeaneli: A Nijeni nakisáagá mapu je'ná auché bilé rijói waminabi bitélama echali rawé yénasí mapalí Nijeni ku nawama, ¿chu chireko mujé? ¡Mujé chopi tamí najató!

²³ Echijiti echi auché jaré ritémtami a'nagupi aneli mapu echi bilé rijói mapu Jesusi binérali ke siné mukumea. Chopi Jesusi ketasi anili mapu ke siné mukumea, chopi jeanili: A Nijeni nakisásagá mapu waminabi bitélama echali rawé yénasí mapalí Nijeni ku nawama, ¿chu chireko mujé?

²⁴ Nijé Juani juni mápuni ne galá bichíwaga aní je'ná jaré namuti, ayénachó nijeni osali je'ná jaré namuti. A'lí si'néamita galá machí mapu nijeni ne bichíwali aní.

²⁵ A'lí chabénala mapalí echi Walubela Jesusi iyénali jena'í wichimóbachí, Binói wabé simírami wisabé wabé omériga olali mapurigá ke wesi auché jaré omero olayá; chopi ne suwaba mapurigá Binói olali ketasi suwaba osirúami ju jena'í oselichi. A'lí a ne suwaba ibílipi niráa osirúami níisagá, nijeni mayé mapu ne wabé simírami wikabé oselí echirigá osirúami níimi.

Echalí suwaba buchimi ne suníami jena'í wichimóbachí echi kúuti ne wabé wikabé oselí jiti, chopi abijí tibimi auché jaré wabé wikabé oselí. A'lí ma ketasi nirúlama ne suníami jena'í wichimóbachí mapo'mí muchuwárami níimi echi auché jaré ne wikabé oselí mapu echirigá osirúami níimi. ¡Echirigá níilaga!

Tito

Echi Pablo galá osé echi Tito

1 Nijé, Pablo, Riosi piónawala ju. Echi Walubela Jesucristo tamí nawesánalaga júuli, mapurigani nawisama echi ne Bichíwali, mapurigá si'néami echi jaré mapu ikí Riosi bachá niráa chapili, ma galá bichíima Binói Ra'íchala. Ayénachó Riosi tamí júuli mapurigani binérama mapurigá aboni galá machimea echi ne Bichíwali, ayénachó mapurigá aboni echijiti ku niwárami níima ne wabé galabé. ² Ayénachó nijeni julárami níili nawesánala mapurigá aboni galá bichíiga buwema mapurigá waminánomí aboni sinibí niráa ku pirélama echo'ná ripá riwigachi. Alí echi Walubela Riosi tarapé ikaléami ju. Alí ki'yá chokichí jonsa mapalí ke cho niwárami níili je'ná kawí, echalí Riosi bichíwaga anili mapu sinibí niráa pirélama si'néami mapu ikí galá bichíima Jesucristo niráa. ³ Alí jipi mapalí ma sébali té-tali, jipi bukúlí jonsa, Riosi nulali mapurigá Binói Ra'íchala galá nawésarami níima echi jaré pagótami. Echijiti echi Walubela Riosi mapu tamujé tamí Ku'wíriami ju, tamí we nuleli Binói Ra'íchala nawisánala, mapurigá Riosi Binói chopi nakili nulayá. ⁴ Jipi, mujé Tito, nimí je'ná jerigá osé. Mujemi ne bichíwali mapurigá nijé binói ranala niráa jumi mapujítimi galá bichíili achigórigá mapurigá nijeni bichíi. Wabeni nakí mapurigá Riosi Onorúami, echi Walubela Jesucristo yuwa, mapu tamujé tamí Ku'wíriami ju, sinibí mi wabé natimaka ku'wírrama mapurigami kilí ologá bitélama.

⁵ Echijiti chabénala nijé nimí ariweli echo'ná Krétachi anilíwachi nasipa walú ba'wírali nirúami kawí, mapurigami galá wachínaga katiwama suwaba Riosi nóchala echo'ná. Echalí nijé nimí nuleli mapurigami jawama jaré galabé bichíyami rijói echo'ná ibílana mapo'ná jaré bichíyami ritémtami sinibí napawí, mapurigá echi jaré mápumi echirigá jawa echo'ná nochama echi auché jaré napawika bichíyami yuwa mapurigá o'wéala ochérami niráa. ⁶ Galá níima ibili o'wéala ochérami ne wabé galabé ologá pirélasa mapurigá aboni ke siné wi'nijírami níima mapurigá chati sití oláami niráa. Ayénachó arigá 'wérali ju mapu ibili aboni mapu ikí jubéami ju, chopi bilepi mukí upéami níima; ayénachó mapu aboni kúchuwala galá bichíyami níima Riosi; ayénachó mapu aboni kúchuwala ketasi wi'nijírami níima mapurigá chuwé oláami niráa; ayénachó mapu aboni kúchuwala galá nijéwiyami ní-

ma aboni 'wénawala. ⁷ Mapujiti arigá 'wérali ju mapu echi jaré napawika bichíyami o'wéalawala galabé oláami níima, ayénachó mapu aboni ketasi wi'nijírami níima mapurigá chuwé oláami niráa, ayénachó mapu aboni ketasi we nóchami níima, ayénachó mapu aboni ketasi na'áwami níima, ayénachó mapu aboni ketasi bajíami níima echi suguí, ayénachó mapu aboni ketasi 'yékaka ologá 'yéami níima, ayénachó mapu aboni ketasi korúkami níima, mapujiti echi jaré napawika bichíyami o'wéalawala we nocha Riosi nóchala olayá. ⁸ Chopi si'winárigá galá níima mapu aboni sinibí galá narema echi auché jaré ritémtami echo'ná aboni kalíachi. Ayénachó galá níima ibili aboni ne wabé galabé oláami níisa. Arigá 'wérali ju mapu aboni galabé 'nátami níima, ne wabé galabé wachínaga oláami niráa. Arigá 'wérali ju mapu ibili aboni chopi nakimea olánala mapurigá Riosi nakí, ayénachó mapu aboni tarapé chuwé oláami níima. ⁹ Ayénachó arigá 'wérali ju mapu ibili rijói mapu o'wéala ochérami niráa nocha echi auché jaré napawika bichíyami yuwa ne galá bichíyami níima echi Galabé Riosi Ra'íchala, mapurigá aboni bachá niráa binératami níili. Alí ibili aboni ayénachó galá omérama binériya echi auché jaré, ayénachó aboni galá omérama bichíiriya echi auché jaré mapu we sayéraga ra'ícha.

¹⁰ Echirigami chopi jawama jaré galabé oláami rijói mapurigá o'wéala ochérami niráa, mapujiti wikabé auché jaré we sayérami ju Riosi. Alí jaré ibili echi Juríosi pagótami ne wabé simírami sayérami ju Riosi. Alí echi jaré aboni ke newalite niráa ra'ícha, ayénachó aboni wabé 'yékami ju. ¹¹ Arigá 'wérali ju mápumi ketasi ariwema mapu echiyiri binériami waminabi binérama echi jaré pagótami, mapujiti aboni wabé si'winárigá binera mapuyénasi ne si'néami echo'ná jaréana bitichí piréami pagótami wabé si'winárigá bichíima. Echalí aboni ketasi galá bichíima Riosi Ra'íchala, mapujiti echi jaré 'yékami binériami wépi binera echi mapu ketasi galá ju, mapujiti aboni 'yékaka niráa ménali wenomí.

¹² Chabé ki'yá bilé rijói nawésami echo'ná Krétachi bitéami jeanili: Ne si'néami jena'í Krétachi piréami pagótami ne wabé 'yékami ju. Ne si'néami wabé jobátami niráa ju. Aboni ne wabé simírami ko'wéami ju, ayénachó aboni ne wabé nasinákuli ju. ¹³ Echi rijói ne bichíwaga anili. Echijiti nijeni nakí mápumi wabé

oyérama echi jaré aboni, mapurigá aboni chopi bichíi-ma echi mapu ne bichíwali ju. ¹⁴ Ne galá oyéraga ané aboni mapurigá ketasi bichíi-ma mapurigá echi jaré Juríosi pagótami 'yékaka ireta. Ayénachó oyéraga ané mapu aboni ketasi nijéwaga olama mapurigá echi jaré pagótami nulá, ne si'néami mapu ikí ketasi bichíinali echi ne Bichíwali.

¹⁵ Echi jaré mapu ikí Riosi ma galabé niráa 'natáraliko, abóniko chopi ne galabé niráa 'nata suwaba namuti jiti. Chopi echi auché jaré ke bichíyami pagótami ketasi galabé 'natáratami ju, echijiti aboni chopi wabé chati sitíi 'nata suwaba namuti jiti, mapujiti aboni ne wabé chati sitíi 'natáratami ju. A'lí mapalí aboni we chati sitíi olá, echalí aboni ketásirapé o'mona. ¹⁶ Echi jaré aboni sinibí aní mapu aboni galá bichíi Riosi, chopi aboni wabé 'yékaka echirigá aní, mapujiti aboni ketasi galabé olá, chopi echi auché jaré mapu ikí bichíi Riosi sinibí ne wabé galá olá. Echi jaré chati sitíi oláami chopi ne wabé simírami chati sitíi olá. Abóniko ketasi nijéwami ju Riosi. A'lí aboni ketasi omero galabé olayá.

Echi galabé binérawami

2 Mujé Tito, galá níima mápumi sinibí ne galabé niráa ra'ichása achigórigá mapurigami ne galabé niráa binératami níili. ² Galá nawésaga ruyé echi jaré ochérami mapu aboni ketasi tékami níima, chopi mapu aboni sinibí galabé oláami níima. Ayénachó nawésaga ruyé mapu aboni sinibí galabé 'nátami níima, ayénachó mapu aboni sinibí galá bichíyami níima. Ayénachó nawésaga ruyé mapu aboni sinibí wabé galéami níima, ayénachó mapu aboni arigá anacháma mapalí aboni risúu olárami ju. ³ Ayénachó echirigá achigórigá ruyé mapu echi jaré 'wékami ne galá bichíyami níima Riosi, ayénachó mapu aboni ketasi chuwé sitíi chati ra'ícha 'yénami níima, auché jaré sayéraga. Ayénachó nawésaga ruyé mapu echi jaré 'wékami ketasi bajíami níima suguí. Galá níima mapu aboni chopi we galabé oláami níima, mapurigá echi auché jaré muguí echirigá riwisá, galá binema achigórigá galabé olayá. ⁴ Ayénachó galá níima mapurigá echi auché jaré muguí mapu ketasi 'me 'wékami ju galá binema galeya aboni kunala, ayénachó mapu aboni binema galeya aboni kúchuwala. ⁵ Ayénachó galá níima mapu echi jaré 'wékami galá binérama echi auché jaré muguí mapurigá aboni ketasi chuwé olama, chopi mapu ibili bilepi rijói yuwa bitélama. Ayénachó galá níima mapu echi jaré 'wékami binérama echi auché jaré muguí mapurigá aboni galá nocháma echo'ná ibílana aboni pirélachi, ayénachó mapu ibili galabé oláami níima, ayénachó mapu ibili ne galá nijéwami níima aboni kunala, mapurigá ke wesi echi auché jaré omérama sayéraga ra'ícha echi Wabé Gal-

abé Riosi Ra'íchala, siné káachi riwisá mapu jaré muguí bichíyami ketasi galá olá.

⁶ Mujé Tito, nimí nulé mápumi achigórigá ruyema echi auché jaré ri'malí mapurigá aboni ne galabé wachínaga 'nátami níima. ⁷ Ayénachó nijé nimí nulé mapu mujemi ne suwaba galabé olama, mapurigá echi auché jaré témali echirigá riwisá ayénachó binema galabé olayá. Ne sinibí galá bineri echi Galabé Riosi Ra'íchala, galá wachínaga ologá mapurigá Riosi nakí. Sinibí galabéala 'nalí 'nátaga bineri, ne wabé galabé niráka Riosi Ra'íchala. ⁸ Sinibí ne galá wachínaga ra'ichá mapurigá ke wesi mi wi'nijima mapurigá chuwé ra'íchami niráa. Echalí echi jaré mapu ikí mi kichiko ne wabé riwélama mapujiti aboni ketasi omérama sayéraga ra'ícha jeanigá mapu tamujeta chati sitíi oláami ju.

⁹ Nijé nimí nulé mápumi ruyema echi jaré pióntami galá bichíyami mapu aboni ne galá nijéwami níima echi jaré aboni o'wéalawala yuwa. Ne galá nawésaga bineri mapurigá echi jaré pióntami bichíyami sébali galá nocháma, mapurigá aboni o'wéalawala nulé, ayénachó mapu aboni ketasi ku kuwana ni'yókami níima. ¹⁰ Ayénachó nulé mapu echi jaré galá bichíyami pióntami ketasi chigóoma echi jaré aboni o'wéalawala níwala namuti. Chopi galá níima mapu aboni sinibí ne galá wachínaga oláami níima, mapurigá aboni o'wéalawala echirigá riwisá animea mapu Riosi Ra'íchala binékowami ne wabé galabé ju. A'lí echi Walubela Riosi, mapu tamujé tamí Ku'wíríami ju, waminabi walubéraga anérami níima.

¹¹ Echi Walubela Riosi ma tamujé tamí machírali mapurigá Binói ne wabé galéami ju, echijiti Binói ku wikáwama ne si'néami pagótami mapu ikí galá bichíi-ma Jesucristo niráa. ¹² A'lí mapujiti Riosi echirigá ne wabé simírami galabé ju, echijiti tamujeta binératami ju máputa waminá ariwebo suwaba chati sitíi oluwáwami, ayénachó máputa tarapé chati sitíi oláanalabo mapurigá echi auché jaré jena'í wichimóbachipiréami sinibí chati sitíi olánali. A'lí bicheta binératami ju máputa galabé wachínaga ologá pirélabo jena'í wichimóbachí, ne wabé galá 'nátami niráa, ayénachó máputa sinibí galá o'wikébo Riosi. ¹³ Ayénachó tamujeta binératami ju máputa galá bichíiga buwebo mapuyénasí echi tamujé Walubélawala Jesucristo ku nawama jena'í wichimóbachí mapurigá ne Walubela niráa, mapujiti Binói tamujé Riósawala ju, ayénachó Binói tamujé tamí Walubela Ku'wíimi ju. Echalita 'nebo mapurigá ne wabé galabé niráa sebama ne suwaba mapurigá ne bichíwaga anirúami ju echo'ná Riosi Ra'íchala oselíwalachi. ¹⁴ Mapujiti echi Walubela Jesucristo, ki'yánala niráa, a Binói nijali tamujé tamí jiti mapurigá Binói waminá mi'lirúami níima echo'ná kúrsichi michóniga, tamujé chati sitíi olalila jiti. Jesucristo echirigá olali mapujiti Binói we nakili tamujé tamí ku wikáwánala suwaba mapurigata chati sitíi olali, ayé-

nachó mapurigá Binói tamujé tamí suwaba ku bi'wama, mapurigata Binói níwala pagótami níbo, ayénachó mapurigata ne wabé nakíami níbo galabé olánala.

¹⁵ Arigá 'wérali ju mapu mujemi sinibí je'ná jerigá galá nawésaga binérama echi jaré pagótami, ne galá bichíiraga aboni. Ayénachó we oyera echi jaré mapu ikí ketasi galá nijéwami ju. Ketasi ariwé mapurigá echi auché jaré pagótami mi ke 'me niráma.

Pablo ruyegá aní mapu churigá galá níima olasa si'néami echi jaré bichíyami

3 Mujé Tito, we galá ruyé echi jaré napawika bichíyami mapu aboni ne galá o'wikéami níima echi jaré aboni igúsawala, ayénachó echi auché jaré aboni o'wéalawala. Galá ruyé mapu aboni ne galá nijéwami níima, ayénachó mapu aboni sinibí nakíami níma galabéala 'nalí olánala. ² Ayénachó galá ruyé mapu aboni ke wesi sitila anema. Ayénachó ruyé mapu aboni sinibí kilí ologá pirélama, ne galá natimáami niráa. Galá níima mapu echi jaré bichíyami sinibí kilí oláami nílama si'néami echi auché jaré pagótami yuwa.

³ Mapujiti chabénala tamujé aboni ayénachó ke newalite niráa níilate mapurigá echi auché jaré, ayénachóta ketasi nijéwami níili Riosi. Echalita chopi 'wigáami niráa 'yéнали, ayénachóta chuwé ologá piréali. Echalita wabé chati sitíi olali, suwaba namuti chati sitíi oluwáwami, ayénachóta wabé korúkami níili. Echalita ne wabé nakichíami níili, ayénachóta wabé nakichiga 'yéнали a'nagupi. ⁴ Chopi wakinánala mapalí echi Walubela Riosi, mapu tamujé tamí Ku'wíimi ju, galá machírali jena'í wichimóbachí piréami mapu Binói ne wabé simírami natimáami ju, ayénachó mapalí Riosi galá machírali aboni mapu Binói ne wabé galé si'néami jena'í wichimóbachí piréami, ⁵ echalí Riosi tamujé tamí ne wabé galigá ku wikáwali. Chopi tamujeta ketásirapé namuti galabé niráa olali mapurigá Riosi echijiti tamujé tamí ku wikáwama; mapujítita ketasi omérali galabé olayá. Echalí Riosi tamujé tamí ku wikáwali chopi mapujiti Binói tamujé tamí ne wabé natimali. Echalí Riosi tamujé tamí ku bi'wali pachana tamujé sulálachi suwaba mapurigata chati sitíi olali, mapurigata auchecho siné bukulíwami niráa ku ranarúami níbo. Ayénachó Riosi tamujé tamí ku bi'wali, echi Wabé Galabé Riosi Iwigala jiti, echi mapu Riosi tamujé tamí 'yali mapurigata bukulíwami niráa ku pirélabo sinibí niráa. ⁶ Echalí Riosi tamujé tamí ne wabé simírami 'yali echi Galabé Riosi Iwigala mapujítita galá bichíili echi Walubela Jesucristo niráa, echi mapu tamujé tamí ku Wikáwami ju. ⁷ A'lí Riosi tamujé tamí echirigá 'yali echi Galabé Riosi Iwigala, mapurigá Riosi Binói echijiti galá omérama tamujé tamí nareya ma-

purigá Binói kúchuwala niráa, mapujiti Riosi ne wabé galabé ju. A'lí Riosi echirigá olali mapurigá tamujeta echijiti 'yárami níbo mapurigata sinibí niráa pirélabo, achigórigá mapurigata bachá niráa bichíwaga anérami níili, mapurigá osirúami ju jena'í Riosi Ra'íchala oselíwalachi.

⁸ Je'ná jerigá mapurigá nijeni aní, ne bichíwali ju. Ayénachó nijeni nakí mápumi sinibí ne wabé nílaga je'ná jerigá nawésama echi jaré pagótami, mapurigá echi jaré mapu ikí galá bichíyami ju Riosi sinibí galabé ologá pirélama. Ne suwaba je'ná jerigá mapurigá nijeni mi oséli ne wabé galabé ju. Ayénachó si'néami mapu ikí je'ná jerigá olako, galá ku'wíratami níima.

⁹ Mujé Tito, ketasi ra'ichá wiká namuti jiti rugá mapu ke newalite niráa ju. Ketasi ra'ichá mapurigá jaré pagótami chopi nakí ra'ichánala aboni a'nayáwali jiti irétaga rugá. Ketasi cho wiká namuti jiti rukugá yóniga ra'ichá echi nulalíwami jiti mapurigá echi walula Moisesi osogá nulali, mapujiti suwaba je'ná jerigá ra'ichálawami ketasi galá ju.

¹⁰ Mujé Tito, galá oyéraga ruyé mapuyíripi rijói mapu a'nagupi na'áwataga rojuana echi auché jaré napawika bichíyami, mapurigá echi rijói ketasi waminabi echirigá olama. A'lí a echi rijói waminabi echirigá na'áwataga rojonásagá echi auché jaré napawika bichíyami, echalí auchecho siné oyéraga ruyé mapurigá ketasi echirigá olama. A'lí a échiko arigá waminabi echirigá olásagá, echalí waminá julá echiyiri rijói echo'ná 'yemi napawika bichíyamichi jonsa, ¹¹ mapujiti mujemi echijiti galá machimea mapu echiyiri rijói we chati sitíi ologá, ma si'wina wichili. Ayénachómi machimea mapu echiyiri rijói ma wi'nijírami ju mapujiti binói wabé chati sitíi olali.

¹² A'lí mapalí nijeni julama echi Artémasi riwéami riji-mala echo'ná mujé yuwa, mapalini echo'ná julama echi Tíkiko riwéami kéremá, echalí we sapú echo'ná Nikópolichi anilíwachi simigá, mapujiti nijeni echo'ná asimea, mapujítini nakí mapurigani echo'ná bitélama jipi romó. ¹³ Pe waminana echo'ná simírama echi Sénasi riwéami rijói mapu we machíami ju echi nulalíwami. Echi Apolo riwéami ayénachó echo'ná simírama. Suwaba galá ku'wíra aboni, ne suwaba mapu ikí aboni newalé, mapurigá aboni we kanílaga waminabi simama mapo'ná aboni simiba. ¹⁴ Echirigá nulé echi jaré tamujé níwala napawika bichíyami mapurigá aboni echirigá ku'wírama echi Sénasi, echi Apolo, mapurigá echi jaré tamujé níwala ayénachó binema ne galabé ologá ku'wíriya echi jaré we newaléami mapu ikí Riosi jiti julárami ju nawésanala, mapurigá echi jaré tamujé níwala ritémtami sinibí galá ku'wíriami níima.

¹⁵ Si'néami echi auché jaré mapu tamí yuwa muchuwi mi galá ripora. Mujé ayénachó ripori echo'ná piréami napawika bichíyami, si'néami mapu ikí tamujé tamí

wabé galé. Nijeni nakí mapu Riosi sinibí waminabi
ku'wírama si'néami 'yemi. ¡Echirigá níima!

Hebreos

Riosi júuli kepu Raná ra'íchanala jena'í wichimóbachí piréami pagótami

1 Chabé ki'yá Riosi wisabé ra'íchali echi jaré ki'yánala piréami tamujé pagótamawala. Echali Binói wisabé niráa, si'winárigá ra'íchali echi jaré aboni, mapalí Riosi Binói júuli echi jaré Riosi jiti nawésami ra'íchanala Riosi Binói Ra'íchala niráa. ² Chopi jipi, bukúlí rawé, Riosi Binói tamujé tamí galá ra'íchali mapalí Binói júuli kepu Raná tamujé tamí nawésanala Riosi Binói ra'íchala niráa. Alí ki'yá chokichí Riosi nuleli kepu Raná je'ná kawí niwánala, ayénachó Binói nuleli kepu Raná niwánala ne suwaba echi jaré o'weli namuti mapu ikita ritiwá echo'ná ripá riwigachi. Ayénachó Riosi 'yali echi Binói Ranala ne suwaba echi jaré namuti. ³ Alí echi Walubela Riosi Ranala ne wabé ratábami ju mapujiti Binói Riosi Onorúami ne wabé Walubela ju. Alí echi Walubela Riosi Ranala achigó yiri ju Riosi Onorúami yuwa. Ayénachó echi Walubela Riosi Ranala, Binói walubela Ra'íchala jiti, galá jiwébana suwaba namuti mapu ikí nirú, mapurigá ketasi waminá suwibama. Alí mapalí echi Walubela Riosi Ranala ma katéwali mapu churigá galá ku bi'wama mapurigá tamujé pagótami chati sitíi olali, mapujiti Binói mukuli echi pagótami chati sitíi olalila jiti, echali Riosi Ranala, ne wabé Walubela niráa, ma ku asíbali echo'ná ripá riwigachi, echo'ná watonachi mapo'ná echi Walubela Riosi Onorúami ne wabé omériga nulá.

Echi Walubela Riosi Ranala ne wabé simírami Walubela ju, ketasi mapurigá echi jaré Riosi kapitánawala

⁴ Alí echi Riosi Ranala ma sébali ne wabé simírami Walubela níliya, ketasi mapurigá echi jaré o'wéala Riosi kapitánawala, mapujiti echi Walubela Riosi ma 'yali mapurigá echi bilepi Binói Ranala ne wabé simírami Walubela níima ketasi mapurigá echi jaré o'wéala Riosi kapitánawala. ⁵ Mapujiti Riosi ke siné jeaneli nibilé Binói kapitánawala jeanigá:

Mujemi ju keni Raná;

Jipi rawé Nijé nimí iwítali.

Chopi Riosi ne bichíwali echirigá aneli echi Bilepi Binói Ranala. Ayénachó Riosi ke siné anili, ke bilé Binói kapitánawala jiti rugá, jeanigá:

Nijeni níima echi Binói Onolá.

Alí echi Binói, Nijé Ranala níima.

Chopi Riosi ne bichíwali echirigá anili echi Bilepi Binói Ranala jiti rugá.

⁶ Alí mapalí Riosi pali echi bilepi ne bacháwala Binói Ranala jena'í wichimóbachí, echali Riosi jeaneli echi jaré Binói kapitánawala jeanigá:

¡Ne si'néami 'yemi waminabi walubéraga anesi echi Bilepi Riosi Ranala!

⁷ Chopi mapalí Riosi ra'íchali echi jaré Binói kapitánawala jiti rugá, echali jeanili:

Riosi olá echi jaré Binói kapitánawala mapurigá iwigá niráa.

Ayénachó Riosi olá echi jaré Binói níwala nagúurami mapurigá rajáami niráa.

⁸ Chopi mapalí Riosi ra'íchali echi bilepi Binói Ranala, echali jeaneli:

Mujemi Walubela Riosi ju. Alí Mujemi ne Walubela Nuláami níima ne sinibí niráa.

Ayénachó Mujemi sinibí ne wabé wachínaga olama mapurigá ne Walubela Silíami niráa.

⁹ Mujemi wabé galeli echi galabé wachínaga oluwáwami, chópimi wabé kichili echi chati sitíi oluwáwami.

Echijiti Mujé Riósawala mi ne wabé simírami 'yali kanílawami ketasi mapurigá Binói kanírali echi auché jaré mujé apanérawala.

Riosi mi ne wabé simírami 'yali echi kanílawami mapurigá echi jaré ki'yánala piréami pagótami ne wabé simírami ro'weli echi akeite echo'ná moba bilé rijói mo'ólachi mapalí wilárami níili walula niráa.

¹⁰ Ayénachó Riosi jeaneli echi bilepi kepu Raná:

Walubela, ki'yá chokichí mujemi niwáli je'ná kawí.

Ayénachó ne suwaba echo'ná ripá riwigachi nirúami niwárami níili Mujé Binói sikala jiti.

¹¹ Ne suwaba echi jaré namuti mapu Mujemi niwáli suwaba waminá suwibama.

Chopi mujé sinibí niráa bitélama, ne sinibí.

Pe waminana ne suwaba echi jaré namuti suwaba 'ocháarama mapurigá bilé napacha niráa.

¹² Alí mapurigami romínaga katewa bilé napacha, echirigá Mujemi ariwema echi jaré namuti mapu Mujemi niwáli.

Alí ne suwaba nakulíwarami níima.

Chopi Mujé Binói ke siné nakuliwa.

Mujemi sinibí niráa bitélama.

¹³ Alí Riosi ke siné jeaneli bilé Binói kapitánawala jeanigá:

Tamí yuwa, keni watonachi asagá, mapuyénasíni ro'wábama echi jaré mujé sayéla mapurigami omérama moba ri'keka olayá, chopi Riosi ne bichíwali echirigá aneli echi Bilepi Binói Ranala.

¹⁴ Ne si'néami echi jaré Riosi kapitánawala chopi iwigá niráa ju, mapu si'nabí nagúuraga olá Riosi nóchala olayá. Alí Riosi jula aboni ku'wíranala ne si'néami echi jaré pagótami mapu ikí ku wikawárami níima mapalí aboni galá bichíima Jesucristo niráa.

Ketasi ariwesi bichíiya

2 Echijiti arigá 'wérali ju máputa waminabi galá bichíiga nijéwabo echi ne Bichíwali máputa ma námali nawisálawachi, mapurigata ketasi chakena ru-juibo. ² Mapujiti Riosi ne galá machírali echi jaré ki'yá piréami pagótami mapu Binói nulalila ne bichíwali níili, echi mapu echi jaré o'wéala Riosi kapitánawala ma osirúami niráa 'yali echi jaré ki'yá bachánala piréami pagótami. Alí echalí ki'yá rawé echi jaré pagótami mapu ikí chati sitíi ologá, ketasi galá nijéwaga olali mapurigá aboni echirigá nulérami níili, abóniko arigá walú kastigo 'yárami níili, mapalí Riosi Binói we galá wachínaga ologá waminá kastigo 'yali. ³ ¿Churigá bicheta ku wikawárami níibo tamujé jipi piréami pagótami, ata ketasi bichíiga nijiyásagá mapurigá Riosi ne wabé simírami nakí tamujé tamí ku wikawánala jipi rawé? Je'ná Galabé Riosi Ra'íchala ne bachá niráa nawisárami níili echi Walubela Jesucristo jiti. Alí echi jaré mapu galá kipúlíko, abóniko ayénachó galá machírata-mi níili mapu Riosi Ra'íchala ne bichíwali ju. Echalí aboni ayénachó echirigá achigórigá tamujé tamí bichíwaga ruyeli, mapurigá tamujeta ayénachó echirigá nawésabo echi auché jaré pagótami. ⁴ Alí Riosi ayénachó galá machírali jipi piréami pagótami mapu Binói Ra'íchala ne bichíwali ju, mapujiti Riosi wisabé ne wabé omériga olali wikabé namuti mapurigá ke wesi pagótami omero olayá. Ayénachó Riosi 'yali mapurigá echi jaré bichíyami wisabé wabé omériga olama mapurigá ke wesi auché jaré pagótami omero olayá. Alí echi Wabé Galabé Riosi Iwigala 'yárami níili echi jaré galá bichíyami pagótami mapurigá aboni wisabé si'winárigá ne wabé omériga olama mapurigá Riosi chopi nakí.

Jesucristo bitéali jena'í wichimóbachí mapurigá Rijói niráa

⁵ Alí ki'yá chokichí mapalí Riosi niwáma riwéali je'ná kawí, echalí Riosi ketasi risensia 'yali echi jaré o'wéala Riosi kapitánawala mapurigá aboni nulama mapurigá o'wéala niráa jena'í wichimóbachí, chopi Binói 'yali ma-

pu echi Bilepi Riosi Ranala mapurigá Walubela Nuláami níima jena'í wichimóbachí waminánomí rawé, mapurigá tamujeta rugá nawesa. ⁶ Mapujiti echo'ná biléana Riosi Ra'íchala oselíwalachi je'ná jerigá ne bichíwaga osirúami ju:

¿Chuyena Walula ju echi Rijói, mapurigá Mujé Riosi galá 'nata Binói jiti?

¿Chuyena Walula ju echi Rijói, mapurigá Mujé Riosi galá natimá echi Binói?

⁷ Mujé Riosi pe téeli tabéala niráa niwálimi echi Rijói, ketasi mapurigá echi jaré o'wéala Mujé kapitánawala.

Chopi Mujemi arigá ma Walula niráa niwáli echi Rijói mapurigá ne Walubela Nuláami níima, ne suwaba echi jaré namuti yuwa mapu ikí Mujemi niwáli.

⁸ Echirigá Mujé Riosi nulali mapu echi Rijói ne Walubela níima suwaba namuti yuwa,

achigórigá mapurigá bilé rijói ne walula ju, mapalí binói galá omero si'néami echi jaré binói sayera.

Alí mapujiti Riosi ma echirigá 'yali mapurigá echi Rijói Walubela níima ne suwaba echi jaré namuti yuwa, alí tarapé biyiri namuti tibili mapu echi Rijói ke omérali.

Chopi jipi rawé tamujeta ketasi cho abijí ritiwá mapu echi Rijói echirigá galá omero suwaba echi jaré namuti. ⁹ Chopi jípita galá ritiwá Jesucristo ne wabé

Walubela niráa, echi mapu Riosi pe téeli niráa tabéala niwáli echi jaré o'wéala Riosi kapitánawala yuwa. Alí Riosi ne wabé galigá nakili mapurigá echi Walubela Jesucristo ne wabé okoka mukumea echi jaré pagótami chati sitíi olalila jiti, mapurigá si'néami mapu ikí bichíi-ma, galá ku wikawárami níima. Echijiti jipi rawé echi Walubela Jesucristo ne wabé walubératami ju, ayénachó Binói ne wabé walubéraga anérami ju, mapujiti Binói echirigá mukuli tamujé chati sitíi olalila jiti.

¹⁰ Alí echi Walubela Riosi ju mapu niwáli ne suwaba namuti. Ayénachó suwaba namuti abijí tibí mapujiti Riosi arigá tibuta ibili namuti. Alí Riosi nakí mapu ne si'néami Binói kúchuwala ayénachó o'wéalatami níima echo'ná ripá riwigachi, mapurigá Riosi Binói ne Walubela ju. Echijiti arigá 'wérali níili mapurigá Riosi ne wabé galabérama echi Walubela Jesucristo, echi jaré namuti jiti, mapurigá Jesucristo ne wabé risúu olárami níili, mapurigá Jesucristo echijiti galá omérama ku wikáwiya echi jaré aboni. ¹¹ Alí Jesucristo ku bi'wá mapurigá echi jaré pagótami ma chati sitíi olali, mapalí aboni galá bichíi. Echalí echi jaré mapu ikí bichíi-ko we onée Riosi Onorúami, achigórigá mapurigá Jesucristo onée. Echijiti echi Walubela Riosi Ranala ketasi riwela ritém-tami niráa anée aboni. ¹² Mapujiti echo'ná Riosi Ra'íchala oselíwalachi je'ná jerigá osirúami ju mapurigá Binói jeanili:

Nijeni nawésama echi jaré keni ritémawa, Mujé jiti rugá.

Ayénachó nijeni nawajima mi nawajímiya echo'ná ne nasipa wiligá echi auché jaré napawika bichíyami yuwa.

¹³ Ayénachó Binói jeanili:

Nijeni galá bichíima Riosi.

Alí auchecho siné jeanili:

Jena'ini atí, echi jaré kúcharami yuwa mapu Riosi tamí 'yali.

¹⁴ Bilepi rijói kúchuwala, a bilepi cho iyéami, si'néami chopi a yiri sapéami ju, ayénachó chopi a yiri léwami ju. Echirigá ayénachó Jesucristo achigó yiri sapéami nílli, ayénachó achigó yiri léwami nílli mapurigá jena'í wichimóbachí piréami pagótami niráa, mapurigá Binói galá omérama mukuyá echi jaré pagótami jiti, mapurigá echirigá suwábama echi riablo, echi mapu galá omérali waminá ko'oyá echi jaré pagótami. ¹⁵ Alí echirigá ologá Jesucristo ma ku machí a'wali mapurigá ma ketasi pióntami niráa níima echi jaré pagótami jena'í wichimóbachí piréami mapu sinibí rawé ne wabé majaga piréali mapurigá pióntami niráa, mapujiti aboni arigá waminá suwimea riwéali. ¹⁶ Mapujiti ne bichíwali ju mapu Jesucristo ketasi ku'wírимиya nawali echi jaré Riosi kapitánawala, chopi Binói ne bichíwali ku'wírимиya nawali echi jaré wikabé Juríosi pagótami mapu echi Abrami kúchala kúchuwala ju. ¹⁷ Echijiti arigá 'wérali nílli mapu Jesucristo, rijói niráa, niwárami níima achigó yiri mapurigá echi jaré Binói ritémawala niráa, mapurigá Binói níima bilé wabé natimáami, galá bichíyami, walubela sacerdote, mapurigá Binói olama Riosi nóchala olayá, mapurigá Binói ma mukugá echi jaré pagótami jiti, echirigá omérama ku wikáwiya echi pagótami chati sitíi olalila. ¹⁸ Alí mapujiti Jesucristo wabé risúu olárami nílli, ayénachó mapujiti echi riablo chati sitíi olánaraga ra'íchali Binói, echijiti Binói ne wabé omero galá natimáa echi auché jaré mapu ayénachó chati sitíi oláratami ju.

Jesucristo waminabi wabé Walubela ju ketasi mapurigá echi walula Moisesi

3 Alí 'yemi keni ritémtami máputamo wabé gal-abératami nílli chabé jonsa mapalítamo bachá niráa galá bichíili, 'yémitamo bayérami nílli mapurigátamo Riosi níwala pagótami níibo. Jipi ne galá 'natasi mapurigá echi Walubela Jesucristo olali, mapujiti Binói Jesucristo, Riosi Onorúami jiti julárami nílli, ayénachó Binói wilárami nílli mapurigá Walubela Sacerdote niráa, echi mapu Walubela Katéwami ju Riosi yuwa, tamujé pagótami yuwa, mapurigá tamujeta galá bichíiga nawesa. ² Mapujiti Jesucristo sinibí ne galá bichíiga olali mapurigá Riosi nakili, mapujiti Riosi wilali echi Binói mapurigá walubela sacerdote niráa. Alí echi walula Moisesi ayénachó achigórigá galá olali suwaba mapu ikí Riosi 'yali mapurigá Binói olama echo'ná echi

jaré Riosi kúchuwala yuwa. ³ Chopi galá níima mapu echi Walubela Jesucristo waminabi ne wabé simírami walubéraga anérami níima, ketasi mapurigá echi Moisesi. Alí echirigá ju achigórigá mapurigá bilé rijói onorúami ne wabé simírami walula ju, ketasi mapurigá echi jaré binói kúchuwala. ⁴ Alí ibili echi jaré kúcharami arigá bilepi rijói kúchuwala ju, chopi echi Walubela Riosi niwáli ne si'néami echi jaré pagótami mapu ikí nirú. ⁵ Echi walula Moisesi ne bichíwali galá olali echo'ná echi jaré Riosi kúchuwala yuwa, mapurigá Riosi piónwala niráa, mapujiti binói julárami nílli nawésanala echi jaré Riosi kúchuwala echi jaré namuti jiti mapu Binói Riosi rumea riwéali pe waminánomí. ⁶ Chopi echi Walubela Jesucristo sinibí ne suwaba galá bichíwaga olá tamujé tamí yuwa máputa Riosi kúchuwala ju, mapujiti Binói echi bilepi Walubela Riosi Ranala ju. Alí Jesucristo sinibí echirigá bichíwaga olama tamujé tamí yuwa, ata sinibí najátasaga Binói yuwa, ayénachóta sinibí galá bichíisagá echalí ne jubá yénasí, ayénachóta sinibí galá kanílasagá mapujítita galá bichíi Binói niráa.

Riosi pagótamawala arigá isábama

⁷ Echijiti mapurigá echi Wabé Galabé Riosi Iwigala jeaní:

Jipi rawé átamo námasagá mapurigá Riosi aní,

⁸ Ketasi biwárami níisi 'yemi sulálachi niráa, mapurigá echi jaré ki'yá piréami 'yemi pagótawala wabé biwárami suléami nílli.

Alí aboni ketasi galá nijéwali Riosi, chopi aboni wabé yórali Riosi mapalí aboni 'yénali echo'ná biléana waná kawichí.

⁹ Alí echi Wabé Galabé Riosi Iwigala waminabi jeaní:

Echo'ná waná kawichí echi jaré ki'yá piréami 'yemi pagótawala ketasi tamí nijéwali, chopi aboni tamí yórali nawosa makói bamíbbali yénasí, mapalí aboni arigá galá riwali mapurigá Nijeni wisabé ne wabé omériga olali mapurigá ke wesi rijói omero olayá.

¹⁰ Echijiti Nijeni yoli echi pagótami yuwa.

Alí Nijeni bichíwaga jeanili: Aboni sinibí we chuwé 'nátaga 'yena echo'ná aboni sulálachi.

Alí aboni ke siné nakili machináliya Nijé buwilá.

¹¹ Echijiti Nijeni ne wabé yoli aboni yuwa. Ayénachó Nijeni ne bichíwaga jeanili mapu aboni ke siné tamí yuwa mo'wigá isábama.

¹² Keni ritémawa, a aboni niráa ne galá tibusí mapurigá ke wesi 'yemi chati sitíi sulérama, chopi mapurigá si'néami 'yémitamo sinibí ne galá bichíyami níibo, mapurigátamo ke siné ariwebo bichiya echi sinibí bitéami Riosi. ¹³ Chopi sinibí rawé a'nagupi waminabi galá bichíratasi mapuyénasítamo abijí piré jena'í wichimóbachí, ayénachó mapuyénasítamo abijí galá oméрабо bichíisiya echi Walubela Jesucristo niráa, ma-

purigá ke wesi 'yemi 'yékarami níibotamo, echi we chati sitíi oluwáwami jiti, ayénachó mapurigá ke wesi 'yemi echijiti ke nijéwiyami níibotamo Riosi, echo'ná pachana 'yemi sulálachi niráa. ¹⁴ Mapujiti echi Walubela Jesucristo abijí tamujé tamí ku'wírama echalí ne jubá rawé yénasí, ata sinibí ne galá bichíísagá mapurigata chabé chokichí jonsa bichíili.

¹⁵ Alí echo'ná Riosi Ra'íchala oselíwalachi je'ná jerigá anirúami ju:

Jipi a 'yémitamo námasagá mapurigá Riosi aní, ketasi biwárami níisi echo'ná 'yemi sulálachi niráa, mapurigá echi jaré ki'yá piréami 'yemi pagótawala wabé biwárami suléami níili, alí aboni ketasi galá nijéwali Riosi.

¹⁶ ¿Chigá biché níili echi jaré mapu galá namsa Riosi Ra'íchala arigá ketasi galá nijéwali? Ne bichíwali níili ne si'néami echi jaré mapu echi walula Moisesi ku machí a'wali echo'ná Ejíptochi anilíwachi kawírali jonsa. ¹⁷ Alí ¿chigá yuwa yoli Riosi nawosa makói bamíwali yénasí? Ne bichíwali níili echi jaré mapu ikí chati sitíi olali, echi jaré mapu ikí waminá suwili echo'ná waná kawichí.

¹⁸ Alí ¿chigá níili echi jaré mapu Riosi bichíwaga aneli mapu aboni ketasi omérama mo'wigá isaba Binói yuwa? Ne bichíwali níili echi jaré mapu ketasi galá nijéwali Riosi. ¹⁹ Echirigata ma galá machí mapu aboni ketasi omérali mo'wiyá Riosi yuwa, mapujiti aboni ketasi bichíili Riosi.

Echo'ná Riosi Ra'íchala oselíwalachi

4 Echo'ná Riosi Ra'íchala oselíwalachi osirúami ju mapurigá Riosi ne bichíwaga anili mapurigá si'néami mapu ikí bichíima Jesucristo niráa, galá mo'wimea isábabiya Riosi yuwa, echo'ná ripá riwigachi. Echirigá jipi rawé mapuyénasí Riosi abijí echirigá tamujé tamí bichíwaga ané, ne galá níima ibili tamujé, aboni niráa tibusá, mapurigá ke wesi tamujé, siné káachi, ke 'me sebámiré echirigá mo'wigá isaba Riosi yuwa, echo'ná ripá riwigachi. ² Mapujiti tamujé ayénachó galá nawésarami níili echi Galabé Riosi Ra'íchala, achigórigá mapurigá aboni nawésarami níili, chopi aboni ketásirapé ku'wíratami níili mapalí aboni námali echi Galabé Riosi Ra'íchala, mapujiti aboni ketasi galá bichíili. ³ Chopi tamujé máputa ma galá bichíili, tamujeta ju máputa mo'wiboa isábabiya Riosi yuwa echo'ná ripá riwigachi. Chopi Riosi anili mapu jaré ketasi echirigá mo'wili isábabiya Binói yuwa, mapalí Riosi jeanili:

Echijítini wabé yoka je'ná jerigá nulali: Aboni ketasi isábama tamí yuwa.

Chopi ki'yá chokichí jonsa mapalí Riosi sunili niwayá je'ná kawí, echalí jonsa Riosi ma sunili Binói nóchala.

⁴ Mapujiti auché biléana echo'ná Riosi Ra'íchala os-

elíwalachi je'ná jerigá osirúami ju mapurigá Riosi anili echi kicháosa rawé jiti rugá:

Echalí kicháosa rawé echi Walubela Riosi galá isábali, mapujiti Riosi ma suwaba sunili Binói nóchala.

⁵ Alí auché biléana echo'ná Riosi Ra'íchala oselíwalachi je'ná jerigá osirúami ju mapurigá Riosi jeanili:

Echi jaré aboni ketasi mo'wimea mapurigá aboni tamí yuwa isábama.

⁶ Echirigá bichíwali ju mapu jaré abijí mo'wimea isábabiya Riosi yuwa, chopi echi jaré chabé ki'yá piréami mapu bachá niráa, námali mapurigá Riosi nakili ku wikawánala echi pagótami, abóniko ketasi mo'wili isábabiya Riosi yuwa, mapujiti aboni ketasi galá nijéwali Riosi. ⁷ Echijiti Riosi auchecho bukulíwami ne bichíwaga anili mapu jipi galá níima echi jaré pagótami we 'yáati galá bichíisa, mapujiti Riosi Binói abijí tamujé tamí ra'ícha mapalita kipú mapurigá Riosi júuli echi walula Rabiri osínala mapurigá echi binói wabé wakinánala osali, mapurigá osirúami ju echo'ná Riosi Ra'íchala oselíwalachi, mapurigá tamujé aboni ma bukulí 'neli osirúami mapo'ná Riosi tamujé tamí jeaneli:

Jipi rawé a 'yémitamo galá námsagá mapurigá Riosi aní, ketasi biwárami suléami níisi.

⁸ Mapujiti a echi Josué riwéami walula ne bichíwali 'yásagá mapurigá echi jaré Isaeli pagótami ne bichíwali isábama Riosi yuwa mapalí binói bayéwali aboni echo'ná Kanánchi anilíwachi kawírali yénasí, echalí Riosi ma ketasi auchecho ra'ichámili wakinana jeanigá mapu waminánomí níima mapalí echi pagótami isábama riwéali Riosi yuwa. ⁹ Echijiti ne bichíwali ju mapu echi jaré Riosi pagótamawala pe waminánomí ne bichíwali galá isábama Riosi yuwa. ¹⁰ Mapujiti si'néami mapu ikí ma galá mo'wigá isábako Riosi yuwa, abóniko ma ketasi waminabi auché nócha, achigórigá mapurigá Riosi Binói ma ketasi nócha mapujiti Riosi ma sunili Binói nóchala. ¹¹ Echijiti galá níima tamujeta we 'yáati ása mapurigata echirigá mo'wigá isábabo Riosi yuwa, mapurigá ke wesi tamujé ketasi bichíyami níibo, mapurigá echi jaré aboni ketasi bichíyami níili.

¹² Mapujiti Riosi Ra'íchala sinibí bitéami ju, ayénachó ne wabé omérami ju. Alí Riosi Ra'íchala waminabi ne wabé simírami oláami niráa ju, ketasi mapurigá mapuyíripi wi'lí ripiyá a'nagú okoná oláami niráa, mapujiti Riosi Ra'íchala ne wabé pachá seba echo'ná echi jaré pagótami sulálachi, mapurigá echi ripiyá wabé pachá chi'wana. Echirigá ayénachó Riosi Ra'íchala wabé pachá chi'wana mapuyénasí seba echo'ná pachana echi jaré pagótami aliwálachi, echo'ná aboni iwigálachi ayénachó, mapuyénasí Riosi Ra'íchala ne galá machiná niráa, machira mapurigá aboni 'nata, ayénachó mapurigá aboni chopi 'nátaga nakí olánala. ¹³ Alí Riosi sinibí ne galá ritiwá ne suwaba namuti mapu ikí Binói

niwáli, echijiti ke bilé wesi omero waminá ichipiya mapurigá Riosi ma ketasi riwimea. Alí arigá 'wérali ju ibili niráa tamujé ku ruyesa Riosi ne suwaba mapurigata ologá piréali jena'í wichimóbachi. Alí Riosi echirigá galá machiná ritiwá suwaba namuti, ayénachó Binói galá machí suwaba namuti.

Jesucristo ju echi ne Walubela Sacerdote

¹⁴ Echi Walubela Jesucristo Riosi Ranala ju, ayénachó ne walubela sacerdote anilíwami ju. Binói ma bakili Riosi yuwa echo'ná ripá riwigachi. Echijiti galá níima mapu tamujeta sinibí waminabi galá bichíibo Binói niráa. ¹⁵ Alí tamujé Walubela Sacerdótawala galá omero tamujé tamí natimaya máputa ketasi me jiwérami ju, mapujiti Binói ayénachó chati sitíi oláratami níili, achigórigá mapurigá echi riablo sinibí tamujé tamí chati sitíi olánali, chopi echi Walubela Jesucristo tarapé siné echirigá nijéwaga chati sitíi olali. ¹⁶ Echijiti galá níima tamujé sinibí ne galá bichíiga ra'íchasa Riosi yuwa mapalita risúu olárami ju, ayénachó mapalita newaléami ju. Alí echirigá bichíiga tamujeta mulubéanabo Riosi yuwa, echo'ná Binói níwala walubela asibálachi mapo'ná Riosi sinibí atí mapurigá Binói sinibí ne wabé galigá nulema echi jaré pagótami. Alí a tamujeta echirigá ologá, echalita ne galá natimátami níibo, ayénachó Riosi sinibí tamujé tamí ne wabé galigá ku'wírama mapalita newaléami ju.

5 Mapalí bilé rijói wilárami ju mapurigá walubela sacerdote niráa, échiko echirigá wilárami ju mapurigá binói sinibí olama Riosi nóchala olayá bacháami Riosi yuwa, echi auché jaré pagótami jiti, mapurigá binói ko'wisáa 'yama Riosi jaré namuti, mapurigá echi jaré pagótami chati sitíi olalila galá ku wikawárami níima. ² Alí mapujiti echi ne walubela sacerdote arigá chati sitíi oláami ju, achigórigá mapurigá echi auché jaré pagótami chati sitíi oláami ju, echijiti echi rijói walubela sacerdote galá omero natimáa echi auché jaré pagótami mapu ketasi galá machíami ju, ayénachó echi jaré mapu ma 'wigáami niráa ju. ³ Echirigá echi ne walubela sacerdote sinibí ko'yagá 'yali Riosi jaré namuti echi auché jaré pagótami chati sitíi olalila jiti, chopi mapujiti Binói ayénachó chati sitíi oláami níili, echijiti arigá 'wérali níili mapu binói ayénachó ko'yagá 'yama Riosi auché jaré namuti, echi binói chati sitíi olalila jiti, achigórigá mapurigá binói ko'yagá 'yali echi jaré pagótami chati sitíi olalila jiti.

⁴ Alí ke wesi a binói niráa wiliba mapurigá walubela sacerdote niráa. Chopi Riosi wilá bilé rijói mapurigá walubela sacerdote níima, achigórigá mapurigá Riosi Binói wilali echi Aroni riwéami rijói mapurigá binói walubela sacerdote niráa níima. ⁵ Alí echi Walubela Jesucristo tarapé cho echirigá walubélali Binói niráa mapurigá Binói arigá wilárami níima mapurigá Walubela

Sacerdote niráa. Chopi Riosi Binói echirigá wilali echi Walubela Jesucristo. Alí Riosi Binói níili mapu chabé-nala jeaneli:

Mujemi ju keni Raná.

Jipi nijé nimí iwítali.

⁶ Mapurigá ayénachó je'ná jerigá osirúami ju echo'ná auché biléana osirúamichi mapurigá Riosi jeaneli echi Walubela Jesucristo:

Mujemi Walubela Sacerdote níima ne sinibí niráa, mapurigá echi Melkisereki riwéami rijói ayénachó walula sacerdote níili.

⁷ Alí mapalí echi Walubela Jesucristo bitéali jena'í wichimóbachi mapurigá rijói niráa, echalí Binói ne o'weli ra'íchaga, ne wabé nalaka tániga ra'íchali Riosi yuwa. Alí Riosi galá omérali ku'wíriya echi Walubela Jesucristo mapurigá Binói ketasi mukumea, a Riosi echirigá nakisáagá. Echalí Riosi arigá galá kipuli echi Walubela Jesucristo echirigá aníachi, mapujiti Binói ne wabé galá bichíiga waminabi walubéraga aneli Riosi.

⁸ Alí echi Walubela Jesucristo bilepi Riosi Ranala ju, chopi Binói arigá galá bineli nijéwiya Riosi mapalí Binói Jesucristo arigá wabé risúu olárami níili. ⁹ Alí mapalí echi Walubela Jesucristo echirigá ne sébali riwíralati mapurigá echi galabé nijéwami Riosi Ranala niráa, echalí Binói ma galá omérali ne sinibí niráa ku wikáwiya ne si'néami echi jaré pagótami mapu ikí galá nijéwaga olako mapurigá Binói nulé aboni. ¹⁰ Alí Riosi wilali echi Walubela Jesucristo ne Walubela Sacerdote niráa, achigórigá mapurigá echi Melkisereki walula sacerdote níili.

Echi jaré mapu ketasi bichíyami níima sinibí niráa, arigá kastigo 'yárami níima

¹¹ Jipi tamujeta abijí wikabé namuti níwa máputa wabé nakí 'yemi mi ruyénala Jesucristo jiti rugá, mapurigá Binói ju echi ne Walubela Sacerdote niráa. Chopi je'ná jerigá ne wabé nóchali ju irétaga ruwáwa, mapujiti 'yémitamo ketasi 'me nakí binénala je'ná jeyiri. ¹² 'Yémitamo ma galá omérati riwéali binériya Riosi Ra'íchala echi auché jaré pagótami, mapujiti 'yémitamo ma wisabé bamíbalí jonsa galá nawésarami níili Riosi Ra'íchala. Chopi abijí arigá 'wérali ju máputamo ne bukulíwami niráa auchecho siné binératami níibo Riosi Ra'íchala, achigórigá mapurigátamo chabé chokichí binératami níili. Echirigátamo we newalé echi leche niráa chópitamo ketasi cho omero ko'yá echi jaré ochérami ko'wámawala. ¹³ Alí ne si'néami echi jaré mapu ikí abijí chopi bajiko echi leche niráa, echi jaré mapu ketasi cho galá machiko Riosi Ra'íchala, abóniko abijí mapurigá echi jaré kúuchi chí'íami niráa ju. Alí biché aboni ketasi cho machí galabé wachínaga ologá piréliya mapurigá Riosi nakí. ¹⁴ Chopi echi jaré ma ochérami we ko'wá karúmati echi auché jaré ko'wáa-

mi. Abóniko we nakí machináliya ne suwaba Riosi Ra'íchala, mapujiti aboni ma galá 'nátami ju. Alí aboni we 'nátaga, galá machí mapu chuyiri 'nalí ju echi galabé oluwáwami, ayénachó aboni galá machí mapu chuyiri 'nalí ju echi chati sitíi oluwáwami.

6 Echijiti waminá bacháami nokuísabota echi Walubela Jesucristo bichíisiya, mapuyénasíta ne sébali galá bichíyami níibota. Ketásita chopi ra'ichábo echi jaré namuti jiti máputa ne chokichí bichíili mapalita chótali Jesucristo yuwa najata. Chópita ayénachó waminabi ne wabé simírami ra'ichábo mapu churigá tamujeta omérabo ne sébali galabé niwárami níliya ata waminabi galá bichíisagá Jesucristo niráa. Mata galá bichíili echi Walubela Riosi niráa. Ketásita auchecho wisabé chotabo bichíiya mapurigata ne chokichí jonsa ma galá bichíili. Chabeta chati sitíi oláami níilita, echijítita chopi suwíami níibo riwéali, chopi mata Riosi yuwa ju. ² ma ketasi galá ju máputa sinibí chopi wabé nawésaka ra'ichabo mapu churigá galá níima mapu echi jaré bichíyami ba'wí jiti pagótami níima, nirapé máputa sinibí ra'ichábo jeanigá mapu galá níima mapu echi jaré o'wéala si'winárigá nocháma aboni sikala echo'ná moba echi jaré bichíyami mo'ólachi. Mata galá bichíi mapu echi jaré suwíami ku o'wínama echalí ne jubá rawé, ayénachó mapu echi auché jaré ke bichíyami pagótami sinibí niráa kastigo 'yárami níima, echijiti ma ketasi 'wérali ju máputa sinibí nawésiga ra'ichábo mapu churigá echi jaré suwíami níima mapalí aboni ku o'wínama, nibilé cho mapu churigá echi jaré ke bichíyami sinibí niráa echirigá kastigo 'yárami níima. ³ Chópita waminabi nokuísabo Riosi yuwa, a Binói tamujé tamí risensia 'yásagá.

⁴ Alí jaré mapu we galá machíratami níili echi Galabé Riosi Ra'íchala arigá ketasi bichíili. Aboni galabé niráa mayeli echi galabéala mapu Riosi nijá, ayénachó aboni ma ra'ícharami níili echi Galabé Riosi Iwigala jiti, ⁵ ayénachó aboni galabé niráa mayeli echi Galabé Riosi Ra'íchala, ayénachó aboni galá machili mapu waminánomí Riosi wabé omérami niráa nulama ne sinibí niráa, ⁶ chopi aboni mapurigá waminá chakena rujuíimi niráa, arigá ketasi bichíili. Echijiti jipi aboni ma ketasi omero auchecho siné bukúliwami niráa ku ro'wí Riosi yuwa, mapujiti aboni ma ketasi nakí bichíinala. Alí echirigá ologá aboni ne noguí achigórigá risúu olá echi Walubela Jesucristo, mapurigá auchecho siné echo'ná biléana kúrsichi michóniya niráa, ayénachó mapurigá sitíila ané echi Walubela Jesucristo, bacháami wikabé pagótami yuwa. ⁷ Echi jaré aboni mapurigá echi wi'yé ju mapo'ná we ukú, mapujiti a galá rakésagá karúmati namuti mapu ikí echi pagótami echo'ná íchá, echalí echi wi'yé galabé anérami ju echi Walubela Riosi jiti. ⁸ Alí a echo'ná chopi a'wisáagá karúmati so'uwéami namuti, echi jaré namuti kasalá ayénachó, echalí echi

wi'yé ketasi iré. Alí Riosi chopi we sitíi wi'yé anema, alí waminánomí suwaba waminá ikósarami níima.

Tamujé galá bichíi Riosi, echijiti waminabi nokuísabo galabé olayá

⁹ Alí a tamujé arigá echirigá ra'ichásagá echi auché jaré pagótami jiti rugá, si'néami mapu ikí waminá ariweli bichíiya, ketásita echirigá ra'ícha 'yemi galá bichíyami ritémtami jiti rugá, mapujítita ne bichíwali mayé mapu Riosi waminabi wabé ku'wírama 'yemi, mapujítitamo ma ku wikawárami ju. ¹⁰ Mapujiti Riosi ne wabé wachínaga oláami ju, alí Binói sinibí niráa 'natama mapurigá 'yémitamo wabé galabé olali, ayénachó mapurigátamo ne wabé galigá ku'wírali echi auché jaré napawika bichíyami ritémtami, mapurigátamo abijí sinibí waminabi echirigá olísimí, mapujítitamo ne wabé galé Riosi. ¹¹ Chopi tamujeta nakí mapu ibili 'yemi sinibí waminabi ne wabé nílasagá galá bichíibotamo mapuyénasí 'yemi abijí piré jena'í wichimóbachi, mapurigátamo ne sébali ku'wíratami níibo, mapurigátamo bichíi mapu Riosi 'yemi mi wabé ku'wírama.

¹² Echirigá tamujeta ketasi nakí mapurigá 'yémitamo nasinákuli níibo, chopi mapurigátamo sinibí achigórigá galá bichíiga olabo mapurigá echi auché jaré chabé bachánala piréami galá bichíyami ritémtami olali, si'néami mapu ikí ma narésimí echi ne wabé galabéala mapu Riosi bachá niráa bichíwaga aneli mapu aboni narema riwéali echo'ná ripá riwigachi.

¹³ Alí mapalí Riosi ne bichíwaga aneli echi Abrami mapu binói ku'wíratami níima riwéali, echalí Riosi Binói chopi echirigá ne bichíwaga aneli, mapujiti ke téeli auché bilé walubela waminabi simírami walubela ketasi mapurigá Riosi niráa, echijiti Riosi ketasi echirigá bichíwaga aneli bacháami auché bilé walubela yuwa, chopi Riosi Binói echirigá bichíwaga aneli echi Abrami, ¹⁴ jeanigá: Ne bichíwali Nijé nimí wabé simírami ku'wírama. Ayénachó Nijé nimí 'yama mapurigá mujé kúchuwala auché jaré ne wikabé muwema. ¹⁵ Alí mapalí echi Abrami wikabé bamíbali kilí ologá buweli, echalí binói arigá echirigá 'yárami níili mapurigá Riosi bachá niráa ne bichíwaga aneli. ¹⁶ Mapujiti echi jaré pagótami aní mapu aboni ra'íchala ne bichíwali ju mapalí aboni jeaní: Riosi galá nami máputi chopi bichíwaga aní. Alí aboni echirigá aní mapujiti Riosi ne wabé simírami Walubela ju, ketasi mapurigá echi jaré pagótami. Alí echi pagótami galá bichíiima mapu ne bichíwali ju mapurigá bilé rijói echirigá ne bichíwaga aní. ¹⁷ Echijiti Riosi ayénachó bichíwaga anili mapu Binói ku'wírama riwéali echi Abrami. Echalí Riosi echirigá bichíwaga anili mapujiti Binói nakili ne galá machiná niráa machíranala mapu echi auché jaré pagótami ayénachó ne bichíwali narema achigórigá mapurigá Riosi bachá niráa bichíwaga anili mapu Binói

'yama riwéali. ¹⁸ Echirigá biché nirú okuá Ra'íchali mapu ketasi siné nakulíwarami níima. Riosi Ra'íchala sinibí ne bichíwali ju, ayénachó mapurigá Riosi Binói ne bichíwaga anili sinibí ne bichíwali ju, mapujiti Riosi ketasi bilé ikaléami ju. Alí Riosi sinibí tamujé tamí ne wabé natimaga kanílata echi okuá Ra'íchali jiti, máputa ma tánali mapu Binói tamujé tamí ku'wírama, ayénachó máputa ma galá bichíili mapurigá Riosi tamujé tamí bichíwaga aneli. ¹⁹ Alí tamujé aliwala echijiti sinibí niráa ne bichíwali galá tibútarami ju mapurigá bilé walú barko ne galá tibútarami ju mapalí bilé wabé jiwérami jiero wiya jiti bologá uchárami ju. Echirigá tamujé aliwala ayénachó ne bichíwali, bulirúami niráa, tibútarami ju echo'ná pachá echi ripá riwigachi nirúami Riosi Ri'obáwalachi, ne wabé pachánala, echo'ná kuwana, mapo'ná chukú echi wabé runáami mapuyiri kimá ²⁰ mapo'ná Jesucristo ma bakili mapurigá Binói echo'ná katiwama tamujé tamí jiti, mapujiti Jesucristo wilárami ju mapurigá Binói sinibí niráa ne Walubela Sacerdote níima, achigórigá mapurigá echi Melkisereki walubela sacerdote níili.

Jesucristo ne Walubela Sacerdote ju achigórigá mapurigá echi Melkisereki ne walubela sacerdote níili

7 Alí je'ná Melkisereki ne walula silíami níili echo'ná Salémachi anilíwachi. Alí binói ayénachó echi Ripabé Atíami Riosi níwala sacerdote níili. Alí mapalí echi Melkisereki natipámiya simili echi Abrami mapalí echi Abrami ma omérasa echi auché jaré o'wéala, alí ku nawali echo'ná binói walúlawachi, echalí echi Melkisereki ne wabé galabéraga aneli echi Abrami. ² Echali echi Abrami ku pali wikabé namuti mapu ikí binói ni'yúraga 'yeli echi auché jaré o'wéala. Alí echi Abrami pe bilé 'yesa galá 'yali echi Melkisereki ibílana makói namuti mapu ikí binói ku pali. Alí echi Melkisereki riwalá je'ná jerigá aniwáami ju: Walubela silíami, ne wachínaga oláami. Alí mapujiti walubela silíami níili echo'ná Salémachi anilíwachi, ayénachó je'ná jerigá aniwáami ju: Walubela silíami galabé kilí oláami, mapujiti Salémachi je'ná jerigá aniwáami ju: Mapo'ná echi pagótami galá kilí ologá piré. ³ Ketasi osirúami ju echo'ná Riosi Ra'íchala oselíwalachi mapu churigá riwéami níili echi Melkisereki onolá, nibilé cho osirúami ju mapu churigá riwéami níili binói iyela. Ketasi cho osirúami ju mapu chu riwéami níili binói aparóchawala. Ketasi osirúami ju mapu chu kilíbuko jonsa echi Melkisereki ranarúami níili, nibilé cho mapu chu kilíbuko jonsa binói waminá mukuli. Echijiti echi Melkisereki ketasi achigó yiri níili echi auché jaré sacerdote, echi jaré Juríosi pagótami sacerdótawala yuwa, mapujiti ne si'néami aboni echi chabé ki'yá bitéami Lebí riwéami rijói kúchala kúchuwala níili. Chopi echi Melkisereki sinibí niráa níili Riosi sacerdótawala, ayé-

nachó binói sinibí niráa echirigá níima Riosi sacerdótawala, achigórigá mapurigá echi bilepi Riosi Ranala sinibí niráa ne Walubela Sacerdote níima.

⁴ Galá 'natasí mapu chu yena walubela níili je'ná Melkisereki, mapujiti echi tamujé walúlawala Abrami pe bilé 'yesa galá 'yali echi Melkisereki ibílana makói namuti mapu ikí binói ni'yúraga 'yeli echi auché jaré o'wéala. ⁵ Alí echi walula Moisesi osogá nulali mapu chopi echi jaré sacerdote mapu echi Lebí kúchala kúchuwala ju, sinibí pe bilé 'yesa chapimea ibílana makói namuti mapu ikí echi auché jaré pagótami galá meli. Alí echi auché jaré arigá aboni ritémawala niráa ju, mapujiti ne si'néami aboni echi bilé Abrami kúchala kúchuwala niráa ju achigórigá mapurigá echi jaré Lebí kúchuwala ayénachó echi Abrami kúchala kúchuwala ju. ⁶ Alí echi Melkisereki ketasi bilé Lebí kúchala kúchuwala níili, chopi binói arigá pe bilé 'yeka chapili ibílana makói namuti mapu ikí echi Abrami meli. Alí echi walula Abrami níili mapu Riosi Binói bichíwaga aneli wikabé namuti. Ayénachó echi Melkisereki arigá wabé galabéraga aneli echi Abrami. ⁷ Alí si'néami pagótami galá machí mapu aboni chopi waminabi o'wéalatami níima mapalí aboni wabé galabéraga anérami níima auché jaré jiti mapu waminabi o'wéala ju ketasi mapurigá aboni niráa. Echijiti echi jaré mapu ikí ne bichíwali echirigá galabéraga aneko auché jaré sinibí waminabi o'wéala ju ketasi mapurigá echi auché jaré pagótami mapu echirigá galabéraga anérami juko, echijiti echi Melkisereki waminabi walubela níili ketasi mapurigá echi walula Abrami. ⁸ Jipi rawé tamujé Isaeli pagótami yuwa, echi jaré sacerdote mapu pe bilé 'yesa chapí ibílana makói namuti mapu ikí tamujeta me, abóniko chopi pagótami ju mapu pe waminánomí arigá suwimea, chopi echo'ná Riosi Ra'íchala oselíwalachi, echi Melkisereki jiti rugá, ketasi osirúami ju mapu binói waminá mukuli. ⁹ Alí si'néami echi jaré sacerdote mapu jipi rawé pe bilé 'yesa chapiko ibílana makói namuti mapu ikí tamujeta me, ne si'néami aboni echi Lebí kúchala kúchuwala ju. Chópita galá omero anyá mapu ne si'néami aboni, echi Lebí yuwa, ayénachó echirigá 'yali echi Melkisereki pe bilé namuti ibílana makói mapu ikí aboni meli. Alí aboni echirigá 'yali chabé ki'yá, echalí we yáati mapalí echi Abrami pe bilé 'yeka 'yali echi Melkisereki echi jaré namuti mapu ikí binói Abrami meli. ¹⁰ Echali ke cho ranarúami níili si'néami echi jaré sacerdote mapu jipi rawé pe bilé 'yeka chapiko ibílana makói mapu ikí echi jaré Isaeli pagótami me. Chopi je'ná jerigá 'nátaga, oméрабо anyá mapu echi Abrami galá natétali si'néami aboni jiti mapalí echi Melkisereki natépali echi Abrami. Aboni ke cho ranarúami níili, chopi echi Abrami mapurigá si'néami aboni onolá niráa níima riwéali. Echali echi Abrami echirigá galá natétali si'néami aboni jiti, mapalí binói natétali echi Melkisereki.

¹¹ Echi jaré Lebí kúchala kúchuwala, mapu sacerdote níili, galá 'yali echi jaré Isaeli pagótami echi nulalíwami, Riosi nulalila. Alí aboni ayénachó echi Aroni riwéami rijói kúchala kúchuwala níili, mapu pe kinana bitéali. Alí a echi jaré sacerdote omérasagá ne galabé niráa niwayá echi pagótami mapu arigá galá nijéwaga olali mapurigá aboni echirigá nulérami níili, echalí ma ketasi arigá 'wérali níimili mapu wakinana nawami auché bilé sacerdote mapu ketasi echi Aroni kúchala kúchuwala niráa níima, chopi mapu achigórigá mapurigá echi Melkisereki níisa. ¹² Mapujiti a auché jaré isena rijói jawárami níisagá mapurigá o'wéala sacerdote niráa, echalí arigá 'wérali níima mapurigá echi nulalíwami ayénachó nakulíwarami níisa, mapujiti osirúami ju echo'ná Riosi nulalila oselíwalachi mapu chopi echi jaré Aroni kúchala kúchuwala o'wéala sacerdote níima. ¹³ Chopi echo'ná Riosi Ra'íchala oselíwalachi osirúami ju mapu tamujé Walubélawala Jesucristo ne walubela sacerdote níima. Alí Binói auché biléana rojuáami ju echi jaré Isaeli pagótami. Alí ke wesi echi auché jaré mapu echi Jurá anilíwami rojuáami níili ayénachó walubela sacerdote níili. ¹⁴ Mapujiti galá machirúami ju mapu tamujé Walubélawala ranarúami níili jena'í wichimóbacha mapurigá bilé echi jaré wikabé Jurá anilíwami rojuáami pagótami. Alí echi Moisesi tarapé siné rugá anili mapu echi jaré Jurá anilíwami rojuáami pagótami jawárami níima riwéali, o'wéala sacerdote niráa.

¹⁵ Alí je'ná jerigá abijí waminabi wabé machiná ju a wilibásagá auché bilé si'nú walubela sacerdote mapu achigórigá mapurigá echi Melkisereki niráa níisa, ¹⁶ Echi mapu chopi wilárami ju Walubela Sacerdote niráa mapujiti Binói ne wabé omériga ne sinibí niráa bité, ayénachó mapujiti Binói ketasi siné mukumea. Alí echi bilepi Walubela Sacerdote ketasi wilárami ju chopi mapujiti Binói bilé níili echi jaré Lebí kúchala kúchuwala, mapurigá echi Moisesi osogá nulali mapu echi jaré Lebí kúchala kúchuwala ibílipi niráa, chopi jawárami níima riwéali mapurigá o'wéala sacerdote niráa. ¹⁷ Mapujiti echi Bilepi Walubela Sacerdote jiti rugá, je'ná jerigá osirúami ju mapurigá Riosi jeaneli:

Mujemi ne Walubela Sacerdote níima ne sinibí niráa, achigórigá mapurigá echi Melkisereki ayénachó walubela sacerdote níili.

¹⁸ Echijiti echi nulalíwami ma nakubárami ju mapurigata chabénala nulérami níili, mapujiti echi jaré pagótami ketasi ku'wiratami níima riwéali echi nulalíwami jiti, mapujiti aboni ketasi omérali nijéwaga olayá mapurigá aboni nulérami níili. ¹⁹ Alí echi nulalíwami, mapurigá echi walula Moisesi osali, ketasi omérali galabératiya echi jaré pagótami. Chopi tamujeta máputa ma galá bichíi Jesucristo niráa sinibita galá bichíiga buwé mapurigá Binói Jesucristo tamujé tamí echirigá galabératama. Alí echirigá waminabi galabé ju, mapujítita

mulubéana Riosi yuwa mapujítita ma galá bichíili Jesucristo niráa.

²⁰ Alí Riosi Binói ne bichíwaga anili mapu echi Walubela Jesucristo wilárami níili, mapurigá ne Walubela Sacerdote niráa. ²¹ Chopi Riosi ketasi siné bichíwaga aneli ke wesi auché jaré o'wéala sacerdote jeanigá mapu aboni o'wéala sacerdote níima ne sinibí niráa, chopi echi Walubela Jesucristo jiti rugá, Riosi ne bichíwaga anili mapu Binói ne Walubela Sacerdote ju, mapalí Riosi je'ná jerigá aneli mapurigá osirúami ju echo'ná Riosi Ra'íchala oselíwalachi jeanigá

Echi Walubela Riosi ne bichíwaga anili, alí ma ketasi nakulíwama, chopi je'ná jerigá ne bichíwaga jeaneli:

Mujemi ne sinibí niráa ne Walubela Sacerdote jumi, achigórigá mapurigá echi Melkisereki walula sacerdote níili.

²² Echijiti waminabi wabé galabé ju mapurigá echi Walubela Jesucristo ne bichíwaga anili mapurigá Binói tamujé tamí ku'wirama riwéali, ketasi mapurigá suwaba mapu echi walula Moisesi osogá nulali jeanigá máputa ku'wiratami níibo riwéali, ata suwaba galá nijéwasagá mapurigá binói tamujé tamí osogá nuleli.

²³ Alí wikabé rijói ibílipi niráa ne walubela sacerdote níilasali, mapujiti aboni ibili niráa waminá suwásali, echijiti ma mukusá bilé, echalí auché bilé rijói wilárami níili mapurigá walubela sacerdote niráa. ²⁴ Chopi mapujiti je'ná Walubela Jesucristo ma ketasi auchecho siné mukumea, echijiti Binói ne sinibí niráa níima Walubela Sacerdote niráa. Alí echijiti auché jaré isena rijói ke siné echirigá jawásarami níima mapurigá walubela sacerdote niráa. ²⁵ Echi jaré pagótami chopi omero mulubéana Riosi yuwa mapalí aboni galá bichíi echi Walubela Jesucristo niráa. Alí echi Walubela Jesucristo Binói sinibí niráa bité, echijiti Binói galá omero ku wikáwiya si'néami echi jaré mapu ikí mulubéanako Riosi yuwa mapurigá aboni echirigá ku wikawárami níima ne sinibí niráa, ne sinibí. Alí echi Walubela Jesucristo sinibí niráa bité mapurigá Binói sinibí tánama Riosi aboni jiti.

²⁶ Echirigá mata riwali mapurigá echi Walubela Jesucristo ne bichíwali echiyiri ne wabé simírami galabé oláami Walubela Sacerdote ju mapurigá tamujé pagótami newaleli. Echi Walubela Jesucristo ne wabé galabé oláami ju. Alí Binói tarapé chati sitíi oláami ju, nirapé chibi síami niráa. Alí Binói ketasi olá mapurigá echi jaré chati sitíi oláami pagótami olá. Alí Riosi ma wilali echi Walubela Jesucristo echo'ná ripá riwigachi, ne wabé simírami ripabé niráa, ketasi mapurigá echi auché jaré namuti echo'ná ripá riwigachi nirúami niráa. ²⁷ Alí echi Walubela Jesucristo ketasi achigó yiri ju mapurigá echi auché jaré o'wéala sacerdote niráa, mapujiti arigá 'wérali níili mapu si'néami echi auché jaré o'wéala sacerdote sinibí rawé ko'wisáa 'yama Riosi echi jaré namuti. Ayénachó arigá 'wérali níili mapu

aboni bachá niráa echirigá ko'wisáa 'yama Riosi jaré namuti mapujiti aboni niráa chati sitíi oláami níili, ayénachó pe wakinana arigá 'wérali níili mapu aboni ko'wisáa 'yama Riosi auché jaré namuti echi auché jaré pagótami chati sitíi olalila jiti, mapujiti echi Walubela Jesucristo sinepi niráa, a Binói niráa nijili mapurigá Binói mi'lirúami níima, ne si'néami echi auché jaré pagótami chati sitíi olalila jiti, alí ketasi arigá 'wérali ju mapurigá Binói auchecheo siné echirigá mi'lirúami níima. ²⁸ Chabé ki'yá echi walula Moisesi osogá nulali mapu echi jaré rijói jena'í wichimóbachí piréami jawásarami níima riwéali, ibílipi niráa, mapurigá walubela sacerdote niráa. Alí echi jaré rijói jena'í wichimóbachí piréami arigá ketasi ne sébali galabé oláami ju. Chopi pe wakinánala mapalí echi Moisesi ma echirigá osogá nulali, echalí Riosi Binói bichíwaga anili mapu echi Bilepi Riosi Ranala ne Walubela Sacerdote ju. Alí echi bilepi Riosi Ranala ne wabé simírami galabé oláami ju ne sinibí niráa.

Echi Walubela Jesusi Katéwami ju mapurigá Riosi bukúliwami bichíwaga anili

8 Alí mapurigá tamujeta ma osogá anili, je'ná chopi waminabi walubéala ju: Tamujeta ma níwa echiyiri Walubela Sacerdote, echi mapu ma asíbali echo'ná ripá riwigachi, echo'ná watonachi mapo'ná Riosi níwala walubela asíbalachi ju, echo'ná mapo'ná echi Walubela Riosi atí. ² Alí Binói we olá, Walubela Sacerdote niráa, echo'ná pachá ri'obachi, ripá riwigachi nirúami, mapu echi ne bichíwali Riosi ri'obáwala ju, echi mapu echi Walubela Riosi Binói gayénali, echi mapu ke wesi rijói niwáli. ³ Mapujiti ne si'néami echi auché jaré o'wéala sacerdote jawárami ju mapurigá aboni 'yama Riosi jaré namuti kónawami, ayénachó mapurigá aboni ko'wisáa 'yama Riosi echi jaré namuti 'akami mapu ikí echi auché jaré pagótami pama riwéali. Echijiti arigá 'wérali ju mapu echi Walubela Jesucristo ayénachó níwama mapurigá Binói 'yama Riosi. ⁴ Alí jipi rawé a echi Walubela Jesucristo abijí jena'í wichimóbachí asisáagá, Binói ketasi níimi Walubela Sacerdote niráa, mapujiti abijí nirú jaré rijói sacerdote mapu abijí echirigá 'ya Riosi echi jaré namuti kónawami, mapu echi walula Moisesi osogá nulali, mapu 'yárami níima riwéali Riosi. ⁵ Alí echi jaré sacerdote jena'í wichimóbachí muchúami we nóchaga olá mapurigá sacerdote niráa echo'ná pachá echi walubé Juríosi pagótami ri'obáwalachi. Chopi echi jaré namuti echo'ná pachá walubé Juríosi ri'obáwalachi nirúami chopi péebi noguí achigó yiri ju echi auché jaré galabé namuti yuwa, echo'ná ripá riwigachi nirúami. Mapujiti echi walula Moisesi je'ná jerigá anérami níili mapalí binói nulérami níili niwánala echi ne bachá niwárami Riosi galila, mapalí Riosi Binói janeli: Nibira, mujemi

niwáma ne suwaba namuti achigó yiri mapurigá Nijeni mi riwírali mapalimi tamí yuwa asali echo'ná ripá biléana rabó. ⁶ Chopi tamujé Walubela Sacerdótawala waminabi galabé nóchaga olá Walubela Sacerdote niráa, ketasi mapurigá echi auché jaré sacerdote jena'í wichimóbachí nirúami olá, mapujiti echi tamujé Walubela Sacerdote 'yárami níili mapurigá Binói nóchaga olama Walubela Katéwami Riosi yuwa, echi auché jaré pagótami yuwa, mapurigá Riosi Binói ne wabé galabé bichíwaga aneli echi Binói.

⁷ Mapujiti a echi jaré pagótami omérasagá nijéwiya mapurigá Riosi chabénala, bachá niráa, nuleli aboni, alí ma ketasi arigá 'wérali níimi mapurigá Riosi bukúliwami, auchecheo siné katiwama aboni yuwa.

⁸ Chopi Riosi riwali mapu echi jaré pagótami ketasi galá nijéwami níili, mapurigá je'ná jerigá osirúami ju echo'ná Riosi Ra'íchala oselíwalachi:

Echi Walubela Riosi jeaní: Waminánomí rawé Nijeni bukúliwami auchecheo siné katiwama echi jaré Isaeli pagótami yuwa, echi jaré Jurá kúchala kúchuwala yuwa.

⁹ Chopi Nijeni ketasi achigórigá katiwama aboni yuwa mapurigá Nijeni ki'yánala katéwali aboni pagótamawala yuwa echalí rawé mapalí Nijeni ne sikachí niráa chapigá bayérali aboni echo'ná Ejíptochi anilíwachi kawírali jonsa.

Mapujiti echi jaré aboni pagótamawala echalí ki'yánala piréami ketasi nijéwaga olali mapurigá Nijeni katéwali aboni yuwa.

Ayénachó echi Walubela Riosi jeaní: Echijiti Nijeni waminá waná ariweli echi jaré ke nijéwami pagótami.

¹⁰ Alí echi Walubela Riosi jeaní:

Waminánomí rawé Nijeni je'ná jerigá katiwama echi jaré Isaeli anilíwami pagótami yuwa:

Echalí Nijeni galá machírama aboni Nijé nulalila niráa, mapurigá aboni galá 'natáma Nijé nulalila jiti.

Ayénachó Nijeni osimea Nijé nulalila echo'ná pachana aboni sulálachi niráa, mapurigá aboni galá nakimea nijéwiya.

Alí Nijeni níima aboni Riósawala.

Alí aboni Nijé Binói pagótamawala níima.

¹¹ Echalí rawé ma ketasi waminabi arigá 'wérali níima mapu ibili aboni waminabi binérama echi auché jaré echo'ná mulubé aboni yuwa piréami,

nibilé mapurigá ibili binérama echi jaré aboni ritémawala jeanigá mapu galá níima mapu aboni galá machimea Riosi,

mapujiti Riosi jeaní:

Echalí rawé ne si'néami pagótami galá tamí machimea.

Echalí echi jaré kuchípala galá tamí machimea, ayénachó echi auché jaré o'wéala galá tamí machimea.

¹² Mapujiti Nijeni suwaba ku wikawama mapurigá aboni wabé chati sitíi olali.

Alí Nijeni ketásirapé siné auchecho ku 'natama echi jaré aboni chati sitíi olalila jiti.

¹³ Alí mapalí Riosi aní mapu Binói bukulíwami, auchecho siné katiwama echi jaré pagótami yuwa, echalí Binói echirigá anigá ruyé mapu ma ocháarami ju echi katiwálawami mapurigá Binói bachánala katéwali echi jaré Isaeli pagótami yuwa. Alí suwaba echi jaré namuti mapu ikí ma ocháarami ju, ayénachó suwaba mapu ikí ma ketasi iré, ne suwaba echiyiri ke 'me ayó waminá nakuma.

Echi jaré Juríosi pagótami ri'obáwala, echi Riosi ri'obáwala yuwa

9 Alí mapalí Riosi bachá niráa katéwali echi jaré Juríosi pagótami yuwa, echalí Binói nuleli mapu churigá nilátarikó mapu aboni chokoba jaga waminabi walubéraga anema Binói Riosi. Ayénachó nuleli mapurigá aboni echirigá olama echo'ná pachá biléanapi ri'obachi jena'í wichimóbacha nirúami. ² Alí echi ri'obá je'ná jerigá katiwárami níili: Echo'ná pachá echi bachá yéachi, mapo'ná Galabéalachi anérami níili, echo'ná nirúali bilé namuti rajékowami, kicháona rajáami. Ayénachó echo'ná nirúali bilé jubétami mapo'ná muchuwálati echi jaré pani mapu echo'ná 'yárami níili Riosi. ³ Alí echo'ná waminabi pachánala, echo'ná okoná yéachi simíraga, mapo'ná 'yérataga chukuli echi auché biléala chiní wabé ru'náami mapuyiri kimá, echo'ná pachá, ne Wabé Simírami Galabéalachi anérami níili. ⁴ Alí echo'ná pachá ne wabé Simírami Galabéalachi nirúali bilé namuti jubétami, echi wabé natéami oro jiti niwárami, mapo'ná echi moluwá na'élati. Ayénachó echo'ná nirúali bilé mapuyiri kajoni, ayénachó moba buchuwí uchérami echi wabé natéami oro. Alí echi kajoni chopi niwárami níili mapurigá echi jaré Isaeli pagótami galá newalama mapurigá Riosi bachá niráa katéwali aboni yuwa. Alí echo'ná pachana kajónachi nirúali bilé taa mapuyiri sikolí, oro niwárami, pachánala buchiga muchúami echi maná anilíwami ko'wáami mapurigá Riosi chabénala nijali, ripá riwigachi jonsa. Ayénachó echo'ná pachana kajónachi nirúali echi Aroni níwala kusí, echi mapu auchecho ku sawarali. Ayénachó echo'ná pachana nirúali echi okuá rité chipérami niwárami, mapo'ná osirúami níili echi makóí nulalíwami Riosi nulalila, mapurigá Riosi katéwaga nuleli echi jaré pagótami. ⁵ Alí echi okuá kerubina anilíwami echo'ná we galá kajónachi moba a'nagú wéemi raweka jali. Echirigá aniwáami níili mapu echi Walubela Riosi, echo'ná nasipa asali. Alí okuánika echirigá pe buná uchuga moba pe na'ómali aboni analá jiti echo'ná ri'lé nasipa. Alí echo'ná nasipa níili mapo'ná echi jaré namuti lalá 'yárami níili Riosi, ma-

purigá echi pagótami chati sitíi olalila ku wikawárami níima. Alí jipi nijeni ketasi omero suwaba ruwigá ra'ícha ne suwaba je'ná jaré namuti jiti.

⁶ Alí mapalí karúmati je'ná namuti ma echirigá muchúami níisa echo'ná pachá echi walubé rióbachi echi Juríosi pagótami níwala, echalí echi jaré sacerdote sinibí wisabé mo'wili echo'ná pachá ne bachá bakiwáami galabéalachi mapurigá aboni nóchaga olama sacerdote niráa mapurigá Riosi nuleli aboni olánala. ⁷ Alí echo'ná waminabi pachánala, pachá echi osá bakiwáamichi galabéalachi, chopi bakí echi ne walubela sacerdote. Alí échiko sinibí bamíbali sinepi rawé niráa echo'ná bakili, ayénachó binói sinibí bamíbali echo'ná pachá togá bakili jaré namuti lalá echi Walubela Riosi 'yámia, mapurigá echi binói sacerdote chati sitíi olalila ku wikawárami níima, ayénachó mapurigá echi auché jaré pagótami chati sitíi olalila ku wikawárami níima.

⁸ Alí suwaba je'ná jaré namuti jiti echi wabé Galabé Riosi Iwigala tamujé tamí machírata mapu ketasi cho iráparami níili echo'ná auché biléana yéachi, mapurigá tamujeta mo'wiboa echo'ná pachá echi osá bakiwáami galabéalachi mapo'ná Wabé Simírami Galabéalachi anélati, ayénachó mapo'ná Riosi atí, mapuyénasí echi jaré sacerdote abijí sinibí rawé waminabi walubéraga anigá Riosi we mo'wili echo'ná pachá echi bachá bakiwáami galabéalachi. ⁹ Suwaba je'ná jerigá aniwáami ju mapu echi jaré pagótami ketasi omérali mulubéaniya mapo'ná Riosi asali mapujiti ketasi risensia níili mapu aboni simárama echo'ná bachá bakiwáami galabéalachi, mapurigá aboni echirigá mulubéanama Riosi yuwa. Alí aboni ketasi galá bichíiga mulubéana Riosi yuwa mapujiti aboni chopi nakí wikabé namuti mi'agá 'yánala Riosi, ayénachó aboni we 'ya Riosi wikabé auché jaré namuti. Alí ne suwaba echiyiri namuti tarapé omero ne galabé ku bi'wíami niráa niwayá echi jaré pagótami sulálachi mapalí aboni abijí echirigá olako mapurigá Riosi waminabi walubéraga anérami níima. ¹⁰ Echi jaré pagótami nulérami níili mapu aboni ketasi ko'méa jaré karúmati ko'wáami, ayénachó mapu aboni ketasi bajima jaré karúmati bajíwami, ayénachó aboni nulérami níili mapu aboni wisabé si'winárigá ubama. Chopi aboni echirigá nulérami níili olánala jena'í wichimóbacha mapuyénasí Riosi ketasi cho si'winárigá nuleli aboni, mapujiti ne suwaba echi jaré nulalíwami si'nú nakulíwarami níima riwéali.

¹¹ Chopi echi Walubela Jesucristo ma nawali chabénala niráa. Alí jipi rawé echi Walubela Jesucristo ne Walubela Sacerdote ju echi ne wabé galabéala jiti mapu ma nawali. Alí jipi echi Walubela Jesucristo we olá sacerdote niráa echo'ná pachá biléana ne wabé simírami galabé ri'obachi, ne wabé simírami galabé niwárami, echi mapu ketasi pagótami niwáala ju. Echirigá aniwáami ju mapu echi wabé simírami galabé ri'obachi mapo'ná Jesucristo we olá sacerdote niráa, ketasi je-

na'í wichimóbachí nirúami ju, chopi echo'ná ripá riwigachi nirúami ju. ¹² Alí echi Walubela Jesucristo ma sinepi bakili echo'ná pachá echi ne wabé Simírami Galabéalachi mapurigá Binói sinepi sunima Walubela Sacerdote niráa olayá, mapurigá ma ketasi 'wérali níima mapu auché bilé walubela sacerdote auhecho siné echirigá olama. Chopi echi Walubela Jesucristo ketasi togá bakili echi jaré chibá owila lalá, nibilé cho toga bakili echi jaré bisero lalá, chopi Binói bakili echo'ná ripá riwigachi nirúami ne wabé Simírami Galabéalachi galá riwíruga mapu Binói lalá ma ku'luwasa 'yárami níili Riosi. ¹³ Bichíwali ju mapu echi jaré toro lalá, ayénachó echi jaré chibá owila lalá, ayénachó echi bisero mukila ikósatami napisóolawala, ba'wí ro'wérami, ne suwaba galá omérami ju ku bi'wayá echi pagótami mapalí aboni péé uchérami ju echi la jiti, ayénachó echi napisó ba'wí ro'wérami jiti, mapurigá aboni echirigá olasa galá omérama waminabi walubéraga anée Riosi echo'ná pachá echi walubé Juríosi pagótami ri'obáwalachi. ¹⁴ Chopi a echirigá ne bichíwali níisagá, waminabi ne wabé simírami omérami ju echi Walubela Jesucristo lalá, mapujiti echi Walubela Jesucristo a Binói niráa nijili, echi sinibí bitéami Riosi Iwigala jiti, echi Walubela Riosi ayá, mapurigá Binói mi'lirúami níima mapurigá suwaba echi jaré namuti ko'wirúami níili. Alí Jesucristo tarapé chati sitíí oláami níili. Alí echi Walubela Jesucristo lalá tamujé tamí ku bi'wá suwaba mapu ikita chati sitíí olali. Alí mapalita chati sitíí olali, echalí tamujé olalila we sitíí níili, ayénachó echirigá ologá tamujeta tarapé kaníili, chopi echi Walubela Jesucristo lalá tamujé tamí ku bi'wá mapurigata chopi ologá pirélabo mapurigá echi Sinibí Bitéami Riosi nakí.

¹⁵ Echijiti echi Walubela Jesucristo Walubela Katéwami ju mapurigá Riosi bukúliwami niráa bichíwaga aneli echi pagótami jena'í wichimóbachí piréami. Alí echi Walubela Jesucristo mi'lirúami níili mapurigá galá ku wikawárami níima echi pagótami chati sitíí olalila mapurigá aboni chati sitíí olali mapalí aboni ketasi galá nijéwaga olali mapurigá Riosi bachá niráa nuleli aboni. Ayénachó Jesucristo mukuli mapurigá si'néami mapu ikí Riosi bayeli arigá 'yárami níima mapurigá aboni sinibí niráa pirélama, mapurigá Riosi bichíyami anérami níima aboni. ¹⁶ Mapujiti mapalí bilé rijói ne bichíwaga niráa osá bilé oselí jeanigá mapu churigá rojonárami níima binói níwala namuti mapalí binói ma mukumea, alí echi jaré binói níwala namuti ketasi cho echirigá rojonárami níima mapalí abijí ketasi cho bichíwali riwirúami juko mapu ma mukuli echi rijói.

¹⁷ Mapujiti mapurigá echi rijói ne bichíwaga osali, ketasi cho olárami níima mapuyénasí abijí bité echi rijói. Chopi echirigá olárami níima mapalí ma mukú echi mapu echirigá ne bichíwaga osali. ¹⁸ Echijiti mapurigá Riosi chabé ki'yá, bachá niráa, ne bichíwaga aneli echi jaré Isaeli pagótami, echirigá ayénachó chopi anérami

níili mapalí echi jaré namuti lalá ma ku'luwárami níili. ¹⁹ Mapujiti mapalí echi walula Moisesi ma ruyeli echi jaré Isaeli pagótami ne suwaba echi jaré nulalíwami jiti, mapurigá Riosi nuleli aboni, alí binói Moisesi chapili echi jaré bisero lalá, echi jaré chibá owila lalá ayénachó, ba'wí asíchiko. Echalí binói chapili pe taa bo'osali sitákami, bilé kusí sawéami, isopo anilíwami yuwa. Alí binói pakeli echi kusí sawéami, echi bo'osali yuwa echo'ná lálali, ba'wí nasóami. Alí binói kúuchi niráa bachímali echi lá, ba'wí nasóami echo'ná oselichi mapo'ná osirúami níili Riosi nulalila. Alí binói ayénachó kúuchi niráa bachímali echi lá, ba'wí nasóami echo'ná moba si'néami echi jaré pagótamichi. ²⁰ Echalí echi walula Moisesi jeaneli: Je'ná ju echi lá mapu ku'luwárami níili mapalí Riosi 'yemi mi ne bichíwaga aneli máputamo ku'wíratami níibo riwéali, átamo galá nijéwasagá mapurigá Riosi 'yemi mi nuleli. ²¹ Alí echi Moisesi ayénachó lá jiti kúuchi niráa bachímali echi ri'obá. Ayénachó lá jiti kúuchi niráa bachímali suwaba echi jaré namuti echo'ná pachá ri'obachi nirúami mapu ikí echo'ná néerati mapalí aboni waminabi walubéraga aneli Riosi echo'ná pachá ri'obachi. ²² Alí echo'ná Riosi nulalila osirúamichi nulárami níili mapu ne noguí suwaba namuti chopi galá ku bi'wárami níima, echi lá jiti bachímaga olárami. Alí mapalí echi lá ketasi ku'luwárami níisagá, alí echi chati sitíí oluwáwami ketasi ku wikawárami níima.

Echi jaré pagótami chati sitíí olalila chopi ku wikawárami ju mapujiti Jesucristo mi'lirúami níili.

²³ Alí echi jaré namuti echo'ná ri'obachi nirúami, ibili niráa, ne noguí achigó yiri ju echi auché jaré waminabi galabéala namuti yuwa mapu echo'ná ripá riwigachi nirúami ju. Alí arigá 'wérali níili mapu je'ná jaré namuti echo'ná pachá jena'í wichimóbachí nirúami ri'obachi arigá galabératami níima bacháami Riosi yuwa jaré namuti lalá jiti bachímaga. Chopi echi auché jaré waminabi galabé namuti echo'ná ripá riwigachi nirúami chopi galabératami níili bacháami Riosi yuwa echi Walubela Jesucristo lalá jiti. ²⁴ Mapujiti echi Walubela Jesucristo ke siné bakili echo'ná pachánala echi wabé simírami galabéalachi jena'í wichimóbachí nirúamichi ri'obá mapu pagótami jiti niwárami níili. Alí jena'í wichimóbachí nirúami ne wabé simírami galabéalachi chopi pe ne noguí achigó yiri níili echi ne wabé simírami Galabéalachi echo'ná ripá riwigachi nirúami yuwa. Chopi echi Walubela Jesucristo ma bakili echo'ná ne wabé simírami Galabéalachi, echo'ná ripá riwigachi nirúami, mapo'ná jipi rawé Binói we ra'ícha bacháami Riosi yuwa, tamujé tamí jiti. ²⁵ Alí echi jaré Juríosi pagótami ne walula sacerdotawala ne sinibí bamíbbali bakí echo'ná pachá echi wabé simírami galabéalachi, jena'í wichimóbachí nirúami ri'obachi ne wabé pachánala,

mapurigá binói 'yama Riosi echi lá mapu ke binói lalá ju, chopi echi Walubela Jesucristo ketasi echirigá wisabé niráa a Binói nijá mapurigá waminá mi'lirúami níima. ²⁶ Mapujiti a echirigá nísagá, echalí arigá 'wérali níimili chabé chokichí jonsa, mapalí jonsa je'ná wichimoba gayenárami níili, mapurigá echi Walubela Jesucristo wisabé, ibili bamíbali niráa, waminá mi'lirúami níimi. Chopi jipi mapalí ma mulubé ju mapalí ma suwibama suwaba namuti jena'í wichimóbachí nirúami, jipi bukulí rawé jonsa, echi Walubela Jesucristo sinepi niráa a Binói nijali mapurigá waminá mi'lirúami níima, mapurigá Binói echirigá waminá 'yema suwaba echi chati sitíi oluwáwami. ²⁷ Mapujiti arigá 'wérali ju mapu ne si'néami pagótami, ibili niráa, sinepi suwimea. Ayénachó 'wérali ju mapurigá ma suwisáa, aboni ibili niráa bacháami jábama Riosi yuwa, mapurigá si'néami mapu ikí ketasi ku wikawárami ju arigá kastigo 'yárami níima. ²⁸ Echirigá ayénachó echi Walubela Jesucristo sinepi nijírami níili mapurigá Binói mi'lirúami níima, mapurigá Binói echirigá 'yema wikabé pagótami chati sitíi olalila. Alí Binói Jesucristo auchecho siné ku nawama jena'í wichimóbachí mapurigá Binói ku'wírama si'néami echi jaré mapu ikí galá bichíga buweko mapurigá Binói ku nawama. Chopi mapalí echi Walubela Jesucristo echirigá auchecho siné ku nawasa, echalí Binói ma ketasi auchecho siné mukumea, echirigá ku 'yémiya echi chati sitíi oluwáwami.

10 Mapujiti echi jaré pagótami chopi péebi niráa machíralati, Riosi nulalila jiti, mapurigá waminánomí aboni ne sébali ku'wíratami níima riwéali, echi Walubela Jesucristo jiti. Mapujiti echi nulalíwami ketasi omérali ne galabé wachínaga oláami niráa niwayá echi jaré pagótami mapu arigá mulubéanalí Riosi yuwa, ne si'néami mapu ikí sinibí bamíbali ko'wigá 'yali Riosi echi jaré namuti mapurigá nulárami ju, echo'ná Riosi nulalíachi. ² Mapujiti a echi nulalíwami omérasagá wachínaga oláami niráa niwayá echi pagótami, alí aboni ma ketasi waminabi echirigá ko'yagá 'yami Riosi echi jaré namuti. Chopi echi jaré pagótami mapu echirigá ko'yagá 'ya Riosi echi jaré namuti ma sinepi bi'wíami nísagá, alí aboni ma ketasi waminabi chati sitíi oláami mayemi. ³ Chopi si'winárigá mapalí echi jaré pagótami echirigá ko'yagá 'ya Riosi echi jaré namuti, echalí aboni sinibí bamíbali we o'mónaga newalá aboni chati sitíi olalila jiti. ⁴ Mapujiti echi jaré toro lalá, ayénachó echi jaré chibá owila lalá ketásirapé omero ku'wíriya echi pagótami mapurigá aboni chati sitíi olalila ku wikawárami níima.

⁵ Echijiti mapalí echi Walubela Jesucristo nawali jena'í wichimóbachí, echalí Binói jeaneli echi Riosi Onorúami:

Mujé ketasi nakí mapu echi jaré pagótami mi ko'yagá 'yama echi jaré namuti, nibilé mi nakí mapu aboni mi

'yama jaré namuti mapurigami echijiti ku wikawama aboni chati sitíi olalila.

Chopi Mujemi tamí 'yali mapurigani bitélama mapurigá Rijói niráa.

⁶ Ayénachó echi Walubela Jesucristo jeaneli Riosi:

Mujemi ketasi galá niralí mapurigá echi jaré pagótami ko'yagá ikósali echi jaré namuti, nirapé mapurigá aboni ko'yagá 'yali jaré namuti mapurigá aboni chati sitíi olalila echijiti ku wikawárami níima.

⁷ Echalí echi Walubela Jesucristo waminabi jeaneli Riosi:

Nijeni mi jeaneli: Nibira, mani nawali jena'í wichimóbachí mapurigani chopi olama mapurigá mujemi nakí, achigórigá mapurigá osirúami ju tamí jiti rugá,

echo'ná Mujé Ra'íchala osurúmachi.

⁸ Alí echirigá anigá echi Walubela Jesucristo arigá aneli mapu Riosi ketasi nakí mapu echi pagótami ko'yagá 'yama echi jaré namuti, nibilé cho nakí mapu aboni ko'yagá ikósama jaré namuti mapurigá aboni chati sitíi olalila echijiti ku wikawárami níima, chopi echirigá arigá nulárami ju mapurigá echi walula Moisesi osogá nulali. ⁹ Alí pe wakinánala echi Walubela Jesucristo jeaneli Riosi:

Nijeni ma nawali jena'í wichimóbachí mapurigani chopi olama mapurigá Mujemi nakí.

Echirigá aniwáami ju mapu echi Walubela Jesucristo chopi olali mapurigá Riosi nakili, mapurigá ma ketasi arigá 'wérali níima mapurigá echi jaré pagótami waminabi ko'yagá 'yama Riosi echi jaré namuti, mapujiti echi Walubela Jesucristo a Binói niráa nijali mapurigá Binói mi'lirúami níima, echi jaré pagótami chati sitíi olalila jiti. ¹⁰ Alí mapujiti echi Walubela Jesucristo chopi echirigá olámiya nawali mapurigá Riosi nakili, echijiti Riosi ma tamujé tamí wabé galabérali, mapujiti echi Walubela Jesucristo sinepi niráa a Binói nijili mapurigá mi'lirúami níima, tamujé chati sitíi olalila jiti, chopi jipi echi Walubela Jesucristo ma ketasi auchecho siné mi'lirúami níima.

¹¹ Alí sinibí rawé echi jaré sacerdote ne bichíwali we nócha echo'ná pachá echi walubé Juríosi ri'obáwalachi, mapo'ná aboni wisabé niráa ko'yagá 'ya Riosi echi jaré achigó yiri namuti. Chopi aboni echirigá ologá ke siné omero ku wikáwiya echi jaré pagótami chati sitíi olalila. ¹² Chopi mapalí echi Walubela Jesucristo ma sinepi niráa nijali a Binói niráa, mapurigá Binói mi'lirúami níima, echi jaré pagótami chati sitíi olalila jiti, alí Binói ma ku owinsa, echalí ku asíbali Riosi yuwa, echo'ná watonachi. ¹³ Echalí jonsa echi Walubela Jesucristo chopi echo'ná Riosi yuwa watonachi atí, mapuyénasí echi jaré Binói asayela omératami níima, mapujiti Riosi Onorúami echo'ná ri'léami echi Walubela Jesucristo ralálachi ro'wábama echi jaré Binói asayela, mapurigá jaré namuti rikékowami niráa. ¹⁴ Mapujiti

mapalí echi Walubela Jesucristo sinepi niráa a Binói ni-jali mapurigá mi'lirúami níima, echalí Binói echirigá ologá ne sébali galabératali echi jaré mapu Binói chapili mapurigá Binói níwala niráa, mapurigá aboni sinibí niráa echirigá galabératami níima. ¹⁵ Ayénachó echi Wabé Galabé Riosi Iwigala tamujé tamí achigórigá ané; mapujiti bachá niráa jeaní:

¹⁶ Echi Walubela Riosi je'ná jerigá aní:

Waminánomí rawé Nijeni je'ná jerigá katiwama echi jaré Isaeli pagótami yuwa:

Nijeni galá machíratama aboni, Nijé nulalila jiti, mapurigá aboni ne galá machimea Nijé nulalila, ne sulachí niráa.

Ayénachóni osimea Nijé nulalila echo'ná pachana abónichi niráa, mapurigá aboni sinibí 'natama Nijé nulalila jiti.

¹⁷ Alí echi Wabé Galabé Riosi Iwigala waminabi jeaní:

Nijeni ke siné ku auché 'natama mapurigá aboni chati sitíi olali. Nibilé sineni ku auché 'natama mapurigá aboni ketasi nijéwaga olali mapurigá Nijeni nuleli aboni.

¹⁸ Echirigá biché mapalí Riosi ma ku wikáwali echi jaré chati sitíi oluwáwami, echalí ma ketasi arigá 'wérali ju mapurigá bilé namuti mi'lirúami níima mapurigá echi chati sitíi oluwáwami auchecho ku wikawárami níima.

Galá níima máputa mulubéanabo Riosi yuwa

¹⁹ Echijiti keni ritémawa, jipi tamujeta galá omero mo'wiyá echo'ná pachánala echi ne Wabé simírami Galabéalachi echo'ná ripá riwigachi nirúami mapo'ná Riosi atí, mapujiti echi Walubela Jesucristo lalá ma ku'luwárami níili tamujé tamí jiti. ²⁰ Jípita galá omero echo'ná pachánala mo'wiyá, mapujiti Jesucristo bukúfwami buwiralali mapurigá tamujeta, sinibí piréami niráa, echo'ná simáraga mo'wiboa, echo'ná ripá riwigachi wabé simírami Galabéalachi, achigórigá mapurigá echi Juríosi pagótami walubela sacerdotawala bakí echo'ná pachánala echi wabé simírami galabéalachi, jena'í wichimóbacha nirúami ri'obachi. Alí Jesucristo echirigá buwiralali mapalí Binói ma ku owinsa bakili echo'ná ripá riwigachi mapurigá Rijói niráa. ²¹ Jipi echi Walubela Jesucristo tamujé Walubela Sacerdotawala ju. Jipi Binói galá nulé ne si'néami echi jaré Riosi kúchuwala. ²² Echijiti galá níima máputa tarapé 'yékami sulélabo, chopi máputa galá bichíiga mulubéanabo Riosi yuwa, mapujiti Jesucristo ma tamujé tamí ku bi'wali tamujé sulálachi niráa, mapurigá tamujeta ma ke o'monabo mapurigá chati sitíi oláami niráa. Alí galá níima mapurigata ubáratami niráa níibo, ne galabéala ba'wí jiti, tarapé wikúamiti mapurigá echi Juríosi sacerdotawala olali. ²³ Alí waminábita galá bichiga olabo achigórigá mapurigata ma galá bichíili. Ketásita si'winárigá bichíibo, mapujiti Riosi ne bichíwali olama

achigórigá mapurigá tamujé tamí bichíwaga aneli mapu Binói olama riwéali, mapurigá osirúami ju echo'ná Riosi Ra'íchala oselíwalachi. ²⁴ Alí ne galá níima mapu tamujeta a'nawita galá 'natasa, mapu churigata a'nagupi nagúurabo mapurigata ibili niráa waminabi wabé galéami níibo, ayénachó mapurigata ibili niráa waminabi galabé oláami níibo. ²⁵ Alí ketasi galá níima máputa waminá ariwebo napawíi echi auché jaré bichíyami yuwa, ketasi mapurigá jaré ma ketasi napawí echi auché jaré yuwa. Chopi galá níima tamujeta a'nagupi waminabi galá bichíiratasa. Jipi waminabi galá níima echirigá a'nagupi bichíiratasa mapujítita galá machí mapu echi Walubela Jesucristo rawéwala ma ne mulubé níilasimí.

²⁶ Mapujiti mapalí echi jaré pagótami ma galá machíratami níisa echi ne Bichíwali, alí a aboni waminabi nokuísagá chati sitíi olayá, ayénachó a aboni we nakisáagá echirigá chati sitíi olánala, echalí aboni ma ketasi ku wikawárami níima, mapujiti aboni ketasi galá bichíili mapurigá Jesucristo mi'lirúami níili aboni chati sitíi olalila jiti. ²⁷ Echalí aboni wabé majaga buwema mapuyénasi Riosi ne wabé 'yoka, walú kastigo 'yama, mapalí Binói waminá ikósaga suwábama echi jaré Binói sayela. ²⁸ Chabé ki'yá mapalí jaré pagótami ketasi galá nijéwaga olali mapurigá echi walula Moisesi osogá nulali, echalí echiyiri pagótami arigá waminá ko'wirúami níili, mapalí okuá testigo chópirigá wi'nijili aboni, bikiyá kéremá. Echalí echi jaré chati sitíi oláami tarapé natimaga arigá ko'wílati. ²⁹ Alí jaré pagótami ke 'me nirá echi Walubela Riosi Ranala. Ayénachó aboni echirigá ologá wabé sitíi nirá echi Walubela Jesucristo lalá mapu sinepi ku'luwárami níili mapurigá aboni chati sitíi olalila ku bi'wárami níima, mapurigá Riosi bachá niráa ne bichíwaga anigá katéwali jena'í wichimóbacha piréami pagótami yuwa. Alí echi jaré ke bichíyami pagótami mapurigá bilé namuti rimisókawami niráa mayé echi Walubela Riosi Ranala. Ayénachó echiyiri ke bichíyami pagótami ne wabé riwélata echi wabé Galabé Riosi Iwigala. Chopi echi Walubela Riosi arigá wabé galé si'néami pagótami. Echijiti galá níima mapu echiyiri chati sitíi oláami pagótami waminabi wabé simírami kastigo 'yárami níima, ketasi mapurigá echi auché jaré kastigo 'yárami níima mapu ketasi nijéwaga olali mapurigá echi walula Moisesi osogá nulali. ³⁰ Alí tamujeta galá machí mapu echi Walubela Riosi jeanili: Nijeni chopi ju mapuni kastigo 'yama echi jaré chati sitíi oláami. Nijeni walú kastigo agá ku natétama aboni. Ayénachó jeanili: Echi Walubela Riosi waminá justikia olama echi jaré Binói pagótamawala yuwa. ³¹ ¡Ne wabé simírami majawíwami ju mapu echi sinibí bitéami Riosi sinibí niráa ne walú kastigo 'yama echi jaré chati sitíi oláami pagótami!

³² Chopi galá ku 'natasi 'yemi mapurigá chabénala rawé 'yémitamo ne wabé risúu olárami níili, mapalíta-

mo ne chokichí machíratami níili echi Galabé Riosi Ra'íchala, ayénachó mapurigátamo galá bichííga anáchali mapalítamo echirigá risúu olárami níili.

³³ Echali jaré 'yemi ne wabé risúu olárami níili, ayénachó jaré walú kastigo 'yárami níili, echi auché jaré pagótami riwírataga. Ayénachó auché jaré 'yemi risúu olárami níili chopi mapujítamo achigórigá bichííli mapurigá echi jaré mapu bachá niráa risúu olárami níili.

³⁴ Echalítamo ayénachó wabé natimali echi auché jaré ritémtami mapu pachá mo'wárami níili, mapujiti aboni nawésali Riosi Ra'íchala. Alí bichétamo arigá wabé kaníli mapalí echi auché jaré pagótami 'yemi mi chuwé 'yeli 'yemi níwala namuti, mapujítamo galá machili máputamo níwami ju ne wabé simírami galabé namuti echo'ná ripá riwigachi nirúami, echi mapu ne sinibí niráa nirúlama. ³⁵ Echijiti sinibí waminabi galá bichíisi mapurigátamo ma galá bichíili, mapujítamo echijiti ne wabé simírami galabéala 'yárami níibo.

³⁶ Galá níima mapu 'yémitamo sinibí kilíi ologá pirélabo mapurigátamo galá omérabo olayá mapurigá Riosi nakí, ayénachó mapurigátamo echirigá narepo mapurigá Riosi 'yemi mi bichíwaga aneli máputamo arigá 'yárami níibo. ³⁷ Mapujiti echo'ná Riosi Ra'íchala oselíwalachi je'ná jerigá osirúami ju:

We yáati, ke 'me ayó nolínama echi mapu arigá nawama.

Échiko ketasi waminá wi'lí buwema.

³⁸ Chopi si'néami mapu ikí Nijeni nareko, abóniko ne galá bichííga pirélama.

Chopi jaré tamí ariwesa, ku kuwana simásagá,

Nijeni ketasi kanílama echi jaré aboni jiti.

³⁹ Chopi tamujé ketasi ku kuwana ro'wíami ju, mapurigá auché jaré mapu ku ro'wiga 'wigá. Chopi tamujeta galá bichíiyami ju Riosi. Echijiti tamujé aliwala sinibí niráa piréami níima.

Echi Bichíílawami

11 Mapalita galá bichíi Riosi, echalita bichíwali mayé máputa waminánomí narepo echi jaré namuti máputa we buwé, mapujiti Riosi bichíwaga anili mapu tamujé tamí echirigá 'yama. Ayénachó mapalita galá bichíi Riosi, echalí tamujeta ne bichíwali mayé mapu arigá nirú echi jaré namuti máputa ke chirigá ritiwá jipi rawé. ² Echi jaré tamujé pagótamawala chabé ki'yá piréami galabé oláami anélati mapujiti aboni galá bichíili Riosi.

³ Mapujiti tamujeta galá bichíi Riosi Ra'íchala, echijítita galá machí mapu Riosi niwáli ne suwaba namuti mapalí Binói chopi ra'íchaga anili mapu echi jaré namuti arigá niwárami nílama. Echirigá echi jaré namuti mapu jípita ritiwá, ketasi niwárami níili auché jaré namuti jíti, mapujiti echalí ki'yá chokichí tarapé biyiri nirúali.

⁴ Echi chabé ki'yá bitéami Abeli galá bichíili Riosi, echijiti binói bilé bo'wá mi'yagá 'yali Riosi. Alí echirigá ologá echi Abeli 'yali Riosi bilé waminabi galabéala namuti, ketasi mapurigá echi binói rijimala Kaíni riwéami 'yali. Echijiti Riosi anili mapu echi Abeli we galabé oláami níili. Ayénachó Riosi nareli echi jaré namuti mapu echi Abeli ko'yagá 'yali. Echijiti echi Abeli mapu arigá mukúami ju, abijí tamujé tamí galá binera, mapujítita nawésarami ju mapurigá echi Abeli echirigá galá bichíili Riosi.

⁵ Echi Enoko riwéami rijói galá bichíili Riosi, echijiti binói tólati echo'ná ripá riwigachi mapalí ke cho mukuli. Alí echi Enoko ma ketasi auché riwílati jena'í wichimóbachí, mapujiti Riosi ma toli. Alí echo'ná Riosi Ra'íchala oselíwalachi osirúami ju mapu chabénala mapalí echi Enoko ketasi cho tólati echo'ná ripá riwigachi, mapu echi Enoko chopi ologá bitéali mapurigá Riosi nakili. ⁶ Alí echi jaré pagótami ketasi chirigá omero olayá mapurigá Riosi nakí, mapalí aboni ketasi bichíi Riosi, mapujiti arigá 'wérali ju mapu echi jaré mapu ikí nakiko mulubéanala Riosi yuwa, arigá galá bichííga mayema mapu ne bichíwali nirú Riosi. Ayénachó 'wérali ju mapu aboni bichíima mapu Riosi galá ku'wírama echi jaré mapu ikí galá ága machináliko Binói Riosi.

⁷ Alí echi Noé galá bichíili Riosi. Echijiti mapalí Riosi ruyeli echi Noé mapurigá pe wakinánala arigá ikimea mapurigá binói Noé ke cho siné riwali ikíachi, echalí echi Noé galá nijéwaga mapurigá Riosi nuleli, arigá niwáli bilé walubé barko anilíwami, mapuyiri kalí niráa, mapurigá echo'ná walubé ba'wírali moba inama. Echalí echi Noé echirigá niwáli echi barko mapurigá echi jaré binói kúchuwala ketasi waminá si'líma echi walubé ba'wí ukúuchi jena'í wichimóbachí. Echi Noé echirigá galá bichíili Riosi, echijiti binói galá nijéwali mapurigá Riosi nuleli. Alí echirigá ologá echi Noé arigá wi'nijili echi auché jaré ke bichíiyami pagótami jena'í wichimóbachí piréami. Ayénachó Riosi galá nirali echi Noé mapujiti binói echirigá bichíili Riosi.

⁸ Echi Abrami galá bichíili Riosi, echijiti binói galá nijéwali mapalí Riosi júuli echo'ná auché biléana kawírali simínala. Echalí Riosi bichíwaga aneli mapu arigá 'yama echi auché biléana kawírali mapurigá binói Abrami kawíwala niráa. Alí echi Abrami arigá simili echo'ná binói kawíwalachi jonsa, echo'ná echi auché biléana kawírali simiyá, tarapé cho machigá mapu kumi simea riwéalo. ⁹ Echi Abrami ne galá bichíili Riosi, echijiti binói bitéali mapurigá si'wina bitéami niráa, echo'ná kawírali mapo'ná Riosi bichíwaga aneli mapu Binói 'yama mapurigá echi Abrami kawíwala niráa. Alí echo'ná íbílana echi Abrami pe téeli niráa bitélasali, mapuyiri chiní niwárami kalirasa. Alí pe kinánala echi Isaka ayénachó echirigá olali, echi Jakobo asíchiko. Alí aboni okuánika achigórigá ne bichíwaga anélati mapurigá

Riosi bichíwaga aneli echi Abrami. ¹⁰ Alí echi Abrami echirigá pe téeli niráa bitélasali echo'ná, mapujiti binói we nakigá buweli mapurigá binói bitélama echo'ná Walúlachi, ripá riwigachi nirúami, mapo'ná ibílana kalírali ne wabé jiwériga tigoka jawárami ju, echi Walúlachi mapu Riosi Binói a'láruga niwáli.

¹¹ Alí echi Abrami upila, Sara riwéami, ayénachó galá bichíili Riosi, echijiti Riosi 'yali mapurigá echi Sara galá omérama bilé taa ranaya mapalí binói ne wabé simírami wiláami níili mapuyena ma ke omérama riwéla echi taa ranaya. Echijiti echi Sara echirigá ne wabé wiláami níisa, arigá ranali bilé taa towí, mapujiti binói galá bichíili mapu Riosi arigá 'yama riwéalo mapurigá Binói bachá niráa bichíwaga anili. ¹² Echirigá mapalí echi Abrami wabé ochérami níili, mapalí ma ne mulubé mukumea riwéali, echalí arigá ranarúami níili binói nolá. Alí wakinánokuá echi Abrami nolá kúchala kúchuwala ne wabé simírami wikabé muweli, mapu ikí echi jaré sopolí ripá riwigachi muchúami, ayénachó mapu ikí echi saté echo'ná walú ba'wírali suwé nirúami, mapu ketasi omérawami ju taráa.

¹³ Alí ne si'néami je'ná jaré mapu ne galá bichíyami níili Riosi, arigá waminá suwili ke cho naresa mapurigá Riosi bichíwaga aneli mapu Binói 'yama riwéalo. Alí aboni echirigá galá bichíili, echijiti aboni mikabé niráa riwali echi jaré namuti. Echirigá aboni galá bichíiga, ne wabé kaníili mapurigá ma 'yárami niráa echi jaré namuti. Alí echirigá ologá aboni galá machírali echi auché jaré pagótami mapu echi jaré mapu ikí galá bichíi Riosi pe téelipi niráa piréami níima riwéali jena'í wichimóbachí, mapujiti aboni chopi echo'ná ripá riwigachi piréami níima riwéali ne sinibí niráa. ¹⁴ Alí ne si'néami echi jaré mapu ikí echirigá bichíiga nawésako, abóniko ne galá machili echi auché jaré pagótami mapu aboni abijí 'yasa 'yena biléana kawí, mapu aboni kawíwala níima, mapujiti aboni ketasi jena'í wichimóbachí piréami níima sinibí niráa. ¹⁵ Alí a aboni ne bichíwali 'natásagá jena'í wichimóbachí nirúami kawí jiti, mapo'ná jonsa aboni simíbalí, echalí aboni ne bichíwali omérami ku siyá echo'ná. ¹⁶ Chopi echi jaré bichíyami nakili bilé kawí ne wabé simírami galabéala, echi mapu echo'ná ripá riwigachi nirúami ju. Echijiti echi Walubela Riosi ketasi riwela mapalí Binói anérami ju aboni Riósawala, mapujiti Binói ma a'lárali biléana walúlachi mapo'ná echi jaré bichíyami sinibí niráa pirélama.

¹⁷ Alí mapalí Riosi nakili machinália acha galá nijéwama echi Abrami, echalí Riosi machináliga aneli echi Abrami mapu mi'agá 'yama binói ranala, Isaka riwéami. Alí echi Abrami ne galá bichíili Riosi, echijiti binói arigá nakili echirigá mi'agá 'yánala Riosi echi Isaka. Echalí echi Abrami arigá echirigá mi'agá 'yama riwéali Riosi echi bilepi kepu raná. Chopi chabénala, bachá niráa, Riosi arigá ne bichíwaga aneli echi Abrami

jeanigá: ¹⁸ Echi Isaka riwéami mujé ranala kúchala kúchuwala ne wikabé muwema, alí ne si'néami aboni ne bichíwali mujé binói pagótamawala níima.

¹⁹ Echirigá níili mapu echi Abrami galá machili mapu Riosi we omérami ju ku o'wíntiya echi jaré suwíami. Ayénachóta omero aniyá mapu echi Isaka ne noguí mi'lirúami níili. Chopi binói ku 'yárami níili echi Abrami, galá ku bitéami niráa.

²⁰ Alí echi Isaka ayénachó galá bichíili Riosi. Echijiti echi Isaka galá omérali bichíwaga aniya echi okuá binói kúchuwala, echi Jakobo riwéami, echi Esaú riwéami, mapu Riosi bichíwali ne wabé ku'wírama aboni waminánomí. ²¹ Echi Jakobo ayénachó galá bichíili Riosi, echijiti mapalí binói ma ke 'me ayó mukumea riwéali, echalí binói arigá ne galá bichíwaga anili mapu Riosi ne wabé ku'wírama riwéali echi José kúchala kúrowi okuánika. Alí echalí echi Jakobo waminabi walubéraga aneli Riosi, echo'ná binói tisólachi moba bunaga chukugá. ²² Echi José galá bichíili Riosi, echijiti mapalí binói ma ke 'me ayó mukumea riwéali, echalí binói rugá anili mapurigá echi jaré wikabé Isaeli kúchala kúchuwala arigá ne bichíwali wabé wakínánomí ku simama echo'ná Ejíptochi anilíwachi kawírali jonsa. Ayénachó echi José galá nuleli echi jaré aboni mapu echalí ayénachó ku tomea binói José mukúami sapala.

²³ Alí echi Moisesi 'wénala ayénachó galá bichíili Riosi, echijiti mapalí echi Moisesi ranálati, echalí binói 'wénala wabé chiná niráa nasoli echo'ná pachá aboni pirélachi, bikiyá michá iyénasí, mapujiti binói 'wénala ne wabé ba'yórali echi taa towí. Ayénachó aboni ketasi majali mapujiti echi walula silíami arigá ma nulali ko'winala echi kúuchi kúruwi. ²⁴ Alí echi Moisesi ayénachó galá bichíili Riosi. Echijiti mapalí binói ma walú ochérali, echalí binói ketasi nakili mapurigá binói echi walula silíami malala ranala anérami níima, echo'ná Ejíptochi bitéami. ²⁵ Alí binói Moisesi waminabi nakili risúu olárami nílanala echi auché jaré Riosi pagótawala yuwa, chopi binói ketasi nakili wabé kaníliga chati sitíi olánala, mapujiti echi jaré mapu echirigá kaníliga chati sitíi olako, pe téeli niráa echirigá kanili. ²⁶ Echirigá echi Moisesi waminabi galabé nilali mapurigá binói risúu olárami nílama mapurigá echi Walubela Jesucristo risúu olárami níima riwéali. Chopi echi Moisesi ketásirapé echirigá galabé niralí ne suwaba echi jaré namuti níllawami echo'ná Ejíptochi nirúami, mapujiti binói chopi galabé niralí suwaba mapurigá binói 'yárami níima riwéali Riosi jiti waminánomí. ²⁷ Echi Moisesi galá bichíili Riosi, echijiti binói ku simili echo'ná Ejíptochi anilíwachi kawírali jonsa, chopi ketasi echirigá ku simili mapujiti binói, siné káachi we majali echi walula silíami, mapu wabé yóami níili. Echalí echi Moisesi chopi waminabi galá bichíiga

ku simili, mapurigá galá riwalá niráa Riosi, echi mapu ketasi ritiwíwami ju.

²⁸ Echi Moisesi galá bichíili Riosi, echijiti binói we omáwali echalí omowálawachi mapalí echi kúuchi bo'wá ko'wílati. Echalí binói nulali echi la jiti uchénala ibílana yéachi mapo'ná piréali echi jaré Isaeli pagótami, mapurigá echi walubela Riosi kapitánawala mapu ko'wimea riwéali echi jaré bachá o'wéalapala bachirúami ketasi echirigá ko'wimea echi jaré Isaeli pagótami níwala o'wéalapala bachá jáwami kúrowi. ²⁹ Alí echi jaré Isaeli pagótami galá bichíili Riosi, echijiti aboni galá omérali waminá bo'ómana nasipa simara, echo'ná walú ba'wírali Sitánachi anilíwachi simara, mapurigá echo'ná wi'yéali wakichéachi niráa. Chopi mapalí echi jaré Ejíptochi piréami achigórigá simáranali, echalí ne si'néami aboni waminá si'lili.

³⁰ Echi jaré Isaeli pagótami galá bichíili Riosi, echijiti suwaba najuli echi ripabé tigótami mapu noligá tigótami níili echo'ná walúlachi Jerikochi anilíwachi, mapalí echi jaré Isaeli pagótami galá bichíiga, noligá simáragá noléali echo'ná walúlachi, isínapi niráa, kichao rawé yénasí. ³¹ Echi Ra'aba riwéami mukí mapu chabénala chati sití oláami níili, arigá galá bichíili Riosi. Echijiti binói ketasi mi'lirúami níili mapalí echi auché jaré ke nijéwami pagótami arigá waminá suwábarami níili. Echalí echi Ra'aba galá ku'wíratami níili mapujiti binói bachá niráa ku'wíraga nareli echi okuá Isaeli rijói mapu chiná niráa, bachá 'nésiya mo'wili echo'ná walúlachi.

³² ¿Piri jítini rugá waminabi animea? Ketásini omero waminabi wi'lí ra'ícha echi Gereoni jiti rugá, nibilé cho echi Baraka jiti rugá, nibilé cho echi Sansoni jiti rugá, nibilé cho echi Jepaté jiti rugá, nibilé cho echi Rabiri jiti rugá, nibilé cho echi Samueli jiti rugá, nibilé cho echi auché jaré jiti rugá, si'néami mapu ikí Riosi jiti julárami níili nawisánala. ³³ Ne si'néami echi jaré aboni echirigá galá bichíili Riosi. Echijiti jaré aboni galá nayúrali sayériga nakoá auché jaréana piréami o'wéala. Alí auché jaré galá omérali wachínaga nuláa mapurigá o'wéala silíami niráa mapujiti aboni galá bichíili Riosi. Ne si'néami aboni galá ku'wíratami níili achigórigá mapurigá Riosi bachá niráa ne bichíiwaga anili mapurigá aboni galá ku'wíratami níima. Alí jaré aboni ayénachó galá ku'wíratami níili mapalí Riosi 'yéali echi jaré wabé jobátami o'wéala namuti chumulá mapurigá echi jaré bichíiyami ketasi waminá ko'wirúami níima echi jaré jobátami namuti jiti. ³⁴ Auché jaré ne galá bichíili Riosi, echijiti Binói galá cho'wali echi walú na'í wabé ratáami mapurigá aboni ketasi waminá ikósarami níima. Auché jaré ayénachó galá bichíili Riosi, echijiti aboni ketasi waminá ko'wirúami níili i'wéala ripiyá jiti mapalí jaré arigá nakili echirigá ko'winala aboni. Auché jaré mapu tarapé jiwérami níili, arigá ne wabé jiwérami niráa niwálati mapujiti aboni galá bichíili Riosi. Auché jaré ma-

pu ayénachó galá bichíili Riosi, echijiti jiwérawami 'yárami níili mapurigá aboni galá omérama nakówaga nayúriya auché jaréana jonsa síami o'wéala sontarsi sayeria. ³⁵ Ayénachó nirúali jaré muguí mapu galá bichíili Riosi, echijiti aboni auchecho siné ku nareli, ku o'wíntarami niráa, jaré aboni níwala mapu ma suwíami níili.

Chopi auché jaré galá bichíiyami ritémtami ne wabé simírami risúu olárami nílasa, arigá waminá suwili. Echalí aboni arigá ko'wirúami níili mapujiti aboni ketasi nakili aninala mapu aboni ketasi bichíi Riosi. Aboni chopi nakili mapu pe waminánomí aboni auchecho ku o'wínaga, waminabi galabéala niráa, sinibí pirélama Riosi yuwa. ³⁶ Auché jaré mapu galá bichíiyami níili Riosi ne wabé sitíila anélati. Ayénachó jaré ne wabé wipisólati. Ayénachó aboni jiero wiya jiti bulirúami níisa, echo'ná pachá kumurachi mo'wálati. ³⁷ Auché jaré rité jiti basibuka ko'wirúami níili. Auché jaré nasipa ripunárami níili echi seruchi jiti. Auché jaré wabé risúu olárami níili. Auché jaré i'weli ripiyá jiti ko'wirúami níili. Alí auché jaré a'najátarami nílaga, wikanáami 'yéali, bo'wá wichila chopi napáchaga, chibá wichila napáchaga ayénachó. Alí ne si'néami echi jaré aboni ne wabé risúwati niwálati. Si'néami aboni ne wabé sitíila olárami níili, ne wabé chibi olárami ayénachó.

³⁸ Alí si'néami je'ná galá bichíiyami pagótami waminabi ne wabé simírami galabé oláami níili, ketasi mapurigá echi auché jaré jena'í wichimóbacha piréami mapu echirigá ne wabé risúu olali echi jaré bichíiyami. Chopi aboni echirigá ne wabé risúu ologá a'najátarami nílaga, kanápuromí 'yéali áya mapo'ná pirélama echo'ná jaréana mikabé waná kawichí mapo'ná tarapebi yiri nirúali, echo'ná jaréana ripá rabó omá, echo'ná jaréana risochí kéremá, echo'ná jaréana ri'lé wi'yéali jótachi omá. ³⁹ Ne si'néami je'ná jaré ne galá bichíili Riosi, echijiti jipi rawé yénasí tamujeta abijí galá ra'ícha aboni jiti rugá. Chopi mapuyénasí aboni abijí piréali jena'í wichimóbacha echalí aboni ketasi cho 'yárami níili mapurigá Riosi bachánala ne bichíiwaga aneli mapurigá aboni 'yárami níima riwéali. ⁴⁰ Mapujiti Riosi arigá waminabi ne wabé galabé olama riwéali si'néami echi jaré Binói níwala yuwa. Ayénachó Riosi galá 'nátali tamujé jipi piréami bichíiyami jiti. Alí ne si'néami echi jaré mapu ikita bichíiyami ju Jesucristo niráa, chopi suwaba galabératami níibo mapujiti Jesucristo Binói echirigá tamujé tamí galabératama waminánomí. Alí Binói ketasi nakili mapu echi auché jaré mapu ma suwili, echirigá bachá niráa galabératami níima, chopi mapu waminánomí ne si'néamita sinepi niráa echirigá suwaba galabératami níibo.

Sinibí waminabi nokuísabo bichísiya Jesucristo mapurigá ne galá machiná 'yéname niráa

12 Ne si'néami je'ná jaré pagótami ne galá bichíili Riosi. Alí aboni ma echo'ná ripá riwigachi muchuwi mapujiti aboni echirigá bichíiga, je'ná jerigá ne wabé galabé oláami níili. Jipi aboni echo'ná muchuwi mapurigá tamujé tamí galá ritée niráa. Echijiti galá níima tamujeta waminá chakena ariwesa ne suwaba mapu ikí tamujé tamí kumé, mapujiti echi jaré namuti jiti tamujeta ketasi omero olayá mapurigá Riosi nakí. Ayénachó galá níima máputa waminá ariwebo echi chati sitíi oluwáwami mapu tamujé tamí ne buchuwí, ne noligá bulé. Echali ayénachó galá níima máputa ne galá bichíiga, waminabi nokuísabo galabé olísiya mapuyénasíta piré jena'í wichimóbachí. ² Sinibí waminabi nokuísabo bichísiya Jesucristo, mapurigá ne galá machiná 'yéname niráa. Echi Walubela Jesucristo tamujé tamí bichíirali, ayénachó Binói tamujé tamí sinibí niráa waminabi galabé niráa bichíirama. Chabé ki'yá echi Walubela Jesucristo we nakili risúu nílaga mukunala echo'ná kúrsichi, jena'í wichimóbachí piréami pagótami chati sitíi olalila jiti. Alí Binói tarapé riwéali echirigá ne wabé risúu ologá mi'lirúami níliya, mapujiti Binói galá machili mapu a echirigá mi'lirúami níisagá, alí waminánomí Binói echijiti ne wabé simírami kaníliami níima. Alí pe wakinánala Jesucristo asíbali echo'ná ripá riwigachi, echo'ná echi Walubela Riosi Onorúami yuwa watonachi.

³ Ne galá 'natasí 'yemi mapurigá echi Walubela Jesucristo olali. Ayénachó 'natasí mapurigá Binói ne wabé simírami risúu olárami níili echi jaré chati sitíi oláami pagótami jiti. Alí echirigá 'nátaga ketasi nasínami níisi Jesucristo yuwa najátíya, nibilé cho ariwesi bichíiya echi Binói. ⁴ Mapujiti 'yemi bichíyami arigá sinibí wabé sayera echi chati sitíi oluwáwami, chópítamo ketasi siné cho ko'wirúami níili mapujítitamo echirigá sayéraga olá. ⁵ 'Yémitamo siné káachi ma ketasi 'nátaliré mapurigá Riosi 'yemi mi galá ruyé, mapujiti Riosi ne bichíwali 'yemi mi ruyé achigórigá mapurigá Binói ruyé echi auché jaré Binói kúchuwala, mapujiti echo'ná Riosi Ra'íchala oselíwalachi osirúami ju mapurigá Riosi 'yemi mi je'ná jerigá ruyé:

Keni kúchuwa, ketasi na'áwasi mapalí Nijeni 'yemi mi kastigo 'ya mapujítitamo ketasi olali mapurigá Nijeni 'yemi mi nuleli.

Nibilé cho ariwesi bichíiya mapalí Nijeni 'yemi mi we yona.

⁶ Mapujiti echi Walubela Riosi we galá binéraga ruyé si'néami echi jaré mapu ikí Binói galeko.

Ayénachó mapalí aboni chati sitíi olako, echali echi Walubela Riosi arigá kastigo 'ya echi jaré mapu Binói naré mapurigá Binói kúchuwala niráa.

⁷ Ne galá níima 'yemi arigá anachasa mapalí Riosi 'yemi mi kastigo 'ya. Echali Riosi chopi 'yemi mi galá nisé, mapurigá Binói kúchuwala niráa, mapujiti ne si'néami echi jaré kúcharami arigá kastigo 'yárami ju aboni 'wénawala jiti. ⁸ Alí a Riosi ketasi 'yemi mi péebi niráa echirigá kastigo 'yásagá, achigórigá mapurigá Binói kastigo 'ya ne si'néami echi auché jaré Binói kúchuwala, echali 'yémitamo ketasi ne bichíwali Riosi kúchuwala níibitamo, chópítamo isena kúchuwala niráa níibo. ⁹ Echirigá achigórigá cho níili chabénala mapalí tamujeta abijí we kúuchi níili. Echali echi jaré tamujé 'wénawala tamujé tamí wabé ruyeli máputa ketasi chati sitíi oláami níibo. Alí tamujeta we galabé níilaga nijéwali aboni. Jipi waminabi ne wabé galabé níima máputa sinibí galá nijéwaga olabo mapurigá tamujé Onolá, ripá riwigachi atíami tamujé tamí nulé, mapurigata sinibí niráa pirélabo Binói yuwa. ¹⁰ Echali chabénala tamujé 'wénawala pe téeli bamíwali sinibí tamujé tamí we ruyeli máputa ketasi chati sitíi oláami níibo. Echali aboni chopi tamujé tamí ruyeli mapurigá aboni galabé nirali, chopi echi Walubela Riosi tamujé tamí péé kastigo 'ya mapurigata ne bichíwali ku galabé 'natabo, ayénachó mapurigata galabé oláami niwárami níibo, achigórigá mapurigá Riosi Binói galabé oláami ju. ¹¹ Ne bichíwali ju mapu tamujeta ke siné kanila echali we 'yáati mapalita kastigo 'yarami juta, mapujiti echalita wabé okolá. Chopi waminánomí tamujeta galá wachínaga ologá pirélabo, ayénachóta galá kilíi ologá pirélabo, ata ne bichíwali binésagá galabé olayá mapujítita echirigá kastigo 'yárami ju Riosi jiti.

Ne wabé simírami majawíwami ju ke nijéwasagáta Riosi

¹² Echirigá biché galá ku jiwératasi 'yemi sikala mapu ma risíami ju, mapurigá echalítamo oméрабо olayá mapurigá Riosi nakí. Ayénachó ku jiwératasi 'yemi chokóbala mapu ma ketasi jiwera, mapurigá echalítamo oméрабо Riosi yuwa najata. ¹³ Alí we ási bilé galabé wachíami buwé, mapurigátamo echo'ná 'yéname. Echali a bilé 'yemi ralala ke akánami níisagá, échiko ketasi waminabi bi'lima, chopi galá ku sa'wimea.

¹⁴ Sinibí galabé olasi si'néami echi auché jaré pagótami yuwa. Ke wesi sayéyasi echi auché jaré, chopi galabé ologá piréyasi, mapujiti ke wesi riwimea echi Walubela Jesucristo, a ketasi galabé ku niwárami níisagá. ¹⁵ Ne galá tibúyasi 'yemi aboni niráa, mapurigátamo sinibí ne galá bichíyami níibo, mapurigá ibili 'yemi echijiti galá ku'wiratami níibo, achigórigá mapurigá Riosi nakí 'yemi mi ku'wiranala. Echirigá olasi mapurigá ke wesi 'yemi wabé chati sitíi olírabotamo auché jaré pagótami, ketasi mapurigá bilé namuti we chati sitíi oméami mapu wabé nayútaga ko'yá echi pagótami. ¹⁶ Echijiti ke wesi 'yemi chuwé bilétari yuwa

kochisí. Sinibí we galá níyasi echi jaré Riosi níwala galabé namuti. Echi ki'yá bitéami Esaú ketasi galá niralí echi jaré namuti mapu binói narema riwéali mapujiti bachirúami níili, chopi binói ne suwaba waminá nijili, pe taa sinepi ko'wáami jiti nakulíwaga. ¹⁷ Ayénachó 'yémitamo galá machí mapurigá pe kinana echi Esaú ne wabé nakili mapu binói echirigá galabéraga anérami níima binói onolá jiti mapujiti bachirúami níili. Chopi echalí echi Esaú arigá ketasi galabéraga anérami níili. Echalí echi Esaú ne wabé nalali, chopi binói arigá ketasi galabéraga anérami níili, mapujiti chabénala niráa binói chijúnali mapurigá binói galabéraga anérami níima riwéali.

¹⁸ Alí echi Walubela Riosi ke siné 'yemi mi nuleli, 'yemi jipi piréami galá bichiyami ritémtami, máputamo mulubéanabo echo'ná biléana ripabé rabó ne wabé rajáachi, mapurigá echi jaré Isaeli pagótami mulubéanali echo'ná ripá rabó Sinaíchi anilíwachi mapalí ne wabé rajali. Echalí rawé echo'ná ripá rabó ayénachó ne wabé simírami rokowárali níili, ayénachó ne wabé iwéami ikali. Alí echi ripá rabó Sinaíchi anilíwachi ne bichíwali nirú, ayénachó echi pagótami abijí galá omero simara echo'ná. ¹⁹ Alí 'yémitamo ke bilé cho námali ne wabé iwéami anéachi echi korneta anilíwami, nibilé chótamo námali echi Walubela Riosi ripana jonsa wabé iwéami ra'íchachi, mapurigá echi jaré Isaeli pagótami galá námali. Echalí ki'yá rawé echi jaré Isaeli pagótami mapu echirigá námali Riosi ra'ícháchanachi, we yáati ne wabé risúu anigá tánali mapu Riosi ma ketasi waminabi echirigá ra'icháma. ²⁰ Echalí aboni ketasi nakili mapu echi Walubela Riosi waminabi ra'icháma aboni yuwa, mapujiti aboni ne wabé majali mapujiti Riosi ma bachá niráa janeli: A bilé rijói simírasagá echo'ná ripá rabó mapo'ná Nijeni atí, ayénachó a bilé namuti echo'ná simírasagá, arigá 'wérali ju mapu echiyiri basibuka mi'lirúami níima, bilé silá jiti omá.

²¹ Echalí ki'yá rawé suwaba je'ná jeyiri mapu echi pagótami riwalí, ne suwaba ne wabé simírami majárami níili. Echijiti echi walula Moisesi binói janeli: ¡Nijeni ne wabé sayirúmaga majawá!

²² Bichíwali ju mapu Riosi ke siné 'yemi mi nuleli máputamo mulubéanabo echo'ná biléana ripá rabó ne wabé rajáachi. Chopi mapujítitamo ma galá bichíili Riosi, echijiti Riosi Binói 'yemi mi mulubéantali echo'ná Riosi níwala ripá rabó Siónachi anilíwachi, echo'ná echi Sinibí Bitéami Riosi walúlawalachi mapu echo'ná ripá riwigachi nirú, echi mapu bukulíwami Jerusalémachi anilíwachi ju. Ayénachótamo mulubéansa echo'ná ne wikabé mili o'wéala Riosi kapitánawala yuwa ²³ mapu napawika muchuwi mapurigá aboni sinibí niráa chopi waminabi walubéraga anema Riosi. Ayénachótamo mulubéansa ne si'néami echi jaré wikabé Riosi kúchuwala yuwa, ne si'néami mapu ikí aboni riwalá ma ro'wárami ju echo'ná ripá riwigachi. Ayénachótamo

mulubéansa echi Walubela Riosi yuwa, echi mapu walubela justisia olama ne si'néami pagótami yuwa. Ayénachótamo mulubéansa ne si'néami echi jaré galá bichiyami pagótami aliwala yuwa, mapu echo'ná ripá riwigachi muchuwi, ne si'néami mapu ikí Riosi Binói ma suwaba ne wabé simírami galabé niráa niwáli.

²⁴ Ayénachótamo mulubéansa echi Walubela Jesucristo yuwa, echi mapu Walubela Katéwami ju Riosi yuwa, echi jaré pagótami jiti, mapurigá Riosi Binói auché osáala si'nú bukulíwami niráa bichíwaga anili. Ayénachótamo mulubéansa mapo'ná echi Walubela Jesucristo lalá bachíntami níili. Alí tamujeta sinibí binératami ju waminabi ne wabé simírami galabéala namuti, mapalita binératami ju echi Walubela Jesucristo lalá jiti rugá, ketasi mapurigá mapalita binératami ju echi ki'yá chokichí bitéami Abeli lalá jiti rugá.

²⁵ Echijiti we galá 'nátaga nijéwasi echi Walubela Riosi mapu 'yemi mi galá ruyé. Chabé ki'yá echi jaré pagótami arigá kastigo 'yárami níili, si'néami mapu ikí ketasi galá nijéwali mapalí Riosi ra'íchali aboni jena'í wichimóbachí. Alí jipi rawé echi Walubela Riosi ripá riwigachi atíami, arigá tamujé tamí ruyé Binói Ra'íchala jiti. Alí echalí chabé ki'yá echi jaré mapu ketasi galá nijéwali mapalí Riosi ra'íchali aboni jena'í wichimóbachí, aboni arigá kastigo 'yárami níili. Echijiti tamujé ayénachó waminabi walubé kastigo 'yárami níibo, ata ketasi galá nijéwasagá echi Walubela Riosi mapu tamujé tamí binéraga ruyé echo'ná ripá riwigachi jonsa.

²⁶ Chabé ki'yá mapalí Riosi ra'íchali echi pagótami, echalí Binói we nokérali echo'ná kawírali, chopi jipi echi Walubela Riosi jeaní: Auhecho siné Nijeni ne wabé iwéami nokérama jena'í wichimóbachí, ayénachó Nijeni ne wabé iwéami nokérama echo'ná ripá riwigachi. ²⁷ Alí mapalí Riosi je'ná jerigá anili: Auhecho siné Nijeni nokérama suwaba je'ná kawí, echalí tamujeta machí mapu je'ná jerigá aniwáami ju: Mapalí Riosi auhecho siné nokérama suwaba namuti mapu ikí Binói niwáli, echalí suwaba echiyiri namuti waminá 'yérami níima, mapurigá chopi tibima echi auché jaré galabéala namuti echo'ná ripá riwigachi nirúami mapu ke siné nokuáami ju. ²⁸ Mapujiti echi galabé kawí mapu Riosi tamujé tamí 'yama, ne sinibí niráa nirúlama. Echijiti galá níima máputa sinibí walú natétara 'yabo Riosi, ayénachó galá níima máputa waminabi walubéraga anebo echi Binói. Alí bicheta echirigá we galá majaga nijéwaga olabo mapurigá Riosi nakí. ²⁹ Mapujiti echi Walubela tamujé Riósawala ne wabé suwábiami ju, mapurigá biléana walú rajáachi niráa.

Mapu churigata ologá pirélabo mapurigá Riosi nakí

13 Sinibí ne galá galesi a'nagupi mapurigá ritémtami niráa. ² Sinibí galá 'natasi mapu arigá galá níima máputamo echo'ná 'yemi pirélachi narepo auché

jaré si'wina piréami pagótami, mapujiti jaré ritémtami echirigá ologá, arigá naleli jaré o'wéala Riosi kapitá-nawala, tarapé machigá mapu Riosi kapitánawala níili.

³ Ne galá natimaga 'natasí si'néami echi auché jaré ritémtami jiti mapu ikí pachá mo'wárami juko, achigórigá mapurigá 'yémitamo ayénachó pachá mo'wárami muchuwa niráa aboni yuwa. Echirigá sinibí galá natimaga 'natasí si'néami echi auché jaré jiti mapu ikí risúu olárami ju, mapujiti 'yemi aboni ayénachó siné káachitamo risúu olárami níibo.

⁴ Ibili 'yemi rijói jubéami sinibí galabé ologá pirélasí ibili 'yemi aboni jubila chopi yuwa. Ayénachó ibili 'yemi muguí 'kunéami sinibí galabé ologá pirélasí ibili 'yemi aboni kunala chopi yuwa. Ketasi chuwé bilétari yuwa kochisí, mapujiti Riosi walú kastigo 'yama si'néami echi jaré ke cho jubéami, ayénachó si'néami echi jaré ke cho 'kunéami mapu ikí chuwé bilétari yuwa kochiko. Ayénachó Riosi walú kastigo 'yama echi jaré jubéami mapu ikí isena muguí yuwa kochiko, ayénachó echi jaré muguí 'kunéami mapu ikí isena rijói yuwa kochiko.

⁵ Ketasi korusi echi wenomí, chopi galá kanílasí echi jaré namuti jiti mapu ikítamo ma níwa, mapujiti Riosi jeanili: Sinibí Nijé nimí tibútama. Nijeni tarapé siné mi wana bi'neli ariwema. ⁶ Echirigá tamujé bichiyami galata omero ne bichíwaga jeanyá:

Echi Walubela Riosi ju mapu tamí ku'wira. Ketásini majama mapu ikí echi pagótami omero tamí chati sitíi olayá.

⁷ Ne galá galabéala 'nalí 'natasí echi jaré jiti mapu 'yemi napawika bichiyami o'wéalawala níili, ne si'néami mapu ikí 'yemi mi nawésali Riosi Ra'íchala. Sinibí galá 'natasí mapurigá aboni ne galabé ologá piréali mapuyénasí aboni abijí muchili jena'í wichimóbachi. Sinibí ne galá bichíisi Riosi, achigórigá mapurigá aboni galá bichíili.

⁸ Echi Walubela Jesucristo ke siné nakuliwa. Binói achigó yiri ju jipi, mapuyiri chabénala níili. Alí Binói ne sinibí echirigá achigó yiri chopi níima. ⁹ Ketasi bichíiga najátasi mapuyiripi pagótami mapu 'yemi mi si'nú niráa, si'winárigá binélako. Ne sinibí chopi galá bichíisi mapurigátamo ma galá binératami níili echi Wabé Galabé Riosi Ra'íchala. Ne wabé galabé ju mapu Riosi sinibí wabé kaligá tamujé tamí jiwérata sulachí niráa, chopi ketasi galá ju máputa chopi nijéwabo karúmati nulalíwami mapurigá echi jaré Juríosi pagótami tamujé tamí nulé. Abóniko chopi tamujé tamí nulé máputa ketasi kopoa wikabé ko'wáami mapu arigá galabé ju ko'wawa. Alí echi jaré pagótami mapu echirigá nijéwa ketasi ku'wíratami ju ne sulachí niráa.

¹⁰ Echi jaré sacerdote echo'ná walubé Juríosi pagótami ri'obáwalachi nóchami sinibí, kúuchi niráa, ko'wá echi sapá mapalí aboni ko'wigá 'ya Riosi echi jaré namuti. Chopi tamujeta galá bichíi mapu echi Walubela Jesucristo arigá mi'lirúami níili tamujé chati sitíi olalila

jiti. Alí mapuyénasí echi jaré sacerdote abijí ko'yagá 'ya Riosi echi jaré namuti, echalí aboni ketasi omero bichíiya Jesucristo niráa. ¹¹ Alí echi walula sacerdote echo'ná pachá ne wabé simírami galabéalachi uchémiya echi jaré namuti lalá, mapurigá echi jaré Juríosi pagótami chati sitíi olalila ku wikawárami níima, chopi echi jaré namuti sapala suwaba ikósarami ju waminá chakena mapo'ná ketasi wesi piré. ¹² Echijiti echi Walubela Jesucristo ayénachó waminá machímana torúami níili, echo'ná walúlachi jonsa, mapalí Binói waminá mi'lirúami níili, mapurigá Binói galá omérama ku galabé niwayá tamujé pagótami, mapujiti Binói lalá echirigá ku'luwárami níili. ¹³ Echijiti jipi galá níima mapu tamujé bichiyami ayénachó risúu nílabo mapujiti tamujé Walubélawala echirigá wabé risúu olárami níili. Alí mapurigá Jesucristo echo'ná walúlachi jonsa togá machímana mi'lirúami níili, echirigá ayénachó 'wérali ju mapu tamujé jipi piréami, máputa galá bichiyami ju, ma ketasi achigórigá olabo mapurigá echi auché jaré pagótami, chopi máputa ayénachó risúu nílabo mapurigá Jesucristo risúu níili.

¹⁴ Mapujiti jena'í wichimóbachi tamujeta ketasi níwa biléana walúlachi mapo'nata sinibí niráa pirélabo, chópita abo echi wabé galabé walúlachi mapo'nata sinibí niráa pirélabo waminánomí. ¹⁵ Echijiti galá níima mapurigá tamujeta sinibí niráa waminabi walubéraga anebo Riosi, mapujiti Jesucristo tamujé tamí jiti mukuli. ma ketásita waminabi ko'wigá 'yabo Riosi echi jaré namuti, chópita sinibí echirigá waminabi walubéraga anebo Riosi. ¹⁶ Ke siné ariwesi galabé olayá. Sinibí a'nagupi nachútaga olasi mapu ikítamo níwa, mapujiti Riosi waminabi wabé kaníila mapalita echirigá olá, ketasi mapurigata ko'yagá 'yabo Binói jaré namuti.

¹⁷ Ne galá nijéwasi echi jaré 'yemi o'wéalawala mapu 'yemi mi binera Riosi Ra'íchala. Ne wabé galabé nílasí 'yemi o'wéalawala mapujiti aboni nulérami níili Riosi jiti 'yemi mi tibútanala, mapurigá 'yémitamo waminabi galá bichiyami níibo. Alí bichétamo galá machí mapu arigá 'wérali ju mapu aboni auchecho ku ruyema Riosi mapu churigá aboni 'yemi mi tibútali. Galá níima yémitamo echirigá ne wabé galabé nílasa aboni, mapurigá aboni echijiti galá kanílaga, ketasi o'mónaga nochama, mapujiti 'yémitamo ketásirapé kaníliga binebo, a aboni ne wabé o'mónami níisagá.

¹⁸ Sinibí tansi Riosi tamujé tamí jiti. Tamujé sinibita mayé máputa galabé ologá piréali mapurigá Riosi nakí, mapujítita sinibí ne suwaba jiti ne wabé galabé olánali. ¹⁹ Jipi nijeni 'yemi mi waminabi wabé táni mapu 'yémitamo tánabo Riosi mapurigá ke 'me ayó nijeni galá omérama ku simiyá echo'ná 'yemi yuwa. Tamujé Riósawala ne wabé Walubela ju

²⁰ Echi Walubela Riosi ju mapu 'yemi mi 'yali mapurigátamo kilíi ologá pirélabo. Ayénachó Binói ju ma-

pu ku owíntali echi tamujé Walubélawala Jesucristo, mapalí Binói ma mi'lirúami níli. Alí Jesucristo ne Walubela Niséami ju mapu tamujé tamí nisé, ne si'néami tamujé mapu ikita Binói pugula bo'wá niráa ju, mapujiti Binói wabé léntaga mi'lirúami níli tamujé chati sitíí olalila jiti. Alí Riosi Onorúami tamujé tamí bichíwaga ané mapu Binói tamujé tamí ku wikáwama mapujiti echi Walubela Jesucristo echirigá mukuli tamujé chati sitíí olalila jiti. Echijiti nijeni nakí mapu echi Walubela Riosi ²¹ 'yemi mi galabératama mapurigátamo sinibí galabé olabo, achigórigá mapurigá Riosi Binói nakí. Ayénachó nijeni nakí mapu Riosi si'néami tamujé tamí ne wabé galabé oláami niwáma, achigórigá mapurigá Binói nakí máputa galabé oláami níbo, mapujítita bichíyami ju Jesucristo niráa. Ayénachó nijeni nakí mapu echi Walubela Jesucristo sinibí niráa, ne sinibí waminabi walubéraga anérami níma. ¡Echirigá níma!

²² 'Yemi keni ritémawa, nijé 'yemi nimí táni mapurigátamo ne kilíí niráa galabeala 'natabo je'ná ra'íchali jiti mapurigá nijeni 'yemi mi galá ruwigá oseli, mapujiti nijeni 'yemi mi pe okuá oseli. ²³ Jipi nijeni 'yemi mi ruyé mapurigá echi tamujé rijimala Timoteo riwéami ma ketasi waminabi pachá bachárami ju. Alí a binói we yáa ku nawásagá jena'ibi, echalí binói ayénachó tamí yuwa simea mapalini echo'ná 'yemi mi 'némiya simí.

²⁴ Galá ripórasi si'néami echi jaré ritémtami mapu ikí 'yemi o'wéalawala ju. Ayénachó galá ripórasi ne si'néami echi jaré napawika bichíyami ritémtami echo'ná piréami. Echi jaré ritémtami jena'í Itáliachi anilíwachi kawírali piréami ayénachó 'yemi mi galá ripóraga 'nawala.

²⁵ Nijeni we nakí mapurigá Riosi si'néami 'yemi mi ne wabé galigá ku'wírama. ¡Echirigá níma!

1 Pegro

Echi Pegro osé echi jaré bichíyami mapu wikaná chijanárami níili

1 Nijé Pegro, Jesucristo jiti julárami juni nawísánala. Nijeni 'yemi mi je'ná jerigá osé, 'yemi máputamo chijaga piré echo'ná wikanáami si'wina kawírali, echo'ná Póntochi anilíwachi, echo'ná Galásiachi anilíwachi ayénachó, echo'ná Kaparósiachi anilíwachi ayénachó, echo'ná Ásiachi anilíwachi ayénachó, echo'ná Bitíniachi anilíwachi asíchiko.

2 Riosi Onorúami ma 'yemi mi chapili mapurigá Binói níwala niráa, mapurigá Binói nakili olánala chabé ki'yá jonsa. Alí echi Wabé Galabé Riosi Iwigala ma 'yemi mi galabérali pachana 'yemi sulálachi mapujiti Jesucristo wabé léniga mukuli 'yemi chati sitíi olalila jiti. Alí bichétamo echirigá wabé galabératami níili mapurigátamo galá nijéwami níibo Riosi, ayénachó mapurigátamo ku bi'wárami níibo mapujiti Jesucristo echirigá léniga mukuli 'yemi jiti, mapurigá 'yemi chati sitíi olalila ku wikawárami níima. Nijeni nakí mapurigátamo suwaba ne galabé niráa ku'wíratami níibo, ayénachó mapurigátamo ne galá kilí ologá pirélabo.

Tamujeta bichíi máputa ne wabé galá ku'wíratami níibo

3 Galá níima máputa waminabi wabé walubéraga anebo Riosi, echi mapu echi Walubela Jesucristo Onolá ju, mapujiti Riosi tamujé tamí ne wabé natimaga 'yali mapurigata bukulíwami niráa pirélabo, mapujiti Jesucristo ku o'wíntarami níili mapalí Binói ma mukúami níili. Echijítita ne galá bichíiga buwé, **4** mapurigata arigá narepo suwaba echi galabéala mapu Riosi tamujé tamí 'yama waminánomí, echi mapu Binói galá nuté echo'ná ripá riwigachi, mapo'ná tarapé nirú echi chati sitíi oluwáwami. Alí echi galabéala mapu Riosi 'ya, ne sinibí niráa nirúlama. Alí ke siné suwibama, ketasi mapurigá echi jaré namuti jena'í wichimóbachi nirúami.

5 Alí mapujiti 'yémitamo ne galá bichíi Riosi niráa, echijiti echi Walubela Riosi 'yemi mi ne wabé jiwériga tibútama mapuyénasítamo ne bichíwali narepo echi galabéala mapu Riosi 'yemi mi 'yama, ayénachó mapuyénasítamo ne sébali galá ku'wíratami níibo, mapalí Jesucristo ku nolínama echalí ne jubá rawé.

6 Echijiti 'yémitamo ne wabé simírami kanila, chopi siné káachi arigá 'wérali níima mapu 'yémitamo pe

téeli niráa risúu olárami níibo. **7** Mapujiti echi wabé natéami oro anilíwami wenomí, arigá galá bi'walíwami ju, ne wabé simírami ratabáchaga echo'ná na'írali mapuyénasí basunú, alí Riosi echirigá achigórigá galá machimea mapu churigá 'yémitamo galá bichíi Binói niráa, mapalítamo wabé risúu olárami ju mapurigátamo waminabi galá bichíyami níibo. Alí átamo abijí waminabi galá bichísagá mapalítamo echirigá risúu olárami ju, echalí 'yemi bichíilawala waminabi ne wabé natéami níima, ketasi mapurigá echi oro mapu ketasi sinibí niráa nirúlama. Alí Riosi chopi ariwé mapurigátamo echirigá risúu olárami níibo mapurigátamo waminabi galá bichíyami níibo, mapuyénasí Riosi omérama aniyá máputamo galá bichíyami ju, ayénachó mapurigá Binói omérama 'yemi mi waminabi ne wabé simírami o'wéalatiya, echalí mapalí Jesucristo ku nawama jena'í wichimóbachi.

8 'Yémitamo ne wabé galé echi Walubela Jesucristo, chópítamo ke siné riwali echi Binói. Alí mapujítitamo ne galá bichíi Jesucristo jipi rawé, mapalítamo ketasi cho ritiwá Binói, echijítitamo ne wabé simírami kaníila echi Walubela Riosi yuwa, mapurigátamo kanílabo echo'ná ripá riwigachi. Alí bichétamo ketasi chirigá omero ra'íchaga niráa ku ruyá mapu chuyena 'yémitamo echirigá ne wabé simírami kaníili. **9** Jípitamo ma ku wikawárami ju 'yemi aliwálachi niráa mapujítitamo echirigá galá bichíili Jesucristo niráa.

10 Chabé ki'yá echi jaré o'wéala Riosi jiti nawésami ne wabé machináali mapu churigá ku wikawárami níibo riwéali 'yemi jipi piréami galá bichíyami pagótami. Alí mapalí Riosi galá machírali aboni, echalí aboni echo'ná oselichi osali mapurigá Riosi ne wabé galigá 'yama riwéali, mapurigá 'yémitamo ku wikawárami níibo ne wabé wakinánala. **11** Echalí Jesucristo Iwigala echo'ná pachana echi jaré nawésamichi asali. Alí Jesucristo Iwigala bachá niráa echirigá machírali echi jaré nawésami mapu churigá Binói risúu olárami níima riwéali, ayénachó mapu churigá Binói wabé walubératami níima riwéali pe wakinana, chopi aboni ketasi cho machili Chigá níili mapu echirigá risúu olárami níima riwéali. Nibilé cho machili chu kilíbuko echirigá ikimea riwéali, chopi aboni ne wabé nakili machinala ne suwaba. **12** Chopi Riosi machírali mapurigá echi jaré namuti mapu aboni osali ketasi osirúami níili mapurigá aboni chopi galá machimea chu aniwáami níili, mapujiti echi

jaré namuti chopi osirúami níili mapurigá tamujé jipi piréami pagótami ne galata machiboa. Alí jipi 'yémitamo ne galá nawésarami níili suwaba je'ná Galabé Ra'íchali. Alí echi jaré mapu 'yemi mi nawésali, ne galá nulérami níili echirigá nawésanala, mapujiti echi Galabé Riosi Iwigala echirigá nuleli. Alí echi jaré o'wéala Riosi kapitánawala ne wabé nakí machinala je'ná jeyiri namuti.

Riosi tamujé tamí bayé mapurigata ne galabé ologá pirélabo

¹³ Echijiti bachá niráa ne galá 'natasi mapu churigátamo ologá pirélabo, alí bichétamo ne bichíwali a'lárata mi níibo. Sinibí galá bichíga pirélasí mapujiti Riosi ne wabé galigá 'yemi mi 'yama echi wabé Galabéala mapalí Jesucristo ku nawama jena'í wichimóbachi. ¹⁴ Mapujítitamo ma galá nijéwiami ju Riosi, mapurigá Binói kúchuwala niráa, ma ketasi waminabi chuwé olasi mapurigátamo chabénala olali mapalítamo ketasi cho machíyami níili Riosi. ¹⁵ Chopi ne wabé galabé oláami nílasi 'yemi, mapujiti echi Walubela Riosi mapu 'yemi mi bayeli bichíinala, Échiko ne wabé simírami galabé oláami ju. ¹⁶ Mapujiti echo'ná Riosi Ra'íchala oselíwalachi je'ná jerigá osirúami ju mapurigá Riosi Binói jeaní: Ne galabé oláami nílasi 'yemi, mapujiti Nijeni ne wabé galabé oláami ju.

¹⁷ Alí 'yémitamo Onorúami niráa ané echi Walubela Riosi, echi mapu galá machí suwaba mapu ikí ibilíga olá. Echijiti galá níima mapu 'yémitamo sinibí ne galá nijéwabo Riosi, ne galá majáami niráa, ne sinibí mapuyénasítamo abijí piré jena'í wichimóbachi, mapujiti Riosi wabé wi'nijima echi jaré chati sitíi oláami, chopi Binói galabé anema echi auché jaré galá oláami. ¹⁸ Ne galá níima 'yémitamo echirigá nijéwasa, mapujítitamo galá machí mapurigá Riosi ma 'yemi mi ku wikáwali, mapurigátamo ma ketasi waminabi chuwé sitíi chati ologá pirélabo mapurigá 'yemi pagótamawala echirigá chuwé sitíi chati ologá piréali. Ayénachótamo galá machí mapu Riosi ne wabé simírami nakili mapurigá 'yémitamo echirigá ku wikawárami níibo, chopi Riosi ketasi natétali jaré namuti jiti mapu suwíbami ju mapurigá 'yémitamo echijiti ku wikawárami níibo. Riosi ketasi natétali echi ne wabé natéami oro jiti, nibilé cho natétali echi we natéami plata jiti, ¹⁹ chopi Riosi nijali echi Walubela Jesucristo mapurigá Binói wabé léntiga mi'lirúami níima 'yemi chati sitíi olalila jiti, mapurigátamo ne bichíwali echijiti ku wikawárami níibo. Echali echi wabé galabé Jesucristo lalá echirigá ku'luwárami níili mapurigá echi jaré Juríosi pagótami ku'lúwali echi jaré galabé bo'wá lalá; chopi echi Walubela Jesucristo lalá waminabi simírami galabé níili mapujiti Binói ke siné chati sitíi olali. ²⁰ Alí ki'yá chokichí jonsa mapalí Riosi ketasi cho niwáli je'ná kawí, echali Riosi galá 'ná-

taga a'lárali mapurigá echi Walubela Jesucristo je'ná jerigá olárami níima, chopi Jesucristo bukulí wabé wakinánala nawali jena'í wichimóbachi mapurigá Binói 'yemi mi wabé ku'wírama. ²¹ Alí 'yémitamo ma galá bichíi Jesucristo niráa, echijítitamo ma ne galá bichíyami ju Riosi Onorúami, mapujiti echi Walubela Riosi ma ku owíntali echi Walubela Jesucristo mapalí Binói ma mukúami níili. Ayénachó Riosi ne wabé walubérali Jesucristo. Echijiti mapalí 'yémitamo echirigá bichíili Jesucristo niráa, echalítamo ayénachó galá bichíili echi Walubela Riosi Onorúami, ayénachótamo buwé mapurigá Échiko 'yemi mi waminabi ku'wírama.

²² Alí mapalítamo ma galá bichíiga nijéwali echi ne bichíwali Riosi nawésawala, mapalí echi Wabé Galabé Riosi Iwigala 'yemi mi echirigá bichíirali, echali jonsa 'yemi aliwala ma galá ku bi'wárami níili. Echijiti jípítamo galá galé echi auché jaré ritémtami. Alí ne galá ju máputamo echirigá galebo a'nagupi, ne sulachí niráa, ayénachó galá níima máputamo ne wabé simírami echirigá galebo a'nagupi. ²³ Mapujiti 'yémitamo ma auchecho siné bukulíwami niráa ku ranarúami níili, chopi mapalítamo echirigá ku ranarúami níili 'yémitamo ma ketasi ranarúami níili echi pagótami kúchuwala niráa, echi mapu waminá suwí. Echalítamo chopi echirigá auchecho siné ku ranarúami níili, Riosi kúchuwala niráa, mapujítitamo galá bichíili Riosi Ra'íchala, echi mapu sinibí niráa bitéami ju, echi mapu ke siné suwibama. ²⁴ Mapurigá osirúami ju echo'ná Riosi Ra'íchala oselíwalachi mapo'ná je'ná jerigá aní:

Ne si'néami pagótami jena'í wichimóbachi piréami waminá suwimea,

mapurigá echi kasalá we yáati waminá suwiba, ayénachó echi pagótami o'wéalawala waminá suwibama mapurigá echi kasalá siwalá we yáati waminá suwiba, mapujiti echi kasalá waminá wakiché, ayénachó echi kasalá siwalá waminá rujuní,

²⁵ chopi Riosi Ra'íchala sinibí niráa nirúlama.

Alí je'ná Galabé Riosi Ra'íchala ju mapurigá 'yémitamo ma nawésarami níili, mapurigátamo ku wikawárami níibo.

2 Echijiti waminá ariwesi suwaba chati sitíi oluwáwami. Ketasi wesi 'yékkaka ra'ichási, nibilé siné 'yékkasi echi auché jaré. Ketasi korúkasi auché jaré níwala namuti, nibilé cho kichisi auché jaré mapu ne wabé simírami machíami ju ketasi mapurigá 'yemi. Alí ketasi sitíi chati ra'ichási auché jaré jiti rugá. ² Jipi 'yémitamo mapurigá echi jaré kúuchi múchali niráa ju, echijiti ne galá níima mapu 'yémitamo wabé nakiboa mapurigá Riosi 'yemi mi binérama Binói Ra'íchala, mapurigátamo waminabi galá bichíyami níibo, achigórigá mapurigá echi jaré múchali galá ochera mapalí aboni galá chi'í, mapujiti echi Galabé Riosi Ra'íchala mapurigá galabé leche niráa ju mapurigá 'yémitamo waminabi ochérabo galá bichíyami niráa, ayénachó

mapurigátamo galá ku'wíratami níibo. ³ Mapujiti máta-mo galá machíili Riosi Ra'íchala, ayénachótamo ma galá machí mapu echi Walubela Riosi ne wabé simírami galabé ju.

Jesucristo mapurigá bilé galabé Rité ju, sinibí bitéami niráa

⁴ Galá bichíiga mulubéanasi echi Walubela Jesucristo yuwa. Binói mapurigá bilé galabé Rité niráa ju, alí Binói sinibí bitéami ju. Echi jaré pagótami waminá chakena pali echi Rité mapurigá tarapé natéami niráa, chopi Riosi ma chapili echi Rité mapurigá ne wabé simírami natéami niráa. ⁵ Jesucristo ma 'yemi mi 'yali mapurigátamo bukúlwami niráa sinibí pirélabo mapujítitamo Binói níwala ju, ayénachó Binói Galabé Iwigala pachana 'yemi yuwa bité, echijiti si'néami 'yemi napawika bichíyami ne napawika niráa mapurigá Riosi ri'obáwala ju. Alí ibili 'yemi mapurigá kúuchi rité ju echo'ná ri'obachi tigótami niráa. Échiko echi ne bichíwali Riosi ri'obáwala ju, tarapé ritiwíwami niráa. Echijiti ariwesi mapurigá Riosi 'yemi mi jawama mapurigá sacerdote niráa, mapurigátamo chopi olabo mapurigá Riosi nakí. Ayénachó máputamo ne wabé galá o'wikebo Riosi, sulachí niráa ne suwaba galá 'yasa mapurigá Riosi Binói nakí, mapujítitamo bichíi Jesucristo niráa. ⁶ Echijiti ayénachó echo'ná Riosi Ra'íchala osilíwalachi je'ná jerigá osirúami ju:

Echo'ná Siónachi anilíwachi Riosi níwala walúlachi Nijeni julama Nijé Ranala mapurigá Binói echi Galabé Rité níima, echi mapu bachá niráa tigótami ju echo'ná sitocho Riosi kalílachi.

Echi Rité ne wabé natéami ju.

Alí si'néami mapu ikí galá bichíiko Binói niráa ketasi riwélatarami níima.

⁷ Alí 'yemi galá bichíyami yuwa, echi Rité ne wabé natéami ju. Chopi echi auché jaré ketasi bichíyami yuwa, je'ná jerigá ikimea mapurigá osirúami ju echo'ná Riosi Ra'íchala osilíwalachi:

Echi Rité mapu echi jaré kaliráami waminá chakena pali mapurigá ke natéami niráa, échiko echo'ná ri'lé sitocho ma bachá tigótami ju.

⁸ Ayénachó ikili mapurigá echo'ná osirúami ju jeanigá: Nijé Ranala mapurigá bilé Rité níima mapo'ná aboni turúpama.

Alí Binói jiti jaré waminá i'mema, mapujiti aboni ketasi bichíinali Binói niráa.

Echijiti echi jaré aboni ma turúpali echi Rité jiti, mapujiti aboni ketasi bichíili Riosi Ra'íchala. Echali aboni arigá chakena rujuili mapujiti echirigá nulárami níili mapu echi jaré ke bichíyami echirigá waminá rujuima.

Echi jaré Riosi níwala pagótami

⁹ Chopi 'yémitamo chapirúami níili mapurigátamo galá o'wikéami níibo Riosi, mapurigá jaré sacerdote niráa, echi Walubela Riosi níwala. Riosi 'yemi mi waná rojuánali mapurigátamo Binói níwala pagótami níibo, ne galabé oláami niráa. Alí Riosi je'ná jerigá olali mapurigá 'yémitamo nawisabo mapurigá Riosi Binói ne wabé omériga oláami ju suwaba namuti mapu echi jaré pagótami ketasi omero olayá. Alí echi Walubela Riosi ju mapu 'yemi mi bayeli mapurigátamo 'machín-abo echo'ná rokowárali jonsa, mapo'nátamo chopi chati sitíi ologá piréali, mapurigátamo mo'wiboa Riosi yuwa echo'ná mapo'nátamo chopi wabé galabé olabo, mapo'ná ne suwaba namuti ne galá machíami niráa machirúami ju. ¹⁰ 'Yémitamo chabénala ketasi Riosi níwala pagótami níili, chopi jípitamo ma Riosi níwala pagótami ju. Chabénala 'yémitamo ketasi machili mapurigá Riosi 'yemi mi natimali, chopi jípitamo galá machí mapurigá Riosi 'yemi mi ne wabé natimá.

Galá o'wikesi Riosi

¹¹ 'Yemi keni ritémawa wabé galérami, 'yémitamo ketasi sinibí niráa piréami ju jena'í wichimóbachi, chópitamo echo'ná ripá riwigachi piréami níibo ne sinibí niráa. Echijiti nijeni 'yemi mi ne wabé táni mapurigátamo ma ketasi chuwé sitíi chati olabo, mapurigá 'yemi aboni, siné káachi, chopi nakí olánala. Alí 'yémitamo chopi waminá 'wigáami níima sinibí niráa mapujítitamo chati sitíi chuwé olánali, átamo ketasi ku wikawárami níisagá. ¹² Ne galabé ologá pirélasa echi auché jaré pagótami yuwa mapu ketasi cho machíami ju Riosi. Alí mapalí 'yémitamo echirigá olá, echali aboni riwimea mapurigá 'yémitamo chopi olá echi wabé galabéala. Alí aboni ayénachó waminabi walubéraga anema Riosi mapalí Binói justicia olama. Chopi jipi iyénasi aboni, abijí wabé sayéraga ra'ícha 'yemi sayéraga, mapurigá 'yémitamo ne wabé chati sitíi oláami niráa.

¹³ Ne galá nijéwasi si'néami echi jaré pagótami o'wéalawala, mapujítitamo galá bichíyami ju echi Walubela Jesucristo niráa. Ne galá nijéwasi echi ne walula bachá nuláami presidente, mapujiti échiko ne bachá walula ju. ¹⁴ Ayénachó ne galá nijéwasi si'néami echi auché jaré igúsuwami mapu ikí echi walula presidente nulé kastigo 'yánala echi jaré chati sitíi oláami, echi jaré mapu binói ayénachó nulé galabé oláami niráa anénala echi auché jaré mapu ikí galabé olako. ¹⁵ Mapujiti Riosi chopi nakí mapurigá 'yémitamo sinibí wabé galabé olabo, mapurigá echi auché jaré ke machíami, mapu ketasi cho bichíyami ju, ketasi omérami 'yemi mi sitila anigá sayériya.

¹⁶ 'Yémitamo ma ketasi nulérami ju wikabé namuti olánala, mapurigátamo nulérami níili echi nulalíwami

jiti. Echijiti galá kaníлага pirélasí, chopi ketasi chuwé olasi. Sinibí ne wabé galá nijéwaga pirélasí Riosi, mapurigá Binói piónawala niráa. ¹⁷ Ne galá o'wikesi si'néami galabé oláami pagótami. Ne wabé galesi si'néami echi auché jaré ritémtami. Ne galá bichííga majasi Riosi. Ne galá o'wikesi echi ne walula bachá nuláami presidente.

Jesucristo ne galá anáchali mapalí Binói risúu olárami níili

¹⁸ 'Yemi máputamo pióntami ju, ne galá o'wikeka nijéwasi echi jaré o'wéala mapu 'yemi mi nuleko. Ketasi chopi echirigá nijéwasi echi jaré mapu galabé oláami ju, chopi ayénachó echirigá o'wikeka nijéwasi echi auché jaré mapu wabé na'áwami ju. ¹⁹ Mapujiti ne galabé oluwáwami ju mapalí bilé rijói, Riosi jiti 'nátaga, arigá galá anacha mapalí binói risúu olárami ju, mapalí binói arigá ketasi biyiri namuti chati sitíi oláliko. ²⁰ Chopi a 'yémitamo chati sitíi olásagá, ayénachó átamo echijiti kastigo 'yárami níisagá, echalí ke wesi 'yemi mi galabé oláami anema, arigátamo kilí niráa anachásagá. Alí a bilé rijói ne galabé olásagá, alí a binói arigá risúu olárami níisagá, echalí Riosi Binói anema mapu echi rijói galabé olá mapalí échiko kilíi niráa anachasa. ²¹ Echijiti Riosi 'yemi mi bayeli najátanala Binói yuwa, mapujiti echi Walubela Jesucristo ma wabé risúu níili 'yemi jiti. Alí galá níima 'yémitamo achigórigá risúu olárami níisa mapurigá Binói risúu olárami níili. ²² Echi Walubela Jesucristo ke bilé siné chati sitíi olali. Alí Binói nirapé siné 'yékali echi auché jaré. ²³ Alí mapalí echi auché jaré we sitila anigá ra'íchali, echalí Jesucristo ketásirapé ku kuwana sitila anigá nimili. Alí mapalí auché jaré wabé risúu olali Binói, echalí Jesucristo ketasi ku kuwana yónali, chopi Binói niráa 'yali Riosi. Alí echirigá buweli mapurigá Riosi chopi kastigo 'yama echi jaré Binói sayela, mapujiti Riosi sinibí galá wachínaga olá justicia. ²⁴ Alí echi Walubela Jesucristo Binói walú kastigo 'yárami níili mapalí Binói klavo jiti michóniga mi'lirúami níili echo'ná kúrsichi, chopi Binói echirigá kastigo 'yárami níili tamujé chati sitíi olalila jiti. Alí echirigá olárami níili mapurigá tamujé bichíiyami ma ketasi waminabi chati sitíi olabo, chopi mapurigata galá wachínaga ologá pirélabo. Echalí echi Walubela Jesucristo waminá mi'lirúami níili, mapurigá 'yémitamo galá bichííga ku wikawárami níibo. ²⁵ Chabénala 'yémitamo 'yénali mapurigá jaré bo'wá 'wigáami niráa, chopi jípitamo ma ku ro'wili echi Walubela Jesucristo yuwa. Alí Jesucristo ne galá tibútaga niserá 'yemi aliwala.

Galá níima echi jaré niwíkami je'ná jerigá ologá pirélasa

3 'Yemi muguí kunéami ne galá nijéwasi 'yemi aboni kunala, mapurigá a jaré aboni ketasi bichíís-agá Riosi Ra'íchala, echalí aboni arigá bichííratami níima mapalí aboni ritiwá mapurigá 'yemi jubítami ne galá bichííga olá. Alí aboni echirigá bichííratami níima mapalí 'yemi jubítami arigá ketásirapé nawésaga ruyé aboni. ² Echalí aboni ne galá bichííma mapujiti aboni riwimea mapurigá 'yemi jubítami ne galabé ologá piré, ayénachó mapurigá 'yémitamo galá o'wiké Riosi. ³ Ketasi galá níima 'yemi muguí, chopi machímana niráa wabé ba'yórasa. Ketasi galá níima máputamo ripabé niráa achagá ne wabé simírami ba'yóraga tichisa 'yemi kupala, nirapé cho mapurigátamo uchuchasa echi jaré wabé natéami namuti oro niwárami, nirapé cho mapurigátamo ne wabé simírami natéami niráa sipusa, ⁴ chopi galá níima 'yémitamo wabé galéami nílasa. Alí átamo echirigá olásagá, echalí 'yémitamo sinibí niráa ba'yóami níibo, mapujítamo wabé galéami níibo ne sulachí niráa, ayénachótamo wabé galá kilíi ologá piréami níibo. Alí Riosi wabé kaníila mapalítamo echirigá ologá pireko. ⁵ Alí echirigá ikili echi jaré galabé oláami muguí, chabé ki'yá piréami, ne si'néami mapu ikí galá bichííga o'wikeli Riosi. Alí aboni ayénachó galá o'wikeka nijéwali aboni kunala. ⁶ Echirigá olali echi Sara, echi mapu ne galá nijéwali echi Abrami, echi mapu ayénachó jeanigá aneli echi Abrami: Mujemi ju keni walula. Alí 'yemi jubítami ayénachó ne bichíwali galabé oláami níibo, mapurigá echi Sara niráa, átamo sinibí galabé olásagá, ayénachó átamo tarapé namuti majásagá. ⁷ 'Yemi rijói kunátami ne wabé galigá nisérasí 'yemi jubila. Galá o'wikesi aboni mapujiti echi jaré muguí ketasi 'me jiwela, ketasi mapurigá 'yemi rijói niráa. Ayénachó galá o'wikesi 'yemi jubila mapujiti aboni achigórigá 'yárami ju mapurigá aboni sinibí niráa pirélama, mapurigá 'yemi galá bichíiyami rijói 'yárami níili, mapujiti Riosi 'yemi mi echirigá wabé galigá 'yali. Echirigá ologá pirélasí, mapurigátamo galá omérabo Riosi yuwa tániga ra'ícha.

Echi jaré mapu risúu olárami ju mapalí aboni chopi galabé olá

⁸ Ne jubá 'yemi nimí ané mapu si'néami 'yémitamo a'nagupi nagúuraga pirélabo. A'nagupi wabé galigá natimasi mapurigá ritémtami niráa. Wabé galéami nílasí, tarapé nóchami niráa. ⁹ Ketasi ku nimíkasi mapalí auché jaré 'yemi mi sitila olá, nibilé cho ku kuwana ni'yókasi sitila anigá mapalí aboni 'yemi mi sitila ané. Chopi si'winárigá wabé galigá ra'íchasi echi jaré aboni, mapujiti Riosi 'yemi mi bayeli mapurigátamo ayénachó

galabé ra'ícharami níibo Riosi Binói jiti. ¹⁰ Mapujiti echo'ná Riosi Ra'íchala oselíwalachi je'ná jerigá osirúami ju:

Ne si'néami echi jaré mapu ikí nakiko kaníliga pirélanala sinibí rawé,
galá níima abóniko we galabé, tarapé chati sitíi ra'ichása,

ayénachó mapurigá aboni tarapé 'yékaka ra'ichása.

¹¹ Galá níima echi jaré aboni waminá ariwesa suwaba chati sitíi oluwáwami, mapurigá aboni chopi wabé galabé olama,

ayénachó galá níima aboni chopi sinibí galabé kilí ologá pirélasa.

¹² Mapujiti echi Walubela Riosi ne galá niserá si'néami echi jaré galabé wachínaga oláami pagótami,

ayénachó Binói ne galá nami mapalí aboni tániga ra'ícha Binói yuwa, chopi echi Walubela Riosi we sayera echi jaré mapu chati sitíi olako.

¹³ Alí a 'yémitamo chopi wabé galabé olásagá, echalí ke wesi omérama 'yemi mi ne sinibí risúu olayá.

¹⁴ Chopi átamo risúu olárami níisagá mapujítitamo galabé wachínaga ologá piré, arigátamo wabé kaníliami níibo. Ke wesi majasi, nirapé majajasi. ¹⁵ Chopi echo'ná 'yemi sulálachi niráa, sinibí waminabi galá bichíisi Jesucristo mapurigá ne Wabé Walubela niráa. Alí sinibí galá kariwesa muchisi mapurigátamo galá ruwigá binérabo echi auché jaré mapu ikí 'yemi mi rukué mapu píritamo galá bichíi. Chopi galá níima máputamo kilíi niráa, wabé galigá ku ruyebo. ¹⁶ Sinibí galabé ologá pirélasa, mapurigátamo echijiti wabé kaníliami sulélabo. Alí wabé riwélama echi auché jaré mapu 'yemi mi chopi sití oláami ané, mapalítamo arigá wabé galabé olá, mapurigá Jesucristo bichíiyami niráa. ¹⁷ Átamo chati sitíi olásagá 'yémitamo risúu olárami níibo mapujítitamo ne bichíwali echijiti kastigo 'yárami níibo; chopi ketasi galá níima máputamo echirigá chati sitíi olabo. Waminabi galá níima máputamo risúu olárami níibo mapujítitamo galabé chopi olá, a Riosi echirigá nakisáagá.

¹⁸ Mapujiti echi Walubela Jesucristo Binói ayénachó ne wabé risúu olárami níili mapalí Binói waminá mi'lirúami níili ne si'néami tamujé chati sitíi olalila jiti. Alí echi Walubela Jesucristo ne wabé galabé wachínaga oláami níili, chopi Binói echirigá mukuli tamujé tamí jiti, máputa chati sitíi oláami ju, mapurigá Binói echijiti galá omérama tamujé tamí ku toyá mapo'ná echi Walubela Riosi atí. Echalí Binói ne bichíwali mukúami níili, chopi auchecho ku bitéali Iwigá niráa.

¹⁹ Echalí Binói mapurigá Iwigá niráa simigá nawésali ne si'néami echi jaré suwíami iwigala mapu pachá mo'warami niráa tibútarami níili. ²⁰ Mapujiti chabé ki'yá je'ná jaré ketasi galá nijéwali Riosi, echalí mapalí echi Noé riwéami rijói bitéali. Echalí Riosi kilí niráa buweli mapuyénasí echi Noé sunili niwayá echi walú

kalí ba'wechi moba iyénami, arka anilíwami, mapujiti Riosi nakili mapurigá ne si'néami pagótami galá bichíi-ma. Alí echalí chopi osá nawó pagótami galá bichíiga mo'wili echo'ná pachá árkachi mapurigá aboni echo'ná galá ku'wíratami níima, mapurigá aboni ketasi suwimea mapalí ripabé buchili ba'wí jena'í wichimóbachí. ²¹ Jipi rawé mapalita ba'wí jiti pagótami ju, echalí tamujeta achigórigá ku'wíratami ju mapurigá aboni ku'wíratami níili, mapujiti mapalita ba'wí jiti pagótami ju, echalí tamujeta galá 'nera echi auché jaré pagótami mapurigata bachá niráa ma ku wikawárami níili, mapurigata ma ketasi kastigo 'yárami níibo. Mapujítita ma galá bichíili mapurigá echi Walubela Jesucristo ma ku owínali mapalí Binói waminá mi'lirúami níili tamujé chati sitíi olalila jiti. Alí tamujeta ketasi ku wikawárami ju chopi mapujiti tamujé sapala pabákarami niráa níili echo'ná ba'wírali mapalita ba'wí jiti pagótami níili, chópita galá ku wikawárami ju mapalita echirigá ba'wí jiti pagótami ju, mapujítita ma tánali Riosi mapurigá Binói ku bi'wama mapurigata chati sitíi olali. ²² Alí Jesucristo ku simili echo'ná ripá riwigachi mapo'ná Riosi yuwa echo'ná watonachi atí. Alí Jesucristo ne Walubela ju si'néami echi jaré o'wéala Riosi kapitánawala yuwa, ayénachó Binói ne Walubela ju si'néami echi auché jaré o'wéala yuwa. Alí ne si'néami echi jaré o'wéala galá nijéwami ju echi Walubela Jesucristo.

Galá níima ibili niráa arigá galá nochasa mapurigá Riosi Binói omératali ibili mapurigá nochama

4 Alí mapujiti Jesucristo echirigá risúu olárami níili, ayénachó galá níima mapu ibili 'yemi galá bichíiyami arigá waminabi nokuísabo galá bichíisiya, mapalítamo siné káachi wabé risúu olárami níibo mapujítitamo echirigá bichíi. Mapujiti echi jaré mapu ikí wabé risúu olárami níili, mapujiti aboni bichíili Jesucristo niráa, abóniko ma ketasi nakimea chati sitíi olánala, ² nibilé cho nakimea chuwé ologá pirélanala mapurigá aboni chopi olánali; chopi jipi jonsa aboni galabé ologá pirélama mapurigá Riosi nakí. ³ Mapujiti chabénala 'yémitamo wi'libé rawé chuwé ologá piréali mapurigá we nakí olánala echi auché jaré pagótami, si'néami mapu ikí ketasi cho machí Riosi. Echalí chabénala 'yémitamo we chuwé olali mapurigá 'yemi aboni chopi nakili olánala. Echalítamo wabé tékali, mapalítamo napawika buchuwí anigá walú bajili suguí, ayénachó mapalítamo omáwali. Alí bichétamo chopi o'wikeli echi jaré amachíkalawami namuti, mapu Riosi 'yemi mi aneli máputamo ketasi o'wikebo. ⁴ Jipi rawé echi auché jaré echirigá oláami wabé charigá 'nata mapujiti 'yémitamo ma ketasi 'yena aboni yuwa mapalí aboni echirigá chati sitíi chuwé olayá. Echijiti aboni wabé sitíi chati ra'ícha 'yemi sayéraga. ⁵ Alí arigá 'wérali ju mapu

aboni ku ruyema echi Walubela Jesucristo mapu churigá aboni olali. Alí Jesucristo wilárami ju mapurigá binói justicia olama echi jaré abijí piréami yuwa, ayénachó echi auché jaré ma suwíami yuwa. ⁶ Mapujiti echi jaré pagótami mapu ma suwíami ju, arigá nawésarami níili Riosi Ra'íchala, mapurigá aboni aliwala sinibí pirélama mapurigá Riosi Binói sinibí bité. Chopi mapalí aboni abijí piréali jena'í wichimóbachi, echalí aboni arigá justicia olárami níili mapurigá si'néami echi auché jaré pagótami.

⁷ Ke 'me ayó suwibama suwaba namuti. Echijiti galabé 'nátami nílasí 'yemi. Sinibí tániga ra'ichási Riosi yuwa. ⁸ Arigá 'wérali ju máputamo a'nagupi ne wabé galebo, mapujiti átamo echirigá a'nagupi galésagá echalí 'yémitamo wisabé a'nagupi ku wikáwabo. ⁹ Echo'ná 'yemi pirélachi we kaníliga naresi echi jaré ritémtami mikabé jonsa síami, mapurigá aboni 'yemi mi yuwa chi'libama. ¹⁰ A'nagupi nagúurasi mapuyena Riosi 'yemi mi ibili 'yali mapurigátamo nagúurabo. Echirigá a'nagupi nagúurasi achigórigá mapurigá Riosi 'yemi mi wikanáami si'winárigá ku'wira. ¹¹ Alí a bilé 'yemi nawisásagá, galá níima échiko chopi nawisasa echi Galabé Riosi Ra'íchala. Alí a bilé 'yemi ku'wírasagá auché jaré, galá níima galabé niráa ku'wírasa mapurigá Riosi 'yemi mi jiwérata. Echirigá ne suwaba galá olasi mapurigá Riosi Binói waminabi walubéraga anérami níima, mapujiti Jesucristo ne wabé Walubela ju. Alí galá ju mapurigá Jesucristo sinibí niráa walubéraga anérami níima, ayénachó mapurigá Binói sinibí niráa suwaba omérami níima. ¡Echirigá níima!

Galá níima mapu echi jaré bichíyami galá anachama mapalí aboni risúu olárami ju

¹² 'Yemi keni ritémawa, ketasi majasi mapalítamo ne wabé risúu olárami ju, mapurigá chabénala niráa 'yémitamo ke siné riwali echirigá ikíachi. Echirigá chopi ikimea 'yemi mi yuwa mapurigá Riosi galá machimea mapu chuyena galá bichíyami ju 'yemi. ¹³ Chopi ne bachá niráa galá kanílasí mapujítitamo omero echirigá risúu olárami níliya, achigórigá mapurigá Jesucristo risúu olárami níili, mapurigátamo ayénachó ne wabé simírami kanílabo waminánomí, mapalítamo riwiboa Jesucristo ne wabé Walubela niráa ku nawáachi jena'í wichimóbachi. ¹⁴ Alí 'yémitamo wabé kaníliami níibo, a jaré pagótami 'yemi mi wabé sitila ra'íchasagá mapujítitamo bichíyami ju Jesucristo niráa, mapujiti echi Galabé Walubela Riosi Iwigala 'yemi mi yuwa mulubé atí. Echi jaré aboni wabé sitila ané echi Walubela Jesucristo, chopi 'yémiko ne wabé Walubela ané echi Binói. ¹⁵ Ke siné ko'wisí auché jaré, nibilé siné chigosi, nibilé chati sitíi olasi. Ketasi siné echomí así nílasí, auché jaré pagótami níwala ra'íchali katéwa, mapalítamo ketasi así risensia ju. Mapujiti a 'yémitamo echirigá olásagá,

echalítamo arigá risúu olárami níibo, chopi ketasi galá níima máputamo echirigá chati sitíi olabo.

¹⁶ Si'winárigá átamo risúu olárami níisagá chopi mapujítitamo bichíyami ju Jesucristo niráa, echalí ketasi riwélasi, chopi waminabi walubéraga anesi Riosi, mapujítitamo Jesucristo níwala ju.

¹⁷ Jipi ma mulubé seba mapalí echi jaré pagótami kastigo 'yárami níima. Alí jipi, ne chokichí niráa, tamujé máputa Riosi kúchuwala ju ayénachó ma péebi niráa kastigo 'yárami ju mapalita risúu olárami ju echi auché jaré jiti. Alí a tamujé echirigá péebi niráa kastigo 'yárami níisagá, pe waminánomí echi auché jaré ne wabé simírami kastigo 'yárami níima, si'néami mapu ikí ketasi nijéwiami ju Riosi Ra'íchala. ¹⁸ Alí a péeriko ku wikáwarami níisagá echi jaré galabé oláami pagótami, ¿churigá ikimea echi auché jaré wabé chati sitíi oláami yuwa? ¹⁹ Alí a Riosi echirigá nakiságá máputamo ne bichíwali risúu olárami níisagá mapujítitamo galá bichíi Binói niráa, galá níima mapu 'yémitamo waminabi olabo echi galabé oluwáwami. Ayénachó galá níima máputamo waminabi galá bichíiibo Riosi, echi mapu 'yemi mi niwáli; mapurigá Binói tibútama 'yemi aliwala, mapujiti Riosi sinibí ne wabé bichíwaga oláami ju.

Echi Pegro galá ruyé echi auché jaré bichíyami

5 Jipi 'yemi nimí je'ná jerigá ruyé, 'yemi máputamo jawárami níili o'wéala ochérami niráa, echo'ná echi jaréana napawika bichíyamichi mapo'ná 'yémitamo piré. Nijeni ayénachó wilárami níili mapurigá bilé walula ochérami niráa, ayénachóni nawesa jeanigá mapu nijeni riwali mapurigá Jesucristo wabé risúu olárami níili. Alí waminánomí mapalí echi Walubela Jesucristo abijí waminabi walubéraga anérami níima echo'ná ripá riwigachi, echalí nijeni ayénachó echo'ná Binói yuwa asimea, achigórigá mapurigá aboni ayénachó echo'ná Binói yuwa muchima. ² Galá nisérasí echi auché jaré Riosi níwala pagótami mapurigá bilé bo'wá niséami galá nisera binói pugula bo'wá, mapujiti Riosi Binói 'yemi mi nuleli tibúnala aboni. Ne galá kaníliga tibútasi echi jaré aboni mapurigá Riosi nakí. Ketasi chopi echirigá tibútasi mapurigá 'wérali nulérami niráa, nibilé cho nakigá máputamo natétarami níibo, chopi sinibí wabé kaníliga nochasi suwaba Riosi nóchala olayá. ³ Chopi ketasi ne wabé jiwériga nulesi echi jaré mapu Riosi 'yemi mi nuleli echirigá tibúnala, ketasi mapurigá 'yemi aboni piónawala niráa. Chopi sinibí galabé olasi aboni yuwa, mapurigá aboni ayénachó nakimea galabé olánala mapurigá 'yémitamo olá. ⁴ Alí átamo echirigá oláami níisagá mapalí echi Walubela Jesucristo ku nawá, echalítamo 'yárami níibo jaré wabé galabé nijíwami, máputamo echijiti ne wabé o'wéalatami níibo, mapujiti Binói echi Walubela Bo'wá

Niséami ju. Alí echi mapu Riosi nijá ketasi waminá suwibama, ketasi mapurigá echi jaré sawá sitúlaga niwárami, mapuyiri koyela, mapu we yáati waminá wachiché.

⁵ Echirigá achigórigá 'yemi ri'malí bichíyami ne galá nijéwasi echi jaré o'wéala ochérami bichíyami. Alí galá níima mapu ne si'néami 'yemi napawika bichíyami a'nagupi nijéwama, ne wabé galá kilí ologá, mapujiti:

Riosi ne wabé sayera echi jaré wabé nóchami, chopi Binói galabé ologá ku'wira echi auché jaré mapu ikí ketasi nóchami ju.

⁶ Echijiti mapurigá kuchípala niráa nílasí bacháami Riosi yuwa, mapujiti Binói ne suwaba omériami ju. Alí waminánomí Riosi 'yemi mi o'wéalatama mapalí ma seba tétali. ⁷ Sinibí ariwesi mapurigá Riosi 'yemi mi tibútama. Ketasi ne wabé nílaga 'natasi karúmati jiti, mapujiti Riosi Binói 'yemi mi ku'wírama.

⁸ Sinibí wabé galabé 'nátami nílasí. Ne galá 'nagá 'yé-nasí, mapurigá echi riablo ketasi 'yemi mi 'yé-kama, mapujiti échiko 'yemi mi ne wabé sayera. Alí echi riablo we iyena mapurigá bilé wabé aparúami namuti, wabé rolóami, echi mapu we áa iyena mapu chigá mi'agá suwábama. ⁹ Sinibí ne galá bichíiga sayérasí echi riablo, mapujítitamo galá machí mapurigá echi auché jaré 'yemi ritémawala galá bichíyami, ne suníami jena'í wichimóbachí piréami, achigórigá risúu olárami ju echi riablo jiti. ¹⁰ Chopi pe waminana mapalí 'yémitamo ma pe téeli niráa risúu olárami níisa, echalí Riosi 'yemi mi ne sébali galabé niráa ku niwáma. Alí

bichétamo ne wabé galá bichíyami níibo. Alí Riosi sinibí 'yemi mi waminabi tibútama. Alí Riosi Binói ayénachó sinibí 'yemi mi wabé galigá ku'wírama. Ayénachó Binói tamujé tamí bayeli mapurigata sinibí niráa Binói yuwa muchibo echo'ná ripá riwigachi, echi Walubela Jesucristo yuwa. ¹¹ Echi Walubela Jesucristo sinibí niráa ne suwaba omériami ju. ¡Echirigá níima! Binói sinibí niráa waminabi walubéraga anérami níima. ¡Echirigá níima!

Echi Pegro ripora echi jaré ritémtami

¹² 'Yemi nimí je'ná jerigá pe okuáa niráa osé. Alí nijeni júuli echi Silibano riwéami rijimá je'ná oselí tórataga. Nijeni mayé mapu échiko ne galá bichíyami ju. Nijeni 'yemi mi je'ná jerigá ruyé: Mapu Riosi ne bichíwali 'yemi mi ne wabé galé. Je'ná jerigá ne bichíwali ju, mapujiti Riosi 'yemi mi ne wabé simírami, wabé galigá ku'wírali. Sinibí waminabi galá bichíisi, mapurigá Binói 'yemi mi waminabi galema.

¹³ Echi jaré napawika bichíyami jena'í Babilóniachi muchúami 'yemi mi ripora. Riosi ayénachó chapili aboni achigórigá mapurigá Binói 'yemi mi chapili. Echi Márkosi ayénachó 'yemi mi ripora. Binói mapurigá nijé ranala niráa ju. ¹⁴ A'nagupi ne wabé galigá ripórasi, ritémtami niráa.

Nijeni nakí mapurigá 'yémitamo ne wabé galá kilí ologá pirélabo, si'néami mapu ikítamo Jesucristo níwala ju. ¡Echirigá níima!

1 Juan

Ne suwaba Riosi nawésawala Jesucristo jiti ruáami ju

1 Nijeni 'yemi mi osé echi Walubela Jesucristo jiti rugá, Echi mapu bachá niráa sinibí bitéali ki'yá chokichí mapalí ne suwaba echi jaré namuti mapu ikí nirú ketasi cho niwárami níili. Nijé binói galá námali mapalí echi Walubela Jesucristo ra'íchali, ayénachó nijé binói galá 'néniga riwali Jesucristo, ayénachóni riwali mapurigá Binói galabé ologá bitéali, ayénachó nijé binói nóchali echi Walubela Jesucristo jiti. Alí ne suwaba Riosi nawésawala Jesucristo jiti rugá nawésami. Alí si'néami pagótami mapu ikí bichíiko Jesucristo niráa ne sinibí pirélama. ² Alí nijeni galá riwali je'ná Jesucristo mapu galá 'ya mapurigá echi pagótami sinibí niráa pirélama. Ayénachó nijeni nawésali Jesucristo jiti rugá, mapu Binói 'yemi mi 'yama máputamo sinibí niráa pirélabo. Ki'yá chokichí jonsa Jesucristo echi Onorúami yuwa asali, chopi chabé bukulí Binói nawali jena'í wichimóbachi. ³ Echirigá nijeni 'yemi mi ruyé suwaba mapu nijeni riwali, ayénachó suwaba mapu nijeni námali, mapurigá 'yémitamo galá bichíiga napawíkami níibo tamujé yuwa máputa ma galá bichíili Jesucristo niráa, mapujiti tamujeta ne bichíwali napawíkami ju Riosi Onorúami yuwa, ayénachóta napawíkami ju Jesucristo yuwa, echi mapu bilepi Riosi Ranala ju. ⁴ Echirigá nijeni 'yemi mi je'ná jerigá osé mapurigá 'yémitamo galá bichíiga, ne sébali kanílabo.

Riosi ne wabé Ratábami ju

⁵ Alí nijeni 'yemi mi je'ná jerigá nawésaga ruyé, mapurigá Jesucristo tamí binérali: Mapu Riosi ne wabé simírami Ratábami ju. Alí Binói sinibí ne galabé machiná oláami ju, mapujiti Riosi yuwa tarapé nirú rokowárali. ⁶ Alí a tamujeta jeanisáagá máputa galá bichíiga napawíkami ju Riosi yuwa, chopi ata sinepi niráa sinibí chati sitíi olásagá, mapurigá echo'ná rokowárali piréami olá, echalita chopi wabé 'yékaka ra'íchami ju, ayénachóta wabé 'yékaka oláami ju. ⁷ Chopi ata sinibí galabé olásagá mapurigá echo'ná galá rayénachi piréami niráa, mapurigá Riosi Binói galabé olá, ayénachó mapurigá Binói sinibí echo'ná galá rayénachi atí, echalita ne bichíwali a'nagupi napawíkami ju echi auché jaré galá bichíyami yuwa, ayénachó Jesucristo lalá tamujé tamí ku bi'wá ne suwaba mapurigata chati sitíi olali. Échiko bilepi Riosi Ranala ju.

⁸ Alí ata jeanisáagá máputa ma ke chirigá omero chati sitíi olayá, echalita aboni niráa wabé 'yeka, ayénachóta ketasi bichíwaga aní. ⁹ Chopi ata ku ruyésagá Riosi mapurigá tamujeta chati sitíi olali, echalí Binói tamujé tamí ku wikáwama tamujé chati sitíi olalila, ayénachó Binói tamujé tamí suwaba ku bi'wama mapurigata chati sitíi olali, mapujiti Riosi sinibí galabé wachínaga oláami ju. ¹⁰ Chopi ata jeanisáagá máputa ke siné chati sitíi olali, echalita wabé 'yékami niráa Riosi, ayénachóta ketasi ne galá bichíili Binói Ra'íchala.

Jesucristo ju ne Walubela Ra'íchami tamujé tamí jiti rugá

2 Keni kúchuwa, nijeni 'yemi mi je'ná jerigá osé mapurigátamo ke siné chati sitíi olabo. Chopi a bilé arigá chati sitíi olásagá, tamujeta níwa bilé Walubela nigúuraga Ra'íchami mapu echo'ná bacháami Onorúami yuwa ra'ícha, mapujiti tamujé tamí ku'wíranali. Échiko, echi Walubela Jesucristo ju, mapu sinibí galabé wachínaga olá. ² Jesucristo mi'lirúami níili mapalí Binói kastigo 'yárami níili tamujé chati sitíi olalila jiti. Echalí Binói echirigá mi'lirúami níili ne si'néami jena'í wichimóbachi piréami chati sitíi olalila jiti.

³ Alí ayena galá nijéwasagá Riosi nulalila, echalita galá machí máputa ma galá machí Riosi. ⁴ Chopi a bilé jeanisáagá: Nijeni galá machí Riosi, alí a binói ketasi galá nijéwasagá Riosi nulalila, échiko we ikaléami ju, ayénachó binói wabé 'yékaka olá. ⁵ Chopi echi jaré mapuyíripi galá nijéwaga olako mapurigá Riosi nulá, abóniko ne sébali galá galé Riosi. Alí bicheta echijiti galá machí máputa napawíkami ju Riosi yuwa. ⁶ Arigá 'wérali ju mapu si'néami mapu ikí aniko mapu aboni ma napawíkami ju Riosi yuwa, sinibí galabé ologá pirélama mapurigá Jesucristo galabé ologá bitéali.

Echi bukulíwami nulalíwami

⁷ 'Yemi keni ritémawa ne wabé galérami, nijeni ketasi 'yemi mi osé auché bilé si'nú nulalíwami, chopi je'ná jerigá mapuni 'yemi mi osé achigó yiri ju mapurigátamo nulérami níili chabé chokichí jonsa, mapalítamo bachá niráa galá bichíili. Alí je'ná nulalíwami, chabé chokichí jonsa nirúami, achigó yiri ju mapurigá echi Galabé Riosi Ra'íchala nawisálawami máputamo ma námali. ⁸ Chopi je'ná jerigá mapurigá nijeni 'yemi mi osé, arigá mapurigá auché bilé si'nú nulalíwami ju,

echi mapu Jesucristo yuwa ne bichíwali ju, ayénachó 'yemi yuwa ne bichíwali ju. Alí echi rokowárali ma simírasimi, mapujiti echi ne bichíwali rajáami ma galá rajá, mapujiti echi Galabé Riosi Ra'íchala ma nawisárami ju.

⁹ A bilé jeanisáagá mapu binói echo'ná galá rajáachi niráa, galabé ologá iyena, chopi a échiko arigá we kichísagá auché bilé rijimala galá bichíyami, échiko abijí echo'ná rokowárali niráa, wabé chati sitíi ologá iyena. ¹⁰ Chopi echi mapu galá galeko echi auché jaré binói ritémawala galá bichíyami, échiko echo'ná galá rajáachi niráa, galabé ologá bité. Alí biché a echirigá olásagá, échiko tarapé chati sitíi olírama auché jaré. ¹¹ Alí echi mapu we kichiko auché bilé binói rijimala galá bichíyami, échiko abijí chati sitíi ologá bité echo'ná rokowárali niráa, ayénachó chati sitíi ologá iyena echo'ná rokowárali. Alí échiko ketasi machí mapu kumi simí mapujiti binói ma ke machíliami niráa niwálati, mapujiti echo'ná rokowárali bité.

¹² Keni kúchuwa, nijeni 'yemi mi osé mapujiti Riosi ma 'yemi mi ku wikáwali mapurigátamo chati sitíi olali, mapujítitamo ma galá bichíili Jesucristo niráa. ¹³ 'Yemi 'wéntami, nijeni 'yemi mi osé mapujítitamo ma galá machili Echi mapu ma bitéami níili ki'yá chokichí, mapalí ke cho niwálati suwaba echi jaré namuti. 'Yemi témali, nijeni 'yemi mi osé mapujítitamo galá bichíiga ma omérali echi riablo.

'Yemi keni kúchuwa, nijeni 'yemi mi je'ná jerigá oseli mapujítitamo ma galá machili echi Onorúami. ¹⁴ 'Yemi 'wéntami, nijeni 'yemi mi je'ná jerigá oseli mapujítitamo ma galá machili Echi mapu ma bitéami níili ki'yá chokichí mapalí ke cho niwálati suwaba echi jaré namuti. 'Yemi témali, nijeni 'yemi mi je'ná jerigá oseli mapujítitamo jiwérami ju, ayénachó mapujítitamo ma galá bichíi Riosi Ra'íchala, ne sulachí niráa, ayénachó mapujítitamo ma galá bichíiga omérali echi riablo.

¹⁵ Ketasi galesi echi chati sitíi oluwáwami mapurigá jena'í wichimóbachí piréami we chati sitíi olá. Nibilé cho galesi jena'í wichimóbachí nirúami namuti. A bilé galésagá echi chati sitíi oluwáwami mapurigá jena'í wichimóbachí piréami we chati sitíi olá, échiko ketasi galá galé Riosi Onorúami, ¹⁶ mapujiti Riosi ketasi 'yali mapurigá jena'í wichimóbachí piréami echirigá chati sitíi olama. Jena'í wichimóbachí piréami pagótami we chati sitíi olá mapurigá aboni chopi nakí chati sitíi olánala, ayénachó aboni ne wabé korú echi jaré namuti mapu ikí aboni chopi wabé ba'yóraga nakí 'nénala. Ayénachó aboni chopi nakí ne wabé nóchaga pirélanala. ¹⁷ Alí je'ná kawí waminá suwibásimi. Alí suwaba mapu ikí jena'í wichimóbachí piréami chati sitíi oláami pagótami nakí olánala, ayénachó waminá suwibásimi, chopi echi auché jaré pagótami mapu ikí olako mapurigá Riosi nakí, abóniko sinibí niráa pirélama.

Riosi Ra'íchala ne bichíwali ju chopi jaré pagótami wabé 'yékami ju

¹⁸ Keni kúchuwa, ma ne jubá rawé ju. 'Yémitamo ma námali mapurigá jena'í wichimóbachí nolínama bilé walula mapu wabé sayérami ju, echi Walubela Jesucristo sayéraga. Jípita galá machí mapu ma ne jubá rawé ju, mapujiti wikabé ma sili mapu wabé sayérami ju Jesucristo sayéraga. ¹⁹ Echi jaré aboni ma ku ariwesa, waminá simíbali tamujé napawika bichíyamichi jonsa. Chopi aboni ketasi ne bichíwali galá bichíyami níili mapurigá tamujeta galá bichíi, mapujiti a aboni ne bichíwali galá bichíyami níisagá, echalí aboni arigá tamujé tamí yuwa tibímili jipi yénasi, chopi aboni echirigá ku ariwesa ma ku simíbali, mapurigá ne galá riwirúami níima mapu jaré wikabé ketasi achigórigá bichíyami ju mapurigá tamujeta galá bichíi.

²⁰ Chopi echi Walubela Jesucristo 'yemi mi 'yali echi Wabé Galabé Riosi Iwigala, alí si'néami 'yemi galá machíami ju. ²¹ Ne bichíwali ju mapu 'yémitamo ma galá machí echi ne Bichíwali. Jipi nijeni 'yemi mi osé mapujítitamo echirigá galá machí echi ne Bichíwali.

²² ¿Chigá ju echi ne wabé 'yékami? Ne si'néami wabé 'yékami ju mapu ikí aniko mapu echi Jesusi riwéami Rijói mapu echo'ná Nasarétachi bitéami níili ketasi ju Jesucristo echi mapu bilepi ju Riosi Ranala. Alí si'néami echirigá aníami pagótami ne wabé sayera echi Walubela Jesucristo. Abóniko aní mapu Riosi ketasi Jesucristo Onolá ju, ayénachó aboni aní mapu Jesucristo ketasi bilepi ju Riosi Ranala. ²³ Ne si'néami echi jaré mapu ikí aniko mapu Jesucristo ketasi echi Bilepi Riosi Ranala ju, abóniko ketasi cho Riosi tanala niráa ju. Chopi si'néami echi jaré mapu ikí aniko mapu aboni galá bichíi echi Bilepi Riosi Ranala, abóniko ma Riosi tanala niráa ju.

²⁴ Echijiti ne sulachí niráa waminabi galá bichíisi echi Galabé Riosi Ra'íchala, mapurigátamo nawésarami níili chabé chokichí jonsa, mapalí jonsa 'yémitamo galá bichíili. Alí átamo ne bichíwali galá bichíisagá, ne sulachí niráa, mapurigátamo nawésarami níili chabé chokichí jonsa, alí bichétamo sinibí napawíkami níibo echi bilepi Riosi Ranala yuwa, ayénachó echi Walubela Riosi Onorúami yuwa. ²⁵ Echi Walubela Jesucristo ne bichíwaga anili mapu tamujé tamí 'yama mapurigata ne sinibí niráa pirélabo.

²⁶ Nijeni 'yemi mi je'ná jerigá oseli, echi auché jaré jiti rugá, si'néami mapu ikí 'yemi mi wabé 'yékaka binera. ²⁷ Alí 'yemi bichíyami ma níwa echi Wabé Galabé Riosi Iwigala echo'ná pachana 'yemi sulálachi, mapurigá Jesucristo ma 'yemi mi 'yali. Echijiti ketasi 'wérali ju mapu auché jaré 'yemi mi binérama, mapujiti echi Wabé Galabé Riosi Iwigala Binói 'yemi mi binera ne suwaba. Alí biché mapurigá echi Wabé Galabé Riosi Iwigala 'ye-

mi mi binera ne bichíwali ju, alí tarapé 'yékami ju. Echirigá waminabi nokuísi napawika niráa pirélasiya echi Walubela Jesucristo yuwa, mapurigá echi Wabé Galabé Riosi Iwigala 'yemi mi binera.

²⁸ Jipi 'yemi keni kúchuwa sinibí echirigá napawíkami níisi Jesucristo yuwa, mapurigá waminánomí mapalí Binói ku nolínama, echalí tamujé ibili ketasi majabo, nibilé chota riwélabo, mapalita bacháami Binói yuwa jábabo. ²⁹ Alí mapujiti 'yémitamo ma galá machí mapu echi Walubela Jesucristo ne galá wachínaga oláami ju, galá níima máputamo ayénachó machiboa mapu ne si'néami echi jaré pagótami mapu ikí ne bichíwali galá wachínaga olako, ne si'néami ma Riosi kúchuwala ju.

Echi jaré Riosi kúchuwala

3 Ne galá machísí mapu chuyena tamujé tamí ne wabé simírami galé Riosi Onorúami. Alí mapujiti Binói tamujé tamí echirigá galé, echijítita Binói kúchuwala niráa anérami ju, ayénachóta ne bichíwali Binói kúchuwala ju. Alí echi auché jaré ke bichíyami pagótami jena'í wichimóbachi piréami ketasi tamujé tamí machí, mapurigá Riosi kúchuwala niráa, mapujiti aboni ketasi cho machili Riosi Binói. ² 'Yemi keni ritémawa wabé galérami, mata Riosi kúchuwala ju, chópita ketasi cho galá machíralati mapu chu yírta níibo waminánomí, chópita galá machí mapu echalí mapalí Jesucristo ku nolínama, tamujeta achigó yiri níibo mapurigá Binói ju, mapujítita riwiboa Jesucristo mapurigá Binói ju. ³ Alí ne si'néami mapu ikí je'ná jerigá bichíiga buweko mapurigá echi Walubela Jesucristo echirigá ku'wírama, abóniko ketasi waminabi chati sitíi ologá piré, achigórigá mapurigá Jesucristo Binói ke siné chati sitíi olá.

⁴ Chopi ne si'néami echi jaré mapu ikí chati sitíi olako, abóniko ketasi nijewa Riosi nulalila, mapujiti mapalí echi pagótami chati sitíi olako, echalí aboni ketasi nijéwami ju Riosi nulalila. ⁵ Echi Walubela Jesucristo nawali; jena'í wichimóbachi mapurigá Binói tamujé tamí ku 'yema tamujé chati sitíi olalila. Alí Jesucristo tarapé chati sitíi oláami ju. ⁶ Echirigá biché ne si'néami echi jaré mapu ikí Jesucristo yuwa napawíkami ju, abóniko ketasi waminabi chati sitíi ologá piré; chopi si'néami echi auché jaré mapuyíripi chati sitíi ologá pireko, abóniko ke siné riwali, nirapé siné machili echi Walubela Jesucristo. ⁷ Keni kúchuwa, ketasi ariwesi mapurigá auché jaré 'yemi mi 'yékama. Ne si'néami echi jaré pagótami mapu ikí galabé ologá pireko, abóniko chopi galabé oláami ju, achigórigá mapurigá Jesucristo galabé oláami ju. ⁸ Alí echi jaré pagótami mapu ikí chati sitíi ologá pireko, abóniko chopi echi riablo níwala ju, mapujiti echi riablo sinibí we chati sitíi olá, ki'yá chokichí jonsa. Echijiti echi

Walubela Riosi Ranala nawali jena'í wichimóbachi, mapurigá suwaba suwábama echi riablo olalila.

⁹ Alí ke wesi echi jaré Riosi kúchuwala waminabi chati sitíi ologá piré, mapujiti Riosi ma 'yali mapurigá aboni sinibí niráa piréami níima, alí aboni ketasi omérama waminabi chati sitíi ologá piréliya, mapujiti aboni ma Riosi tanala niráa ju. ¹⁰ Ne galá machiwáwami ju mapu chigá ju echi jaré Riosi kúchuwala, ayénachó mapu chigá ju echi riablo kúchuwala, mapujiti si'néami mapu ikí ketasi galabé wachínaga olako, abóniko ketasi Riosi níwala ju. Ayénachó echi jaré mapu ikí ketasi galeko echi auché jaré aboni ritémawala, abóniko ketasi Riosi níwala ju. ¹¹ Mapujiti je'ná ju echi nawisálawami máputa námali ne chokichí jonsa: Máputa sinibí ne wabé galebo a'nagupi.

Galá galesi a'nagupi

¹² Chopi ketasi galá níima máputa wabé chati sitíi olabo mapurigá echi Kaini riwéami rijói olali. Échiko echi riablo níwala níili, alí waminá mi'yali binói rijimala. ¿Churékula waminá mi'yali? Echi Kaini waminá mi'yali binói rijimala mapujiti echi binói Kaini olalila wabé chati níili, chopi binói rijimala olalila galabé níili.

¹³ 'Yemi keni ritémawa, ketasi ne chati níilaga majasi, a echi auché jaré ke bichíyami pagótami 'yemi mi wabé kichísagá. ¹⁴ Chabénala mapalita chati sitíi ologá piréali tamujeta mapurigá suwíami niráa níili, chopi jipi tamujé galá machí máputa bukulíwami niráa ku piré, mapujiti tamujeta ma galá galé echi auché jaré tamujé ritémawala, galá bichíyami. Echi jaré mapu ketasi galeko echi auché jaré aboni ritémawala abóniko abijí mapurigá suwíami niráa ju. ¹⁵ Ne si'néami echi jaré mapu ikí kichiko auché jaré aboni ritémawala, abóniko we nakówami ju. Alí 'yémitamo galá machí mapu echi jaré mapu ikí nakówami juko, ke wesi sinibí piréami ju. ¹⁶ Tamujeta galá machí mapu chu yena galá níima máputa ne wabé simírami galebo echi auché jaré pagótami; mapujítita ma galá machí mapurigá Jesucristo a Binói niráa nijali mapurigá waminá mi'lirúami níima tamujé chati sitíi olalila jiti, mapujiti Binói tamujé tamí ne wabé simírami galeli. Alí echirigá ayénachó wabé galá níima mapurigá tamujeta ne wabé simírami galebo echi auché jaré tamujé ritémawala, mapalí siné káachi arigá 'wérali níimilé máputa waminabi ku'wíruami níibo, ata echirigá ne wabé simírami galésagá. ¹⁷ Alí a bilé rijói ne sébali níwasagá echi jaré namuti mapuyénasí binói galá omero kaníliga bitélasia, chopi a binói riwisáagá auché bilé wabé risúwati rijimala mapu tarapé te mapu binói níilaga bitélama, alí a echi we níwami rijimala ketasi natimaga 'yásagá mapu ikí we newalé echi auché bilé, ¿churigá bichíwali níima mapu echi we níwami rijói galá galé Riosi, ne sulachí niráa? ¹⁸ 'Yemi keni kúchuwa, ketasi ne

séballi ju máputa chopi ra'íchaga aniboa máputa wabé galé echi auché jaré pagótami. Chopi arigá 'wérali ju máputa ne bichíwali, ne sulachí niráa galebo aboni, ayénachó máputa wabé galigá ku'wírabo echi jaré aboni.

Echi jaré galá bichíyami ketasi majama Riosi

¹⁹ Alí ata echirigá olásagá, tamujeta galá machiboa mapu Riosi ne bichíwali ju, ayénachóta machiboa mapu tamujeta Binói kúchuwala ju. Echálita ketasi majabo Riosi mapalita arigá galá machí mapu Binói sinibí tamujé tamí ritiwá. ²⁰ Chopi a tamujé aboni we o'mónami nísagá, tamujé sulálachi niráa, mapujítita auché siné chati sitíi olali, echalí Riosi Binói abijí waminabi wabé simírami tamujé tamí wi'nijí, mapujiti Binói ne galá machí suwaba máputa chati sitíi olali, mapujiti Riosi machí ne suwaba namuti, chopi tamujeta ketasi machí ne suwaba namuti. ²¹ Echirigá biché, 'yemi ritémtami ne wabé galérami, ketasi biyiri chati sitíi olásagá, mapurigata echijiti o'monáratami níibo, echálita ketasi majabo Riosi. ²² Ayénachó Riosi tamujé tamí 'ya suwaba mapu ikita táni, mapujiti tamujeta echirigá ne galá nijewa Binói nulalila, ayénachóta olá mapurigá Binói nakí máputa olabo. ²³ Alí Riosi nulalila je'ná ju: Máputa galá bichíibo Jesucristo niráa, echi mapu bilepi Riosi Ranala ju; ayénachó máputa a'nagupi galebo mapurigá Jesucristo tamujé tamí nuleli. ²⁴ Alí si'néami mapu ikí galá nijewa Riosi nulalila, abóniko napawika piré Riosi yuwa, ayénachó Riosi pachana aboni yuwa bité. Alí tamujeta galá machí mapu Riosi pachana tamujé tamí yuwa bité, mapujiti Binói ma tamujé tamí 'yali echi Wabé Galabé Riosi Iwigala pachana tamujé sulálachi bitéranala.

Echi Wabé Galabé Riosi Iwigala ayénachó echi wabé chati si'nú iwigá mapu ne wabé sayérami ju Jesucristo

⁴ 'Yemi ritémtami ne wabé galérami, ketasi bichíisi ne si'néami echi jaré mapu ikí aniko mapu Riosi júuli aboni nawisánala, chopi ne galá machísí ibili aboni, acha aboni ne bichíwali níwa echi Wabé Galabé Riosi Iwigala, mapujiti ne buchuwíami jena'í wichimóbachí 'yena wikabé ne wabé 'yékami nawésami, jeanigá mapu Riosi Binói júuli aboni echirigá nawisánala. ² Alí je'ná jiti 'yémitamo galá omérabo machiyá echi jaré mapu ikí ma níwa echi Galabé Riosi Iwigala: Ne si'néami echi jaré mapu ikí galá bichíiga nawesa jeanigá mapu Jesucristo, echi Walubela Riosi Ranala, ne bichíwali nawali jena'í wichimóbachí mapurigá bilé rijói niráa, abóniko ayena níwa echi Wabé Galabé Riosi Iwigala. ³ Alí si'néami pagótami mapu ikí ketasi aniko mapu Jesucristo ne bichíwali nawali jena'í wichimóbachí mapurigá bilé rijói niráa, abóniko ketasi níwa echi Wabé Galabé Riosi Iwigala, si'winárigá aboni

chopi níwa echi we chati si'nú iwigá mapu wabé sayérami ju echi Walubela Jesucristo. Alí 'yémitamo ma galá námali mapu echi wabé sayérami iwigá nolínama riwéali jena'í wichimóbachí, chopi jipi échiko ma jena'í wichimóbachí iyena.

⁴ Keni kúchuwa, 'yémitamo ma Riosi níwala ju, alí bichétamo ma omérali echi auché jaré wabé 'yékami nawésami, mapujiti echi Wabé Galabé Riosi Iwigala mapu pachana 'yemi yuwa atí, échiko ne wabé simírami Walubela ju, ketasi mapurigá echi wabé chati si'nú iwigá mapu pachana echi auché jaré jena'í wichimóbachí piréami pagótami yuwa atí, si'néami mapu ikí ke galá bichíyami ju. ⁵ Echi jaré 'yékala nawésami chopi jena'í wichimóbachí piréami ju. Echijiti aboni we ra'ícha jena'í wichimóbachí nirúami namuti jiti rugá, alí echi auché jaré jena'í wichimóbachí piréami ke bichíyami pagótami ne wabé kanlíga kipunú. ⁶ Chopi tamujé Riosi níwala juta. Alí ne si'néami pagótami mapu ikí galá machiko Riosi, abóniko galá kipunú mapalita nawesa Riosi Ra'íchala. Chopi echi auché jaré mapu ikí ketasi Riosi níwala juko, abóniko ketasi kipunú mapalita nawesa Riosi Ra'íchala. Alí je'ná jítita galá omérabo machiyá mapu chigá níwa echi Wabé Bichíwali Galabé Riosi Iwigala, ayénachó mapu chigá chopi níwa echi wabé 'yékami si'nú iwigá.

Riosi ne wabé galéami ju

⁷ 'Yemi keni ritémawa, ne wabé galérami, galá níima máputa a'nagupi ne wabé galebo, mapujiti Riosi Binói tamujé tamí 'ya máputa ne wabé galéami níibo. Alí ne si'néami pagótami mapu ikí wabé galéami juko, aboni ma Riosi kúchuwala niráa ju, ayénachó aboni galá machí Riosi. ⁸ Si'néami echi jaré mapu ikí ketasi galéami juko, aboni ketasi cho galá machili Riosi, mapujiti Riosi ne wabé galéami ju. ⁹ Alí Riosi ma tamujé tamí machírali mapurigá Binói tamujé tamí ne wabé simírami galeli; mapujiti Riosi júuli echi Bilepi Binói Ranala jena'í wichimóbachí, mapurigata ne sinibí niráa pirélabo, ata galá bichíisagá mapu Binói mukuli tamujé chati sitíi olalila jiti. ¹⁰ Echi galelíwami je'ná jerigá ju: Mapu Riosi Binói bachá niráa tamujé tamí ne wabé galeli, ayénachó mapu Binói júuli echi Bilepi Binói Ranala jena'í wichimóbachí mapurigá Échiko waminá mi'lirúami níima tamujé chati sitíi olalila jiti. Chopi tamujeta ketasi ne bachá niráa galeli Riosi.

¹¹ 'Yemi ritémtami, ne wabé galérami, ne bichíwali ju mapu Riosi echirigá tamujé tamí ne wabé galeli; echijiti galá níima mapu tamujeta ayénachó wabé galebo a'nagupi. ¹² Ke wesi nirapé siné riwali Riosi; chopi ata a'nagupi galésagá, echalí Riosi pachana tamujé tamí yuwa bité, ayénachóta ne séballi galé Riosi. ¹³ Alí je'ná jiti tamujeta galá machí máputa napawika piré Riosi yuwa, ayénachó mapu Riosi pachana tamujé tamí

yuwa bité: Mapujiti Riosi ma tamujé tamí 'yali echi wabé galabé Binói Iwigala. ¹⁴ Alí tamujé aboni ma galá riwali, ayénachóta nawésaga ruyé echi auché jaré pagótami mapu Riosi Onorúami júuli echi bilepi Kepu Raná, mapurigá jena'í wichimóbachí piréami pagótami ku wikawárami níima mapurigá aboni chati sitíi olali. ¹⁵ Alí mapuyíripi galá bichíiga aniko mapu Jesucristo echi bilepi Riosi Ranala ju, Riosi sinibí pachana aboni yuwa bité, alí aboni sinibí napawika Riosi yuwa piré.

¹⁶ Tamujeta ma galá machí mapu chuyena Riosi tamujé tamí galé, mapujiti chabé jonsa tamujeta galá machigá bichíili mapurigá Binói echirigá tamujé tamí ne wabé galé. Echi Walubela Riosi ne wabé galéami ju. Alí ne si'néami mapu ikí galá galigá pireko, abóniko napawika Riosi yuwa piré, ayénachó Riosi Binói pachana aboni yuwa bité. ¹⁷ Je'ná jiti tamujeta ma ne sébali galá galé Riosi, mapurigata tarapé majáami níibo echalí ne jubá wi'nijíwachi rawé, mapujiti tamujé galá bichíyami jena'í wichimóbachí piréami wabé galéami ju, achigórigá mapurigá Jesucristo Binói ne wabé galéami ju. ¹⁸ Alí echi jaré pagótami mapu ikí wabé galeko Riosi, abóniko tarapé majáami ju, mapujiti mapalí echi pagótami ne sébali wabé galé Riosi, echalí aboni ketasi waminabi majama, mapujiti aboni chopi bichíima mapu Riosi sinibí wabé galigá ku'wírama aboni. Alí echi jaré mapu ikí wabé majáami juko, abóniko chopi echirigá majawá, mayega mapu aboni kastigo 'yárami níima. Echijiti si'néami mapu ikí majáami juko, abóniko ketasi ne sébali galé Riosi.

¹⁹ Alí tamujeta we galá galé Riosi, mapujiti Binói bachá niráa tamujé tamí ne wabé galeli. ²⁰ Chopi a bilé jeanisáagá: Nijeni wabé galé Riosi, chopi echalí arigá wabé kichísagá auché bilé rijimala, galá bichíyami, échiko arigá ne wabé 'yékami ju. Mapujiti a bilé ketasi galésagá binói rijimala mapu binói galá ritiwá, échiko ketasi omero galéa echi Walubela Riosi mapu binói ke siné riwali. ²¹ Alí Riosi ma tamujé tamí je'ná jerigá nuleli: Mapu ne si'néami mapu ikí galeko Riosi, ayénachó galema echi auché jaré ritémtami galá bichíyami.

Ketasi chati sitíi olabo, ketasi mapurigá echi auché jaré jena'í wichimóbachí piréami we chati olá

5 Si'néami echi jaré mapu ikí bichíiko mapu echi Jesusi riwéami Rijói mapu echo'ná Nasaréachi bitéami níili bilepi ju echi Walubela Riosi Ranala abóniko ma Riosi kúchuwala ju. Alí biché mapuyíripi galeko Riosi Onorúami, échiko ayénachó we galé echi jaré mapu ikí Riosi kúchuwala ju. ² Alí mapalita wabé galé Riosi, ayénachó mapalita galabé olá mapurigá Riosi nulá, echalita galá machí máputa ayénachó wabé galé echi auché jaré mapu ikí ma Riosi kúchuwala ju. ³ Mapujiti mapuyíripi pagótami galá galeko Riosi,

abóniko ayénachó galá nijéwaga olá mapurigá Riosi nulá. Alí ketasi wabé nóchali ju echirigá nijéwaga oluwawa. ⁴ Mapujiti si'néami echi jaré mapu ikí ma Riosi kúchuwala juko, abóniko galá nayura, mapujiti aboni ketasi achigórigá chati sitíi olá, ketasi mapurigá echi auché jaré jena'í wichimóbachí piréami olá. Alí bicheta chopi omero echirigá nayúria mapujítita galá bichíi Jesucristo niráa. ⁵ Mapujiti echi jaré mapu ikí bichíiko mapu echi Jesusi riwéami Rijói mapu echo'ná Nasaréachi bitéami níili ne bichíwali echi bilepi Riosi Ranala ju, abóniko chopi galá omero echirigá nayúria, mapurigá aboni ketasi chati sitíi olama, ketasi mapurigá echi auché jaré jena'í wichimóbachí piréami chati sitíi olá.

Jesucristo bilepi ju Riosi Ranala

⁶ Mapalí Jesucristo iyénali jena'í wichimóbachí, echalí bichíwaga nawésarami níili mapu Jesucristo bilepi ju Riosi Ranala. Jesucristo nawali echi ba'wí jiti, mapalí ba'wí jiti pagótami níili; ayénachó Binói nawali echi la jiti, mapalí wabé léntaga mi'lirúami níili echo'ná kúr-sichi. Echirigá Jesucristo bichíwali nawali echi ba'wí jiti, chopi ayénachó nawali echi la jiti. Alí echi Wabé Galabé Riosi Iwigala achigórigá bichíwaga nawesa Jesucristo jiti rugá. Alí echi Wabé Galabé Riosi Iwigala sinibí ne wabé bichíwali nawesa. ⁷ Echirigá ju mapu echo'ná ripá riwigachi bikiyá nirú mapu ne bichíwaga nawesa jeanigá mapu Jesucristo ne bichíwali bilepi Riosi Ranala ju: Echi Onorúami echirigá aní, ayénachó echi Galabé Riosi Ra'íchala echirigá aní, ayénachó echi Wabé Galabé Riosi Iwigala achigórigá aní. Alí je'ná bikiyá arigá Bilepi niráa ju. ⁸ Alí mapalí Jesucristo bitéali jena'í wichimóbachí, echalí baisá chokéami ne bichíwali nawésarami níili jeanigá mapu Binói bilepi ju Riosi Ranala: Echi Wabé Galabé Riosi Iwigala sinibí echirigá aní; alí Riosi Onorúami echirigá anili mapalí Jesucristo ba'wí jiti pagótami níili; ayénachó Riosi Onorúami auché siné echirigá anili mapalí Jesucristo chapirúami níili mapurigá Binói wabé léntaga mi'lirúami níima echo'ná kúr-sichi. Echirigá baisá chokéami achigórigá ne bichíwali nawésarami níili jeanigá mapu Jesucristo bilepi ju Riosi Ranala. ⁹ Alí tamujeta sinibí galá bichíi mapalí auché jaré pagótami bichíwaga aní mapu bilé namuti ne bichíwali ju, echijiti waminabi 'wérali ju máputa galá bichíibo echi mapu Riosi ne bichíwaga aní, mapujiti Riosi bichíwaga aní mapu Jesucristo bilepi ju Binói Ranala. ¹⁰ Si'néami echi jaré mapu ikí bichíiko echi bilepi Riosi Ranala, abóniko galá machí, ne sulachí niráa, mapu Jesucristo ne bichíwali bilepi Riosi Ranala ju. Alí echi auché jaré mapu ikí ketasi bichíi Riosi, abóniko chopi wabé 'yékami niráa Riosi, mapujiti aboni ketásirapé bichíi mapurigá Riosi ne bichíwaga anili, Binói Ranala jiti rugá. ¹¹ Alí Riosi ma

je'ná jerigá anigá nawésali echi bilepi Binói Ranala jiti rugá: Mapu Riosi ma nijali máputa ne sinibí niráa pirélabo, ayénachó mapu echi bilepi Riosi Ranala ju mapu tamujé tamí 'ya je'ná sinibí pirélawami. ¹² Ne si'néami mapu ikí ma galá bichíga níwako echi bilepi Riosi Ranala echo'ná aboni sulálachi niráa, abóniko ayénachó ma níwa je'ná sinibí pirélawami. Chopi echi auché jaré mapu ikí ke níwako echi bilepi Riosi Ranala echo'ná aboni sulálachi niráa, abóniko ketasi níwa echi sinibí pirélawami.

Ne jubáami echi Juani galá ruyé echi jaré bichíyami

¹³ Nijeni 'yemi mi je'ná jerigá osé, 'yemi máputamo ma galá bichí echi bilepi Riosi Ranala niráa, mapurigátamo ne bichíwali machiboa máputamo ma sinibí piréami ju.

¹⁴ Alí tamujeta echirigá ne galá bichí Riosi, ayénachóta ne bichíwali mayé mapu ayénata tánsagá mapurigá Riosi olama bilé namuti, mapurigá Binói chopi nakí olánala, echalí Riosi galá kipukú mapurigata tániga ra'ícha. ¹⁵ Alí echirigá mapurigata galá machí mapu Riosi galá kipukú mapalita tániga ra'ícha Binói yuwa, ayénachóta galá machí mapu mata 'yárami ju echi jaré namuti mapu ikita tánali.

¹⁶ Alí a bilé rijimala riwisáagá mapu auché bilé rijimala we olá echi chati sitíi oluwáwami, chopi binói ketasi olá echi wabé simírami chati sitíi oluwáwami mapu arigá ke sayiná, we yáa mukuwáami ju, echalí galá níma mapu echi bacháala rijimala tániga ra'ichása Riosi yuwa, mapurigá Riosi ku wikáwama echi auché bilé ri-

jimala mapu chati sitíi olali. Chopi jaré arigá ne wabé simírami chati sitíi olá, alí aboni echijiti ke sayiná, we yáa suwimea. Nijeni ketasi aní mapu galá níma máputamo tánabo Riosi mapu echiyiri ku wikáwami níma. ¹⁷ Ne suwaba echi pagótami chati sitíi olalila ne wabé chati sitíi oluwáwami ju, chopi jaré chati sitíi oluwáwami ketasi we yáa, ke sayiná mukuwáami ju.

¹⁸ Galata machí mapu si'néami echi jaré mapu ikí ma Riosi kúchuwala juko, ma ketasi chati sitíi ologá piré, mapujiti echi Walubela Riosi Ranala tibuta aboni, alí echi riablo ketasi omérama olayá mapurigá aboni arigá chati sitíi olama.

¹⁹ Galata machí mapu tamujeta Riosi níwala ju, chopi ne si'néami echi auché jaré jena'í wichimóbachí piréami mapu ikí ke bichíyami juko, abóniko arigá waminá omératami ju echi riablo jiti.

²⁰ Alí bicheta ayénachó galá machí mapu echi Walubela Riosi Ranala ma nawali jena'í wichimóbachí. Alí Binói ma tamujé tamí 'yali mapurigata galá machiboa echi ne Bichíwali Walubela Riosi. Alí tamujeta napawika piré echi yuwa mapu ne Bichíwali ju. Echirigá aniwáami ju máputa napawika piré echi bilepi Riosi Ranala yuwa, echi mapu echi Walubela Jesucristo ju. Échiko echi ne Bichíwali Riosi ju, ayénachó Binói nijá mapurigá echi pagótami ne sinibí niráa pirélama.

²¹ 'Yemi keni kúchuwa, a aboni niráa ne galá tibútasi mapurigátamo ketasi bichíibo echi jaré amachíkalawami namuti mapu ketasi ne bichíwali Riosi ju. ¡Echirigá níma!

2 Juan

Juani osá echi ne Bichíwali jiti rugá, echi galelíwami jiti ayénachó

¹ Nijé mápuni ma ochérami ju, 'yemi mi osé 'yemi napawika bichíyami máputamo Riosi jiti chapirúami níli, ayénachóni osé si'néami echi auché jaré mapu ikí ma bichíili 'yemi nawésawala, mapujiti aboni mapurigá 'yemi kúchuwala niráa ju, mapu nijeni ne bichíwali wabé galé mapujiti si'néamita ma galá bichíili echi ne Bichíwali. Alí ne si'néami echi auché jaré ritémtami mapu ikí ma galá machili echi ne Bichíwali ayénachó 'yemi mi ne wabé galé. ² Nijeni 'yemi mi ne wabé galé mapujiti a'nawita galá bichíili echi ne Bichíwali, ne sulachí niráa. Alí je'ná ne Bichíwali ne sinibí niráa tamujé tamí yuwa níima. ³ Alí Riosi Onorúami, echi Walubela Jesucristo ayénachó, echi mapu bilepi ju Riosi Onorúami Ranala, sinibí 'yemi mi wabé ku'wírama, ayénachó 'yemi mi ne wabé natimaga 'yama máputamo galá kilí ologá pirélabo, ayénachó máputamo galá bichíibo echi ne Bichíwali, ayénachó máputamo ne wabé galéami níibo.

⁴ Nijeni ne wabé kaníili mapujítini riwali mapu jaré 'yemi napawika bichíyami galabé ologá piré mapurigá Riosi Onorúami tamujé tamí nuleli, mapurigá osirúami ju echo'ná Riosi Ra'íchala oselíwalachi, echi mapu ne Bichíwali ju. ⁵ Jipi, 'yemi ritémtami ne wabé galérami, nijeni 'yemi mi wabé táni mapu ne si'néami tamujé bichíyami a'nagupi ne wabé galebo. Alí je'ná jerigá mapu nijeni 'yemi mi nulegá osé, ketasi mapurigá auché bilé si'nú bukulíwami nulalíwami ju, mapujítita achigórigá nulérami níili chabé ne chokichí jonsa. ⁶ Alí ayénata galésagá Riosi, echalita galá nijéwaga olabo mapurigá Binói tamujé tamí nuleli. Alí 'yémitamo ma námali chabé chokichí jonsa mapurigá Riosi tamujé tamí nuleli máputa a'nagupi ne wabé galebo.

Echi jaré wabé 'yékami pagótami

⁷ Jipi jena'í wichimóbachí 'yena wikabé wabé 'yékami pagótami mapu ketasi bichíiga nawesa mapu Jesu-

cristo bilepi ju Riosi Ranala, ayénachó aboni ketasi bichíiga nawesa mapu echi bilepi Riosi Ranala arigá nawali jena'í wichimóbachí mapurigá bilé Rijói niráa. Si'néami echiyiri pagótami wabé 'yékami ju, ayénachó aboni ne wabé sayérami ju echi Walubela Jesucristo.

⁸ Chopi 'yemi bichíyami a aboni niráa ne galá tibútasi mapurigátamo sinibí niráa waminabi galá bichíisabotamo, mapurigátamo echirigá ologá ne sébali ku natétarami níibo echalí ne jubá rawé, suwaba máputamo galá bichíiga olali, echi Walubela Jesucristo nóchala olayá.

⁹ Alí mapuyíripi bichíisamiko auché si'nú nawisálawami mapu ketasi achigó yiri ju mapurigá Jesucristo tamujé tamí binérali, abóniko ketasi níwa Riosi. Chopi si'néami echi jaré mapu ikí bichíisamiko mapurigá Jesucristo tamujé tamí binérali, abóniko ayena níwa echi Onorúami, ayénachó aboni níwa echi Walubela Riosi Ranala. ¹⁰ Alí a bilé nawásagá echo'ná 'yemi pirélachi mapu ketasi achigórigá je'ná jerigá nawésami ju, ketasi nakiísi mapu binói 'yemi mi binérama, nibilé cho naripasi echiyiri. ¹¹ Mapujiti si'néami mapu ikí narépa-go echiyiri nawésami, abóniko echirigá ologá achigórigá chati sitíi oláami nílama, mapurigá echi 'yékaka nawésami niráa.

Juani nakili 'nénala echi jaré napawika bichíyami

¹² Abijí nirú wikabé ra'íchali mapu nijeni omérama 'yemi mi ruyée, chópini ketasi nakí mápuni oselichi chopi osogá echirigá ruyema, mapujiti nijeni nakí mápuni echo'ná 'yémi simea, mapurigani ne binói niráa 'yemi mi ra'íchama, mapurigá si'néamita a'nawí echirigá ne sébali kanílabo.

¹³ Jena'í piréami napawika bichíyami, mapu Riosi ayénachó chapili mapurigá Binói níwala niráa, si'néami 'yemi mi walú ripora. ¡Echirigá níima!

3 Juan

Echi Juani galabé ané echi Kayo

1 Nijé mápuni ma ochérami ju, nimí je'ná jerigá osé, mujé Kayo riwéami, mápumi ne wabé galabé nijé amígowala ju, mapu nijeni ne bichíwali mi ne wabé galé.

² Mujé ne wabé galérami rijimala, nijeni sinibí táni Riosi mapurigá Binói mi 'yama mapurigami sinibí ne suwaba jiti wabé galabé ologá bitélasama, ayénachó mapurigami sinibí waminabi kanílasama, achigórigá mapurigami sinibí waminabi galá bichísimi Jesucristo niráa. ³ Máani ne wabé kaníili mapujiti jaré ritémtami echo'ná jonsa simíbami ma tamí ruyeli mapurigá mujemi sinibí galá bichíi, mapujítimi sinibí ne galabé ologá bité, achigórigá mapurigami nawésarami níili echi ne Bichíwali Riosi Ra'íchala. ⁴ Alí nijeni sinibí echirigá ne wabé simírami kanila mapalini nami mapurigá echi jaré nijé kúchuwala ne wabé galabé ologá pirélasimi, mapurigá aboni nawésarami níili echi ne Bichíwali Riosi Ra'íchala.

⁵ Mujé ne wabé galérami rijimala, mujemi wabé galabé olá ne suwaba mapu ikimi olá, echi auché jaré ritémtami ku'wíriya. Alí ne bachá niráa mujemi sinibí ne wabé ku'wira echi jaré ritémtami, auché jaréana okuá simíbami. ⁶ Alí aboni ma galá nawésaga anili bacháami si'néami echi auché jaré napawika bichíyamichi yuwa, mapurigá mujemi echirigá ne wabé galigá olali. Galá níima mápumi echirigá ku'wírama echi auché jaré ritémtami, mikabé jonsa simíbami, mapurigá aboni wabé kaníliga ku simama echo'ná mapo'ná aboni nakí simánala, mapujiti Riosi Binói nakí mápumi echirigá ku'wírama. ⁷ Mapujiti aboni chopi 'yé-nali Jesucristo nóchala olayá. Alí aboni ketasi biyiri nareli mapu echi auché jaré pagótami nakili 'yánala, si'néami mapu ikí ketasi cho bichíi Riosi. ⁸ Echijiti arigá 'wérali ju mapu tamujeta ku'wíрабо echi jaré nawésami, mapurigá aboni kaníliga 'yénama echi ne Bichíwali Riosi Ra'íchala nawésiya.

Echi Riótreje wabé sayérali echi Juani

⁹ Chabénala nijeni oseli echi jaré napawika bichíyami, chopi echi Riótreje riwéami rijói ketasi nakili tamí ni-

jéwanala. Échiko chopi nakí mapurigá walula niráa nílanala echi auché jaré ritémtami yuwa. ¹⁰ Je'ná jiti mapalini echo'ná simea, nijeni galá ruyema ne si'néami mapurigá echi Riótreje wabé 'yéka, sitíragá ruyé auché jaré tamí sayéraga, ayénachó binói waminabi chati sitíi olá, mapujiti binói ketasi risensia 'ya mapu echo'ná binói bitélachi chi'libama echi auché jaré mikabé jonsa simíbami nawésami. Alí mapalí auché jaré ritémtami echo'ná piréami arigá nakí mapu echi jaré mikabé jonsa simíbami nawésami echo'ná aboni pirélachi chi'libama, echalí echi Riótreje ané mapu ketasi risensia ju, ayénachó ané mapu átamo arigá narésagá echi auché jaré mikabé jonsa simíbami nawésami echo'ná 'yemi pirélachi, echalí ma ketasi risensia níibotamo waminabi napawiya echi auché jaré napawika bichíyami yuwa.

¹¹ Mujé wabé galérami rijimala, Kayo riwéami, ketasi olá mapurigá echi Riótreje chati sitíi olá, chopi sinibí galabé olá mapurigá echi auché jaré galabé oláami niráa, mapujiti echi jaré mapu ikí galabé olako, abóniko Riosi níwala ju, chopi echi auché jaré mapu we chati sitíi olako, abóniko ke siné cho bichíili Riosi.

Echi Rimétrio galabé oláami níili

¹² Alí ne si'néami echi auché jaré ritémtami aní mapu echi Rimétrio wabé galabé oláami ju, ayénachó ne bichíwali ju mapu binói galabé olá. Nijeni ayénachó bichíwaga aní mapu échiko galabé oláami ju, alí biché 'yémitamo galá machí mapu nijeni sinibí ne bichíwaga aní.

Juani ripóraga osé echi Kayo

¹³ Nijeni níwa auché jaré wikabé ra'íchali, mapu nijeni nakí mi ruyénala, chopi ketásini nakí oselichi chopi osogá mi ruyénala, ¹⁴ mapujiti nijeni mayé mapu ke 'me ayó nijeni mi 'nema. Echalita a'nagupi ra'ichábo.

¹⁵ Sinibí galá kilí ologá biteli. Echi jaré tamujé amígowala jena'í piréami walú ripóraga nawala. Perikó, ibili niráa galá ripora echi jaré nijé amígowala echo'ná piréami.